

Namo tassa bhagavato arahato sammāsambuddhassa

Saṃyuttanikāye

Mahāvaggaṭikā

1. Maggasāyuttam

1. Avijjāvaggo

1-2. Avijjāsuttādivaṇṇanā

1-2. Pubbaṅgamāti pubbecarā. Avijjā hi aññāṇalakkhaṇā sammuyhanākārena ārammaṇe pavattatīti sampayuttadhammānampi tadākārānuvidhānatāya paccayo hoti. Tathā hi te aniccāsuhadukkhānattasabhāvepi dhamme niccādito gaṇhanti, ayamassā tesam sahaṅgātasena pubbaṅgamatā. Yaṃ pana mohena abhibhūto pāpakiriyāya ādīnaṃ apassanto pāṇaṃ hanati, adinnaṃ ādiyati, kāmesu micchā carati, musā bhaṇati, aññānampi vividhaṃ dussīlyam ācarati, ayamassa sahaṅgātasena ca upanissayavasena ca pubbaṅgamatā. **Samāpajjanāyāti** tabbhāvāpajjanāya akusalappattiyā. **Sabhāvapaṭilābhāyāti** attalābhāya. Tenāha “**uppattiyā**”ti. Sā panesā vuttākārena akusalānaṃ pubbaṅgamabhūtā avijjā uppajjatīti sambandho. **Yadetanti** yaṃ etaṃ pāpājigucchanatāya pāpato **alajjanākārasaṅgāhitam ahirikaṃ**, pāpānutrāsātāya **pāpato abhāyanākārasaṅgāhitāna anottappam, etaṃ** dvayaṃ **anudeva** anvāgatameva. **Anu-**saddena cettha **etanti** upayogavacanāṃ. **Anudevāti** etassa attho saheva ekatoti. Ettha avijjāya vuttanayānusārena tappaṭipakkhato ca attho veditabbo. Ayaṃ pana vireso – tattha yathā akusalakammāpathavasena pavattiyam pubbaṅgamatā avijjāya, evaṃ kusalakammāpathavasena puññakiriyavattuvasena ca pavattiyam vijjāya pubbaṅgamatā vattabbā. Vīmaṃsādhīpativasena pavattiyam ādhīpaccākārasena ca pubbaṅgamatā veditabbā. Dvīhevāti ca avadhāraṇam ādhīpaccākārassa sahaṅgāteneva saṅgahetabbato.

Lajjanākārasaṅgāhitāti pāpato jigucchanākārasaṅgāhitā. **Bhāyanākārasaṅgāhitanti** uttasanākārasaṅgāhitam. **Etthāti** hiriottappe. Vidati, vindatīti vā **vijjā**. **Viddasūti** ca sappaññāpariyāyoti āha “**viddasunoti viduno**”ti. **Yāthāvadiṭṭhīti** aviparītā diṭṭhi, saṃkilesato **niyyānikadiṭṭhi**. **Sammādiṭṭhi pahotīti** ettha sā vijjā sammādiṭṭhi veditabbā. **Na ekato sabbāni labbhanti** sammāvācākammantājīvanam pubbābhisaṅkhārassa anekarūpattā. **Lokuttaramaggakkhaṇe ekato labbhanti** kiccato bhinnānampi tāsam tattha sarūpato abhinnattā. Ekā eva hi virati maggakkhaṇe tissannampi viratīnam kiccaṃ sādhentī pavattati, yathā ekā eva sammādiṭṭhi pariṅānanādivasena catubbidhakiccaṃ sādhentī pavattati. Tāni ca kho sabbāni aṭṭhapi paṭhamajjhāniko magge labbhantīti yojanā. **Paṭhamajjhāniketi** paṭhamajjhānavante.

Tathābhūtassāti ariyamaggasamaṅgino. **Yasmā mahāsaṅgāyatanaṃ vuttam** “sammādiṭṭhiādīnaṃ pañcannaṃ eva aṅgānaṃ vasenā”ti, **tasmā pañcaṅgiko lokuttaramaggo hoti**. “Pubbeva kho panā”ti hi vacanaṃ tadā maggakkhaṇe viratīnam abhāvaṃ ñāpeti, tasmā kāmāvacaracittesu viya lokuttaracittesu virati aniyatāti adhippāyo. **Parisuddhabhāvadassananti** parisuddhasīlabhāvadassanattam. **Ayamatto dīpito**, na ariyamagge viratīnam abhāvo.

Yadi evaṃ kasmā abhidhamme maggavibhaṅge pañcaṅgikavāro āgatoti āha “**yampi abhidhamme**”tiādi. **Tanti** “pañcaṅgiko maggo hotī”ti vacanaṃ. “**Ekam kiccantaram dassetum vutta**”nti vatvā tam dassetum “**yasmīñhi kāle**”tiādi vuttam. **Yasmīñhi kāleti** lokiyakāle. Tena “**ekam kiccantara**”nti vuttam aṭṭhaṅgikakiccaṃ dasseti. Viratiuppādanena micchāvācādīni puggalena

maggasamaye pajahāpentīti sammādiṭṭhiādīni “pañca kārakaṅgānī”ti vuttāni. Sammāvācādikiriya hi virati, tañca etāni kārāpentīti. **Virativasenā**ti viramaṇakiriyaavasena kārāpakabhāvena, kattubhāvena vāti attho. “Viratittayavasenā”ti vā pāṭho.

Sammākammanto pūratīti imehi sammādiṭṭhiādīhi sammākammantakiccaṃ pūratī nāma tehi vīriyādikeyhi tadatthasiddhito. Tampi sandhāya “**ekaṃ kiccantaraṃ dassetu**”nti vuttaṃ. **Imaṃ kiccantaraṃ dassetu**nti lokuttaramaggakkhaṇepi imāneva pañca sammāvācādiviratittayassa ekakkhaṇe kārāpakaṅgānīti dassetuṃ. **Evaṃ vuttanti** “tasmim samaye pañcaṅgiko maggo hotī”ti (vibha. 494) evaṃ vuttaṃ. Lokiyamaggakkhaṇe pañceva honti, virati pana aniyatā, tasmā “chaṅgiko”ti avatvā “pañcaṅgiko”iceva vuttaṃ. Tayidaṃ abhidhamme pañcaṅgikavāradesanāya kārānakittanamaggo, ariyamaggo pana aṭṭhaṅgikovāti dassetuṃ, “**yā ca, bhikkhave**”tiādīmāha, taṃ suviññeyyameva. Micchādiṭṭhiādikā dasa, tappaccayā akusalā ca dasāti vīsati akusalapakkhiyā, sammādiṭṭhiādikā dasa, tappaccayā kusalā ca dasāti vīsati kusalapakkhiyā mahācattārīsakasutte vuttā. **Mahācattārīsakanti** tassettaṃ nāmaṃ. **Missakova kathito** lokuttarassapi idha labbhamānattā.

Yasmā kosalasaṃyuttepi idha ca therena “upaḍḍhamidaṃ, bhante, brahmacariyassā”tiādīnā vuttaṃ “mā hevaṃ ānandā”tiādīnā paṭikkhipivā “sakalamevidaṃ ānandā”tiādīnā bhagavatā desitaṃ suttaṃ āgataṃ. Tassattho kosalasaṃyuttavaṇṇanāyaṃ vutto, tasmā vuttaṃ “**kosalasaṃyutte vuttatthamevā**”ti.

Avijjāsuttādivaṇṇanā niṭṭhitā.

3. Sāriputtasuttavaṇṇanā

3. Sāvaka bodhi sāvaka pāramiyo, tappariyāpannaṃ nānaṃ sāvaka pāramiññaṃ, taṃ pana dvinnam aggasāvakaṇaṃ tatthapi dhammasenāpatino eva savisesaṃ matthakaṃ pattaṃ, na itaresanti āha – “**sāvaka...pe... appattatāyā**”ti. Tasmā tassa matthakappattiyā maggabrahmacariye ijjhante tassa ekadeso idha ijjhati, na sakalanti. Na hi addhabrahmacariyaṃ nāma atthi, tasmā vuttaṃ, “**sakalampi ... pe... labbhati**”ti, taṃ pana bhaṇḍāgāriko nāññasi nāñassa sāvaka visayepi sappadesikattā, dhammasenāpati pana nāñassa tattha nippadesikattā aññāsīti. Tenāha – “**ānandatthero...pe... aññāsī**”ti. **Evamāhāti** “sakalamidaṃ, bhante”ti evaṃ avoca.

Sāriputtasuttavaṇṇanā niṭṭhitā.

4. Jāṇussoṇi brāhmaṇasuttavaṇṇanā

4. **Valāvābhi**-saddo valāvāpariyāyoti āha “**catūhi valāvāhi yuttarathenā**”ti. **Yodharathoti** yodhehi yujjhanatthaṃ ārohitabbaratho. **Alaṅkāraratho** maṅgaladivasesu alaṅkatapaṭiyatthehi ārohitabbaratho. **Ghanadukulena parivāritoti** rajatapaṭṭavaṇṇena setadukulena paṭicchādito. Paṭicchādanattho hi idha parivārasaddo. **Rajatapanālisuparikkhattā** setabhāvakaraṇatthaṃ.

Channaṃ channaṃ māsānanti niddhāraṇe sāmivacanaṃ. **Ekavāraṃ nagaraṃ padakkhiṇaṃ karotī**ti idaṃ tasmim ṭhānantare ṭhitena kātappaṃ cārittaṃ. **Nagarato na pakkantā**ti nagarato bahi na gatā. Maṅgalavacane niyuttā **maṅgalikā**, suvatthivacane niyuttā **sovattikā**. **Ādi**-saddena thutimāgadhavandikācariyake saṅgaṇhāti. **Sukapattasadisāni** vaṇṇato.

Vaṇṇagīnti thutigītaṃ. Brahmabhūtaṃ seṭṭhabhūtaṃ yānaṃ, brahmabhūtaṃ seṭṭhabhūtaṃ yānanti vā **brahmayānaṃ**. **Vijitattā** visesena jinanato. **Rāgaṃ vinayamānā pariyosāpetī**ti sabbampi rāgaṃ samucchadavinayavasena vineti, attano kiccaṃ pariyosāpeti. Kiccāpariyosāpaneneva hi sayampi pariyosānaṃ nipphattiṃ upagacchati. Tenāha “**pariyosānaṃ gacchati nipphajjati**”ti.

Dhuranti bhummatthe upayogavacananti āha “**tatramajjhataṭṭāyuge yuttā**”ti. **Īsāti** yugasandhārikā dāruyugaḷā. Yathā vā bāhiraṃ yugaṃ dhāreti, tassā ṭhitāya eva kiccāsiddhi, evaṃ kiriyāvasena laddhabalena tatramajjhataṭṭāyuge thiraṃ dhāreti, teheva ariyamaggarathassa pavattanaṃ. **Hiriggahaṇena** cettha taṃsahacaraṇato ottappampī gahitaṃyeva hoti. Tenāha “**attanā saddhi**”ntiādi. Nāḷiyā minamāno puriso viya ārammaṇaṃ minātīti **mano**. Kataraṃ pana taṃ mano, kathaṅcassa yottasadisatāti āha “**vipassanācitta**”ntiādi. Tena yottaṃ viyāti yottanti dasseti. Lokiyavipassanācittam atirekapaññāsa kusaladhamme ekābaddhe ekasaṅgahite karotīti sambandho. Te pana “phasso hoti... pe... avikkhepo hoti”ti cittaṅgavasena **dhammasaṅgahe** (dha. sa. 1) āgatanayeneva veditabbā. **Lokuttaravipassanācittanti** maggacittaṃ āha. **Atirekasaṭṭhīti** te eva sammākammantājīvehi anaññātaññassāmītindriyādīhi ca saddhiṃ atirekasaṭṭhi kusaladhamme. **Ekābaddheti** ekasmiṃ eva ārammaṇe ābaddhe. **Ekasaṅgaheti** tatheva vipassanācikkavasena ekasaṅgahe karoti. Pubbaṅgamabhāvena ārakkhaṃ saretīti **ārakkhasārathī**. “**Yathā hi rathassa...pe... sārathī**”ti vatvā taṃ dassetuṃ “**yoggiyo**”ti vuttaṃ. **Dhuraṃ vāheti** yogge. **Yojeti** yogge samagatiyaṅca. **Akkhaṃ abbhāñjati** sukhappavattanattaṃ. **Rathaṃ peseti** yoggacodanena. **Nibbisevane karoti** gamanavīthiyaṃ paṭipādanena sanniyojeti. **Ārakkhapaccupaṭṭhānāti** ārakkhaṃ paccupaṭṭhapeti asammosasabhāvattā. **Gatīyoti** pavattīyo, nipphattīyo vā. **Samanvesatīti** gavesati.

Ariyapuggalassa nibbānaṃ paṭimukhaṃ sampāpane ratho viyāti **ratho**. Parikaroti vibhūsayatīti **parikkhāro**, vibhūsaṇaṃ, sīlaṅca ariyamaggassa vibhūsaṇaṭṭhāniyaṃ. Tena vuttaṃ “**catupārisuddhisīlāṅkāro**”ti, sīlabhūsaṇoti attho. **Vipassanāsampayuttānanti** lokiyāya lokuttarāya ca vipassanāya sampayuttānaṃ. Vidhinā iretabbato pavattetabbato **vīriyaṃ**, sammāvāyāmo. Samaṃ sammā ca dhiyatīti samādhi, dhuraṅca taṃ samādhi cāti dhurasamādhi, upekkhā dhurasamādhi etassāti **upekkhādhurasamādhi**, ariyamaggo upekkhāsaṅkhātadhurasamādhi attho. Aṭṭhakathāyaṃ pana byañjanaṃ anādiyitvā dhurasamādhisaddānaṃ bhinnādhikaraṇatā vuttā. **Payogamajjhatteti** vīriyasamatāya. **Anicchāti** icchāpaṭipakkhā. Tenāha “**alobhasaṅkhātā**”ti. **Parivāraṇanti** parivāro, paricchadoti attho.

Mettāti mettācetovimutti. Tathā **karuṇā**. **Pubbabhāgoti** ubhinnampi upacāro. Dvepi kāyacittavivekā viya pubbabhāgadhamavasena vuttā. **Ariyamaggaratheti** parisuddhamaggasaṅkhāte rathe. Ariyamaggaratho ca maggaratho cāti **ariyamaggaratho**, evaṃ ekasesanayena vā attho veditabbo. Tenāha “**imasmīṃ lokiyalokuttaramaggarathe ṭhito**”ti. **Sannaddhacammoti** yogāvacarassa paṭimukkacammaṃ. **Na naṃ te vijjhantīti** vacanapathā na naṃ vijjhanti. Dhammabhedanavasena na bhañjati, tassa ariyamaggassa rathassa sammā yojitassa antarā bhaṅgo natthīti attho.

Attano purisakāraṃ nissāya laddhattā attano santāneti adhippāyo. **Anuttaranti** uttararahitaṃ. Tato eva **setṭhayānaṃ**, nassa kenaci sadisanti **asadisam**. Dhitisampannatāya **dhīrā paṇḍitapurisā lokamhā niyyanti gacchanti**. “Jayam jaya”nti gāthāyaṃ vacanavipallāsena vuttanti āha “**jinantā jinantā**”ti.

Jāṇussoṇibrāhmaṇasuttavaṇṇanā niṭṭhitā.

5-6. Kimatthiyasuttādivaṇṇanā

5-6. Niyamatthoti avadhāraṇattho. **Tena** niyameṇa avadhāraṇena – **aññaṃ maggaṃ paṭikkhipati** ito aññassa niyyānikamaggassa abhāvato. “Dukkassa pariññattha”nti vuttattā **vaṭṭadukkhaṃ kathitaṃ**. Ariyamagge gahite tassa pubbabhāgamaggo vipassanāya gahito evāti “**missakamaggo kathito**”ti vuttaṃ. **Uttānameva** apubbassa abhāvā. Ayaṃ pana viseso “rāgakkhayo”tiādīhi yadipi nibbānaṃ vuttaṃ. Tathāpi arahattaṃ viya brahmacariyampi. Tena nibbānaṃ eva vuccati “**idaṃ brahmacariyapariyosāna**”nti.

Kimatthiyasuttādivaṇṇanā niṭṭhitā.

7. Dutiyaaññatarabhikkhusuttavañṇanā

7. **Rāgavinayā**dipadehi nibbānaṃ vāpi vucceyya arahattaṃ vāpi. Yasmā so bhikkhu ubhayatthapi nivīṭṭhabuddhi, tasmā bhagavā tassa ajjhāsaya vasena “nibbānadhātuyā kho eta”ntiādinā nibbānadhātuṃ vissajjetvā puna “āsavaṇaṃ khayō tena vuccatī”ti āha. Yasmā ariyamaggo rāgādike samucchadavasena vineti, āsavaṇa sabbaso khepeti, tena ca vuttaṃ nibbānaṃ arahattaṇca, tasmā tadubhayaṃ “**rāgavinayotiādi nāmamevā**”ti vuttaṃ. **Anusandhikusalatāya pucchanto etaṃ avocāti** iminā “pucchānusandhi idha labbhatī”ti dīpitaṃ, ajjhāsayaṇusandhipi ettha labbhatevāti daṭṭhabbaṃ.

Dutiyaaññatarabhikkhusuttavañṇanā niṭṭhitā.

8. Vibhaṅgasuttavañṇanā

8. **Ekena pariyāyena aṭṭhaṅgikamaggaṃ vibhajivāti** “sammādiṭṭhī”tiādinā ekena pariyāyena ariyaṃ aṭṭhaṅgikaṃ maggaṃ vibhāgena dassetvā “katamā ca, bhikkhave, sammādiṭṭhī”tiādinā **puna aparena pariyāyena vibhajitukāmo**. Uggahadhāraṇaparicayaññānīpi savanaññaṇe eva avarodhaṃ gacchantīti “**savanasammasanapaṭivedhapaccavekkhaṇavasenā**”ti vuttaṃ.

Kammaṭṭhānābhīnivesoti kammaṭṭhānapaṭipatti. Purimāni dve saccāni uggaṇhitvāti sambandho. **Iṭṭhaṃ kantaṃ manāpanti** nirodhamaggesu ninnabhāvaṃ dasseti, na abhinandanaṃ, tanninnabhāvo eva ca tattha kammakaraṇaṃ daṭṭhabbaṃ. Ekenevākārena saccānaṃ paṭivedhanimittatā, so eva abhimukhabhāvo tesam samāgamoti **ekābhisamayo**.

Assāti ñāṇassa, yogino vā. Ettha ca keci “lokiyañāṇampi paṭivedho sabbassa yāthāvabodhabhāvato”ti vadanti. Nanu uggaḥādipaṭivedho ca paṭivedhova, na ca so lokuttaroti? Taṃ na, kevalena paṭivedha-saddena uggaḥādipaṭivedhānaṃ avacanīyattā, paṭivedhanimittatā vā uggaḥādivasena pavattaṃ dukkhādīsu pubbabhāge ñāṇaṃ “paṭivedho”ti vuccati, na paṭivedhattā, paṭivedhabhūtaṃ eva pana ñāṇaṃ ujukaṃ paṭivedhoti vattabbaṃ arahati. **Kiccatoti** pariññādikiccatō. **Ārammaṇapaṭivedhoti** sacchikiriyāpaṭivedhamāha. **Kiccatoti** asammohapaṭivedhaṃ. Uggahādīhi saccassa pariggaṇhanaṃ **pariggaho**.

Duddasattāti anadhigatañāṇena yāthāvasarasalakkhaṇato daṭṭhuṃ asakkuṇeyyattā uppattito pākāṭānīpi. Tenāha “**dukkhasaccaṃ hī**”tiādi. **Ubhayanti** purimaṃ saccadvayaṃ. **Payogoti** kiriyā, vāyāmo vā. Tassa mahantatarassa icchitabbaṃ dukkaratarataṇca upamāhi dasseti “**bhavaggaḥaṇattha**”ntiādinā. Yathā purimaṃ saccadvayaṃ viya kenaci pariyāyena apākāṭāyā paramagambhīrattā uggaḥādivasena pubbabhāge pavattibhedhaṃ gahetvā “**dukkhe ñāṇa**”ntiādinā catubbidhaṃ katvā vuttaṃ. **Ekameva taṃ ñāṇaṃ hoti** ekābhisamayavaseneva pavattanato.

Kāmapaccanīkatṭhenāti kāmānaṃ ujupaccanīkabhāvena. **Kāmato nissaṭabhāvenāti** kāmehi viṣayuttabhāvena. **Kāmaṃ sammasantassāti** duvidhampi kāmānaṃ aniccādito sammasantassa. Pajjati pavattati etenāti padaṃ, kāmassa padanti **kāmapadaṃ**, kāmassa uppattikāraṇassa ghāto samugghāto, taṃ **kāmapadaghātaṃ**. Tenāha “**kāmavūpasama**”nti. Kāmehi vivittaṃ **kāmavivittaṃ**. So eva ca nesam anto samucchadaviveketi katvā tasmim sādhetabbe uppannoti vuttaṃ “**kāmavivittante uppanno**”ti. Kāmato nikkhamatīti nikkhamo, so eva **nekkhammasaṅkappo**. Imasmiṇca nekkhammasaṅkappassa saddatthavibhāvena yathāvutto kāmappaccanīkatṭhādiko atthaniddhāraṇaviseso antogadho.

Eseva nayoti iminā byāpādapaccanīkatṭhena vihiṃsāya paccanīkatṭhenātiādikam abyāpādāvihimsāsāṅkappānaṃ atthuddhāraṇavidhiṃ atidisati. **Nekkhammasaṅkappādayoti ādi-**saddena abyāpādaāvihimsāsāṅkappe eva saṅgaṇhāti. **Kāma...pe... saññānanti** kāmavitakkādiviratisampayuttānaṃ nekkhammādisaññānaṃ. **Nānattāti** nānākhaṇikattā. **Tisu ṭhānesūti**

tippakāresu kāraṇesu. **Uppannassāti** uppajjanārahassa. Bhūmiladdhauppannaṃ idhādhippetam. Esa nayo ito paresupi. **Padacchedatoti** kāraṇupacchedato. **Padanti** hi uppattikāraṇanti vuttovāyamatto. **Anuppattisādhanavasenāti** yathā saṅkappo āyatim nuppajjati, evaṃ anuppattisādhanavasena. Sammādiṭṭhi viya **ekova kusalasaṅkappo uppajjati**.

Catūsu ṭhānesūti viṣaṃvādanādīsu catūsu vītikkamatṭhānesu. Pabbajitānaṃ micchājīvo nāma āhāranimittakoti āha “**khādanīyabhojanīyādīnaṃ atthāyā**”ti. Sabbaso anesanāya pahānaṃ sammāājīvoti āha “**buddhappasatthena ājīvenā**”ti. Kammaṭṭhapaṭṭānaṃ vasena “**sattasu ṭhānesū**”ti vuttaṃ. Akammaṭṭhapaṭṭāya hi anesanāya so padaghātaṃ karotiyeva.

Tathārūpe vā ārammaṇeti yasmim ārammaṇe imassa pubbe kilesā na uppannā, tasmim eva. **Anuppannānanti** anuppādassapi patthanāvasena anuppannānaṃ. **Vīriyacchandanti** vīriyassa nibbattetukāmatāchandaṃ. “Chandasampayuttavīriyañcā”ti vadanti. Vīriyameva pana anuppannākusalānuppādane labbhamānachandaṭṭāya dhurasampaggahatāya chandapariyāyena vuttaṃ. Tathā hi vīriyaṃ – “anikkhittachandaṭṭā anikkhittadhurata”ti (dha. sa. 26) niddiṭṭhaṃ. Kosajjapakke patitum adatvā **cittam pagghitam karoti. Padhānanti** padhānabhūtavīriyaṃ.

Uppattipabandhavasenāti nirantaruppādanavasena. **Catūsu ṭhānesu kiccāsādhanavasenāti** yathāvuttesu catūsu ṭhānesu padhānakiccassa nipphādanavasena anuppādanādivasena. **Kiccāsādhanavasenāti** kāyavedanācittadhammesu subhasukhaniccaattaḡāhavidhamanavasena asubhadukkhāniccānattasādhanavasena.

Ayanti yathāvutto sadisāsadisatāvīseso. **Assāti** maggassa. **Ettha kathanti** yadi rūpāvacaracatutthajjhānato paṭṭhāya yāva sabbabhavaggā jhānaṅgamaggaṅgabojjhaṅgānaṃ sadisatā, evaṃ sante “āruppe catukkapañcakajjhānaṃ uppajjati, tañca lokuttara”nti ettha kathaṃ attho gaheṭṭabboti āha “**etthāpi**”tiādi. **Taṃjhānikāvāti** paṭṭhamajjhānādīsu yaṃ jhānaṃ maggaṭṭilābhassa pādakabhūtaṃ, taṃjhānikāva **assa** ariyassa uparipi **tayo maggā. Evanti** vuttākārena. **Pādakajjhānameva niyameṭi** āruppe catukkapañcakajjhānuppattiyam. **Vipassanāya ārammaṇabhūtā khandhāti** sammasitakhandhe vadanti. **Puggalajjhāsayo niyameṭi** pādakasammasitajjhānānaṃ bhede. Yasmā saṅkhārupekkhāñānameva ariyamaggassa bojjhaṅgādivīsesaṃ niyameṭi, tato dutiyādipādakajjhānato uppannassa saṅkhārupekkhāñānaṃ pādakajjhānātikkantānaṃ aṅgānaṃ asamāpajjitukāmatāvīrāgabhāvato itarassa ca atabbhāvato tīsupi vādesu vipassanāva niyameṭi veditabbo, tasmā vipassanāniyameneva hi paṭṭhamavādepi apādakajjhānādipādakāpi maggā paṭṭhamajjhānikā honti. Itarehi ca pādakajjhānehi vipassanāniyamehi taṃtaṃjhānikāva. Evaṃ sesavādesu vipassanāniyamo yathāsambhavaṃ yojetabbo. Dutiyavāde taṃtaṃjhānikatā sammasitasāṅkhāravipassanāniyamehi hoti. Tatra hi vipassanā taṃtaṃvirāgabhāvanā bhāvetabbā, na somanassasahagatā upekkhāsahagatā hutvā jhānaṅgādiniyamaṃ maggassa karotīti evaṃ vipassanāniyamo vuttanayeneva veditabbo. Imasmiñca vāde pādakasammasitajjhānupanissayasabbhāve ajjhāsayo ekantena hotīti “**puggalajjhāsayo niyameṭi vadanti**”ti vuttaṃ, aṭṭhakathāyaṃ pana visuddhimaggassa etissā aṭṭhakathāya ekasaṅgahitattā “**tesaṃ vādavinicchayo...pe... veditabbo**”ti vuttaṃ. **Pubbabhāgeti** vipassanākkhaṇe.

Vibhaṅgasuttavaṇṇanā niṭṭhitā.

9. Sūkasuttavaṇṇanā

9. Sūkanti sāliyavādīnaṃ vālamāha. So hi nikantakasadiṣo paṭimukhagataṃ hatthaṃ vā pādaṃ vā bhindati, tasmā bhedaṃ icchantena uddhaggaṃ katvā ṭhapitaṃ **sammāpaṇihitaṃ** nāma, tathā aṭṭhapitaṃ **micchāpaṇihitaṃ** nāmāti vuttaṃ. **Micchāpaṇihitāyāti** kammassakatapaññāya micchāṭṭhapaṇaṃ nāma – “ime sattā kammavasena sukhadukkhāṃ paccanubhavanti, taṃ pana kammaṃ issarassa icchāvasena brahmā nimmināti”tiādinā micchāpakappaṇaṃ. Keci pana “natthi dinnantiādinā

mayena pavatti, tassa vā ñāṇassa appavattī”ti vadanti. **Maggabhāvanāyāti** etthāpi micchāmaggassa pavattanaṃ, ariyamaggassa vā appavattanaṃ micchāṭṭhapanāṃ. Tenāha “**appavattitattā**”ti. **Avijjā bhindissatīti** avijjāṃ samucchindissati. **Magganissitaṃ katvā** magge eva pakkhipitvā. Tañhi ñāṇaṃ maggassa mūlakāraṇaṃ magge siddhe tassa kiccassa matthakappattito. “Sammāpaṇihitāya diṭṭhiyā sammāpaṇihitāya maggabhāvanāyā”ti vuttatā **missakamaggo kathito**. Chavibhedasadisō cettha avijjābhedo, lohituppādasadisō lokuttaramaggabhāvo daṭṭhabbo.

Sūkasuttavaṇṇanā niṭṭhitā.

10. Nandiyasuttavaṇṇanā

10. Channaparibbājako vatthacchādiyā channaṅaparibbājako, na naggaparibbājako.

Avijjāvaggavaṇṇanā niṭṭhitā.

2. Vihāravaggo

1. Paṭhamavihārasuttavaṇṇanā

11. Aḍḍhamāsanti accantasamyoge upayogavacanaṃ. **Paṭisalliyitunti** yathāvuttaṃ kālaṃ paṭi divase divase samāpattiyāṃ dhammacintāyāṃ cittaṃ nilīyitūṃ. **Vinetaḍḍhanti** samucchadavinayena vinetaḍḍhanti ariyamaggādhigantaḍḍhanti. **Tanti** diṭṭhānugatiāpajjanaṃ. **Assāti** janatāya. **Apagacchatīti** satthu santikato apeti. **Sūti** nipātamattaṃ.

Padesenāti ekadesena. Saha padesenāti **sapadeso**. Svāyaṃ sapadeso yasmā vedanāvaseneva pāḷiyāṃ āgato, tasmā paramatthadhammakotṭhāse vedanā anavasesato labbhati, te gaṇhanto “**khandhapadeso**”tiādimāha. **Taṃ sabbanti** khandhapadesādikaṃ sabbampi. “**Sammasanto**”ti padassa atthadassanavasena “**paccavekkhanto**”ti āha. Paccavekkhāṇā idha sammasanaṃ nāma, na vipassanā. Vipassanāsammasanaṃ pana bhagavato visākhapūṇṇamāyaṃ eva nipphannaṃ, tasmā bhagavato aññabhūmikāpi vedanā aññabhūmikānaṃ sattānaṃ viruddhā uppajjatevāti vuttaṃ “**yāva bhavaggā pavattā sukhā vedanā**”ti. **Sabbākārenāti** sarūpato samudayato atthaṅgamato assādādītōti sabbākārena. **Pariggaṇhanto** upaparikkhanto.

Nippadesāneva anavasesāneva. Indriyasatipatṭhānapadeso suviññeyyoti anuddhato. **Assāti** bhagavato. **Ṭhāneti** tasmim tasmim paccavekkhitabbaṅkhatē okāse. **Sā sā ca vihārasamāpattīti** khandhavasena āyatanādivasena ca pavattitvā tesam ekadesabhūtaṃ vedanaṃyeva pariggahetvā taṃ sammasitvā anukkamena samāpannā jhānasamāpatti phalasaṃpatti ca. Phalasaṃpatti hi tathā sammasitvā punappunaṃ samāpajjanavasena atthato abhinnaṃpi adhiṭṭhānabhūtaḍḍhammabhedenā bhinnā viya vuccati, yato catuvīsatiḷḷasahasasabbhedā devasikaṃ vaḷaṅjanasaṃpattiyo aṭṭhakathāyaṃ vuttā. Kāmaṃ aññadhammavasenaṃpi jātā eva, vedanāvasena panettha abhiniveso kato **vedanānubhāvena jātā**. Kasmā evaṃ jātāti? Buddhānaṃ ñāṇapadassa antaravibhāgattā. Tathā hi bhagavā sakalampi aḍḍhamāsaṃ vedanāvaseneva sammasanaṃ pavatteti, tadanusārena ca tā vihārasamāpattiyo samāpajji. Tayidaṃ acchariyaṃ anaññasādhāraṇaṃ bhikkhū pavedento satthā – “yena svāha”ntiādimavoca.

Akusalāvāti pāṇātipāta-adinnādāna-kāmesumicchācāra-musāvāda-pisuṇavācāsamphappalāpa-abhijjhā-byāpādasena taṃtaṃmicchādassanavasena ca akusalā vedanā eva hoti. Brahmaḷokādīsū uppajjitvā tattha niccā dhuvā bhavissāmāti evaṃ diṭṭhiṃ upanissāyāti yojetabbaṃ. **Devakulādīsū** devapūjatthaṃ, sabbajanaparibhogatthaṃ vā **mālāvaccamaṃ ropenti**. **Vadhabandhanādīnti** ādisaddena adinnādāna-micchācāra-musāvāda-pisuṇavācā-samphappalāpādīnaṃ saṅgaho daṭṭhabbo. Diṭṭhadhammavipākassa apacurattā apākaṭattā ca “**bhavantaragatāna**”nti vuttaṃ.

Iti nesanti ettha **iti**-saddo ādiattho, pakārattho vā. Tena yathā pharusavācāvasena, evaṃ tadaññesampi akusalakammānaṃ vasena sammādiṭṭhipaccayā akusalavedanāppavatti yathārahaṃ nīharitvā vattabbā. **Eseva nayoti** iminā yathā micchādiṭṭhipaccayā sammādiṭṭhipaccayā ca kusalākusalavipākavedanā sahajātaḥkoṭiyā upanissayakoṭiyā ca vasena yathārahaṃ yojetvā dassitā, evaṃ micchāsāṅkappapaccayādisupi yathārahaṃ yojetvā dassetabbāti imamattaṃ atidisati. **Chandapaccayāti** ettha taṇhāchandasaḥito kattukāmatāchando adhippetoti āha “**chandapaccayātiādisu pana chandapaccayā aṭṭhalobhasahagatacittasampayuttā vedanā veditabbā**”ti. **Vitakkapaccayāti** ettha appanāpattova vitakko adhippetoti vuttaṃ “**vitakkapaccayā paṭhamajjhānavedanāvā**”ti. Vitakkapaccayā paṭhamajjhānavedanāya gahitattā “**ṭhapetvā paṭhamajjhāna**”nti. Upari tisso rūpāvacarā, heṭṭhā tisso arūpāvacarā evaṃ **sesā cha saññāsamāpattivedanā**.

Tiṇṇanti chandavitakkasaññānaṃ. **Avūpasameti** paṭipakkhena avūpasamite. Tiṇṇaṅhi tesam sahabhāvena paccayatā aṭṭhalobhasahagatacittesu eva. Tattha yaṃ vattabbaṃ taṃ vuttameva. **Chandamattassāti** tesu tīsu chandamattassa. **Vūpasame paṭhamajjhānavedanāva** appanāpattassa adhippetattā. **Chandavitakkānaṃ vūpasame dutiyajjhānādivedanā adhippetā** saññāya avūpasantattā. Dutiyajjhānādivedanāgahaṇena hi sabbā saññāsamāpattiyo ca gahitāva honti. **Tiṇṇampi vūpasameti** chandavitakkasaññānaṃ vūpasame **nevasaññānāsaññāyanavedanā adhippetā**. Bhavaggappattasaññā hi vūpasamanti chandasaṅkappānaṃ accantasukhumabhāvappattiyā. Heṭṭhā “sammādiṭṭhipaccayā”ti ettha sammādiṭṭhigahaṇena heṭṭhimamaggasammādiṭṭhipi gahitāva hotīti āha – “**appattassa pattiyaṭi arahattaphalassa pattatthāyā**”ti. Atha vā heṭṭhimamaggādhiḡamena vinā aggamaḡḡo natthīti heṭṭhimamaggādhiḡamaḡ atthāpannaḡ katvā “**arahattaphalassa pattatthāyā**”ti vuttaḡ. Āyameṭi phalena missito hoti etenāti **āyāmo**, sammāvāyāmoti āha “**atthi āyāmaṅti atthi vīriya**”nti. **Tassa vīriyārambhassāti** aññādhiḡamakāraṇassa sammāvāyāmassa vasena. Pāḷiyam ṭhāna-saddo kāraṇapariyāyoti āha – “**arahattaphalassa kāraṇe**”ti. **Tappaccayāti** ettha **taḡ**-saddena “ṭhāne”ti vuttakāraṇameva paccāmaṭṭhanti āha – “**arahattassa ṭhānapaccayā**”ti. **Catumaggasahajātāti** etena “arahattaphalassa pattatthāyā”ti ettha heṭṭhimamaggānaḡ atthāpattivasena gahitabhāvameva joteti. Keci pana “catumaggasahajātāti vatvā nibbattitalokuttaravedanāti bhūtakathanaḡ viṣesanaḡ. Nibbattitalokuttaravedanāti paṭhamaḡ apekkhitabbaḡ, pacchā catumaggasahajātā”ti vadanti.

Paṭhamavihārasuttavaṇṇanā niṭṭhitā.

2. Dutiyavihārasuttavaṇṇanā

12. Micchādiṭṭhi vūpasamati sabbaso pahīyati etenāti **micchādiṭṭhivūpasamo**. “Micchādiṭṭhivūpasamo nāma sammādiṭṭhi. Bhavantare uppajjanto atidūreti maññamāno vipākavedanaḡ na gaṇhātī”ti aṭṭhakathāyaḡ vuttaḡ. “**Iminā nayaṅā**”ti atidisitvāpi tamattaḡ paḡaṭataraḡ kātuḡ “**yassa yassā**”tiādim vatvā eva sāmāññavasena vuttamatthaḡ pacchimesu tīsu padesu sarūpatova dassetuḡ “**chandavūpasamapaccayā**”tiādimāha, taḡ suviññeyyameva. **Vuttatthāneva** anantarasutte.

Dutiyavihārasuttavaṇṇanā niṭṭhitā.

3-7. Sekkhasuttādivaṇṇanā

13-17. Tissannaḡpi sikkhānaḡ sikkhanaḡ sīlaḡ etassāti **sikkhanasīlo**. Sikkhatīti vā **sekkho**. Vuttañhetam “sikkhatīti kho, bhikkhave, tasmā sekkhoti vuccati. Kiñca sikkhati? Adhisīlampaḡ sikkhati”tiādi (a. ni. 3.86). **Tīhi phalehi** heṭṭhā. Sāpi catutthamaggena saddhiḡ uppannaḡsikkhāpi. Maggakkhaṇe hi sikkhākiccaḡ na niṭṭhitaḡ vippakatabhāvato, phalakkhaṇe pana niṭṭhitaḡ nāma. **Uttānatthāneva** heṭṭhā vuttanayattā.

Sekkhasuttādivaṇṇanā niṭṭhitā.

Vihāravaggavaṇṇanā niṭṭhitā.

3. Micchattavaggavaṇṇanā

21-30. Micchāsabhāvanti ayāthāvasabhāvaṃ aniyyānikasabhāvaṃ. **Sammāsabhāvanti** yāthāvasabhāvaṃ niyyānikasabhāvaṃ. **Micchāpaṭipattādhikaraṇahetūti** ettha **adhi-saddo** anattakoti āha – “**micchāpaṭipattikaraṇahetū**”ti. Nāyati paṭividdhavasena nibbānaṃ gacchatīti **ñāyo**. So eva taṃsamaṅgīnaṃ vaṭṭadukkhapātato dhāraṇaṭṭhena **dhammoti** āha – “**ñāyaṃ dhammanti ariyamaggadhamma**”nti. Nāṇassa micchāsabhāvo nāma natthīti viññānamevettha paccavekkhaṇavasena pavattaṃ ṇāṇa-saddena vuccatīti āha “**micchāviññāṇo**”ti. **Micchāpaccavekkhaṇoti** kiñci pāpaṃ katvā “aho mayā kataṃ sukata”nti evaṃ pavatto micchāpaccavekkhaṇo. Gosīlagovatādi pūraṇaṃ muttīti evaṃ gaṇhato **micchāvimutti** nāma. Micchāpaṭipadādīhi vivaṭṭanti evaṃ **vaṭṭavivaṭṭaṃ kathitaṃ. Puggalo pucchitoti** nigamito ca “ayaṃ vuccati, bhikkhave, asappuriso”tiādinā. Kiñcāpi “micchādiṭṭhiko hoti”tiādinā puggalova niddiṭṭho, tathāpi puggalasīsenāyaṃ dhammadesanāti āha “**dhammo vibhatto**”ti. Tenevāha “**dhammena puggalo dassito**”ti. **Dhammenāti** micchādiṭṭhiādikena dhammena. Kalyāṇaputhujjanato paṭṭhāya sabbaso **sappurisā** nāma, khīṇāsavo **sappurisataro. Suppavattaniyoti** sukhena pavattetuṃ sakuṇeyyo. **Dhāvati**ti gacchati. Paccayuppanna upecca nissitabbato upanisā, paccayo, ekassa sakārassa lopaṃ katvā vāti āha – “**saupanisam sapaccaya**”nti. Parikaraṇato **parikkhāro**, parivāroti āha – “**saparikkhāram saparivāra**”nti. Sahajātavasena upanissayavasena ca sapaccayatā kiccasādhane nipphādane sahāyabhāvūpagamane ca saparivāratā datṭhabbā.

Micchattavaggavaṇṇanā niṭṭhitā.

4. Paṭipattivaggavaṇṇanā

31-40. Ayāthāvapaṭipatti, na yathāpaṭipatti, hetumhipi phalepi ayāthāvavattusāadhanato. **Ekam suttaṃ dhammavasena kathitaṃ** paṭipattivāsena. **Ekam suttaṃ puggalavasena kathitaṃ** paṭipannakavasena. Saṃsāramahoghassa paratīrabhāvato yo naṃ adhigacchati, taṃ pāreti gametīti pāraṃ, nibbānaṃ, tabbidhuratāya natthi ettha pāraṃ, saṃsāroti vuttaṃ – “**apārāpāranti vaṭṭato nibbāna**”nti. **Pāraṅgatāti** asekkhe sandhāya. **Yepi gacchantīti** sekkhe. **Yepi gamissantīti** kalyāṇaputhujjane. **Pāragāminoti** ettha kita-saddo tikālavācīti evaṃ vuttaṃ.

Tiranti orimatīramāha. Tena vuttaṃ “**vaṭṭameva anudhāvati**”ti. Ekantakāḷakattā cittassa apabhassarabhāvakaraṇato kaṇhābhijāti hetuto ca vuttaṃ “**kaṇhanti akusaladhamma**”nti. Vodānabhāvato cittassa pabhassarabhāvakaraṇato sukkābhijāti hetuto ca vuttaṃ – “**sukkanti kusadaladhamma**”nti. Kilesamāra-abhisāṅkhāramāra-maccumārānaṃ pavattiṭṭhānatāya okaṃ vuccati vaṭṭaṃ, tabbidhuratāya anokanti nibbānanti āha – “**okā anokanti vaṭṭato nibbāna**”nti.

Paramatthato samaṇā vuccanti ariyā, samaṇānaṃ bhāvo sāmāññaṃ, ariyamaggo, tena araṇīyato upagantabbato sāmāññattho nibbānanti āha – “**sāmāññatthanti nibbānaṃ, taṃ hī**”tiādi. **Brahmaññatthanti** etthāpi iminā nayena attho veditabbo. **Brahmaññena** ariyamaggena. **Rāgakkhayoti** ettha **iti-saddo** ādisaddattho. Tena “dosakkhayo mohakkhayo”ti padadvayaṃ saṅgaṇhāti. **Vaṭṭatiyevāti vadanti** “rāgakkhayo”ti. Pariyāyena hi arahattassa vattabbatīti.

Paṭipattivaggavaṇṇanā niṭṭhitā.

5. Aññatitthiyapeyyālavaggavaṇṇanā

41-48. Aparāparam parivattamānena vattasampannena saṃsāraddhānapariññāvaseneva nibbānassa pattabbattā vuttam – “**nibbānaṃ patvā pariññātaṃ nāma hotī**”ti. **Nibbānaṃ patvāti** nibbānappattihetu. Hetuattho hi ayaṃ **tvā**-saddo yathā – “ghataṃ pivitvā balaṃ hoti, sīhaṃ disvā bhayaṃ hotī”ti. **Tasmāti** yasmā aparīññeyyaparijānanakiccena nibbānassa pattiyā addhānapariññāsiddhi ñāyati, tasmā upacāravasena nibbānaṃ “addhānapariññā”ti vuccati yathā “himasanti sūriyaṃ uggameti”ti. **Vijjāvimuttiphalasacchikiriyatthanti** ettha **vijjāti** aggamaggavijjā. **Vimuttīti** aggamaggasamādhi adhippeto. Tesam phalaṃ aññāti āha – “**vijjāvimuttiphaleṇa arahattaṃ kathita**”nti. Yāthāvato jānanato paccakkhato dassanato ca ñāṇadassananti idha phalanibbānapaccavekkhaṇā adhippetāti āha – “**ñāṇadassaneṇa paccavekkhaṇā kathitā**”ti. **Sesehīti** rāga-virāga-saṃyojanappahāna-anusayasamuggahāta-addhānapariññā- āsavakkhaya-vijjā-vimuttiphalasacchikiriyā-ñāṇadassana-anupādāparinibbānapadehi.

Aññatitthiyapeyyālavaggavaṇṇanā niṭṭhitā.

6. Sūriyapeyyālavaggavaṇṇanā

49-62. Yathā aruṇuggaṃ sūriyuggamanassa ekantikaṃ pubbanimittaṃ, evaṃ kalyāṇamittatā ariyamaggapātubhāvassāti sadisūpamā **aruṇuggaṃ kalyāṇamittatāya**. Kalyāṇamittoti cettha ariyo, **ariyamaggo** vā datṭhabbo **sūriyapātubhāvo viya** tena vidhūpanīyandhakāraavidhamanato. **Kusalakattukamyatāchando chandasampadā** itarachandato sampannatā. **Kārāpakaappamādassāti** saccapaṭivedhassa kārāpakassa. Evaṃ sabbattheva sampadāsaddā visesādhigamahetutāya veditabbā. **Aññenapi ākārenāti** “vivekanissita”ntiādiākārato aññena “rāgavinayapariyosāna”ntiādinā ākārena.

Sūriyapeyyālavaggavaṇṇanā niṭṭhitā.

7. Ekadhammapeyyālavaggādivaṇṇanā

63-138. **Tathā tathā vutte bujjanakānaṃ ajjhāsaya vasena kathito**, tasmā “vutto eva attho, kasmā puna vutto”ti na codetabbaṃ.

Ekadhammapeyyālavaggādivaṇṇanā niṭṭhitā.

8. Appamādapeyyālavaggo

1. Tathāgatasuttavaṇṇanā

139. **Kārāpakaappamādo** nāma “ime akusalā dhammā pahātabbā, ime kusalā dhammā uppādetabbā”ti vuttavajjetabbavajjanasampādetabbasampādanavasena pavatto appamādo. **Esāti** appamādo. **Lokiyova. Na** lokuttaro. **Ayanti esāti** ca appamādameva vadati. **Tesanti** catubhūmakadhammānaṃ. **Paṭilābhakaṭṭhenāti** paṭilābhāpanaṭṭhena.

Tathāgatasuttavaṇṇanā niṭṭhitā.

2. Padasuttavaṇṇanā

140. **Jaṅgalānanti** jaṅgalavāsīnaṃ. **Jaṅgala**-saddo cettha thaddhabhāvasāmaññena pathavīpariyāyo, na anupaṭṭhānavidūradesavācī. Tenāha – “**pathavītalavāsīna**”nti. Padānaṃ vuccamānattā “**sapādakapāṇāna**”nti visesetvā vuttam. **Samodhānanti** antogadhabhāvaṃ. Tenāha – “**odhānaṃ upakkhepa**”nti, upanetvā pakkhipitabbanti attho.

Padasuttavaṇṇanā niṭṭhitā.

3-10. Kūṭasuttādivaṇṇanā

141-148. Vassikāya pupphaṃ **vassikaṃ** yathā ‘āmalakiyā phalaṃ āmalaka’nti. **Mahātalasminti** uparipāsāde. ‘**Yāni kānici**’ti padehi itarāni samānādihikaraṇāni bhavituṃ yuttānīti ‘**paccatte sāmivacana**’nti vatvā tathā vibhattivipariṇāmo kato. ‘**Tantāvutāna**’nti padaṃ niddhāraṇe sāmivacananti tattha ‘vatthānī’ti vacanasesena atthaṃ dassetuṃ ‘**atha vā**’tiādi vuttaṃ.

Kūṭasuttādivaṇṇanā niṭṭhitā.

Appamādavaggavaṇṇanā niṭṭhitā.

9. Balakaraṇīyavaggo

1. Balasuttavaṇṇanā

149. Kammāniyeva **kammantā** yathā suttantā. **Ariyaṃ aṭṭhaṅgikaṃ magganti** ettha nānantariyakatāya vipassanāpi gahitā eva hotīti vuttaṃ ‘**sahavipassana**’nti.

2. Bijasuttavaṇṇanā

150. Pañcavidhampi samūhaṭṭhena **bījagāmo nāma**. **Tadevāti** mūlabījādi **eva**. **Sampannanti** saḥajātāmūlavantaṃ. **Nilabhāvato paṭṭhāyāti** nīlabhāvāpattito paṭṭhāya.

3. Nāgasuttavaṇṇanā

151. **Balaṃ gāhentī**ti attano sarīrabalaṃ gāhenti. Taṃ pana nāgānaṃ balappatti evāti āha – ‘**balaṃ gaṇhantī**’ti. **Sambhejjamukhadvāranti** mahāsamuddena sambhedagatamahānadīnaṃ mukhadvāraṃ. **Nāgā kāyaṃ vaḍḍhentī**tiādi yasmā ca bhagavatā upamāvasena ābhataṃ, tasmā **evameva khoti etthā**tiādinā upamaṃ saṃsandati. **Āgatesū**tiādisu tīsu padesu bhāvenabhāvalakkhaṇe.

5. Kumbhasuttavaṇṇanā

153. **Na patiāvamatī**ti ca nikujjitabhāvena udakavamano ghaṭo, na taṃ puna mukhena gaṇhāti. Tenāha ‘**na anto paveseṭī**’ti.

7. Ākāsasuttavaṇṇanā

155. **Tenetam vuttanti** tena ariyamaggassa ijjhanena etesaṃ sabbesaṃ bodhipakkhiyadhammānaṃ ijjhanaṃ vuttaṃ.

8-9-10. Paṭhamameghasuttādivaṇṇanā

156-158. **Paṃsurajojallanti** bhūmireṇusahajātamaṃ. **Vāṇijakopameti** vāṇijakopamaṃpaṭṭhamasutte cāpi.

11-12. Āgantukasuttādivaṇṇanā

159-160. Sahavipassanassa ariyamaggassa bhāvanāya ijjhanena **etaṃ**

abhiññāpariññeyyādidhammānaṃ abhiññāparijānanādīnaṃ ijghanāṃ **vuttaṃ** khattiyādīnaṃ visayaādikaṃ karontassa kathāya sajjitattā.

Balakaṇṭiyavaggavaṇṇanā niṭṭhitā.

10. Esanāvaggo

1. Esanāsuttavaṇṇanā

161. Kāmānanti vatthukāmakilesakāmānaṃ. Kilesakāmopi hi kāmīnanti parikappitena vidhinā ca adhikarāgehi esanīyo. **Bhavānanti** tiṇṇaṃ gatīnaṃ. Diṭṭhigatikaparikappitassa brahmacariyassa nimittabhāvato micchādiṭṭhi “brahmacariya”nti adhippetā.

2-11. Vidhāsuttādivaṇṇanā

162-171. Seyyohamasmitiādīnā taṃtaṃvibhāgena dhīyanti vidhīyantīti **vidhā**, mānakoṭṭhāsā, mānaṭṭhapanā vā. **Nīhanantīti** vibādenti.

Esanāvaggavaṇṇanā niṭṭhitā.

11. Oghavaggo

1-2. Oghasuttādivaṇṇanā

172-173. Vaṭṭe ohananti osīdāpentīti **oghā**. **Rūpārūpabhaveti** rūpabhava ca arūpabhava ca rūpārūpataṇhohanissayā rūpārūpāvacarakammanibhattā khandhā. Yojanaṭṭhena **yogo**.

3-4. Upādānasuttādivaṇṇanā

174-175. Kāmanavasena upādiyanato **kāmupādānaṃ**. Tenāha “**kāmaggaḥaṇa**”nti. **Nāmakāyassāti** vedanādīnaṃ catunnaṃ arūpakkhandaṇaṃ. **Ghaṭanapabandhanakilesoti** hetunā phalassa kammavaṭṭassa vipākavaṭṭena dukkhappabandhasaññitassa ghaṭanassa sambajjhanassa nibbattakakilesa. **Antaggāhikadiṭṭhi** sassatucchedagāho.

Upādānasuttādivaṇṇanā niṭṭhitā.

5-10. Anusayasuttādivaṇṇanā

176-181. **Thāmagataṭṭhenāti** sattasantāne thirabhāvūpagamanabhāvena. **Thāmagatanti** ca aññehi asādhāraṇo kāmarāgādīnaṃyeva āveṇiko sabhāvo daṭṭhabbo. **Kāmarāgovāti** kāmarāgo eva appahīno. So satī paccayalābhe uppajjanārahātāya santāne anusetīti **anusayo**. **Sesesupīti** paṭighānusayādīsu. Orambhāgo vuccati kāmādhātu rūpārūpabhāvato heṭṭhābhūtattā. Tattha pavattiyā paccayabhāvato **orambhāgiyāni** yathā “pacchiyo goduhako”ti. Saṃyojentīti **saṃyojanāni**, heṭṭhā viya attho vattabbo. **Uddhambhāgo** mahaggatabhāgo, tassa hitānīti sabbaṃ heṭṭhā vuttanayattā na vuttanti adhippāyo.

Anusayasuttādivaṇṇanā niṭṭhitā.

Oghavaggavaṇṇanā niṭṭhitā.

Maggasaṃyuttavaṇṇanā niṭṭhitā.

2. Bojjhaṅgasamyuttam

1. Pabbatavaggo

1.Himavantasuttavaṇṇanā

182. Bujjhati catusaccaṃ ariyasāvako etāyāti **bodham**, dhammasāmaggī, ariyasāvako pana catusaccaṃ bujihatīti **bodhi**. **Aṅgā**ti kāraṇā. Yāya dhammasāmaggiyāti sambandho. Taṇhāvasena **paṭiṭṭhānam**, diṭṭhivasena **āyūhanā**. Sassatadiṭṭhiyā **paṭiṭṭhānam**, ucchedadiṭṭhiyā **āyūhanā**. Līnavasena **paṭiṭṭhānam**, uddhaccavasena **āyūhanā**. Kāmasukhānuyogavasena **paṭiṭṭhānam**, attakilamathānuyogavasena **āyūhanā**. **Oghatarāṇasuttavaṇṇanāyama** (saṃ. ni. 1.1) –

“Kilesavasena paṭiṭṭhānam, abhisankhāravasena āyūhanā. Taṇhādiṭṭhihi paṭiṭṭhānam, avasesakilesābhisaṅkhārehi āyūhanā, sabbākusalābhisaṅkhāravasena paṭiṭṭhānam, sabbalokiyakusalābhisaṅkhāravasena āyūhanā”ti –

Vuttesu pakāresu idha avuttānaṃ vasena veditabbo. **Kilesasantānaniddāya uṭṭhahatī** etena sikhāpattavipassanāsahagatānampi satiādīnaṃ bojjhaṅgabhāvaṃ dasseti. **Cattārī**tiādīnā maggaphalena sahatānaṃ. Sattahi bojjhaṅgehi bhāvitehi saccapaṭivedho hotīti kathamidam jānitabbanti codanaṃ sandhāyāha **“yathāhā”**tiādi. **Jhānaṅgamaggaṅgādayo viyā**ti etena bodhibojjhaṅgasaddānaṃ samudāyāvayavavisayatam dasseti. **Senāgarathāṅgādayo viyā**ti etena puggalapaññattiyā avijjamānapaññattibhāvaṃ dasseti.

Bodhāya saṃvattantīti bojjhaṅgāti vuttam “kāraṇattho aṅgasaddo”ti. Bujjhatīti bodhi, bodhiyā eva aṅgāti **bojjhaṅgā**ti vuttam **“bujjantīti bojjhaṅgā”**ti. Vipassanādīnaṃ kāraṇānaṃ bujhitabbānaṃ saccānaṃ anurūpaṃ paccakkhabhāvena paṭimukhaṃ aviparītaṃ sammā bujjantīti evam vatthuvisesadīpakehi uparimaggehi anubujjantītiādīnā vuttabodhisaddehi nippadesena vuttam “bujjhanatāsāmaññaena saṅgaṇhātī”ti. Ettha ca līnapaṭiṭṭhāna-kāmasukhallikānuyoga-ucchedābhinivesānaṃ dhammavicaya-vīriyapītipadhāna-dhammasāmaggī paṭipakkho. Uddhaccāyūhanaattakilamathānuyoga-sassatābhinivesānaṃ passaddhisamādhī-upekkhāpadhāna-dhammasāmaggī paṭipakkho. Sati pana ubhayatthāpi icchitabbā. Tathā hi sā sabbatthikā vuttā.

Saṃ-saddo pasaṃsāyama. Punadeva sundaro ca atthopīti āha **“pasattho sundaro ca bojjhaṅgo”**ti. **Abhinibbattetī** abhivisiṭṭhabhāvena nibbattetī savisesabhāvaṃ vadati. **“Eke vaṇṇayantī”**ti vatvā tattha yathāvuttavivekattayato aññaṃ vivekadvayaṃ uddharitvā dassetuṃ **“te hi”**tiādi vuttam. Tattha jhānakkhaṇe tāva kiccato vikkhambhanavivekanissitam, vipassanākkhaṇe ajjhāsayatō paṭippassaddhivivekanissitam bhāvetīti. Tenāha – “anuttaram vimokkhaṃ upasampajja viharissāmī”ti. Tattha tattha nicchayatāya kasiṇajjhānaggahaṇena anuppādānampi gahaṇam daṭṭhabbama.

Himavantasuttavaṇṇanā niṭṭhitā.

2. Kāyasuttavaṇṇanā

183. Tiṭṭhanti etenāti ṭhiti, kāraṇam. Kammutucittāhārasaññito catubbidho paccayo ṭhiti etassāti **paccayaṭṭhitiko**. Āhārapaccayasaddā hi ekatthā. **Subhampī**ti kāmacchando paccayo, asubhe subhākārena pavattanato subhanti vuccatī. Tena kāraṇena pavattanakassa aññaṃsā kāmacchandassa nimittattā **subhanimittanti**. **Subhassā**ti yathāvuttassa subhassa. **Ārammaṇampī**ti subhākārena, iṭṭhākārena vā gayhamānaṃ rūpādiārammaṇampi subhanimittam vuttākārena. **Anupāyamanasikāro**ti ākāṅkhitassa hitasukhassa anupāyabhūto manasikāro, tato eva **uppathamanasikāro**ti ayonisomanasikāro. **Tasminti** yathāniddhārite kāmacchandabhūte tadārammaṇabhūte ca duvidhepi

subhanimitte. Aṭṭhakathāyaṃ pana “subhārammaṇe” icceva vuttaṃ. **Atthi, bhikkhave, subhanimittantiādīti ādi-**saddena kāmacchandanivaraṇassa āhāradassanapāli uttānāti katvā vuttaṃ – “**evaṃ sabbanīvaraṇesu yojanā veditabbā**”ti.

Paṭighopi paṭighanimittam purimuppannaṃ pacchā uppajjanakassa nimittabhāvato. **Paṭighārammaṇam** nāma ekūnavīsati āghātavattubhūtā sattasaṅkhārā. **Aratīti** pantasenāsanādīsu aramaṇam. **Ukkaṇṭhitāti** ukkaṇṭhabhāvo. **Pantesūti** dūresu, vivittesu vā. **Adhikusalesūti** samathavipassanādhammesu. **Aratī** ratipaṭipakkho. **Aratītāti** aramaṇākāro. **Anabhiratīti** anabhiratabhāvo. **Anabhiramaṇāti** anabhiramaṇākāro. **Ukkaṇṭhitāti** ukkaṇṭhanākāro. **Paritassitāti** ukkaṇṭhanavaseneva paritassanā.

Āgantukaṃ, na sabhāvasiddham. **Kāyālasīyanti** nāmakāye alasabhāvo. **Sammohavinodaniyaṃ** pana “tandīti jātiālasīya”nti vuttaṃ. **Vadatīti** etena atisītādipaccayā saṅkocāpattiṃ dasseti. **Yaṃ sandhāya vuttaṃ** kilesavattuvibhaṅge (vibha. aṭṭha. 857). **Tandīti** jātiālasīyaṃ. **Tandiyanāti** tandiyanākāro. **Tandimanakatāti** tandiyā abhibhūtacittatā. Alasassa bhāvo **ālasyaṃ**. Ālasyāyanākāro **ālasyaṇā**. Ālasyāyitassa bhāvo **ālasyaṇitattam**. Iti sabbehipi imehi padehi kilesavasena kāyālasīyaṃ kathitaṃ.

Kilesavasenāti sammohavasena. **Kāyavinamanāti** kāyassa virūpato namanā. **Jambhanāti** phandanā. Punappunaṃ jambhanā **vijambhanā**. **Ānamanāti** purato namanā. **Vinamanāti** pacchato namanā. **Sannamanāti** samantato namanā. **Paṇamanāti** yathā hi tantato uṭṭhitapesakāro kiñcīdeva upariṭṭhitaṃ gahetvā ujum kāyaṃ ussāpeti, evaṃ kāyassa uddham ṭhapanā. **Byādhiyakanti** uppanabyādhitā. Iti sabbehipi imehi padehi kilesavasena kāyaphandanameva kathitaṃ (vibha. aṭṭha. 858).

Bhattapariḷāhoti bhattavasena pariḷāhuppatti. **Bhuttāvissāti** bhuttavato. **Bhattamucchāti** bhattagelaññaṃ. Atibhuttapaccayā hi mucchāpato viya hoti. **Bhattakilamathoti** bhuttapaccayā kilantabhāvo. **Bhattapariḷāhoti** bhattadaratho. Kucchipūram bhuttavato hi pariḷāhuppattiyā upahatindriyo viya hoti, kāyo khijjati. **Kāyaduṭṭhullanti** bhuttabhattam nissāya kāyassa akammaññatā.

Cittassa liyanākāroti ārammaṇe cittassa saṅkocappatti. **Cittassa akalyatāti** cittassa gilānabhāvo. **Gilānoti** akallako vuccati. Tathā cāha “nāham, bhante, akallako”ti. **Akammaññatāti** cittagelaññasāṅkhāto akammaññanākāro. **Olīyanāti** olīyanākāro. Iriyāpathikampi cittaṃ yassa vasena iriyāpatham sandhāretuṃ asakkonto olīyati, tassa taṃ ākāraṃ sandhāya vuttaṃ “**olīyanā**”ti. Dutiyapadam upasaggena vaḍḍhitaṃ. **Līnanti** avipphārikatāya saṅkocappattam. Itare dve ākāraniddesā. **Thinanti** avipphārikatāya anussāhanā asaṅghanasāṅghanam. Thīyanākāro **thīyanā**. **Thiyitattanti** thiyitassa ākāro, avipphārikatāti attho.

Cetaso avūpasamoti cittassa avūpasantatā asannisinnabhāvo. Tenāha – “**avūpasantākāro**”ti. **Atthato panetanti** svāyaṃ avūpasantākāro vikkhepasabhāvattā vikkhepahetutāya ca atthato etaṃ uddhaccakukkucameva.

Vicikicchāya ārammaṇadhammā nāma “buddhe kaṅkhatī”tiādinā āgataaṭṭhakaṅkhāvattubhūtā dhammā. Yasmā vicikicchā byāpādādayo viya anu anu uggahaṇapaccayā uppajjati, tasmā kaṅkhatṭhānīyaṃ ārammaṇameva dassitaṃ “vicikicchāya ārammaṇadhammā”ti. Yasmā purimuppannā vicikicchā pacchā vicikicchāya paccayo hoti, tasmā vicikicchāpi vicikicchāṭṭhānīyadhammā veditabbā. Tatrāyaṃ vacanatto – tiṭṭhanti pavattanti etthāti ṭhānīyā, vicikicchā eva ṭhānīyā **vicikicchāṭṭhānīyā**. Aṭṭhakathāyaṃ pana ārammaṇassapi tattha visesapaccayataṃ upādāya “**kāmacchando vicikicchāti ime dve dhammā ārammaṇena kathitā**”ti vuttaṃ. Subhanimittassa hi paccayabhāvamattaṃ sandhāyetaṃ vuttaṃ, tathāpi yathā “paṭighampi paṭighanimitta”nti katvā “byāpādo upanissayena kathito”ti vuttaṃ, evaṃ subhampi subhanimittanti katvā kāmacchando upanissayena kathitoti sakkā viññātuṃ. **Sesā**

thinamiddhauddhaccakukkuccāni. Tattha thinamiddhaṃ aññamaññaṃ sahaḥajādivasena paccayo, tathā uddhaccakukkuccanti. Ubhayesampi upanissayakoṭṭiyā paccayabhāve vattabbameva natthīti āha “**sahajātena ca upanissayena cā**”ti.

Yasmā sati nāma “cattāro satipaṭṭhānā”tiadinā tesam tesam dhammānaṃ anussaraṇavasena vattati, tasmā te dhammā satisambojjhaṅgaṭṭhānīyā nāma. Lokuttaradhamme ca anussavādivasena gahetvā tathā pavattateva. Tena vuttaṃ “**satiyā**”tiadi.

Kosallaṃ vuccati paññā, tato uppannā **kosallasambhūtā**. **Anavajjasukhavipākā**ti anavajjā hutvā sukhavipākā vipaccanakā. Padadvayena paccayato sabhāvato kiccato phalato kusaladhammaṃ dasseti. Akusalaniddesepe eseva nayo. **Sāvajjāti** gārayhā. **Anavajjāti** agārayhā. **Hīnā** lāmakā. **Paṇītā** seṭṭhā. **Kaṇhā** kālakā asuddhā. **Sukkā** odātā suddhā. **Paṭibhāga**-saddo paṭhame vikappe sadisakoṭṭhāsatto, dutiye paṭipakkhakoṭṭhāsatto, tatiye niggahettabbapaṭipakkhakoṭṭhāsatto daṭṭhabbo.

Kusalakiriyaā ādikammabhāvena pavattavīriyaṃ dhitisabhāvatāya dhātūti vuttanti āha “**ārambhadhātūti paṭhamārambhavīriya**”nti. Laddhāsevanam vīriyaṃ balappattaṃ hutvā paṭipakkhaṃ vidhamatīti āha – “**nikkamadhātūti kosajjato nikkhantattā tato balavatara**”nti. Adhimattādhimattatarānaṃ paṭipakkhadhammānaṃ vidhamanasamattaṃ paṭupaṭutarādibhāvappattaṃ hotīti āha – “**parakkamadhātūti paraṃ paraṃ ṭhānaṃ akkamanatāya tatopi balavatara**”nti.

Tiṭṭhati pavattati etthāti ṭhānīyā. Ārammaṇadhammā, pītisambojjhaṅgassa ṭhānīyāti **pītisambojjhaṅgaṭṭhānīyāti** “**pītiyā ārammaṇadhammā**”ti vuttaṃ. Yasmā aparāparuppattiyā pītipi tathā vattabbataṃ labhatīti vuttaṃ visuddhimagge “pītiyā eva taṃ nāma”nti. **Darathapassaddhī**ti daratho kilesapariḷāho, so passambhati etāyāti darathapassaddhi, kāyapassaddhiyā vedanādikhandhattayassa viya rūpakāyassapi passambhanaṃ hoti, cittapassaddhiyā cittasseva passambhanaṃ, tato evettha bhagavatā lahutādīnaṃ viya duvidhatā vuttā. Tathā samāhitākāraṃ sallakkhetvā gayhamāno samathova **samathanimittam**, tassa ārammaṇabhūtaṃ paṭibhāganimittampi. Vividhaṃ aggaṃ etassāti byaggo, vikkhepo. Tathā hi so anavaṭṭhānaraso bhantatāpaccupaṭṭhāno vutto. Ekaggabhāvato byaggapaṭipakkhoti **abyaggo**, samādhi, so eva nimittanti pubbe viya vattabbaṃ. Tenāha “**tasseva vevacana**”nti.

Yo ārammaṇe iṭṭhāniṭṭhākāraṃ anādiyitvā gahetabbo majjhattākāro, yo ca pubbe upekkhāsambojjhaṅgassa bhāvanāvasena uppanno majjhattākāro, duvidhopi so upekkhāya ārammaṇadhammoti adhippetoti āha – “**atthato pana majjhattākāro upekkhāṭṭhānīyā dhammāti vedītabbo**”ti. **Ārammaṇena kathitā** ārammaṇasseva tesam viśesapaccayabhāvato. **Sesāti** vīriyādayo cattāro dhammā. Tesañhi upanissayova sātisayo icchitabboti.

Kāyasuttavaṇṇanā niṭṭhitā.

3. Sīlasuttavaṇṇanā

184. Khīṇāsavassa lokuttaraṃ sīlaṃ nāma maggaphalapariyāpannā sammāvācākammantājīvā sīlakkhaṇappattā tadaññe cetanādayo. **Lokiyam** pana kiriyābyākatacittapariyāpannaṃ cārittasīlaṃ, vārittasīlassa pana sambhavo eva natthi viramaṇavasena pavattiyā abhāvato. “Pubbabhāgasīlaṃ lokiyasīla”nti keci.

Cakkhudassananti cakkhūhi dassanaṃ. **Lakkhaṇassa dassananti** sabhāvadhammānaṃ saṅkhatānaṃ paccattalakkhaṇassa ñātapariññāya, aniccādisāmaññalakkhaṇassa tīraṇapariññāya dassanaṃ. Pajahantopi hi te pahātabbākārato passati nāma. Nibbānassa tathalakkhaṇaṃ maggaphalehi dassanaṃ, taṃ pana **paṭivijjanaṃ**. Jhānena pathavīkasiṇādīnaṃ, abhiññāhi rūpānaṃ dassanampi **ñānadassanameva**. **Cakkhudassanaṃ adhippetam** savanapayirupāsānaṃ parato gahitattā.

Pañhapayirupāsānanti pañhapucchanavasena payirupāsanaṃ aññakammatthāya upasāṅkamanassa kevalaṃ upasāṅkamaneneva jotitattā.

Ariyānaṃ anussati nāma guṇavasena, tatthāpi laddhaovādāvajjanamukhena yathābhūtasīlādiguṇānussaraṇanti dassetuṃ “**jhānavipassanā**”tiādi vuttaṃ. **Aññesaṃyeva santiketi** ariyehi aññesaṃ sāsānikānaṃyeva santike. Tenāha – “**anupabbajjā nāma**”ti. **Aññesūti** sāsānikhehi aññesu tāpasaparibbājakādīsu. Tattha hi pabbajjā ariyānaṃ anupabbajjā nāma na hotīti vuttaṃ.

Satasahassamattā ahesuṃ samantapāsādikattā mahātherassa. **Laṅkādiṭṭeti** nissayasīsena nissitasallakkhaṇaṃ. Na hi pabbajjā dīpapaṭiladdhā, atha kho dīpanivāsiācariyapaṭiladdhā. **Mahinda... pe... pabbajanti nāma** tassa parivāratāya pabbajjāyāti.

Saratīti taṃ ovādānusāsānidhammaṃ cinteti citte karoti. **Vitakkāhatam karotīti** punappunaṃ parivittakkena tadatthaṃ vitakkaniṭṭhitam karoti. **Āraddho hotīti** sampādito hoti. Taṃ pana sampādanaṃ pāripūri evāti āha “**paripuṇṇo hoti**”ti. **Tatthāti** yathāvutte dhamme. **Ñānacāravasenāti** ñānaṃ pavattanavasena. **Tesaṃ tesaṃ dhammānanti** tasmim tasmim ovādadhamme āgatānaṃ rūpārūpadhammānaṃ. **Lakkhaṇanti** visesalakkhaṇaṃ sāmāññalakkhaṇaṃ. **Pavicinatīti** “idaṃ rūpaṃ ettakaṃ rūpa”ntiādinā vicayaṃ āpajjati. **Ñānaṃ ropetīti** “aniccaṃ calaṃ palokaṃ pabhaṅgū”tiādinā ñānaṃ pavatteti. **Vimaṃsanaṃ... pe... āpajjati** rūpasattakārūpasattakakkamena vipassanaṃ paccakkhato viya aniccatādīnaṃ dassanaṃ sammasanaṃ āpajjati.

Ubhayampetanti phalānisamsāti vuttadvayaṃ. **Atthato ekaṃ** pariyāyasaddattā. **Paṭikaccāti** pageva. **Maraṇakāleti** maraṇakālasamīpe. Samīpatthe hi idaṃ bhummanti āha “**maraṇassa āsannaṃkāle**”ti.

So tividho hoti ñānaṃ tikkhamajjhamudubhāvena. Tenāha “**kappasahassāyukesū**”tiādi. **Upahaccaparinibbāyī nāma** āyuvemajjhaṃ atikkamitvā parinibbāyanato. **Yattha katthacīti** avihādīsu yattha katthaci. **Sappayogenāti** vipassanāñānaṃsāṅkhārasāṅkhātena payogena, saha vipassanāpayogenāti attho. Suddhāvāsabhūmiyaṃ uddhamyeva maggasoto etassāti **uddhamṣoto**. Paṭisandhivasena akaniṭṭhabhavaṃ gacchatīti **akaniṭṭhagāmī**.

Avihādīsu vattamānopi ekaṃsato uddhamgamanāraho puggalo akaniṭṭhagāmī eva nāmāti vuttaṃ “**eko uddhamṣoto akaniṭṭhagāmī pañca hontī**”ti. **Tesanti** niddhāraṇe sāmivacanaṃ. Uddhamṣotabhāvato yadipi heṭṭhimādīsipi ariyabhūmi nibbattateva, tathāpi tattha bhūmiṃ āyūṃ aggahetvā akaniṭṭhabhave āyuvaseva soḷasakappasahassāyukatā daṭṭhabbā. “Satta phalā sattānisamsā pāṭikāṅkhā”ti vuttattā “**arahattamaggassa pubbhāgavipassanā bojjaṅgā kathitā**”ti vuttaṃ. Sattannampi sahabhāvo labbhatīti “**apubbaṃ acarimaṃ ekacittakkaṅkhā**”ti vuttaṃ. Tayidaṃ pāliyaṃ tattha tattha “tasmim samaye”ti āgatavacanena viññāyati, bojjaṅgānaṃ pana nānāsabhāvattā “**nānālakkhaṇā**”ti vuttaṃ.

Sīlasuttavaṇṇanā niṭṭhitā.

4. Vatthasuttavaṇṇanā

185. “Satisambojjhaṅgo”ti evaṃ ce mayhaṃ hotīti satisambojjhaṅgo nāma seṭṭho uttamo pavaro, tasmāhaṃ satisambojjhaṅgasīsena phalasaṃpattim appētvā viharissāmīti evaṃ ce mayhaṃ pubbhāge hotīti attho. “**Appamāṇo**”ti evaṃ **mayhaṃ hotīti** svāyaṃ satisambojjhaṅgo, sabbaso pamāṇakarakilesābhāvato appamāṇadhammārammaṇato ca appamāṇoti evaṃ mayhaṃ antosaṃpattiyāṃ asammohavasena hoti. **Suparipuṇṇoti** bhāvanāpāripūriyā suṭṭhu paripuṇṇoti evaṃ mayhaṃ antosaṃpattiyāṃ asammohavasena hotīti. **Tiṭṭhatīti** yathākālaparicchedasaṃpattiyā avatṭhānena tappariyāpānātāya satisambojjhaṅgo tiṭṭhati paṭibandhavasena. **Uppādaṃ anāvajjitattāti**

uppādassa anāvajjanena asamannāhārena. Uppādasīsena cettha uppādavantova saṅkhārā gahitā. **Anuppādanti** nibbānaṃ uppādābhāvato uppādavantehi ca vinissaṭattā. **Pavattanti** vipākappavattaṃ. **Appavattanti** nibbānaṃ tappaṭikkhepato. **Nimittanti** sabbasaṅkhāranimittaṃ. **Animittanti** nibbānaṃ. **Saṅkhāreti** uppādādiānāmasanena kevalameva saṅkhāragahaṇaṃ. **Visaṅkhārenti** nibbānaṃ. **Āvajjitattā** āvajjitakālato paṭṭhāya ārabba pavattiyā **satisambojjhaṅgo tiṭṭhati**. **Aṭṭhahākārehīti** aṭṭhahi kāraṇehi. **Jānātīti** samāpattito vuṭṭhitakāle pajānāti. **Aṭṭhahākārehīti** uppādāvajjanādīhi ceva anuppādāvajjanādīhi ca vuttākāraviparītehi aṭṭhahi ākārehi **cavantaṃ** samāpattivāsena anavaṭṭhānatopi gacchantaṃ **cavatīti** thero **pajānātīti**.

Phalabojjhaṅgāti phalasaṃpattipariyāpannā bojjhaṅgā. Kiṃ pana te visuṃ visuṃ pavattantīti āha “**yadā hi**”tiādi. **Sisaṃ katvāti** padhānaṃ seṭṭhaṃ katvā. **Tadanvayāti** tadanugatā satisambojjhaṅgaṃ anugacchanakā. Tañca kho tathā katvā dhammaṃ paccavekkhaṇavasena. Keci pana “taṃ paccavekkhaṇādikaṃ katvā”ti vadanti.

Vatthasuttavaṇṇanā niṭṭhitā.

5. Bhikkhusuttavaṇṇanā

186. Bodhāyāti ettha bodho nāma bujjanāṃ, taṃ pana kissa kenāti pucchanto “**kiṃ bujjanatthāyā**”ti vatvā taṃ dassento “**maggena**”tiādimāha. Maggena nibbānaṃ bujjanatthāya saṃvattanti, paccavekkhaṇāya katakiccatāṃ bujjanatthāya saṃvattanti, paṭhamavikappe sacchikiriyābhisamayo eva dassitoti tena atuṭṭhe “**maggena vā**”ti dutiyavikappamāha. **Vivekanissitaṃ virāganissitanti** padehi sabbaṃ maggakiccaṃ tassa phalañca dassitaṃ. **Nirodhanissitanti** iminā nibbānasacchikiriyā. **Kāmāsavāpi cittaṃ vimuccatīti**adinā kilesappahānaṃ. **Vimuttasmiṃ vimuttamiti nānaṃ hotīti**adinā paccavekkhaṇā dassitā.

Bhikkhusuttavaṇṇanā niṭṭhitā.

6-7. Kuṇḍaliyasuttādivaṇṇanā

187-188. Nibaddhavāsavasena ārāme nisīdanasīloti **ārāmanisādī**. Parisaṃ ogāḷho hutvā caratīti **parisāvacarotī** āha – “**yo panā**”tiādi. **Evanti** iminākārena. **Gahaṇanti** niggahaṇaṃ. Tena pucchāpadassa atthaṃ vivarati. **Nibbeṭhananti** niggahanibbeṭhanaṃ. Tena vissajjanapadassa atthaṃ vivarati. **Iminā nayanāti** etena “itivādo”ti ettha iti-saddassa atthaṃ dasseti. Upārambhādhippāyo vadati etenāti **vādo**, doso. **Itivādo hotīti** evaṃ imassa upari vādāropanaṃ hoti. **Itivādappamokkhoti** evaṃ tato pamokkho hoti. Evam vādappamokkhānisamsaṃ parehi āropitadosassa nibbeṭhanavasena dassetvā idāni dosapavedanavasena dassetuṃ “**ayaṃ pucchāya doso**”tiādi vuttaṃ.

Ettakaṃ ṭhānantiādito paṭṭhāya yāva “tīṇi sucaritānī”ti ettakaṃ ṭhānaṃ. **Imaṃ desananti** “indriyasaṃvaro kho”tiādinayappavattaṃ imaṃ desanaṃ. **Nābhijjhāyatīti** na abhijjhāyati. **Nābhijaṃsatīti** na abhitussati. **Gocarajjhatte ṭhitaṃ hotīti** kammaṭṭhānārammaṇe samādhānavasena ṭhitaṃ hoti avatṭhitaṃ. Tenāha “**susaṅṭhita**”nti. **Susaṅṭhitaṃ** sammā avikkhepavasena ṭhitaṃ. **Kammaṭṭhānavimuttiyāti** kammaṭṭhānānuyuñjanavasena paṭipakkhato nīvaraṇato vimuttiyā. Suṭṭhu vimuttanti **suvimuttaṃ**. **Tasmiṃ** amanāparūpadassane **na maṅku** vilakkho na hoti. **Kilesavasena** dosavasena. **Aṭṭhitacitto** athaddhacitto. Kovesena hi cittaṃ thaddhaṃ hoti, na mudukaṃ. **Adīnamānasoti** domanassavasena yo dīnabhāvo, tadabhāvena niddosamānaso. **Apūticittoti** byāpajjābhāvena sītibhūtacitto.

Imesu chasu dvāresu aṭṭhārasa duccharitāni honti paccekaṃ kāyavacīmanoduccharitabhedena. Tāni vibhāgena dassetuṃ “**katha**”ntiādi vuttaṃ. Tattha **iṭṭhārammaṇe āpāthagateti** nayadānamattametaṃ. Tena “aniṭṭhārammaṇe āpāthagate dosaṃ uppādentassā”tiādinā tividhaduccharitaṃ nīharitvā vattabbaṃ,

tathā “majjhāttārammaṇe mohamaṃ uppādentassā”tiādinā ca. Manoduccaritādisāmaññaena pana tīṇiyeva duccharitāni hontīti veditabbaṃ.

Paññattivāsenati vatthumaṃ anāmasitvā piṇḍagahaṇamukhena kevalamaṃ paññattivāseneva. **Bhāvanāpaṭisaṅkhāneti** bhāvanāsiddhe paṭisaṅkhāne, bhāvanāya paṭisaṅkhāne vāti attho. **Imānīti** yathāvuttāni chadvārārammaṇāni. **Duccharitānīti** duccharitakāraṇāni. Appaṭisaṅkhāne ṭhitassa duccharitāni sucaritāni katvā. **Pariṇāmetīti** parivatteti duccharitāni tatha anuppādetvā sucaritāni uppādentō. **Evanti** vuttappakārena. **Indriyaṣaṃvaro...pe... veditabbo** indriyaṣaṃvarasampādanavasena tiṇṇamaṃ sucaritānaṃ sijjhanato. Tenāha “**ettāvata**”tiādi. **Ettāvata**ti ādito paṭṭhāya yāva “tīṇi sucaritāni paripūrentī”ti padaṃ, ettāvata. **Sīlānurakkhakaṃ indriyaṣaṃvarasīlanti** catupārisuddhisīlassa anurakkhakaṃ indriyaṣaṃvarasīlaṃ kathikaṃ. Kathamaṃ pana tadeva tassa anurakkhakaṃ hotīti? Aparāparuppattiyā upanissayaabhāvato.

Tīṇi sīlānīti indriyaṣaṃvara-ājīvapārisuddhi-paccayasannissita-sīlāni. **Lokuttaramissakāti** lokiyāpi lokuttarāpi hontīti attho. **Sattannaṃ bojjaṅgānanti** lokuttarānaṃ sattannaṃ bojjaṅgānaṃ. **Mūlabhūtā satipaṭṭhānā pubbhāgā**, te sandhāya vuttaṃ “cattāro kho, kuṇḍaliya, satipaṭṭhānā bhāvitā bahulikatā satta bojjaṅge paripūrentī”ti. **Tepīti** yathāvuttasatipaṭṭhānā. **Satipaṭṭhānamūlakā bojjaṅgāti** lokiyasatipaṭṭhānamūlakā bojjaṅgāva. **Pubbabhāgāvāti** ettha keci “pubbhāgā cā”ti pāṭhaṃ katvā “pubbeva lokuttarā pubbhāgā cā”ti atthaṃ vadanti. **Vijjāvimuttimūlakāti** “satta kho, kuṇḍaliya, bojjaṅgā bhāvitā bahulikatā vijjāvimuttiṃ paripūrentī”ti evamaṃ vuttā bojjaṅgā lokuttarāva vijjāvimuttisahagatabhāvato.

Kuṇḍaliyasuttādivaṇṇanā niṭṭhitā.

8. Upavānasuttavaṇṇanā

189. Paccattanti karaṇaniddeso ayanti āha – “**attanāvā**”ti. **Kurumānoyevāti** uppādentō **eva**. **Kammaṭṭhānavimuttiyā suṭṭhu vimuttanti** kammaṭṭhānāmanasikārena nīvaraṇānaṃ dūrībhāvato tehi suṭṭhu vimuttaṃ. **Atthaṃ karitvāti** bhāvanāmanasikāraṃ uttamaṃ katvā. “Mahā vata me ayaṃ attho uppanno”ti **atthiko hutvā**.

9. Paṭhamauppannasuttavaṇṇanā

190. Tathāgatassa pātubhāvātiādinā buddhuppādakāle eva bojjaṅgaratanapaṭilābhoti dasseti.

Pabbatavaggavaṇṇanā niṭṭhitā.

2. Gilānavaggo

1-3. Pāṇasuttādivaṇṇanā

192-194. Yesanti yesamaṃ sattānaṃ. **Cattāro iriyāpathā atthi** labbhanti tadupagasarīravayavalābhena. **Etanti** “cattāro iriyāpathe kappenti”ti etaṃ vacanaṃ. “Vivekanissita”ntiādivacanato “**sahavipassanake maggabojjhaṅge**”iceva vuttaṃ. **Dutiyatatiyāni uttānatthāneva** heṭṭhā vuttanayattā.

4-10. Paṭhamagilānasuttādivaṇṇanā

195-201. Visuddhaṃ ahosi visabhāgadhātukkabhamaṃ vūpasamaṃ. Tenāha – “**pokkharapatte ...pe... vinivattitvā gato**”ti. **Eseva nayo** pālito atthato ca catutthena pañcamachattānaṃ samānattā.

Visarukkhavātasamphassenāti visarukkhassannissitavātasamphassena. **Mandasītajaroti** muduko sītajaro. **Sesanti** vuttāvasesaṃ. **Sabbatthā**ti sattamādisu catūsu.

Gilānavaggavaṇṇanā niṭṭhitā.

3. Udāyivaggo

1-2. Bodhāyasuttādivaṇṇanā

202-203. Kittakena nu kho kāraṇena **bujjhanakaṅgā nāma vuccanti** bujjhanakassa puggalassa aṅgāti vattabbataṃ labhanti. **Missakabojjhaṅgā kathitā** sahavipassanā maggabojjhaṅgā kathitāti katvā. **Dhammaparicchedo kathito** gaṇanāmattena paricchindivā vuttattā na bhūmantaraparicchedo, vipassanādiaparicchedo vā.

3-5. Ṭhānīyasuttādivaṇṇanā

204-206. Kāmarāgena gadhitabbaṭṭhānabhūtā kāmarāgaṭṭhānīyāti āha “**ārammaṇadhammā**”nti. “Manasikārabahulīkāra”ti vuttattā “**ārammaṇeneva kathita**”nti vuttaṃ. **Vuttaparicchedoti** etena na kevalaṃ ārammaṇavaseneva, atha kho upanissayavasena pettha attho labbhatīti dasseti. Paṭhamavaggassa hi dutiye sutte upanissayavaseneva attho dassito. **Missakabojjhaṅgā kathitā** avibhāgeneva kathitattā. **Aparihānīyeti** tīhi sikkhāhi aparihānāvahe.

6-7. Taṇhakkhayasuttādivaṇṇanā

207-208. “So maṃ pucchissati”ti adhippāyena **bhagavatā osāpitadesanaṃ. Patthaṭṭā** bhāvanāpāripūriyā vitthāritaṃ gatattā. **Mahantabhāvanti** bhāvanāvaseneva mahattaṃ gatattā. Tato eva **vaḍḍhippamaṇā**. Nīvaraṇavigame sambhavato paccayato byāpādo vigato hotīti āha – “**nīvaraṇānaṃ dūrībhāvena byāpādavirahitattā**”ti. **Taṇhāmūlakanti** taṇhāpaccayaṃ. Yañhi taṇhāsahagataṃ asahagatampi taṇhaṃ upanissāya nipphannaṃ, sabbaṃ taṃ taṇhāmūlakaṃ. **Pahīyati** anuppādappahānena. **Taṇhādīnaṃyeva khayā**, na tesāṃ saṅkhārānaṃ khayā. **Etehi** taṇhakkhayā dipadehi.

8. Nibbedhabhāgiyasuttavaṇṇanā

209. Nibbijjhantīti nibbedhā, nibbijjhanadhammā dhammavinayādayo, tappariyāpannatāya nibbedhabhāge gato nibbedhabhāgiyo, taṃ **nibbedhabhāgiyaṃ**. Tenāha “**nibbijjhanakoṭṭhāsiya**”nti. **Bhāvetvā ṭhitena** cittena. Vipassanāmaggaṃ gahetvā “**maggabojjhaṅgā missakā**”ti vuttā. **Tehīti** bojjhaṅgehi **bhāvitaṃ** cittaṃ. **Te vā** bojjhaṅge **bhāvetvā ṭhitaṃ cittaṃ** nāma phalacittaṃ, tasmā **nibbattitalokuttarameva. Tampīti** phalacittampi maggānantaratāya **magganissitaṃ katvā missakameva kathetuṃ vaṭṭati** “bodhāya saṃvattantī”ti vuttattā.

9. Ekadhammasuttavaṇṇanā

210. Saṃyojanasaṅkhātā vinibandhāti kāmarāgādisaṃyojanasaññitā bandhanā. **Pariniṭṭhapetvā gahaṇā**ti gilitvā viya pariniṭṭhapetvā gahaṇākārā.

10. Udāyisuttavaṇṇanā

211. Bahukataṃ vuccati bahukāro bahumāno, natthi etassa bahukatanti **abahukato**, akatabahumāno. Dhammo uppajjamāno ukkujjanto viya nirujjhamāno avakujjanto viya hotīti vuttaṃ

“**ukkujjaṃ vuccati udayo, avakujjaṃ vayo**”ti. **Parivattentoti** aniccātipi dukkhātipi anattātipi. “Eso hi te udāyi maggo paṭiladdho, yo te...pe... tathattāya upanessatī”ti pariyosāne bhagavato vacanañcetha sādhaḥkaṃ daṭṭhabbaṃ. **Tena tenākārena viharantanti** yena sammasanākārena vipassanāvihārena viharantaṃ. **Tathābhāvāyāti** khīṇāsavabhāvapaccavekkhaṇāya. Tenāha – “**khīṇā jātīti...pe... taṃ dassento evamāhā**”ti.

Udāyivaggavaṇṇanā niṭṭhitā.

4. Nīvaraṇavaggo

3-4. Upakkilesasuttādivaṇṇanā

214-215. Na ca pabhāvantanti na ca pabhāsampannaṃ. **Pabhijjanasabhāvanti** tāpetvā tālane pabhaṅgutaṃ. **Avasesaṃ lohanti** vuttāvasesaṃ jātilohaṃ, vijātilohaṃ, kittimalohanti pabhedaṃ sabbampi lohaṃ. **Uppajjituṃ appadānenāti** ettha nanu lokiyakusalacittassa suvisuddhassa uppajjituṃ appadānena upakkilesatāti? Saccametaṃ, yasmim̐ pana santāne nīvaraṇāni laddhapatiṭṭhāni, tattha mahaggatakusalassa asambhavo, pageva lokuttarakusalassa, parittakusalaṃ pana yathāpaccayaṃ uppajjati. Nīvaraṇe hi vūpasante santāne uppattiyā aparissuddhaṃ hoti, upakkiliṭṭhaṃ nāma hoti, aparissuddhadīpakapallikavaṭṭhitelādisannissayo dīpo viya, apica nippariyāyato uppajjituṃ appadānena tesam̐ upakkilesatāti dassento “**yadaggena hī**”tiādīmāha. Ārammaṇe vikkhittappattivasena **cuṇṇavicuṇṇatā** veditabbā. **Na āvarantīti** kusaladhamme uppajjituṃ appadānavasena na āvaranti, atha kho tesam̐ uppattiyā honti. **Na paṭicchādentīti** na vinandhanti. **Catubhūmakacittassāti** catutthabhūmakakusalacittassa anupakkilesā, tehi akilissanato.

8. Āvaraṇanīvaraṇasuttavaṇṇanā

219. Paññā dubbalā hoti, na balavatī paṭipakkhena upakkiliṭṭhabhāvato. Tenāha “**mandā avisadā**”ti.

Pañca nīvaraṇā dūre honti āvaraṇābhāvato. **Tameva pītinti** sappāyadhammasavane uppannaṃ pītiṃ. Tassā tadā uppannākārasallakhaṇena avijahanto punappunaṃ tassā nibbattanena. Tenāha “**pañca nīvaraṇe vikkhambhetvā**”ti. **Idaṃ sandhāyāti** ettake divasepi na vinassanti, sā dhammapīti laddhapaccayā hutvā viśesāvahāti imamatthaṃ sandhāya etaṃ “imassa pañca nīvaraṇā tasmim̐ samaye na hontī”tiādi vuttaṃ. **Pītipāmojjapakkhiyāti** pītipāmojjapaccayā. **Nassantīti** nirodhapaccayavasena pavattanato nassanti. Sabhāgapaccayavasena **puna uppajjantāpi...pe... vuccati** kiccaśādhanaśādhana pavattanato.

9. Rukkhasuttavaṇṇanā

220. Abhiruhanakāti samīparukkhe abhibhavitvā ruhanakā. **Aṭṭhikacchakoti** aṭṭhibahulakacchako. Kapithanasadisaphalattā **kapitthanoti** laddhanāmo.

10. Nīvaraṇasuttavaṇṇanā

221. Andhabhāvakaraṇā paññācakkhussa vibandhanato. Tathā hi te “acakkhukaraṇā paññānirodhikā”ti vuttā. Vihanati vibādhatīti **vighāto**, dukkhanti āha “**vighātapakkhiyāti dukkhapakkhikā**”ti. Nibbānatthāya na saṃvattantīti **anibbānasamvattanikā**. **Missakabojjhaṅgāva kathitā** pubbhāgikānaṃ kathitattā.

Nīvaraṇavaggavaṇṇanā niṭṭhitā.

5. Cakkavattivaggo

1. Vidhāsuttavaṇṇanā

222. Vidhīyantīti **vidhā**, mānādibhāgā koṭṭhāsāti āha “**tayo mānakoṭṭhāsā**”ti. **Tathā tathā vidahanatoti** “seyyohamasmī”tiādīnā tena tenākārena vidahanato ṭhapanato, ṭhabetabbato vā.

2. Cakkavattisuttavaṇṇanā

223. **Sirisampattiyā rājati** dippati sobhatīti **rājā**, dānapiyavacanaatthacariyāsamānattatāsankhātehi **catūhi saṅgahavatthūhi**. **Raṅjetīti** rameti. **Abbhuggatāyāti** udīritā nibbattito tattha tattha gacchanato. **Cakkaṃ vatteti**ti cakkaratanaṃ pavatteti. **Devatṭhānanti** pūjanīyadevatṭhānaṃ. **Cittīkatatṭhenāti** pūjanīyabhāvena. **Aggho natthi** cirakālasambhavapuññānubhāvasiddharatanasabbhāvato. **Aññehi** cakkavattino pariggahabhūtaratanehi. **Loketi** manussaloke. Tena tadanñalokaṃ nivatteti. **Vijjamānaggahaṇena** atītānāgataṃ nivatteti. **Buddhā ca kadāci karahaci uppajjanti** cakkavattinopi yebhuyyena tasmimpyeva uppajjanatoti adhippāyo. **Anomassāti** alāmakassa ukkaṭṭhassa. **Sesāni** ratanāni.

Tatrāti vākyopaññāsane nipāto, tasmim pātubhāvavacane. “**Ayutta**”nti vatvā tattha adhippāyaṃ vivaranto “**uppannaṃ hī**”tiādīmāha. Tehi ratanehi **cakkavattaniyamāpekkhatāya** cakkavattivacanassa. **Niyamenāti** ekantena. **Vattabbataṃ āpajjati** bhāvini bhūte viya upacāroti yathā – “agamā rājagahaṃ buddho”ti (su. ni. 410). **Laddhanāmassāti** cakkavattīti loke laddhasamaññassa patthanīyassa purisavisesassa. **Mūluppattivacanatopi**ti “cakkavattissa pātubhāvā”ti etassa paṭhamuppattiyā vacanatopi. Idāni tamatthaṃ vivaranto “**yo hī**”tiādīmāha. Yo hi cakkavattirājā, tassa uppattiyā cakkaratanaṃ uppajjanato cakkavattīti evaṃ nāmaṃ uppajjati. “Cakkaṃ vattessatī”ti idaṃ pana niyāmaṃ anapekkhitvā tassa uppajjati ratanānuppattiṃ gahetvā vuttanayato saññā uppajjati “cakkavattī”ti. **Ekamevāti** cakkaratanaṃ eva paṭhamam pātubhavati. Yasmiṃ bhūte rañño cakkavattisamaññā, atha pacchā ratanāni pātubhavanti bahūnaṃ pātubhāvaṃ upādāya **bahulavacanatopi etaṃ** “cakkavattissa pātubhāvā ratanānaṃ pātubhāvo”ti vuttaṃ. **Ayaṃ** hetukattusaññito atthabhedo. **Pātubhāvāti** pātubhāvato. Puññāsambhāro bhinnasantānatāya **ratanānampi pariyāyena upanissayahetūti** vuttaṃ. **Yuttamevetam** yathāvuttayuttiyuttattā.

Vattabbabhūto adhippāyo etassa atthīti adhippāyo, atthaniddeso, saṅkhepato adhippāyo **saṅkhepādhippāyo**. Cakkaratanaṃ nubhāvena cakkavattissariyassa sījhanato “**dātuṃ samatthassā**”ti vuttaṃ. Yojanappamaṇe padese pavattattā **yojanappamaṇaṃ andhakāraṃ**. Atidighātirassatādīm chabbidham dosam vivajjetvā ṭhitassāti vacanaseso.

Sabbesaṃ catubhūmakadhammānaṃ purecamaṃ kusalānaṃ dhammānaṃ gatiyo samanvesanavasena pavattanato. Buddhādīhipi appahānīyatāya mahantadhammasabhāvattā dhammakāye ca jeṭṭhakatṭhena **dhammakāyūpapannaṃ**. Paññāpāsādatāya cassa uparigataṭṭhena **accuggataṃ**. Vitthataṭṭhena **vipulaṃ**. Mahantatāya **mahantaṃ**. Anādikālabhāvitassa kilesasantānassa khaṇeṇa viddhaṃsanato **sīghaṃ lahu javanti** pariyāyā. Bojjhaṅgadhammapariyāpannattā hi vuttaṃ “**ekanta-kusalattā**”ti. Sampayuttavasena pītiyā ālokaviddhaṃsanabhāvavaseṇāti vuttaṃ “**sahajātapaccayādī**”tiādī. **Sabbasaṅgāhikadhammaparicchedoti** catubhūmakattā sabbasaṅgāhako bojjhaṅgadhammaparicchedo kathito.

4-10. Duppaññasuttādivaṇṇanā

225-231. Eḷaṃ vuccati doso, eḷena mūgo viyāti **eḷamūgoti** imamatthaṃ dassento “**mukhena vāca**”ntiādīmāha.

Cakkavattivaggavaṇṇanā niṭṭhitā.

6. Sākacchavaggo

1. Āhārasuttavaṇṇanā

232. Purimanayatoti “satisambojjhaṅgaṭṭhānīyānaṃ dhammāna” ntiādīnā āgatanayato. **Evanti** idāni vuccamānākārena. Sati ca sampajaññaṃ **satisampajaññaṃ**. Satipadhānaṃ vā abhikkantādīsu satthakabhāvapariggaṇhakaññaṃ **satisampajaññaṃ**. Taṃ sabbattha satokārībhāvāvahattā satisambojjhaṅgassa uppādāya saṃvattati. Yathā ca paccanīkadhammappahānaṃ anurūpadhammadesanā ca anuppannaṃ kusalaṃ dhammānaṃ uppādāya hoti, evaṃ satirahitapuggalavajjanā satokārīpuggalasevanā ca tatha ca yuttapayuttatā satisambojjhaṅgassa uppādāya hotīti imamattaṃ dasseti “**satisampajañña**” ntiādīnā. **Arahattamaggena bhāvanāpāripūrī hoti**. Tathā hi arahāva “sativepullappatto” ti vuccati.

Dhammānaṃ, dhammesu vā vicayo, so eva heṭṭhā vuttanayena sambojjhaṅgo, tassa **dhammavicayasambojjhaṅgassa. Paripucchakatāti** ācariyaṃ payirupāsītvā pañcapi nikāye sahaṭṭhakathāya pariyogāhetvā yaṃ yaṃ tatha gaṇṭhiṭṭhānaṃ, tassa tassa “idaṃ, bhante, kathaṃ imassa ko attho” ti evaṃ khandhādīsu atthapucchakabhāvo. Tenāha “**khandha...pe... bahulatā**” ti.

Vatthuisadakiriyāti cittacetāsikānaṃ pavattiṭṭhānabhāvato sarīraṃ tappaṭibaddhāni ca cīvarādīni idha “vatthūnī” ti adhippetāni, tāni yathā cittassa sukhāvahāni honti, tathā karaṇaṃ tesam visadabhāvakaraṇaṃ. Tena vuttaṃ “**ajjhattikabāhirāna**” ntiādi. **Ussannadosanti** vātādiussannadosaṃ. **Sedamalamakkhanti** sedena ceva jallikāsānkhātena sarīramalena ca makkhitaṃ. **Ca**-saddena aññaṃpi sarīrassa ca cittassa ca pīlavahaṃ saṅgaṇhāti. **Senāsanaṃ vāti vā**-saddena pattādīnaṃ saṅgaho daṭṭhabbo. **Avisade** sati, visayabhūte vā. Kathaṃ bhāvanamanuyuttassa tāni visayoti? Antarantarā pavattanakacittuppādavasena evaṃ vuttaṃ. Te hi cittuppādā cittekaggatāya ijjhantiyāpi aparissuddhabhāvāya saṃvattanti. **Cittacetāsikesu** nissayādipaccayabhūtesu. **Ñāṇampīti pi**-saddo sampiṇḍane. Tena na kevalaṃ taṃ vatthuyeva, atha kho tasmim aparissudde ñāṇampī aparissuddhaṃ hotīti nissayāparissuddhiyā nissitāparissuddhi viya visayassa aparissuddhatāya visayīnaṃ aparissuddhiṃ dasseti anvayato byatirekato ca.

Samabhāvakaraṇaṃ kiccato anūnādhikabhāvakaraṇaṃ. Yathāpaccayaṃ saddheyyavatthusmiṃ adhimokkhakiccassa paṭutarabhāvena paññāya avisadatāya vīriyādīnaṃ anubalappadānasithilatādīnā **saddhindriyaṃ balavaṃ hoti**. Tenāha “**itarāni mandāni**” ti. **Tatoti** tasmā saddhindriyassa balavabhāvato itaresaṃca mandattā. Kosajjapakke patitūṃ adatvā sampayuttadhammānaṃ paggaṇhanaṃ anubalappadānaṃ **paggaḥo**, paggaḥakiccaṃ kātūṃ na sakkotīti sambandhitabbaṃ. Āramaṇaṃ upagantvā ṭhānaṃ, anissajjanaṃ vā **upaṭṭhānaṃ**, vikkhepapaṭipakkho. Yena vā sampayuttā avikkhattā honti, so **avikkhepo**. Rūpagataṃ viya cakkhunā yena yāthāvato visayasabhāvaṃ passati, taṃ **dassanakiccaṃ kātūṃ na sakkoti** balavatā saddhindriyena abhibhūtattā. Sahajātadhammesu hi indaṭṭhaṃ karontānaṃ saha pavattamānānaṃ dhammānaṃ ekarasatāvaseneva atthasiddhi, na aññathā. **Tasmāti** vuttamevatthaṃ kāraṇabhāvena paccāmasati. **Tanti** saddhindriyaṃ.

Dhammasabhāvapaccavekkhaṇenāti yassa saddheyyavatthuno uḷaratādiguṇe adhimuccanassa sātisayappavattiyā saddhindriyaṃ balavaṃ jātaṃ, tassa paccayapaccayuppannatādivibhāgato yāthāvato vīmaṃsanena. Evañhi evaṃdhammatānayaena sabhāvasarasato pariggayhamāne savipphāro adhimokkho na hoti – “ayaṃ imesaṃ dhammānaṃ sabhāvo” ti paññābyāpārassa sātisayattā. Dhuriyadhammesu hi yathā saddhāya balavabhāve paññāya mandabhāvo hoti, evaṃ paññāya balavabhāve saddhāya mandabhāvo hoti. Tena vuttaṃ – “taṃ dhammasabhāvapaccavekkhaṇena...pe... hāpetabba” nti. **Tathā amanasikaraṇenāti** yenākārena bhāvanamanuyuñjantassa saddhindriyaṃ balavaṃ jātaṃ, tenākārena bhāvanaṃ nānyuñjanenāti vuttaṃ hoti. Idha duvidhena saddhindriyassa balavabhāvo attano vā

paccayavisesena kiccuttariyato vīriyādīnaṃ vā mandakiccatāya. Tattha paṭhamavikappe hāpanavidhi dassito, dutiyavikappe pana yathā manasikaroto vīriyādīnaṃ mandakiccatāya saddhindriyaṃ balavaṃ jātaṃ, tathā amanasikārena vīriyādīnaṃ paṭutarabhāvāvahena manasikārena saddhindriyaṃ tehi samataṃ karontena hāpetabbaṃ. Iminā nayena sesindriyesupi hāpanavidhi veditabbo.

Vakkalitheravattḥūti so hi āyasmā saddhādhimutto tattha ca katādhikāro satthu rūpakāyadassane pasuto eva hutvā viharanto satthārā – “kiṃ te, vakkali, iminā pūtikāyena diṭṭhena, yo kho, vakkali, dhammaṃ passati, so maṃ passati” tiādīnā (saṃ. ni. 3.87) ovadiyamāno kammaṭṭhāne niyojitopi taṃ ananuyuñjanto paṇāmito attānaṃ vinipātetuṃ papātaṭṭhānaṃ abhiruhi. Atha naṃ satthā yathānisinnova obhāsavissajjanaena attānaṃ dassetvā –

“Pāmojjabahulo bhikkhu, pasanno buddhasāsane;
Adhigacche padaṃ santaṃ, saṅkhārūpasamaṃ sukha”nti. (dha. pa. 381) –

Gāthaṃ vatvā “ehi, vakkali”ti āha. So tena vacanena amateneva abhisitto haṭṭhatuṭṭho hutvā vipassanaṃ paṭṭhapesi, saddhāya bahulabhāvato vipassanāvīthiṃ nārohati. Taṃ ñatvā bhagavā indriyasamattapaṭipādanāya kammaṭṭhānaṃ sodhetvā adāsi. So satthārā dinnanayena vipassanaṃ ussukkāpetvā maggapaṭipāṭiyā arahattaṃ pāpuṇi. Tena vuttaṃ – “vakkalitheravattu cettha nidassana”nti. **Etthāti** saddhindriyassa adhimattabhāve sesindriyānaṃ sakiccākaraṇe.

Itarakiccabhedanti upaṭṭhānādikiccavisesaṃ. **Passaddhādīti ādi**-saddena samādhiupekkhāsambojjhaṅgānaṃ saṅgaho daṭṭhabbo. **Hāpetabbanti** yathā saddhindriyassa balavabhāvo dhammasabhāvapaccavekkhaṇena hāyati, evaṃ vīriyindriyassa adhimattatā passaddhiyādibhāvanāya hāyati samādhipakkhikattā tassā. Tathā hi samādhindriyassa adhimattataṃ kosajjapātato rakkhantī vīriyādibhāvanā viya vīriyindriyassa adhimattataṃ uddhaccapātato rakkhantī ekaṃsato hāpeti. Tena vuttaṃ “passaddhādibhāvanāya hāpetabba”nti. **Soṇattherassa vatthūti** sukumārasonattherassa vatthu. So hi āyasmāpi satthu santikā kammaṭṭhānaṃ gahetvā sītavane viharanto – “mama sarīraṃ sukhumālaṃ, na ca sakkā sukheva sukhaṃ adhigantūṃ, kāyaṃ kilametvāpi samaṇadhammo kātabbo”ti ṭhānacaṅkamanameva adhiṭṭhāya padhānamanuyuñjanto pādātesu phoṭesu utṭhitesupi vedanaṃ ajjupekkhitvā daḷhavīriyaṃ karonto accāraddhavīriyatāya visesaṃ pavattetuṃ nāsakkhi. Satthā tattha gantvā viṇopamovādena ovaditvā vīriyasamatāyojanavidhiṃ dassento kammaṭṭhānaṃ sodhetvā gijjhakūṭaṃ gato. Theropi satthārā dinnanayena vīriyasamataṃ yājetvā bhāvento vipassanaṃ ussukkāpetvā arahatteva paṭiṭṭhāsi. Tena vuttaṃ “soṇattherassa vatthu dassetabba”nti. **Sesesupīti** satisamādhipaññindriyesupi.

Samatanti saddhāpaññānaṃ aññamaññaṃ anūnādhikabhāvaṃ, tathā samādhivīriyānañca. Yathā hi saddhāpaññānaṃ visuṃ visuṃ dhuriyadhamabhūtānaṃ kiccato aññamaññanātivattanaṃ visesato icchitabbaṃ. Yato tesāṃ samadhuratāya appanā sampajjati, evaṃ samādhivīriyānaṃ kosajjudhaccapakkhikānaṃ samatāya satī aññamaññupatthambhanato sampayuttadhammānaṃ antadvayapātābhāvena sammadeva appanā ijhatīti. **Balavasaddhotiādi** vuttasseva atthassa byatirekamukhena samatthanaṃ. Tassattho – yo balavatiyā saddhāya samannāgato avisadaññaṃ, so mudhappasanno hoti, na aveccappasanno. Tathā hi so avatthusmiṃ pasīdati, seyyathāpi titthiyasāvaka. **Kerāṭikapakkhanti** sāṭheyyapakkhaṃ bhajati. Saddhāhīnāya paññāya atidhāvanto “deyyavattthupariccāgena vinā cittuppādamattenapi dānamayaṃ puññaṃ hoti”tiādīni parikappeti hetupatirūpakehi vañcīto, evaṃbhūto ca lūkhatakkaviluttacitto paṇḍitānaṃ vacanaṃ nādiyati, saññattim na gacchati. Tenāha “**bhesajjasamuṭṭhito viya rogo atekiccho hoti**”ti. Yathā cettha saddhāpaññānaṃ aññamaññaṃ samabhāvo atthāvaho, visamabhāvo anattāvaho, evaṃ samādhivīriyānaṃ aññamaññaṃ samabhāvo atthāvaho, itaro anattāvaho, tathā samabhāvo avikkhepāvaho, itaro vikkhepāvaho. **Kosajjaṃ abhibhavati**, tena appanaṃ na pāpuṇātīti adhippāyo. Esa nayo **uddhaccaṃ abhibhavatīti** etthāpi. **Tadubhayanti** saddhāpaññadvayaṃ samādhivīriyadvayañca. **Samaṃ kātabbanti** samataṃ

kātabbama.

Samādhikammikassāti samathakammaṭṭhānikassa. **Evanti** evaṃ sante, saddhāya thokaṃ balavabhāve satīti attho. **Saddahantoti** “pathavī pathavīti manasikāramattena kathaṃ jhānuppattī”ti acintetvā “addhā sambuddhena vuttavidhi ijjhātī”ti saddahanto saddhaṃ janento. **Okappentoti** ārammaṇaṃ anupavisitvā viya adhimuccanavasena avakappento pakkhandanto. **Ekaggatā balavati vaṭṭati** samādhipadhānattā jhānassa. **Ubhinnanti** samādhipaññānaṃ. Samādhikammikassa samādhino adhimattatāya paññāya adhimattatāpi icchitabbāti āha “**samatāyapī**”ti, samabhāvenāpīti attho. **Appanāti** lokiyaappanā. Tathā hi “hotiyevā”ti sāsankamaṃ vadati, lokuttarappanā pana tesamaṃ samabhāveneva icchitā. Yathāha “samathavipassanaṃ yuganaddhaṃ bhāvetī”ti (a. ni. 4.170). Yadi visesato saddhāpaññānaṃ samādhivīriyānañca samānataṃ icchati, kathaṃ satīti āha – “**sati pana sabbattha balavati vaṭṭati**”ti. **Sabbatthāti** līnuddhaccapakkhikesu pañcindriyesu. Uddhaccapakkhikekadese gaṇhanto “**saddhāvīriyapaññāna**”nti āha. Aññathā pīti ca gahetabbā siyā. Tathā hi “**kosajjapakkhikena samādhinā**”icceva vuttaṃ, na ca “passaddhisamādhiupekkhāhī”ti. **Sāti** sati. Sabbesu rājakammesu niyuttoti **sabbakammiko**. **Tenāti** yena kāraṇena sabbattha icchitabbā, tena **āha** aṭṭhakathāyaṃ. Sabbattha niyuttā **sabbatthikā**, sabbena vā līnuddhaccapakkhikena bojjaṅgena atthetabbā sabbatthiyā, sabbatthiyāva **sabbatthikā**. **Cittanti** kusalacittaṃ. Tassa hi **satipaṭisaraṇaṃ** parāyaṇaṃ appattassa pattiyā anadhigatassa adhigamāya. Tenāha – “**ārakkhapaccupaṭṭhānā**”tiādi.

Khandhādibhede anogālhapaññānanti pariyattibāhusaccavasenaṃ khandhāyatanādīsū appaṭiṭṭhitabuddhīnaṃ. Bahussutasevanā hi sutamayaññāvahā. Taruṇavipassanāsamaṅgīpi bhāvanāmayāññe ṭhitattā ekaṃsato paññāvā eva nāma hotīti āha – “**samapaññāsa...pe... puggalasevanā**”ti. Neyyadhammassa gambhīrabhāvavasena tapparicchedakaññāssa gambhīrabhāvagahaṇanti āha – “**gambhīresu khandhādīsū pavattāya gambhīrapaññāyā**”ti. Tañhi ñeyyaṃ tādisāya paññāya caritabbato gambhīraññācariyaṃ, tassā vā paññāya tattha pabhedato pavattī gambhīraññācariyā, tassā paccavekkhaṇāti āha “**gambhīrapaññāya pabhedapaccavekkhaṇā**”ti. Yathā sativepullappatto nāma arahā eva, evaṃ so eva paññāvepullappattopīti āha “**arahattamaggena bhāvanāpāripūrī hotī**”ti. Vīriyādīsūpi eseva nayoti.

“Tattaṃ ayokhilaṃ hatthe gamentī”tiādinā vuttapañcavidhabandhanakammakāraṇā niraye nibbattasattassa sabbapaṭhamaṃ karontīti **devadūtasuttā**dīsū (ma. ni. 3.250), tassā ādito vuttattā ca āha – “**pañcavidhabandhanakammakāraṇato paṭṭhāyā**”ti. **Sakaṭavahanādikāleti ādi**-saddena tadaññāmanussehi tiracchānehi ca vibādhanīyakālaṃ saṅgaṇhāti. **Ekaṃ buddhantaranti** idaṃ aparāparaṃ petesu eva uppajjanakasattavasena vuttaṃ, ekaccānaṃ vā petānaṃ, ekaccatiracchānānaṃ viya tathā dīghāyukatāpi siyāti tathā vuttaṃ. Tathā hi kālo nāgarājā catunnaṃ buddhānaṃ rūpadassāvī.

Evaṃ ānisaṃsadassāvīnanti “vīriyāyatto eva sakalalokiyalokuttaravisesādhigamo”ti evaṃ ānisaṃsadassanasīlassa. **Gamanavīthinti** sapubbabhāgaṃ nibbānagāminīṃ paṭipadaṃ. Saha vipassanāya ariyamaggapaṭipāṭi, sattavisuddhiparamparā vā. Sā hi vaṭṭato niyyānāya gantabbā paṭipadāti katvā gamanavīthi nāma.

Kāyadaḥhibahuloti kāyassa posanapasuto. **Piṇḍanti** raṭṭhapiṇḍaṃ. Paccayadāyakanāṃ attani kārassa attano sammāpaṭipattiyā mahapphalabhāvassa karaṇena piṇḍāya bhikkhāya paṭipūjanā **piṇḍāpacāyanā**. **Nīharantoti** pattatthavikato nīharanto. **Taṃ saddaṃ sutvāti** taṃ upāsikāya vacanaṃ paṇṇasāladvāre ṭhitova pañcābhīñnatāya dibbasotena sutvāti vadanti. Manussasampatti, dibbasampatti, ante nibbānasampattīti **tisso sampattiyo**. **Sitaṃ karontovāti** “akiccheneva mayā vaṭṭadukkhaṃ samatikkanta”nti paccavekkhaṇāvasāne sañjātapāmojjavasena sitaṃ karonto eva.

Alasānaṃ bhāvanāya nāmamattampi ajānantānaṃ kāyassa posanabahulānaṃ yāvadatthaṃ paribhuñjitvā seyyasukhādīṃ anuyuñjantānaṃ tiracchānakathikānaṃ dūratova vajjanaṃ **kusītapuggalaparivajjanā**. “Divasaṃ caṅkamaṇa nisajjāyā”tiādinā bhāvanārambhavasena

āraddhavīriyānaṃ daḥaparakkamānaṃ kālenakālaṃ upasaṅkamanā
āraddhavīriyapuggalasevanā. Tenāha “**kucchiṃ pūretvā**”tiādi.

Visuddhimagge pana “jātimahattapaccavekkhaṇā, sabrahmacārimahattapaccavekkhaṇā”ti idaṃ dvayaṃ na gahitaṃ, “thinamiddhavinodanā, sammappadhānapaccavekkhaṇā”ti idaṃ dvayaṃ gahitaṃ. Tattha ānisamsadassāvitāya eva sammappadhānapaccavekkhaṇā gahitā lokiyalokuttaravisesādhigamassa vīriyāyattatādassanabhāvato. Thinamiddhavinodanaṃ tadadhimuttatāya gahitaṃ, vīriyuppādane yuttapayuttassa thinamiddhavinodanaṃ atthato siddhameva. Tattha thinamiddhavinodanaṃ kusītapuggalaparivajjana-āraddhavīriyapuggala-sevana-tadadhimuttatāpaṭipakkhavidhamana-paccayūpasamhāravasena, apāyabhayapaccavekkhaṇādayo samuttejanavasena vīriyasambojjhaṅgassa uppādakāti daṭṭhabbā.

Buddhānussatiyā upacārasamādhiniṭṭhattā vuttaṃ “**yāva upacārā**”ti. **Sakalasarīraṃ pharamānoti** pītisamuṭṭhānehi paṇītarūpehi sakalasarīraṃ pharamāno. Dhammasaṅghaguṇe anussarantassapi yāva upacārā sakalasarīraṃ pharamāno pītisambojjhaṅgo uppajjati yojanā. Evaṃ sesaanussatisu pasādanīyasuttantapaccavekkhaṇāya ca yojetabbaṃ tassāpi vimuttāyatanabhāvena taggatikattā. **Evarūpe kāleti** dubbhikkhabhayādisūti vuttakāle. **Samāpattiyā...pe... na samudācarantīti** idaṃ upasamānussatiyā vasena vuttaṃ. Saṅkhārānañhi sappadesavūpasamepi nippadesavūpasame viya tattha sapaññāya pavattanato bhāvanāmanasikāro kilesavikkhambhanasamattho hutvā upacārasamādhim āvahanto tathārūpapītisomanassasamannāgato pītisambojjhaṅgassa uppādāya hotīti. Pasādanīyesu ṭhānesu pasādasinehābhāvena saṃsūcitahadayatā lūkhatā. Sā ca tattha ādaragāravākaraṇena viññāyatīti āha “**asakkaccakiriyāya saṃsūcitalūkhabhāve**”ti.

Kāyacittadarathavūpasamalakkhaṇā passaddhi eva yathāvuttabodhiaṅgabhūto passaddhisambojjhaṅgo, tassa **passaddhisambojjhaṅgassa**. **Paṇītabhojanasevanatāti** paṇītasappāyabhojanasevanatā. Utuiriyāpathasukhaggahaṇehi sappāyautuiriyāpathaṃ gahitanti daṭṭhabbaṃ. Tañhi tividhampi sappāyaṃ sevyamānaṃ kāyassa kallatāpādanavasena cittaṃ kallataṃ āvahantaṃ duvidhāyapi passaddhiyā kāraṇaṃ hoti. Sattesu labbhamānaṃ sukhadukkhaṃ ahētukanti ayameko anto, issarādivisamahētukanti ayaṃ dutiyo, ete ubho ante anupagamma yathāsakaṃ kammunā hotīti ayaṃ majjhimā paṭipatti. Majjhato payogo yassa so majjhattapayogo, tassa bhāvo **majjhattapayogatā**. Ayañhi pahānasāraddhakāyatā-saṅkhātapassaddhakāyatāya kāraṇaṃ hontī passaddhidvayaṃ āvahati. Eteneva sāraddhakāyapuggalaparivajjana-passaddhakāyapuggalasevanānaṃ tadāvahanatā saṃvaṇṇitāti daṭṭhabbaṃ.

Vatthuisadakiriyā indriyasamattapaṭipādanā ca “paññāvahā”ti vuttā. Samathāvahāpi tā honti samathāvahabhāveneva paññāvahattāti vuttaṃ “**vatthuisada...pe... veditabbā**”ti.

Karaṇakosallabhāvanākosallānaṃ nānantariyabhāvato rakkhaṇakosallassa ca taṃmūlakattā “**nimittakusalatā nāma kasiṇanimittassa uggahaṇakusalatā**”iceva vuttaṃ. **Atisithilavīriyatādīhīti ādi**-saddena paññāpayogamandataṃ appamādavekallañca saṅgaṇhāti. **Tassa paggaṇhananti** tassa līnassa cittaṃ dhammavicayasambojjhaṅgādisamuṭṭhāpanena layāpattito samuṭṭhāpanaṃ. Vuttañhettaṃ bhagavatā –

“Yasmiñca kho, bhikkhave, samaye līnaṃ cittaṃ hoti, kālo tasmim samaye dhammavicayasambojjhaṅgassa bhāvanāya, kālo vīriyasambojjhaṅgassa bhāvanāya, kālo pītisambojjhaṅgassa bhāvanāya. Taṃ kissa hetu? Līnaṃ, bhikkhave, cittaṃ, taṃ etehi dhammehi susamuṭṭhāpayamaṃ hoti. Seyyathāpi, bhikkhave, puriso parittaṃ aggim ujjāletukāmo assa, so tattha sukkhāni ceva tiṇāni pakkhipeyya, sukkhāni gomayāni pakkhipeyya, sukkhāni kaṭṭhāni pakkhipeyya, mukhavātañca dadeyya, na ca paṃsukena okireyya, bhabbo nu kho so puriso parittaṃ aggim ujjāletunti. Evaṃ, bhante”ti (saṃ. ni. 5.234).

Ettha ca yathāsakaṃ āhārasena dhammavicayasambojjhaṅgādīnaṃ bhāvanā samuṭṭhāpanāti veditabbā, sā anantaram vibhāvitā eva.

Accāraddhavīriyatādīhīti ādi-saddena paññāpayogabalavataṃ pamoduppilāvanañca saṅgaṇhāti. **Tassa niggaṇhananti** tassa uddhatassa cittassa samādhisambojjhaṅgādisamuṭṭhāpanena uddhatāpattito nisedhanaṃ. Vuttampi cetam bhagavatā –

“Yasmiñca kho, bhikkhave, samaye uddhataṃ cittaṃ hoti, kālo tasmim samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāya. Taṃ kissa hetu? Uddhataṃ, bhikkhave, cittaṃ, taṃ etehi dhammehi suvūpasamayaṃ hoti. Seyyathāpi, bhikkhave, puriso mahantaṃ aggikkhandhaṃ nibbāpetukāmo assa, so tattha allāni ceva tiṇāni...pe... paṃsukena ca okireyya, bhabbo nu kho so puriso mahantaṃ aggikkhandhaṃ nibbāpetunti. Evaṃ, bhante”ti (saṃ. ni. 5.234).

Etthāpi yathāsakaṃ āhārasena passaddhisambojjhaṅgādīnaṃ bhāvanā samuṭṭhāpanāti veditabbā. Tattha passaddhisambojjhaṅgassa bhāvanā vuttā eva, samādhisambojjhaṅgassa vuccamānā, itarassa anantaram vakkhati. **Paññāpayogamandatāyāti** paññābyāpārassa appabhāvena. Yathā hi dānaṃ alobhappadhānaṃ, sīlaṃ adosappadhānaṃ, evaṃ bhāvanā amohappadhānā. Tattha yadā paññā na balavatī hoti, tadā bhāvanā pubbenāparaṃ visesāvahā na hoti, anabhisankhato viya āhāro purisassa yogino cittassa abhiruciṃ na uppādeti, tena taṃ nirassādaṃ hoti. Tathā bhāvanāya sammadeva vīthiṇipattiyā abhāvena upasamasukhaṃ na vindati, tenapi cittaṃ nirassādaṃ hoti. Tena vuttam **“paññāpayoga...pe... nirassādaṃ hoti”**ti.

Tassa saṃveguppādanañca pasāduppādanañca tikicchananti taṃ dassento **“aṭṭha saṃvegavatthūni”**tiādīmāha. Tattha jātijarābyādhimaraṇāni yathārahaṃ sugatiyaṃ duggatiyañca honṭīti tadaññameva pañcavidhabandhanādikhuppipāsādiāññamaññavibādhanādihetukaṃ apāyadukkaṃ daṭṭhabbaṃ. Tayidaṃ sabbaṃ tesam tesam sattānaṃ paccuppanabhavanissitaṃ gahitanti atīte anāgate ca kāle vaṭṭamūlakadukkhāni visuṃ gahitāniyeva. Ye pana sattā āhārupajīvino tattha ca uṭṭhānaphalūpajīvino, tesam aññehi asādhāraṇaṃ jīvikadukkaṃ aṭṭhamaṃ saṃvegavatthu gahitanti daṭṭhabbaṃ. **Ayaṃ vuccati samaye sampahaṃsanāti** ayaṃ sampahaṃsitabbasamaye vuttanayena saṃvegajananavasena ceva pasāduppādanavasena ca sammadeva pahamaṃsā, saṃvegajananapubbakapasāduppādanena bhāvanācittassa tosanātiattho.

Sammāpaṭipattiṃ āgammāti līnuddhaccavirahena samathavīthiṇipattiyā ca sammadeva bhāvanāpaṭipattiṃ āgamma.

Alīnantiādīsu kosajjapakkhikānaṃ dhammānaṃ anadhimattatāya **alīnaṃ**, uddhaccapakkhikānaṃ anadhimattatāya **anuddhataṃ**, paññāpayogasampattiyā upasamasukhādhigamena ca **anirassādaṃ**, tato eva ārammaṇe **samappavattaṃ samathavīthiṇipannañca**. Tattha alīnatāya paggahe, anuddhatāya ca niggahe, anirassādatāya sampahaṃsane na byāpāraṃ āpajjati. Alīnānuddhaccatāhi ārammaṇe samappavattaṃ, anirassādatāya samathavīthiṇipannaṃ, samappavattiyā vā alīnaṃ anuddhataṃ, samathavīthiṇipattiyā anirassādanti daṭṭhabbaṃ. **Ayaṃ vuccati samaye ajjuhekkhanatāti** ayaṃ ajjuhekkhitabbasamaye cittassa paggahaniggahasampahaṃsanesu byāvataṭṭāsankhātāṃ paṭipakkhaṃ abhibhuyya upekkhā vuccati. **Esāti** samādhibojjhaṅgo anuppanno uppajjati. **Arahattamaggena bhāvanāpāripūrī hotīti** etena nipariyāyato samādhivepullappattopi arahā evāti dasseti.

Anurodhavirodhapahānavasena majjhatabhāvo upekkhāsambojjhaṅgassa kāraṇaṃ tasmim sati sijjhanato, asati ca asijjhanato, so ca majjhatabhāvo visayavasena duvidhoti āha **“sattamajjhataṃ saṅkhāramajjhataṃ”**ti. Tadubhayavasena cassa virujjhanam passaddhisambojjhaṅgassa bhāvanāya eva dūrīkatanti anurujjhanasseva pahānavidhiṃ dassento **“sattamajjhataṃ”**tiādīmāha. Tathā hissa sattasaṅkhārelāyanapuggalaparivajjanaṃ “uppattiyā kāraṇa”nti vuccati. Upekkhāya hi visesato rāgo

paṭipakkho, tato rāgabahulassa puggalassa upekkhā “visuddhimaggo”ti vuccati. **Dvīhākārehī** kammassakatāpaccavekkhaṇaṃ attasuññatāpaccavekkhaṇanti imehi dvīhi kāraṇehi. **Dvīhevāti** avadhāraṇaṃ saṅkhārasahitāya saṅkhyāsamānatāya dassanattamaṃ. Saṅkhyā eva hettha samānaṃ, na saṅkhyeyyaṃ sabbathā samānanti. **Assāmikabhāvo** anattaniyatā. Sati hi attani tassa kiñcanabhāvena cīvaraṃ aññaṃ vā kiñci attaniyaṃ nāma siyā, so pana koci natthevāti adhippāyo. **Anaddhaniyanti**, na addhānakkhamaṃ, na ciratṭhāyi ittaraṃ aniccanti attho. **Tāvakālikanti** tasseva vevacanaṃ.

Mamāyatīti mamattaṃ karoti. Mamāti taṇhāya pariggayha tiṭṭhati. **Dhanāyantāti** dhanaṃ dabbaṃ karontā. **Assāti** upekkhāsambojjhaṅgassa **arahattamaggena bhāvanāpāripūrī hoti**. Tathā hi arahato eva chaḷaṅgupekkhānipphatti.

Asubhārammaṇā dhammāti asubhappakārā asubhajhānassa ārammaṇabhūtā dhammā. Kāmaṃ indriyabaddhāpi kesādayo asubhappakārā eva, visesato pana jigucchitabbe jigucchāvahe gaṇhanto “**dasā**”ti āha. Yathā manasikaroto sabhāvasarasato tattha asubhasaññā santiṭṭhati, tathā pavatto manasikāro **upāyamanasikāro**. Asubhe asubhapaṭikkūlakārassa uggaṇhanaṃ, yathā vā tattha ugghanimittaṃ uppajjati, tathā manasikāro asubhanimittassa uggaṇho. Upacārappanāvahāya asubhabhāvanāya anuyūñjanā **asubhabhāvanānuyogo**.

Manacchatṭhānaṃ indriyānaṃ suṭṭhu susaṃvaraṇe sati avasaraṃ alabhanto kāmacchando pahīyateva, tathā bhojane mattaññuno mitāhārassa thinamiddhābhībhavābhāvā otāraṃ alabhamāno kāmacchando pahīyati. Yo pana āhāre paṭikkūlasaññaṃ tabbipariṇāmassa tadādhārassa tassa ca udariyabhūtassa ativiya jegucchataṃ, kāyassa ca āhāratitṭhakataṃ sammadeva jānāti, so sabbaso bhojane pamāṇassa jānanena visesato **bhojane mattaññū** nāma. Tassa kāmacchando pahīyateva, aṭṭhakathāyaṃ pana appāhāratamyeva dassetuṃ “**catunna**”ntiādi vuttaṃ. **Asubhakammikatissatthero** dantaṭṭhidassāvī. **Pahīnassāti** vikkhambhanavasena pahīnassa. Abhidhammapariyāyena sabbopi lobho kāmacchandanivaraṇanti “**arahattamaggena āyatim anuppādo**”ti vuttaṃ.

Mejjati hitapharaṇavasena siniyhatīti mitto, hitesī puggalo, tasmiṃ mitte bhavā, mittassa vā esāti mettā, hitesitā. Sā eva paṭipakkhato cetaso vimuttīti **mettācetovimutti**. Tattha mettāyanassa sattesu hitapharaṇassa uppādanaṃ pavattanaṃ **mettānimittassa uggaṇho**. Tenāha “**odissakā**”tiādi.

Tattha attapiyasahāyamajjhattaverivasena **odissakatā**. Sīmāsambhede kate **anodissakatā**. Ekādidiṣapharaṇavasena diṣapharaṇatā mettāya uggaṇhane veditabbā. **Uggaṇho** yāva upacārā daṭṭhabbo. Uggaṇhitāya āsevanā **bhāvanā**, sabbā itthiyo purisā ariyā anariyā devā manussā vinipātikāti sattodhikaraṇavasena pavattā sattavidhā, aṭṭhavīsatividhā vā, dasahi diṣāhi disodhikaraṇavasena pavattā dasavidhā, ekekāya diṣāya sattādiitthādiaverādībhedenā asītādhikacatusatappabhedā ca **odhisopharaṇamettā**. Sabbe sattā, pāṇā, bhūtā, puggalā, attabhāvapariyāpannāti etesaṃ vasena pañcavidhā. Ekekasmīṃ averā hontu, abyāpajjā, anīghā, sukhī attānaṃ pariharantūti catudhā pavattiyā vīsatividhā **anodhisopharaṇamettā**, taṃ sandhāyāha – “**odhiso...pe... bhāventassapī**”ti. **Tvaṃ etassāti**ādinā kammassakatāpaccavekkhaṇaṃ dasseti. **Paṭisaṅkhāne ṭhitassāti** kodhe yathāvuttassa ādīnavassa tappaṭipakkhato akodhe mettāya ānisaṃsassa ca paṭisaṅkhāne sammadeva jānane. **Sevantassāti** bhajantassa **byāpādo pahīyati**.

Atibhojane nimittaggāhoti āhārassa adhikabhojane thinamiddhassa nimittaggāho, “ettake bhutte thinamiddhaṃ uppajjati, ettake no”ti thinamiddhassa kāraṇākāraṇaggāhoti attho. **Divā sūriyālokanti** divā gahitanimittaṃ sūriyālokaṃ, rattiyaṃ manasikarontassapīti evamettha attho veditabbo. Dhutaṅgānaṃ vīriyanissitattā vuttaṃ “**dhutaṅganissitasappāyakathāyapī**”ti.

Kukkuccampi katākatānusocanavasena pavattamānaṃ cetaso avūpasamāvahatāya uddhaccena samānalakkhaṇamevāti tadubhayassa pahānakāraṇaṃ dassento bhagavā – “atthi, bhikkhave, cetaso vūpasamo”tiādimāha. Tasmā bāhusaccādi tassa pahānakāraṇanti dassetuṃ “**apica cha**

adhippāyo. **Sesāti** bahiddhādhammesu sati-dhammavicaya-upekkhā-cetasika-vīriya-savitakka-savicāra-pīti-samādhī dve passaddhiyo ca. Ayaṃ pana nayo pacurappavattivasena aṭṭhakathānāyeneva vutto. Theravādavasena pana avitakkaavicāramattā pītisamādhisambojjhaṅgā rūpāvacarāpi atthīti tepi gahetvā dasa missakāva hontīti vattabbaṃ siyāti.

Pariyāyasuttavaṇṇanā niṭṭhitā.

3. Aggisuttavaṇṇanā

234. Loṇadhūpananti loṇaṅca dhūpanaṅca loṇadhūpanaṃ. **Yodhakammanti** yodhapuggalena kattabbaṃ kammaṃ. **Mantakammanti** rājakiccamantanaṃ. **Paṭihārakammanti** rañño santikaṃ āgatānaṃ vacanaṃ rañño nivedetvā tato nesamaṃ paṭiharaṇakammaṃ. **Tasmāti** sabbatthikattā satiyā. **Evamaṃ** “satiṅca khvāha”ntiādikamaṃ avoca. **Pubbabhāgavipassanā bojjaṅgāva kathitā** paggahaniggahavinoditattā.

Aggisuttavaṇṇanā niṭṭhitā.

4. Mettāsahagatasuttavaṇṇanā

235. Kīdisā gati nibbatti etissāti **kiṃgatikā**, kiṃniṭṭhāti vuttaṃ hoti. Kīdisī paramā uttamā koṭī etissāti **kiṃparamā**. Kīdisamaṃ phalaṃ ānisaṃsaṃ udayo etissāti **kiṃphalā**. **Samsaṭṭhaṃ sampayuttanti** idaṃ **sahagata**-saddassa atthadassanamattaṃ, idha pana mettājhānaṃ pādakaṃ katvā vipassanāpubbabhāgabojjhaṅgā ca “mettāsahagataṃ satisambojjhaṅga”ntiādinā vuttāti veditabbaṃ. **Sabbatthāti** sabbesu bojjaṅgesu sabbesu ca brahmavihāresu.

Paṭikūleti virajjatīti paṭikūlaṃ, aniṭṭhaṃ. Na paṭikūlaṃ **appaṭikūlaṃ**, iṭṭhaṃ. Tenāha “**iṭṭhe vatthusmi**”nti. **Etthāti** appaṭikūlavatthusmiṃ. **Evanti** paṭikūlasaṅgā. Satte appaṭikūle **asubhapharaṇaṃ**, saṅkhāre appaṭikūle **aniccanti manasikāraṃ karonto**. **Asubhāyāti** asubhasaṅgāya. **Aniccato vā upasaṃharatīti** aniccanti manasikāraṃ pavatteti. “Eseva nayo”ti saṅkhepato vuttamatthaṃ vivarituṃ “**appaṭikūlapaṭikūlesū**”tiādi vuttaṃ. **Chalaṅgupekkhanti** chasu ārammaṇesu pahīnānurodhassa uppattiyā chalaṅgavantaṃ upekkhaṃ.

Mettāyāti mettābhāvanāya. Paṭikūlādīsu vatthūsu icchitavihārena viharituṃ samatthā ariyānaṃ eva, tattha ca arahato eva ijjhanato **ariyiddhi** nāma. Tassā **ariyiddhiyā ca dassitattā desanā vinivaṭṭetabbā** pariyosānetabbā **siyā**. **Arahattaṃ pāpuṇituṃ na sakkoti** indriyānaṃ aparipakkattā nikantiyā ca duppariyādānato. **Ayaṃ desanāti** “mettāsahagataṃ bojjaṅgaṃ bhāveti”tiādinā ayaṃ desanā āradhā. Yo hi mettājhānaṃ pādakaṃ katvā sammasanaṃ ārabhitvā arahattaṃ pāpuṇituṃ asakkonto parisuddhesu vaṇṇakasīnesu vimokkhasaṅkhātaṃ rūpāvacarajjhānaṃ nibbatteti, taṃ sandhāyāha bhagavā – “subhaṃ kho pana vimokkhaṃ upasampajja viharatī”ti.

Subhaparamanti subhavimokkhaparamaṃ. **Idha** loke eva **paññā assa**. Tenāha “**lokiyapaññassāti attho**”ti. **Arahattaparamāva mettā** arahattamaggassa pādakattā. **Karuṇādīsipi eseva nayoti** karuṇādījhānaṃ pādakaṃ katvā saṅkhāre sammasanto arahattaṃ pattuṃ sakkoti, tassa arahattaparamā karuṇā hoti, evaṃ muditāupekkhāsipi vattabbanti imamatthaṃ atidisati. Puna desanārambhapayojanaṃ pana “iminā nāyena”ti heṭṭhā atidiṭṭhameva.

Subhaparamādītāti mettākaruṇāmuditāupekkhānaṃ subhaparamatā ākāsānañcāyatanaparamatā, viññānañcāyatanaparamatā, ākiñcaññāyatanaparamatā. **Tassa tassāti** subhavimokkhasa heṭṭhā tiṇṇaṃ arūpajjhānaṅca yathākkamaṃ upanissayattā. **Appaṭikūlaparicayāti** iṭṭhārammaṇe manasikārabahulīkāra. **Appakasirenevāti** sukheneva. **Tatthāti** visuddhatāya iṭṭhesu vaṇṇakasīnesu.

Cittanti bhāvanāmayacittam pakkhandati appanāvasena. Tato paranti tato subhavamokkhatō param vimokkhānam upanissayo nāma na hoti, mettāsahagatabhāvo daṭṭhabbo.

Sattadukkham samanupassantassāti daṇḍena abhihaṭappattarūpahetuṃ sattesu uppajjanakadukkham ñāṇena vīmaṃsantassa. Tayidaṃ rūpanimittakaṃ sattesu uppajjanakaṃ dukkham ñāṇena karuṇāvihāriṣṣa viṣesato pakkhandatīti katvā vuttaṃ **“appakasireneva tattha cittam pakkhandati”**ti, na pana sabbaso arūpe ānisaṃsadassanato.

Viññāṇam samanupassantassāti idaṃ pāmojjagahaṇamukhena tannissayaviññāṇassa gahaṇam sambhavatīti katvā vuttaṃ. **Viññāṇaggahaṇaparicīṭanti** vuttanayena viññāṇaggahaṇe paricīṭam.

Upekkhāvihāriṣṣāti upekkhābrahmavihāraṃ viharato. **Ābhogābhāvatoti** sukhādivasena ābhujanābhāvato. **Sukha...pe... sambhavatoti** sukhadukkhatī paramatthakammaggahaṇe vimukhatāsambhavato. **Avijjamānaggahaṇadukkanti** paramatthato avijjamānasattapaññattigahaṇaparicīṭam tassa tassa abhāvamattakassa gahaṇampi dukkham kusalampi hoti. Sesam suviññeyyameva.

Mettāsahagatasuttavaṇṇanā niṭṭhitā.

5. Saṅgāravasuttavaṇṇanā

236. Paṭhamaññevāti puretaraṃyeva. Asajjhāyakatānaṃ mantānaṃ appaṭibhānaṃ pageva paṭhamaṃyeva siddham, tattha vattabbameva natthīti adhippāyo. Pariyuṭṭhānaṃ nāma abhibhavo gahaṇanti āha – **“kāmarāgapariyuṭṭhitenāti kāmarāgagahitenā”**ti. Vikkhambheti apanetīti vikkhambhanaṃ, paṭipakkhato nissarati etenāti nissaraṇam, vikkhambhanañca tam nissaraṇañcāti **vikkhambhananissaraṇam**. Tenāha – **“tatthā”**tiādi. Sesapadadvayepi eseva nayo. Attanā araṇiyo pattabbo **attattho**, tathā **parattho** veditabbo.

“Aniccato anupassanto niccasaññaṃ pajahatī”tiādīsu byāpādādīnaṃ anāgatattā abyāpādavāre tadanissaraṇam na gahitaṃ. Kiñcāpi na gahitaṃ, paṭisaṅkhānavasena pana tassa vinodetabbatāya tadanissaraṇampi labbhatevāti sakkā viññātum. **Ālokasaññā** upacārappattā, appanāppattā vā, yo koci kasiṇajjhānādibhedo **samatho**. **Dhammavavatthānaṃ** upacārappanāppattavasena gahetabbaṃ.

Kuthitoti tatto. **Usmudakajātoti** tasseva kuthitabhāvassa usmudakataṃ accuṇṇataṃ patto. Tenāha **“usumajāto”**ti. **Tilabījakādibhedenāti** tilabījakakaṇṇikakesarādibhedena. **Sevālena...pe... paṇakenāti** udakapicchilena. **Appasanno** ākulatāya. **Asannisinno** kalaluppattiyā. **Anālokaṭṭhāneti** ālokarahite ṭhāne.

Saṅgāravasuttavaṇṇanā niṭṭhitā.

6. Abhayasuttavaṇṇanā

237. Ekaṃsena bhagavā nīvaraṇāti ekaṃsato eva bhagavā ete dhammā nīvaraṇā citte kusalappavattiyā nīvaraṇato. **Kāyakilamathoti** kāyaparissamo, so pana aṭṭhuppattiyā paccayattā **“daratho”**ti vutto. Cittakilamatho tappaccayajāto daṭṭhabbo. Tenāha – **“tassa kirā”**tiādi. Cittadarathopi paṭippassambhīti ānetvā sambandho. **Maggenevāti** yathādhiगतena ariyamaggeneva. **Assāti** abhayassa rājakumārassa. **Etam** kāyacittadarathadvayaṃ.

Abhayasuttavaṇṇanā niṭṭhitā.

Sākacchavaggavaṇṇanā niṭṭhitā.

7. Ānāpānavaggo

1. Aṭṭhikamahapphalasuttādivaṇṇanā

238. Uppannasaññāti saññāsīsena upacārajjhānaṃ vadati. Tenāha “**taṃ paneta**”ntiādi. **Chavicammampi upaṭṭhātīti** idaṃ saviññāṇakaṃ aviññāṇakampi kāyasāmaññato gahetvā vuttaṃ. **Sati vā upādiseseti** ettha upādiyati attano ārammaṇaṃ gaṇhātīti **upādi**, upādānaṃ, etassa ekadese appahīne satīti attho.

Ānāpānavaggavaṇṇanā niṭṭhitā.

8. Nirodhavaggo

1-10. Asubhasuttādivaṇṇanā

248-257. **Anabhiratinti** anabhiramaṇaṃ anapekkhitaṃ. Accantanirodhabhūte nibbāne pavattasaññā **nirodhasaññā**. Tattha sā maggasahagatā lokuttarā, yā pana nibbāne ninnabhāvena pavattā, upasamānussatisahagatā ca, sā lokiyāti āha – “**nirodhasaññā missakā**”ti. “Tesaṃ navasū”tiādi pamādapāṭho. “Ekādasasu appanā hoti, nava upacārajjhānikā”ti pāṭho gahetabbo. **Visati kammaṭṭhānānīti** idampi idhāgatanayo, na visuddhimaggādīsu āgatanayo. Ettha ca ārammaṇādīsu yathāyogaṃ appanaṃ upacāraṃ vā pāpuṇivā arahattappattassa pubbhāgabhūtā vipassanāmaggaḥḥaṅgā kathitā.

Nirodhavaggavaṇṇanā niṭṭhitā.

Bojjhaṅgasamṃyuttavaṇṇanā niṭṭhitā.

3. Satipaṭṭhānasamṃyuttaṃ

1. Ambapālivaggo

1. Ambapālisuttavaṇṇanā

367. **Ekāyanvāyanti** sandhivasena vuttaṃ o-kārassa va-kāraṃ a-kārassa dīghaṃ katvā. Ayaṃ kira samṃyuttābhilāpo, tattha ayana-saddo maggapariyāyo. Na kevalaṃ ayameva, atha kho aññepi maggapariyāyāti paduddhāraṃ karonto “**maggassa hī**”tiādiṃ vatvā yadi maggapariyāyo āyana-saddo, kasmā puna maggoti vuttanti codanaṃ sandhāyāha “**tasmā**”tiādi. Tattha **ekamaggoti** ekova maggo. Na hi nibbānagāmi maggo añño atthīti. Nanu satipaṭṭhānaṃ idha maggoti adhippettaṃ, tadanñepi bahū maggadhammā atthīti? Saccaṃ atthi, te pana satipaṭṭhānaggahaṇeṇeva gahitā tadavinābhāvato. Tathā hi ñāṇavīriyādayo niddese gahitā, uddese satiyā eva gahaṇaṃ veneyyajjhāsavāsenaṇāti daṭṭhabbaṃ, satiyā maggabhāvadassanathāṇca. **Na dvedhāpathabhūtoti** iminā imassa dvayabhāvābhāvaṃ viya anibbānagāmi bhāvābhāvaṇca dasseti. **Nibbānagamaṇaṭṭhenāti** nibbānaṃ gacchati etenāti nibbānagamaṇaṃ, so eva aviparītabhāvanāya attho, tena nibbānagamaṇaṭṭhena, nibbānādhi gamupāyatāyāti attho. **Magganīyaṭṭhenāti** gavesitabbatāya.

Rāgādīhīti “rāgo malaṃ, doso malaṃ, moho mala”nti (vibha. 924) evaṃ vuttehi rāgādīhi malehi. Sā panāyaṃ saṃkiliṭṭhacittānaṃ visuddhi sījhamānā yasmā sokādīnaṃ anuppādāya saṃvattati, tasmā vuttaṃ “sokaparidevānaṃ samatikkamāyā”tiādi. Tattha socanaṃ nātibyasanādinimittaṃ cetaso santāpo

antonijjhānaṃ **soko**. Ñātibyasanādinimittameva sokādhikatājanito “kaḥaṃ ekaputtakā”tiādīnā paridevanavasena vācāvippalāpo paridevanam **paridevo**. Tassa āyatim anuppajjanaṃ idha samatikkamoti āha “**pahānāyā**”ti. **Dukkhadomanassānanti** ettha cetasikadukkhātāya domanassassapi dukkhasaddeneva gahaṇe siddhe saddena anivattanato sāmāññajotanāya viśesavacanam seṭṭhanti “domanassāna”nteva vuttaṃ. **Cetasikadomanassassāti** bhūtakathanam daṭṭhabbam. Ñāyati etena yāthāvato paṭivijjhīyati catusaccanti **ñāyo** vuccati ariyamaggo. Nanu ayampi maggo, kiṃ maggo eva maggassa adhigamāya hotīti codanam sandhāyāha – “**ayaṃ hī**”tiādi. Taṇhāva kammakilesavipākānam vinanaṭṭhena saṃsibbanaṭṭhena **vānam**. Tena taṇhāvānena virahitattā tassa abhāvāti attho. **Attapaccakkhāyāti** attapaccakkhatthāya.

Vaṇṇabhāsananti pasamsāvacanam. **Visuddhinti** visujjhanaṃ kilesappahānam. **Uggahetabbanti** ettha vācuggatakaraṇam uggaho. Paricayakaraṇam paripucchāmūlakattā taggahaṇeneva gahitanti daṭṭhabbam.

Na tato heṭṭhāti idha adhippetakāyādīnam vedanādisabhāvattābhāvā kāyavedanācittavimuttassa tebhūmakadhammassa viśum vipallāsavattantarabhāvena gahitattā ca heṭṭhā gahaṇesu vipallāsavattāhūnam aṇiṭṭhānam sandhāya vuttaṃ. Pañcamassa pana vipallāsavattāhūno abhāvena “**na uddha**”nti āha. Ārammaṇavibhāgena hettha satipaṭṭhānavibhāgoti. **Tayo satipaṭṭhānāti** satipaṭṭhānasaddassa atthuddhāradassanam, na idha pāliyam vuttassa satipaṭṭhānasaddassa atthadassanam. **Ādisu hīti** ettha **ādi**-saddena “phassasamudayā vedanānam samudayo, nāmarūpasamudayā cittassa samudayo, manasikārasamudayā dhammānam samudayo”ti (saṃ. ni. 5.408) satipaṭṭhānāti vuttānam satigocarānam pakāsake suttapadese saṅgaṇhāti. Evaṃ paṭisambhidāmaggapāliyampi avasesapālipadesadassanattho **ādi**-saddo daṭṭhabbo. **Satiyā paṭṭhānanti** satiyā paṭiṭṭhātabbaṭṭhānam.

Ariyoti ārakattādīnā ariyam sammāsambuddhamāha. **Etthāti** etasmim saḷāyatanavibhaṅgasutte (ma. ni. 3.311). Tattha hi –

“Tayo satipaṭṭhānā yadariyo...pe... maraḥatīti iti kho panetaṃ vuttaṃ, kiñcetaṃ paṭicca vuttaṃ. Idha, bhikkhave, satthā sāvakānam dhammaṃ deseti anukampako hitesī anukampaṃ upādāya – ‘idaṃ vo hitāya idaṃ vo sukhāyā’ti. Tassa sāvakā na sussūsanti, na sotaṃ odahanti, na aññā cittaṃ upaṭṭhapenti, vokkamma ca satthusāsanā vattanti. Tatra, bhikkhave, tathāgato na ceva anattamano hoti, na ca anattamanataṃ paṭisaṃvedeti, anavassuto ca viharati sato sampajāno. Idaṃ, bhikkhave, paṭhamaṃ satipaṭṭhānam. Yadariyo sevati...pe... maraḥati. Puna caparaṃ, bhikkhave, satthā ...pe... idaṃ vo sukhāyāti. Tassa ekacce sāvakā na sussūsanti...pe... ekacce sāvakā sussūsanti...pe... na ca vokkamma satthusāsanā vattanti. Tatra, bhikkhave, tathāgato na ceva anattamano hoti, na ca anattamanataṃ paṭisaṃvedeti, na ceva attamano hoti, na ca attamanataṃ paṭisaṃvedeti. Anattamanatañca attamanatañca tadubhayaṃ abhinivajjetvā upekkhako viharati sato sampajāno. Idaṃ, bhikkhave, dutiyam satipaṭṭhānam...pe... maraḥati. Puna caparaṃ, bhikkhave,...pe... sukhāyāti, tassa sāvakā sussūsanti...pe... vattanti. Tatra, bhikkhave, tathāgato attamano ceva hoti, attamanatañca paṭisaṃvedeti, anavassuto ca viharati sato sampajāno. Idaṃ, bhikkhave, tatiyam satipaṭṭhāna”nti –

Evaṃ paṭighānūnāyehi anavassutā niccaṃ upaṭṭhitassatitāya tadubhayaavītivattatā “satipaṭṭhāna”nti vuttā. Buddhānamyeva hi niccaṃ upaṭṭhitassatitā hoti āveṇikadhamabhāvato, na paccakabuddhādīnam. Pa-saddo ārambham joteti, ārambho ca pavattīti katvā āha “**pavattayitabbatoti attho**”ti. **Satiyā** karaṇabhūtāya **paṭṭhānam** paṭṭhapetabbam satipaṭṭhānam. Ana-saddo hi bahulavacanena kammattthopi hotīti.

Tathāssa kattuattthopi labbhatīti “**paṭiṭṭhātīti paṭṭhāna**”nti vuttaṃ. **Upaṭṭhātīti** ettha **upa**-saddo bhusatthaviṣiṭṭham pakkhandanam dīpetīti “**okkanditvā pakkhanditvā pavattatīti attho**”ti vuttaṃ.

Puna bhāvatthaṃ satisaddaṃ paṭṭhānasaddaṅca vaṇṇento “**atha vā**”tiādimāha. Tena purimavikappe sati-saddo paṭṭhāna-saddo ca kattuatthoti viññāyati. **Saraṇaṭṭhenā**ti cirakatassa cirabhāsitaṃ ca anussaraṇaṭṭhena. **Idanti** yaṃ “satiyeva satipaṭṭhāna”nti vuttaṃ, idaṃ **idha** imasmiṃ suttapadese **adhippetam**.

Yadi evanti yadi sati eva satipaṭṭhānaṃ, sati nāma eko dhammo, evaṃ sante kasmā satipaṭṭhānāti bahuvacananti āha “**satīnaṃ bahuttā**”tiādi. Yadi bahukā tā satiyo, atha kasmā maggoti ekavacananti yojanā. **Magganaṭṭhenā**ti niyyānaṭṭhena. Niyyāniko hi maggadhammo, teneva niyyānikabhāvena ekattupagato ekantato nibbānaṃ gacchati, atthikehi ca tadatthaṃ maggīyatīti āha “**vuttañheta**”ntiādi. Tatha **catassopi cetā**ti kāyānupassanādivasena catubbidhāpi ca etā satiyo. **Aparabhāgeti** ariyamaggakkhaṇe. **Kiccaṃ sādhayamānā**ti pubbabhāge kāyādīsu ārammaṇesu subhasaññādividhamanavasena viṣuṃ viṣuṃ pavattivā maggakkhaṇe sakimyeva tatha catubbidhassapi vipallāsassa samucchadavasena pahānakiccaṃ sādhayamānā ārammaṇakaraṇavasena nibbānaṃ gacchanti, tamevassa catukiccasādhanataṃ upādāya bahuvacananiddeso, tathāpi atthato bhedābhāvato maggoti ekavacanena vuccati. Tenāha – “**tasmā catassopi eko maggoti vuttā**”ti.

Kathetukamyatāpucchā itarāsaṃ pucchānaṃ idha asambhavato niddesādivasena desetukāmatāya ca tathā vuttattā. “Ayañceva kāyo bahiddhā ca nāmarūpa”ntiādīsu (ma. ni. 1.271, 287, 297; pārā. 11) khandhapañcakam, “sukhañca kāyena paṭisaṃvedetī”tiādīsu vedanādayo tayo arūpakkhandhā, “yā tasmim samaye kāyassa passaddhi paṭippassaddhī”tiādīsu (dha. sa. 40) vedanādayo tayo cetasikā khandhā “kāyo”ti vuccanti, tato viśesanatthaṃ “**kāyeti rūpakāye**”ti āha. **Kāyānupassī**ti ettha tassilatthaṃ dassento “**kāyaṃ anupassanasīlo**”ti āha. **Aniccato anupassatī**ti catusamuṭṭhānikakāyaṃ “anicca”nti anupassati, evaṃ passanto eva cassa aniccākārampi anupassatīti vuccati, tathābhūtaṃ cassa niccagāhassa viśesopi na hotīti vuttaṃ “**no niccato**”ti. Tathā hesa “niccasaññaṃ pajahatī”ti (paṭi. ma. 1.28) vutto. Ettha ca aniccato eva anupassatīti evakāro luttaniddiṭṭhoti tena nivattitamattaṃ dassetuṃ “**no niccato**”ti vuttaṃ. Na cettha dukkhānupassanādivattanamāsankitabbaṃ paṭiyoginivattanaparattā eva-kārassa, upari desanāārulhattā ca tāsam. **Dukkhatō anupassatī**tiādīsupi eseva nayo. Ayaṃ pana viśeso – aniccassa dukkhattā tameva kāyaṃ dukkhato anupassati, dukkhassa anattattā anattato anupassatīti.

Yasmā pana yaṃ aniccaṃ dukkhaṃ anattā, na taṃ abhinanditabbaṃ, yañca na abhinanditabbaṃ, na tatha rajjitabbaṃ, tasmā vuttaṃ “aniccato anupassati, no niccato, dukkhato anupassati, no sukhatō, anattato anupassati, no attato, nibbindati, no nandati, virajjati, no rajjatī”ti. So evaṃ arajjanto rāgaṃ **nirodheti, no samudeti**, samudayaṃ na karotīti attho. Evaṃ paṭipanno ca **paṭinissajjati, no ādiyati**. Ayañhi aniccādivanupassanā tadanavasena saddhiṃ kāyatannissayakhandhābhisañkhārehi kilesānaṃ pariccajanato sañkhatadosadassanena tabbiparīte nibbāne tanninatāya pakkhandanato “pariccāgapaṭinissaggo ceva pakkhandanapaṭinissaggo cā”ti vuccati. Tasmā tāya samannāgato bhikkhu vuttanayena kilese ca pariccajati, nibbāne ca pakkhandati, tathābhūto ca pariccajanavasena kilese na ādiyati, nāpi adosadassitāvasena sañkhatārammaṇaṃ. Tena vuttaṃ “paṭinissajjati, no ādiyati”ti. Idāni nissitāhi anupassanāhi yesaṃ dhammaṇaṃ pahānaṃ hoti, taṃ dassetuṃ “**aniccato anupassanto niccasaññaṃ pajahatī**”tiādi vuttaṃ. Tatha **niccasaññanti** sañkhārā niccāti evaṃ pavattaṃ viparītasāññaṃ. Diṭṭhicittavipallāsapahānamukheneva saññāvīpallāsappahānanti saññāgahaṇaṃ, saññāsīsena vā tesampi gahaṇaṃ daṭṭhabbaṃ. **Nandinti** sappītikataṇhaṃ. Sesam vuttanayameva.

Viharatīti iminā kāyānupassanāsamaṅgino iriyāpathavihāro vuttoti āha – “**iriyatī**”ti, iriyāpathaṃ pavattetīti attho. Ārammaṇakaraṇavasena abhibyāpanato “**tīsu bhavesū**”ti vuttaṃ, uppajjanavasena pana kilesā parittabhūmakā evāti. Yadi kilesānaṃ pahānaṃ ātāpananti taṃ sammādiṭṭhiādīnampi attheva, ātappa-saddoviya pana ātāpa-saddopi vīriye eva nirulhoti vuttaṃ “**vīriyasetam nāma**”nti. Atha vā paṭipakkhappahāne sampayuttadhammaṇaṃ abhussahanavasena pavattamānassa vīriyassa sātisaṃ tadātāpananti vīriyameva tathā vuccati, na aññe dhammā.

Ātāpīti cāyamīkāro pasamsāya, atisayassa vā dīpakoti ātāpīgahaṇena sammappadhānasamaṅgitaṃ dasseti. Sammā samantato sāmañca pajānanto **sampajāno**, asammisato vavatthāne aññadhammānupassitābhāvena sammā aviparītaṃ, sabbākārapajānanena samantato, uparūpari viśesāvahabhāvena pavattiyā sāmaṃ pajānantoti attho. Yadi paññāya anupassati, kathaṃ satipaṭṭhānatāti āha “**na hī**”tiādi. Tasmā satiyā laddhupakārāya eva paññāya ettha yathāvutte kāye kammaṭṭhāniko bhikkhu anupassako, tasmā “**kāyānupassī**”ti vuccati. **Antosañkhepo** antolīnatā, kosajjanti attho. **Upāyapariggahoti** ettha silavisodhanādi gaṇanādi uggahakosallādi ca **upāyo**, tabbipariyāyato **anupāyo** veditabbo. Yasmā ca upaṭṭhitassatī yathāvuttaṃ upāyaṃ na pariccajati, anupāyañca na upādiyati, tasmā vuttaṃ “**muṭṭhassati...pe... asamatto hotī**”ti. **Tenāti** upāyanupāyānaṃ pariggahaparivajjanesu apariccāgāpariggahesu ca asamattabhāvena. **Assa** yogino.

Yasmā satiyevettha satipaṭṭhānaṃ vuttā, tasmāssa sampayuttadhammā vīriyādayo aṅganti āha – “**sampayogaṅgañcassa dassetvā**”ti. **Aṅga**-saddo cettha kāraṇapariyāyo daṭṭhabbo. **Satigahaṇenevettha** sammāsamādhissapi gahaṇaṃ daṭṭhabbaṃ tassā samādhikkhandhe saṅgahitattā. Yasmā vā satisīsenāyaṃ desanā. Na hi kevalāya satiyā kilesappahānaṃ sambhavati, nibbānādhigamo vā, nāpi kevalā sati pavattati, tasmāssa jhānadesanāyaṃ savitakkādivacanassa viya sampayogaṅgadassanatāti aṅga-saddassa avayavapariyāyatā daṭṭhabbā. **Pahānaṅganti** “vivicceva kāmehī”tiādisu viya pahātabbaṅgaṃ **dassetuṃ**. Yasmā ettha pubbabhāgamaggo adhippeto, na lokuttaramaggo, tasmā pubbabhāgiyameva vinayaṃ dassento “**tadaṅgavinayena vā vikkhambhanavinayena vā**”ti āha. **Assāti** yogino. **Tesaṃ dhammānanti** vedanādidhammānaṃ. Tesañhi tattha anadhippetattā “**atthuddhāranayenetaṃ vutta**”nti āha. **Yaṃ panāti** vibhaṅge, vibhaṅgapakaraṇeti adhippāyo. **Etthāti** “loke”ti etasmiṃ pade, tā ca lokiyā eva anupassanā nāma sammasananti katvā.

Dukkhatoti vipariṇāmasaṅkhāradukkhatāhi dukkhasabhāvato, dukkhāti anupassitabbāti attho. Sesapadadvayepi eśeva nayo. **Yo sukhaṃ dukkhato addāti** yo bhikkhu sukhaṃ vedanaṃ vipariṇāmadukkhatāya dukkhanti paññācakkhunā addakkhi. **Dukkhamaddakkhi sallatoti** dukkhavedanaṃ piḷājananato antotudanato dunnīharaṇato ca sallanti addakkhi passi. **Adukkhamasukhanti** upekkhāvedanaṃ. **Santanti** sukhadukkhanānaṃ viya anolārikatāya paccayavasena vūpasantasabhāvattā ca santaṃ. **Aniccatoti** hutvā abhāvato udayabbayavantato tāvakālikato niccapaṭikkhepato ca aniccanti yo addakkhi. **Sa ve sammaddaso bhikkhūti** so bhikkhu ekaṃsena, paribyaṭṭaṃ vā vedanāya sammā passanakoti attho.

Dukkhatīpīti saṅkhāradukkhatāya dukkhā itipi. **Sabbaṃ taṃ** vedayitaṃ **dukkhasmiṃ** antogadhaṃ pariyaṅpananti **vadāmi** saṅkhāradukkhati vattabbato. **Sukhadukkhatopi cāti** sukhādīnaṃ ṭhitivipariṇāmaññasukhatāya ca vipariṇāmaṭṭhitiaññānadukkhatāya ca vuttattā tissopi sukhato tissopi ca dukkhato anupassitabbāti attho. **Satta anupassanā** heṭṭhā pakāsītā eva.

Ārammaṇā...pe... bhedānanti rūpādiārammaṇānānattassa nīlādītābbhedassa, chandādiadhipatinānattassa hīnādītābbhedassa, ñāṇajhānādisahajātanānattassa sasaṅkhārikāsāṅkhārika-savitakka-savicārādītābbhedassa, kāmāvacarādībhūminānattassa, ukkaṭṭhamajjhīmādītābbhedassa, kusalādīkammanānattassa, devagatisaṃvattaniyatādītābbhedassa, kaṇhasukkavipākanānattassa, diṭṭhadhammavedanīyatādītābbhedassa, parittabhūmakādīkiriyaṇānattassa, tihetukādītābbhedassa vasena anupassitabbanti yojanā. **Ādi**-saddena savatthukāvattukādinānattassa puggalattayasādhāraṇādītābbhedassa ca saṅgaho daṭṭhabbo. **Sarāgādīnanti mahāsatiipaṭṭhānasutte** (dī. ni. 2.381; ma. ni. 1.114) āgatānaṃ sarāgavītarāgādībhedānaṃ. **Salakkhaṇa-sāmaññalakkhaṇānanti** phusanāditaṃtaṃsalakkhaṇānañceva aniccatādisāmaññalakkhaṇānañca vasenāti yojanā.

Suññatadhammassāti anattatāsaṅkhātasuññatasabhāvassa. “Salakkhaṇa-sāmaññalakkhaṇāna”nti hi iminā yo ito bāhirakehi sāmīnīvāsīkarakavedakaadhiṭṭhāyakabhāvena parikkappito attā, tassa saṅkhāresu niccatā sukhatā viya katthacipi abhāvo vibhāvito. Natthi etesaṃ attāti **anattā**, yasmā pana

saṅkhāresu ekadhammopi attā na hoti, tasmā te na attātipi anattāti ayaṃ tesam suññatadhammo. Tassa suññatadhammassa, yaṃ vibhāvetuṃ **abhidhamme** (dha. sa. 121) “tasmim kho pana samaye dhammā hontī”tiādinaṃ suññatavāradesanā vuttā. Sesam suviññeyameva.

Ambapālisuttavaṇṇanā niṭṭhitā.

2. Satisuttavaṇṇanā

368. Saratīti **sato**. Ayaṃ pana na yāya kāyaci satiyā sato, atha kho edisāyāti dassento “**kāyādiānupassanāsatiyā**”ti āha. **Catusampajaññapaññāyā**ti catubbidhasampajaññapaññāyā, abhikkamaṇaṃ abhikkantanti āha – “**abhikkantaṃ vuccati gamana**”nti. Tathā paṭikkamaṇaṃ paṭikkantanti vuttaṃ – “**paṭikkantaṃ nivattana**”nti. Nivattanañca nivattimattaṃ, nivattitvā pana gamanaṃ gamanameva. **Kāyaṃ abhiharanto** abhigamanavasena kāyaṃ nāmento. Ṭhānanisajjāsayanesu yo gamaṇādividhinā kāyassa purato abhihāro, so abhikkamo, pacchato apaharaṇaṃ paṭikkamoti dassento “**ṭhānepī**”tiādimāha. **Āsanassāti** pīṭhakādiāsanassa. **Purimaāṅgābhimukho**ti aṭṭanikādiapurimāvayavābhimukho. **Saṃsarantoti** saṃsappanto. **Paccāsaṃsarantoti** paṭiāsappanto. **Eseva nayoti** iminā sarīrasseva abhimukhasaṃsappanapaṭiāsappanāni nidasseti.

Sammā pajānaṇaṃ **sampajānaṃ**. Tena attanā kātabbakiccassa karaṇasīlo sampajānakārīti āha – “**sampajaññena sabbakiccakārī**”ti. Sampajānameva hi sampajaññaṃ. **Sampajaññasseva vā kārī**ti sampajaññasseva karaṇasīlo. **Sampajaññaṃ karotevāti** abhikkantādīsu asammohaṃ uppādeti eva, sampajānasseva vā kāro etassa atthīti **sampajānakārī**.

Dhammato vaḍḍhitasāṅkhātena saha atthena vattatīti sātthakaṃ, abhikkantādi, sātthakassa sampajānaṇaṃ **sātthakasampajaññaṃ**. Sappāyassa attano upakārāvahassa hitassa sampajānaṇaṃ **sappāyasampajaññaṃ**. Abhikkamādīsu bhikkhācāragocare, aññatthāpi ca pavattesu avijāhite kammatṭhānasāṅkhāte gocare sampajaññaṃ **gocarasampajaññaṃ**. Abhikkamādīsu asammuyhanameva sampajaññaṃ **asammohasampajaññaṃ**. **Pariggaṇhitvāti** tulayitvā tīretvā, paṭisaṅkhāyāti attho. **Saṅghadassaneneva** uposathapavāraṇādiatthaṃ gamaṇaṃ saṅgahitaṃ. **Asubhadassanādīti ādi-**saddena kaṣiṇaparikkamādīnaṃ saṅgaho daṭṭhabbo. Saṅkhepato vuttamatthaṃ vivarituṃ “**cetiyaṃ disvāpi hi**”tiādi vuttaṃ. **Arahattaṃ pāpuṇātīti** ukkaṭṭhaniddeso eso. Samathavipassanuppādanampi hi bhikkhuno vuddhi eva. **Dakkhiṇadvāreti** cetiyaṅgaṇassa dakkhiṇadvāre, tathā **pacchimadvāreti**ādīsu. **Abhayavāpi pāliyaṇti** abhayavāpiyā puratthimatīre.

Buddhavaṃsa-ariyavaṃsa-cetiyaṃsa-dīpavaṃsādivaṃsakathanato **mahāariyavaṃsabhāṇako**thero. **Paññāyanaṭṭhāneti** cetiyassa paññāyanaṭṭhāne. **Ekapaduddhāreti** paduddhārapaṭiṭṭhānaparivattanaṃ akatvā ekasmiṃyeva avatṭhāne. **Kecīti** abhayagirivāsino.

Tasmim panāti sātthakasampajaññavasena pariggahitaatthepi gamane. Attho nāma dhammato vaḍḍhīti yaṃ sātthakanti adhippetam gamaṇaṃ, taṃ sappāyamevāti siyā kassaci āsānkāti tannivattanattaṃ “**cetiyaḍassanaṃ tāvā**”tiādi āradhamaṃ. **Cittakammarūpakāni viyāti** cittakammakatā paṭimāyo viya, yantapayogena vā vicittakammā paṭimāya sadisā yantarūpakā viya. **Asamapekkhanaṃ** gehassitaaññānupekkhāvasena ārammaṇe ayoniso olokanādi. Yaṃ sandhāya vuttaṃ “**cakkhunā rūpaṃ disvā uppajjati upekkhā bālassa mūlhassa puthujjanassā**”tiādi (ma. ni. 3.308). Hatthiādisammaddena **jīvitantarāyo**. Visabhāgarūpadassanādinā **brahmacariyantarāyo**.

Pabbajitadivasato paṭṭhāya bhikkhūnaṃ anuvattanakathā āciṇṇā, anuvattanakathā pana tassā aparā dutiyā nāma hotīti āha – “**dve kathā nāma na kathitapubbā**”ti. **Evanti** iminā “sace panā”tiādikaṃ sabbampi vuttākāraṃ paccāmasati, na “purisassa mātugāmāsūbha”ntiādikaṃ vuccamānaṃ.

Yogakammasa pavattiṭṭhānatāya bhāvanāya ārammaṇaṃ kammaṭṭhānaṃ vuccatīti āha “**kammaṭṭhānasāṅkhātaṃ gocara**”nti. **Uggahetvā**ti yathā uggahanimittaṃ uppajjati, evaṃ uggahakosallassa sampādanavasena uggahetvā.

Haratīti kammaṭṭhānaṃ pavatteti, yāva piṇḍapātaṭṭhānaṃ anuyuñjatīti attho. **Na paccāharatī**ti āhārūpabhogato yāva divāṭṭhānupasaṅkamanā kammaṭṭhānaṃ na paṭineti. **Samādāya vattati** sammā ādiyitvā tesam vattānaṃ paripūraṇavasena vattati. **Sarīraparikkamanti** mukhadhovanādisarīrapaṭṭhānaṃ. **Dve tayo pallaṅketi** dve tayo nisajjāvāre dve tīṇi uṇḥasanāni. Tenāha – “**usumaṃ gāhāpento**”ti. **Kammaṭṭhānasīsenevā**ti kammaṭṭhānamukheneva kammaṭṭhānaṃ avijahanto eva. Tena “pattopi acetano”tiādīnā pavattetabbakammaṭṭhānaṃ, yathāparihariyamānaṃ vā kammaṭṭhānaṃ avijahitvāti dasseti. **Tathevā**ti tikkhattumeva. Paribhogacetiyo sarīracetiyaṃ garutaranti katvā “**cetiyaṃ vanditvā**”ti cetiyavandanāya paṭhamam karanīyatā vuttā. Tathā hi aṭṭhakathāyaṃ – “cetiyaṃ bādhayamānā bodhisākhā haritabbā”ti vuttā. Buddhaguṇānussaraṇavaseneva bodhiṇca paṇipātakaraṇanti āha – “**buddhassa bhagavato sammukhā viya nipaccakāraṃ dassetvā**”ti. **Gāmasamīpeti** gāmassa upacāraṭṭhāne.

Janasaṅgahaṇatthanti “mayi akathente etesaṃ ko kathessatī”ti dhammānuggahena janasaṅgahaṇattham. **Tasmā**ti yasmā “dhammakathā nāma kathetabbā evā”ti aṭṭhakathācariyā vadanti, yasmā ca dhammakathā kammaṭṭhānavinimuttā nāma natthi, tasmā. **Kammaṭṭhānasīsenevā**ti attanā parihariyamānaṃ kammaṭṭhānaṃ avijahanto tadanugunaṃyeva dhammakathaṃ kathetvā. **Anumodanaṃ katvā**ti etthāpi “kammaṭṭhānasīsenevā”ti ānetvā sambandhitabbaṃ. **Sampattaparicchadenevā**ti paricito aparicitotiādivibhāgaṃ akatvā sampattakoṭiyā eva, samāgamamattenevāti attho. **Bhayeti** paracakkādibhaye.

Kammajatejoti gahaṇiṃ sandhāyāha. **Kammaṭṭhānavīthiṃ nārohati** khudāparissamena kilantakāyattā samādhānābhāvato. **Avasesaṭṭhāneti** yāguyā aggahitaṭṭhāne. **Poṅkhānupoṅkhanti** kammaṭṭhānupaṭṭhānassa aviccheda-dassanametaṃ, yathā poṅkhānupoṅkhaṃ pavattāya sarapaṭipāṭiyā anavicchedo, evametassapi kammaṭṭhānupaṭṭhānassāti vuttaṃ hoti.

Nikkhattadhuro bhāvanānuyoge. Vattapaṭipattiyā apūraṇena **sabbavattāni bhinditvā**. Kāme avītarāgo hoti. Kāye avītarāgo. Rūpe avītarāgo. Yāvadattham udarāvadeham bhuñjitvā seyyasukham passasukham middhasukham anuyutto viharati. Aññataram devanikāyaṃ paṇidhāya brahmacariyaṃ caratī”ti (dī. ni. 3.320; ma. ni. 1.186) evaṃ vuttaṃ **pañcavidhacetovinibandhacitto**. **Caritvā**ti pavattitvā.

Gatapaccāgatikavattavasenāti bhāvanāsahitaṃyeva bhikkhāya gatapaccāgataṃ gamanapaccāgamaṃ etassa atthīti gatapaccāgatikaṃ, tadeva vattaṃ, tassa vasena. Attano hitasukham kāmenti icchantīti **attakāmā**, dhammacchandavanto. “Dhammo”ti hi hitam taṃnimittakaṇca sukhanti. Atha vā viññūnaṃ dhammānaṃ attaniyattā attabhāvaparicchannattā ca attā nāma dhammo. Tenāha bhagavā – “**attadīpā, bhikkhave, viharatha attasaraṇā**”tiādi (saṃ. ni. 3.43). Tam kāmenti icchantīti **attakāmā**. **Usabham** nāma vīsati yaṭṭhiyo. **Tāya saññāyā**ti tāya pāsāṇasaññāya, “ettakaṃ ṭhānamāgatā”ti jānantāti adhippāyo. **So eva nayo** ayam bhikkhūtiādiko yo ṭhāne vutto, so eva nisajjāyapi nayo. Pacchato āgacchantānaṃ chinnabhatabhāvabhayenapi yonisomanasikāraṃ paribrūheti.

Maddantāti dhaññakaraṇaṭṭhāne sālīsīsāni maddantā. **Mahāpadhānaṃ pūjessāmī**ti amhākaṃ atthāya lokanāthena cha vassāni kataṃ dukkaracariyaṃ evāham yathāsatti pūjessāmīti. Paṭipattipūjā hi satthupūjā, na āmisapūjāti. **Ṭhānacaṅkamamevā**ti adhiṭṭhātabbairiyāpathakālavasena vuttaṃ, na bhojanādikālesu avassaṃ kātabbanisajjāya paṭikkhepavasena.

Vīthiṃ otarivā ito cito anoloketvā paṭhamameva vīthiyo sallakkhetabbāti āha “**vīthiyo**

sallakkhetvā”ti. Yaṃ sandhāya vuccati – “pāsādikena abhikkantenā”tiādi. Taṃ dassetuṃ **“tattha cā”**tiādi vuttaṃ. **Āhāre paṭikūlasaññaṃ upaṭṭhapetvāti**ādīsu yaṃ vattabbaṃ, taṃ heṭṭhā vuttameva. **Aṭṭhaṅgasamannāgatanti** “yāvadeva imassa kāyassa ṭhitiyā”tiādinā (ma. ni. 1.23; 2.24; 3.75; saṃ. ni. 4.120; a. ni. 6.58; 8.9) vuttehi aṭṭhahi aṅgehi samannāgataṃ katvā. **Neva davāyāti**ādi pana paṭikkhepadassanaṃ.

Paccekabodhiṃ sacchikaroti, yadi upanissayasampanno hoṭīti sambandho. Idañca yathā heṭṭhā tīsu ṭhānesu, evaṃ ito paresu ṭhānesu upanetvā sambandhitabbaṃ. Tattha paccekabodhiyā upanissayasampadā kappānaṃ dve asaṅkhyeyyāni satasahassañca tajjaṃ puññaññasambhārasambharaṇaṃ, sāvakabodhiyaṃ aggasāvakānaṃ ekaṃ asaṅkhyeyyaṃ kappasatasahassañca, mahāsāvakānaṃ kappasatasahassameva tajjaṃ sambhārasambharaṇaṃ, itaresaṃ atītasu jātīsu vivaṭṭasannissayavasena nibbattitaṃ nibbedhabhāgiyaṃ kusalaṃ. **Bāhiyo dārucīriyoti** bāhiyavisaye jātasamvaddhatāya bāhiyo, dārucīrapariharaṇena dārucīriyoti laddhasamañño. So hi āyasmā “tasmātiha te, bāhiya, evaṃ sikkhitabbaṃ – diṭṭhe diṭṭhamattaṃ bhavissati”tiādivasappavattena (udā. 10) samkhitteneva ovādena khippataraṃ visesaṃ adhigacchi. Tena vuttaṃ **“khippābhiñño vā hoti seyyathāpi thero bāhiyo dārucīriyo”**ti. Evaṃ **mahāpañño vāti**ādīsu yathārahaṃ vattabbanti.

Tanti asammuyhanaṃ. **Evanti idāni vuccamānākāradassanaṃ. Attā abhikkamatīti** iminā andhaputhujjanassa diṭṭhiggāhavasena abhikkame sammuyhanaṃ dasseti, **ahaṃ abhikkamāmīti** pana iminā mānaggāhavasena, tadubhayaṃ pana taṇhāya vinā na hoṭīti taṇhāggāhavasenaṃ sammuyhanaṃ dassitameva hoti, **“tathā asammuyhanto”**ti vatvā taṃ asammuyhanaṃ yena ghanavinibbhogena hoti, taṃ dassento **“abhikkamāmīti citte uppajjamāne”**tiādimāha. Tattha yasmā vāyodhātuyā anugatā tejodhātu uddharaṇassa paccayo. Uddharaṇagatikā hi tejodhātūti uddharaṇe vāyodhātuyā tassā anugatabhāvo, tasmā imāsaṃ dvinnamettha dhātūnaṃ sāmattihiyato adhimattatā, itarāsañca omattatāti dassento **“ekekāpāduddharaṇe...pe... balavatiyo”**ti āha. Yasmā pana tejodhātuyā anugatā vāyodhātu atiharaṇavītiharaṇānaṃ paccayo. Tiriyagatikāya hi vāyodhātuyā atiharaṇavītiharaṇesu sātisayo byāpāroti tejodhātuyā tassānugatabhāvo, tasmā imāsaṃ dvinnamettha sāmattihiyato adhimattatā, itarāsañca omattatāti dassento **“tathā atiharaṇavītiharaṇesū”**ti āha. Satipi anugamanānugantabbatāvisese tejodhātuvāyodhātubhāvamattaṃ sandhāya **tathā-saddaggaṇaṃ**.

Tattha akkantaṭṭhānato pādassa ukkhipanaṃ **uddharaṇaṃ**, ṭhitaṭṭhānaṃ atikkamitvā purato haraṇaṃ **atiharaṇaṃ**. Rukkakhāṇuādīpariharaṇatthaṃ, patiṭṭhitapādaghaṭṭanapariharaṇatthaṃ vā passena haraṇaṃ **vītiharaṇaṃ**. Yāva patiṭṭhitapādo, tāva āharaṇaṃ **atiharaṇaṃ**, tato paraṃ haraṇaṃ **vītiharaṇanti** ayaṃ vā etesaṃ viseso. Yasmā pathavīdhātuyā anugatā āpodhātu vossajjanassa paccayo. Garutarasabhāvā hi āpodhātūti vossajjane pathavīdhātuyā tassānugatabhāvo, tasmā tāsaṃ dvinnamettha sāmattihiyato adhimattatā, itarāsañca omattatāti dassento āha **“vossajjane...pe... balavatiyo”**ti. Yasmā pana āpodhātuyā anugatā pathavīdhātu sannikkhepanassa paccayo. Patiṭṭhābhāve viya patiṭṭhāpanepi tassā sātisayakiccattā āpodhātuyā tassā anugatabhāvo, tathā ghaṭṭanakiriyāya pathavīdhātuyā vasena sannirumbhanaṃ sijaṇato tatthāpi pathavīdhātuyā āpodhātuanugatabhāvo, tasmā vuttaṃ – **“tathā sannikkhepanasannirumbhanesū”**ti.

Tatthāti tasmim abhikkamane, tesu vā vuttesu uddharaṇādīsu chasu koṭṭhāsesu. **Uddharaṇeti** uddharaṇakkhaṇe. **Rūpārūpadhammāti** uddharaṇākārena pavattā rūpadhammā taṃsamuṭṭhāpakā arūpadhammā ca. **Atiharaṇaṃ na pāpuṇanti** khaṇamattāvaṭṭhānato. **Tattha tatthevāti** yattha yattha uppannā, tattha tattheva. Na hi dhammānaṃ desantarasaṅkamaṇaṃ atthi. **Pabbaṃ pabbanti**ādi uddharaṇādikoṭṭhāse sandhāya sabhāgasantativasena vuttanti veditabbaṃ. Atiittaro hi rūpadhammānaṃ pavattikkhaṇo, gamanassādānaṃ devaputtānaṃ heṭṭhupariyāyena paṭimukhaṃ dhāvāntānaṃ sirasi pāde ca baddhakhuradhārāsamāgamatopi sīghataro. Yathā tilānaṃ bhajjiyamānānaṃ taṭataṭāyanena bhedo lakkhiyati, evaṃ saṅkhatadhammānaṃ uppādenāti dassanatthaṃ **“taṭataṭāyantā”**ti vuttaṃ. Uppannā hi ekantato bhijjantīti.

Saddhiṃ rūpenāti idaṃ tassa tassa cittassa nirodhena saddhiṃ nirujjhanakarūpadhamavasena vuttaṃ, yaṃ tato sattarasamacittassa uppādakkaṇe uppannaṃ. Aññathā yadi rūpārūpadhammā samānakkhaṇā siyuṃ, “rūpaṃ garupariṇāmaṃ dandhanirodha”ntiādivacanehi virodho siyā. Tathā – “nāhaṃ, bhikkhave, aññaṃ ekadhammampi samanupassāmi, yaṃ evaṃ lahuparivattaṃ, yathayidaṃ citta”nti (a. ni. 1.48) evamādipāliyā ca. Cittacetasikā hi sārammaṇasabhāvā yathābalaṃ attano ārammaṇapaccayabhūtamattaṃ vibhāventāyeva uppajjantīti tesam taṃsabhāvanipphattianantaraṃ nirodho, rūpadhammā pana anārammaṇā pakāsetabbā. Evaṃ tesam pakāsetabbabhāvanipphatti soḷasahi cittehi hotīti taṅkhaṇāyukatā tesam icchitā, lahukaviññāṇassa visayaṅgatimattapaccayatāya tiṇṇaṃ khandhānaṃ, visayaṅgatimattatāya ca viññāṇassa lahuparivattitā, dandhamahābhūtapaccayatāya rūpadhammānaṃ dandhaparivattitā. Nānādhātuyā yathābhūtaññaṃ kho pana tathāgatasseva, tena ca purejātapaccayo rūpadhammova vutto, pacchājātapaccayo ca tasevāti rūpārūpadhammānaṃ samānakkhaṇatā na yujjateva, tasmā vuttanayenevettha attho veditabbo.

Aññaṃ uppajjate cittaṃ, aññaṃ cittaṃ nirujjhatīti yaṃ purimuppannaṃ cittaṃ, taṃ aññaṃ, taṃ pana nirujjhantaṃ aparassa anantarādipaccayo hutvā eva nirujjhatīti tathāladhapaccayaṃ aññaṃ uppajjate cittaṃ. Yadi evaṃ tesam antaro labbheyyāti, noti āha “**avīcimanupabandho**”ti. Yathā vīci antaro na labbhāti, “tadeveta”nti avisesavidū maññanti, evaṃ anu anu pabandho cittasantāno rūpasantāno ca **nadisotova** nadiyaṃ udakappavāho viya **vattati**.

Abhimukhaṃ lokitaṃ **ālokitanti** āha “**puratopekkhana**”nti. Yasmā yaṃdisābhimukho gacchati tiṭṭhati nisīdati vā, tadabhimukhaṃ pekkhanaṃ ālokitam, tasmā tadanugataṃ vidisālokanam vilokitanti āha “**vilokitaṃ nāma anudisāpekkhana**”nti. Sammajjanaparibhaṇḍādikaraṇe olokittassa, ullokāharaṇādīsu ullokittassa, pacchato āgacchantassa parissayassa parivajjanādivasena apalokittassa ca siyā sambhavoti āha – “**iminā vā mukhena sabbānīpi tāni gahitānevā**”ti.

Kāyasakkhinti kāyena sacchikatavantaṃ, paccakkhakārinanti attho. Sohāyasmā vipassanākāle eva “yamevāhaṃ indriyesu aguttadvārataṃ nissāya sāsane anabhiratiādivippakāraṃ patto, tameva suṭṭhu niggahessāmī”ti ussāhajāto balavahirottappo, tattha ca katādhikāratā indriyasamvare ukkaṃsapāramippatto, teneva naṃ satthā – “etadaggaṃ, bhikkhave, mama sāvakānaṃ bhikkhūnaṃ indriyesu guttadvārānaṃ yadidaṃ nando”ti (a. ni. 1.230) etadagge ṭhapesi.

Sātthakatā ca sappāyatā ca veditabbā ālokitavilokitassāti ānetvā sambandho. **Tasmāti** kammaṭṭhānāvijahanasseva gocarasampajaññabhāvatoti vuttamevatthaṃ hetubhāvena paccāmasati. **Attano kammaṭṭhānavaseneva ālokanavilokanaṃ kātabbaṃ**, khandhādikammaṭṭhānikehi añño upāyo na gavesitabboti adhippāyo. Yasmā ālokitādisamaññāpi dhammamattasseva pavattiviseso, tasmā tassa yāthāvato pajānanaṃ asammohasampajaññanti dassetuṃ “**abbhantare**”tiādi vuttaṃ. **Cittakiriyavāyodhātuvipphāravasena**ti kiriyamayacittasamuṭṭhānavāyodhātuyā calanākārapavattivaseva. **Adho sīdatī**ti thokaṃ otarati. **Uddhaṃ laṅghetī**ti laṅghantaṃ viya upari gacchati.

Aṅgakiccaṃ sādhamānanti padhānabhūtaṃ aṅgakiccaṃ nipphādentam, upapattibhavassa sarīraṃ hutvāti attho. **Paṭhamajavanepi...pe... sattamajavanepi na hotīti** idaṃ pañcadvāraviññānavīthiyaṃ “itthī puriso”ti rajjanādīnaṃ abhāvaṃ sandhāya vuttaṃ. Tattha hi āvajjanavotṭhabbanānaṃ ayoniso āvajjanavotṭhabbanavasena itṭhe itthirūpādīmhi lobhamattaṃ, anitṭhe paṭighamattaṃ uppajjati. Manodvāre pana “itthī puriso”ti rajjanādi hoti, tassa pañcadvārajavanaṃ mūlaṃ, yathāvuttaṃ vā sabbam bhavaṅgādi. Evaṃ manodvārajavanassa mūlabhūttadhammaparijānavaseneva mūlapariññā vuttā, āgantukatāvakālikatā pana pañcadvārajavanasseva apubbabhāvavasena ceva ittarabhāvavasena ca vuttā. **Heṭṭhupariyavasena bhijjivā patitesūti** heṭṭhimassa uparimassa ca aparāparaṃ bhaṅgappattimāha.

Tanti javanaṃ. Tassa javanassa na yuttanti sambandho. **Āgantuko** abbhāgato.

Udayabbayaparcchinno tāvatako kālo etesanti **tāvakālikāni**.

Etam asammoahasampajaññaṃ. **Samavāyeti** sāmaggiyaṃ. **Tatthāti** pañcakkhandhavasena ālokanavilokane paññāyamāne tabbinimutto – **ko eko āloketi, ko viloketi**. **Upanissayapaccayoti** idaṃ suttantanayena pariyāyato vuttaṃ. **Sahajātapaccayoti** nidassanamattametam aññamaññasampayuttaatthiavigatādipaccayānampi labbhanato.

Kāleti samiñjituṃ yuttakāle **samiñjantassa**, tathā pasāretuṃ yuttakāle **pasārentassa**. “**Maṇisappo** nāma ekā sappajātī”ti vadanti. **Laḷananti** kampanaṃ, līlākaraṇaṃ vā.

Uṇhapakatiko pariāhabahulakāyo. Sīlassa vidūsanena ahitāvahattā **micchājīvasena uppannaṃ asappāyaṃ**. “**Cīvarampi acetana**”ntiādinā cīvarassa viya kāyopi acetanoti kāyassa attasuññatāvibhāvanena “**abbhantare**”tiādinā vuttamevatthaṃ paridīpento itarītarasantosassa kāraṇaṃ dasseti. Tenāha “**tasmā**”tiādi.

Catupañcagaṇṭhikāhatoti āhatacatupañcagaṇṭhiko, catupañcagaṇṭhikāhi vā hatasobho.

Aṭṭhavidhopi atthoti aṭṭhavidhopi payojanaviseso. Mahāsivatheravādavasena “imassa kāyassa ṭhitiyā”tiādinā nayena vutto daṭṭhabbo. Imasmiṃ pakkhe “**neva davāyātiādinā nayenā**”ti pana idaṃ paṭikkhepaṅgadassanamukhena pāli āgatāti katvā vuttanti daṭṭhabbaṃ.

Pathavīsandhārakajalassa taṃsandhārakavāyunā viya paribhuttassa āhārassa vāyodhātuyāva āsaye avatṭhānanti āha – “**vāyodhātuvaseneva tiṭṭhatī**”ti. **Atiharatīti** yāva mukhā abhiharati. **Vītiharatīti** tato kucchiyaṃ vimissaṃ karonto harati. **Atiharatīti** vā mukhadvāraṃ atikkāmento harati. **Vītiharatīti** kucchigataṃ passato harati. **Parivattetīti** aparāparaṃ cāreti. Ettha ca āhārassa dhāraṇaparivattanasañcuṇṇanavisosanāni pathavīdhātusahitā eva vāyodhātu karoti, na kevalāti tāni pathavīdhātuyā kiccabhāvena vuttāni, sā eva dhāraṇādīni kiccāni karontassa sādharmaṇāti vuttāni. **Allattañca anupāletīti** yathā vāyodhātuādīhi aññehi visosanaṃ na hoti, tathā anupāleti allabhāvaṃ. **Tejodhātūti** gahaṇīsāṅkhātā tejodhātu. Sā hi antopaviṭṭhaṃ āhāraṃ paripāceti. **Añjaso hotīti** āhārassa pavisanādīnaṃ maggo hoti. **Ābhujatīti** pariyesanavasena, ajjhoharaṇajijñājiṇṇatādipaṭisaṃvedanavasena ca āvajjeti, vijānātīti attho. Taṃtaṃvijānanassa paccayabhūtoyeva hi payogo “sammāpayogo”ti vutto. Yena hi payogena pariyesanādi nipphajjati, so tabbisayavijānanampi nipphādeti nāma tadavinābhāvato. Atha vā sammāpayogaṃ sammāpaṭipattiṃ **anvāya** āgamma **ābhujati** samannāharati. Ābhogapubbako hi sabbopi viññāṇabyāpāroti tathā vuttaṃ.

Gamanatoti bhikkhācāravasena gocaragāmaṃ uddissa gamanato. **Pariyesanatoti** gocaragāme bhikkhatthaṃ āhiṇḍanato. **Paribhogatoti** āhārassa paribhuñjanato. **Āsayatoti** pittādīsayato. Āsayati ettha ekajjhaṃ pavattamānopi kammabalavavattahito hutvā mariyādavasena aññamaññaṃ asaṅkarato sayati tiṭṭhati pavattatīti **āsayo**, āmāsayaṃ upari tiṭṭhanako pittādiko. Mariyādattho hi ayamākāro. Nidheti yathābhutto āhāro nicito hutvā tiṭṭhati etthāti nidhānaṃ, āmāsayo, tato **nidhānato**. **Aparipakkatoti** gahaṇīsāṅkhātēna kammajatejena avipakkato. **Paripakkatoti** yathābhuttassa āhārassa vipakkabhāvato. **Phalatoti** nipphattito. **Nissandatoti** ito cito ca vissandanato. **Sammakkhanatoti** sabbaso makkhanato. Ayamettha saṅkhepo, vitthāro pana **visuddhimaggasaṃvaṇṇanāya** (visuddhi. mahāṭī. 1.294) gahetabbo.

Sarīrato sedā muccantīti vegasandhāraṇena uppannapariāhato sarīrato sedā muccanti. **Aññe ca rogā** kaṇṇasūlabhagandarādayo. **Aṭṭhāneti** manussāmanussapariggāhe ayuttaṭṭhāne khetadevāyatanādike. Kuddhā hi manussā amanussāpi vā jīvitakkhayaṃ pāpenti. Vissatṭhattā **neva tassa bhikkhuno attano**, kassaci anissajjitattā jigucchaniyattā ca **na parassa, udakatumbatoti** veḷunāliādiudakabhājanato. **Tanti** chaḍḍitaudakaṃ.

Ettha ca eko iriyāpatho dvīsu thānesu āgato, so pubbe abhikkamapaṭikkamagahaṇena. “Gamanepi purato pacchato ca kāyassa abhiharaṇaṃ vuttanti idha gamanameva gahita”nti apare. Yasmā idha sampajaññakathāyaṃ asammohasampajaññameva dhuraṃ, tasmā antarantare iriyāpathe pavattānaṃ rūpārūpadhammānaṃ tattha tattheva nirodhadassanavasena sampajānakāritā gahitāti. Majjhimabhāṇakā pana evaṃ vadanti – eko hi bhikkhu gacchanto aññaṃ cintento, aññaṃ vitakkento gacchati, eko kammaṭṭhānaṃ avissajjtvāva gacchati, tathā eko tiṭṭhanto, nisīdanto, sayanto aññaṃ cintento, aññaṃ vitakkento sayati, eko kammaṭṭhānaṃ avissajjtvāva sayati. Ettakena pana na pākaṭaṃ hotīti caṅkamanena dīpenti. Yo bhikkhu caṅkamaṇaṃ otaritvā caṅkamanakoṭiyaṃ thito pariggaṇhāti – “pācīnacaṅkamanakoṭiyaṃ pavattā rūpārūpadhammā pacchimacaṅkamanakoṭiṃ appatvā ettheva niruddhā, pacchimacaṅkamanakoṭiyaṃ pavattāpi pācīnacaṅkamanakoṭiṃ appatvā ettheva niruddhā, caṅkamanamajjhe pavattā ubho koṭiyo appatvā ettheva niruddhā, caṅkamaṇe pavattā rūpārūpadhammā thānaṃ appatvā ettheva niruddhā, thāne pavattā nisajjaṃ appatvā ettheva niruddhā, nisajjāya pavattā sayanaṃ appatvā ettheva niruddhā”ti, evaṃ pariggaṇhanto pariggaṇhanto eva cittaṃ bhavaṅgaṃ otāreti, utṭhahanto pana kammaṭṭhānaṃ gahetvāva utṭhahati. Ayaṃ bhikkhu **gatādīsu sampajānakārī** nāma hotīti.

Evampi sutte kammaṭṭhānaṃ avibhūtaṃ hoti, kammaṭṭhānaṃ avibhūtaṃ na kātabbaṃ, tasmā so bhikkhu yāva sakkoti, tāva caṅkamitvā thātvā nisīditvā sayamāno evaṃ pariggahetvā sayati – “kāyo acetano mañco acetano, kāyo na jānāti ‘ahaṃ mañce sayito’ti, mañcopi na jānāti ‘mayi kāyo sayito’ti, acetano kāyo acetane mañce sayito’ti, evaṃ pariggaṇhanto eva cittaṃ bhavaṅgaṃ otāreti, pabujjhanto kammaṭṭhānaṃ gahetvāva pabujjhatīti ayaṃ **sutte sampajānakārī** nāma hoti. Kāyikādikiriyānibbattanena tammayattā āvajjanakiriyānibbattakattā āvajjanakiriyāsamuttṭhitattā ca javanaṃ, sabbampi vā chadvārappavattaṃ kiriyāmayapavattaṃ nāma, tasmīṃ sati jāgaritaṃ nāma hotīti pariggaṇhanto **jāgarite sampajānakārī** nāma. Apica rattindivaṃ cha koṭṭhāse katvā pañca koṭṭhāse jaggantopi **jāgarite sampajānakārī** nāma hotīti.

Vimuttāyatanasīse thātvā dhammaṃ desentopi bāttimsatiracchānakathaṃ pahāya dasakathāvattahunissitasappāyakathaṃ kathentopi **bhāsīte sampajānakārī** nāma hoti. Aṭṭhatimsāya ārammaṇesu cittaruciyaṃ ārammaṇaṃ manasikāraṃ pavattentopi dutiyajjhānaṃ samāpannopi **tuṅhībhāve sampajānakārī** nāma. Dutiyāñhi jhānaṃ vacīsankhārappahānato visesato tuṅhībhāvo nāmāti. **Oṭṭhe cātiādīsu ca**-saddena kaṅṭhasīsānābhiādīnaṃ saṅgaho daṭṭhabbo. **Tadanurūpaṃ payoganti** tassa uppattiyā anucchavikaṃ cittassa pavattiākārasaññitaṃ payogaṃ, yato sabbe vicārādayo nīpphajjanti. **Upādārūpapavattiyāti** viññattivikārasahitasaddāyatanuppattiyā. **Evanti** vuttappakārena. Sattasupi thānesu asammuyhanavasena “**missaka**”nti vuttaṃ. Maggasammāsatiyāpi kāyānupassanādiānurūpattā sampajaññānurūpapubbabhāgaṃ sattaṭṭhāniyassa ekantalokiyattā.

Satisuttavaṇṇanā niṭṭhitā.

3. Bhikkhusuttavaṇṇanā

369. Yasmā so bhikkhu “desetu me, bhante, bhagavā saṃkhittena dhamma”nti saṃkhittena dhammadesanaṃ yāci, tassa saṃkhittarucibhāvato, tasmā saṃkhitteneva dhammaṃ desetukāmo bhagavā “tasmātiḥā”tiādīmāhāti vuttaṃ – “**yasmā saṃkhittena desanaṃ yācasi, tasmā**”ti. Kammassakatādiṭṭhikasēva lokiyalokuttaragaṇavisesā ijjhanti, na diṭṭhivipannassa, tasmā vuttaṃ “**diṭṭhīti kammassakatādiṭṭhī**”ti.

4. Sālasuttavaṇṇanā

370. Yathānusiṭṭhaṃ paṭipajjamāne apāyadukkhe apātanavasena dhāraṇaṭṭhena **dhammo**, sāsanaḥbrahmacariyaṃ, tadeva tadanāgādivasena kilesānaṃ vinayanaṭṭhena **vinayoti** āha – “**dhammoti vā...pe... nāma**”nti. Paṭipakkhadhammehi anabhibhūtatāya eko udetīti ekodīti laddhanāmo samādhi

bhūto jāto etesanti **ekodibhūtā**. Ettha ca **ekodibhūtā**ti etena upacārajjhānāvaho pubbabhāgiko samādhi vutto. **Samāhitā**ti etena upacārappanāsamādhi. **Ekaggacittā**ti etena subhāvito vasippatto appanāsamādhi vuttoti veditabbo. **Navakabhikkhūhi bhāvitasatipaṭṭhānā pubbabhāgā**. Te hi yathābhūtañāṇāya bhāvitā. Yathābhūtañāṇanti hi sotāpattimaggañāṇaṃ idhādhippetāṃ. **Khīṇāsavehi bhāvitasatipaṭṭhānāpi pubbabhāgā**. Tesāñhi katakaraṇīyānaṃ diṭṭhadhammasukhavihārāya satipaṭṭhānabhāvanā, sekkhānaṃ pana satipaṭṭhānabhāvanā pariññatthāya pavattā lokiyā, pariṇānavasena pavattā lokuttarāti “**missakā**”ti vuttaṃ.

5. Akusalarāsisuttavaṇṇanā

371. Pañcame **kevaloti** kusaladhammehi asammisso, tato eva sakalo sukkaṭṭhānā anavajjaṭṭho. Sesāṃ vuttanāyameva.

6. Sakuṇagghisuttavaṇṇanā

372. Pākatikasakuṇakulesu balavabhāvato tesāṃ hananato **sakuṇagghi**. Senoti vuttaṃ “**senassetāṃ adhvācāna**”nti, senaviseso pana so veditabbo. Āmisatthāya pattattā “**lobhasāhasena pattā**”ti vuttaṃ, lobhanimittena sāhasākārena pattāti attho. Naṅgalena kaṭṭhaṃ kasitaṃ naṅgalakaṭṭhaṃ, taṃ karīyati etthāti **naṅgalakaṭṭhakaraṇanti** āha – “**adhunā kaṭṭhaṃ khettaṭṭhāna**”nti. Leḍḍuyo tiṭṭhanti etthāti **leḍḍuṭṭhānaṃ**, leḍḍunimittaṃ kasitaṭṭhānaṃ. Vajjatīti vadaṃ, vacanaṃ. Kucchitaṃ vadaṃ avadaṃ. Garahane hi ayaṃ a-kāro yathā – “aputto abhariyā”ti. Avadaṃ mānetīti **avadamānā**, attano balamadena lāpaṃ atimaññitvā vadantīti attho. Tenevāha “gaccha kho, tvaṃ lāpa, tatrapī me gantvā na mokkhasī”ti. Yaṃ pana aṭṭhakathāyaṃ vuttaṃ “attano balassa suṭṭhu vaṇṇaṃ vadamānā”ti, tattha attato āpannaṃ gahetvā vuttaṃ. “Vadamāno”ti vā pāṭho, sārambhavasena avhāyantoti attho. Tenāha “ehi kho dāni sakuṇagghi”ti. **Suṭṭhu ṭhapetvā**ti jiyāmuttasarassa viya sīghapātayogyatākaraṇena ubho pakkhe sammā ṭhapetvā. **Ayanti sakuṇagghi. Nātvā**ti yathābhūtaḍḍassanena attano ñāṇena jānitvā. **Phālīyitthā**ti phālacchedatikhiṇasikhare sukkaḥleḍḍusmiṃ bhijjittha.

7. Makkaṭasuttavaṇṇanā

373. **Sañcāroti** sañcaraṇaṃ. **Lepanti** silesasadisaṃ ālepanaṃ. **Kājasikkā viyā**ti kājadanḍake olaggetabbā sikkā viya. Apica catasso rajjuyo upari bandhanaṭṭhānañcāti **pañcaṭṭhānaṃ. Oḍḍitoti** olambito. **Thunantoti** nitthunanto.

8. Sūdasuttavaṇṇanā

374. Āhārasampādanena taṃtaṃāhāravatthugate sūdeti paggharetīti **sūdo**, bhattakārako. Daharehi manāpataraṃ accetabbato atikkamitabbato accayā, bhojane rasavisesā, tasmā **nānaccayehī**ti nānappakārasavisesehīti attho. Tena vuttaṃ “nānaccayehī”tiādi. Aggīyati asaṅkarato vibhajjīyattīti aggo, ambulameva aggo **ambilaggoti** āha – “**ambilaggehīti ambulakoṭṭhāsehī**”ti. Dātuṃ abhiharitabbatāya **abhihārā**, deyyadhammā. Tenāha – “**abhihāṇaṃ dāyāna**”nti. **Idaṃ me kammaṭṭhānaṃ anulomaṃvā**ti idaṃ mama kammaṭṭhānaṃ evaṃ pavattamānaṃ anulomāvasānameva hutvā tiṭṭhati. Evāṃ puna pavattamānaṃ ussakkivā visesanibbattanatthameva hotīti evāṃ **nimittaṃ gahetuṃ na sakkoti** bālo abyatto, paṇḍito pana sakkoti. **Attano cittassā**ti attano bhāvanācittassa. **Pubbabhāgavipassanā satipaṭṭhānāva kathitā** “sakassa cittassa nimittaṃ uggaṇhātī”ti vuttattā.

9. Gilānasuttavaṇṇanā

375. **Pādagāmoti** nagarassa padasadiso mahantagāmo. Tenevāha “**vesāliyaṃ viharati**

veļuvagāmake’ti. Ahitanisedhana-hitaniyोजना-byasanapariccajana-lakkhaṇo mittabhāvo yesu atthi, te **mittā**. Ye pana diṭṭhamattasahāyā, te **sandiṭṭhā**. Ye savisesaṃ bhattimanto, te **sambhattāti** dassento “**mittāti mittāvā**”tiādimāha. **Assāti** bhagavato. Pañcamiyaṃ aṭṭhamiyaṃ cātuddasiyaṃ pañcadasiyanti ekekasmim pakkhe cattāro vāre katvā māsassa **aṭṭhavāre**.

Vedanānaṃ balavabhāvena **kharo pharuso** kakkhaḷo. **Ābādhoti** pubbakammahetutāya kammaṣamuttāhāno ābādho saṅkhāradukkhātāsāṅkhāto sabbakālikattā sarīrassa sabhāgarogo nāma. Nāyamīdiso ābādho, ayaṃ pana bahalatarabyādhitāya “**visabhāgarogo**”ti vutto. Anta-saddo samīpapavattoti āha – “**marañantaṃ marañasantika**”nti. **Vedanā...pe... akaronto** ukkaṃsagatabhāvitakāyāditāya. **Apīliyamānoti** apīliyamāno viya. Ovādameva bhikkhusaṅghassa apalokananti āha – “**ovādānusāsaniṃ adatvāti vuttaṃ hoti**”ti. **Pubbabhāgavīriyaṃ** nāma phalasaṃpattiyā parikkammabhūtavipassanāvīriyaṃ. **Jīvitampi jīvitasāṅkhāro** patitvaṃ adatvā attabhāvassa abhisāṅkharaṇato.

“Ettakaṃ kālaṃ atikkamitvā vuṭṭhahissāmī”ti khaṇaparicchedavati samāpatti **khaṇikasamāpatti**. **Niggumbaṃ nijjaṭaṃ katvāti** rūpasattakārūpasattakavasena pavattiyamānaṃ vipassanābhāvanaṃ sabbaso khilavirahena niggumbaṃ, abyākulatāya nijjaṭaṃ katvā. **Mahāvīpassanāvāsena**ti paccekaṃ savisesaṃ vitthāritānaṃ aṭṭhārasādīnaṃ mahāvīpassanānaṃ vasena vipassitvā **samāpannā** yā **samāpatti**, **sā suṭṭhu vikkhambheti** vedanaṃ mahābalavatāya pubbārammaṇassa, mahānubhāvātāya tathāpavattitavipassanāvīriyassa. **Yathā nāmāti**ādīnā tassa nidassanaṃ dasseti. **Vedanāti** dukkhavedanā. **Cuddasahākārehi**ti tasseva sattaadvayassa vasena vadati. **Sannetvāti** antarantarā samāpannajjhānasamāpattisambhūtena vipassanāpītisinehena temetvā. **Samāpattīti** phalasaṃpatti.

Gilānā vuṭṭhitoti gilānabhāvato vuṭṭhito. Sarīrassa garuṭhaddhabhāvappatti madhurakatāti āha – “**sañjātagarubhāvo sañjātathaddhabhāvo**”ti. **Nānākāratoti** puratthimādibhedato. **Satipaṭṭhānadhammāti** pubbe attanā bhāviyamānā satipaṭṭhānadhammā. **Pākaṭā na honti** kāyacittānaṃ akammaññatāya. **Tanti dhammāti** pariyattidhammā na ñāyanti.

Anantaraṃ abāhiranti dhammavasena puggalavasena ca antarabāhiraṃ akatvā. **Ettakanti**ādīnā vuttamevatthaṃ vivarati. **Daharakāleti** attano daharakāle. **Na evaṃ hotīti** “ahaṃ bhikkhusaṅghaṃ pariharissāmī”tiādiko mānataṅhāmūlako issāmacchariyānaṃ pavattiākāro tathāgatassa na hoti, nattheva pageva tesāṃ samucchinnatāti āha – “**bodhipallaṅkeyevā**”tiādi. Paṭisaṅkharaṇena veṭṭhena missakena. **Maññeti** yathāvuttaṃ paṭisaṅkharaṇasaññitena veṭṭhamissakena viya jarasakaṭaṃ. **Arahattaphalaveṭṭhenāti** arahattaphalasaṃpattisaññitena atthabhāvaveṭṭhena.

Phalasaṃpattiyā adhippetattā “**ekaccānaṃ vedanānanti lokiyānaṃ vedanāna**”nti vuttaṃ. **Attadīpāti** ettha **atta**-saddena dhammo eva vutto, svāyamattho heṭṭhā vibhāvito eva. **Navavidho lokuttaradhammo vedītabbo**. So hi catūhi oghehi anajjhottharaṇīyato “dīpo”ti vutto. **Tamaaggeti** tamayogābhāvena sadevakassa lokassa agge. **Sabbesanti** sabbesaṃ sikkhākāmānaṃ. **Te** “dhammadīpā viharathā”ti vuttā **catusatipaṭṭhānagocarāva bhikkhū agge bhavissanti**.

10. Bhikkhunupassayasuttavaṇṇanā

376. Kammatṭhānakammikāti kammatṭhānāmanuyuttā. Viseseṭīti **viseso**, atisayo, svāyaṃ pubbāparaviseso upādāyupādāya gahetabboti taṃ dassetuṃ “**tatthā**”tiādimāha.

Uppajjati kilesapariḷāhoti kāye asubhādivasena manasikāraṃ adahantassa manasikāraṣsa vīthiyaṃ apaṭipannatā subhādivasena kāyārammaṇo kilesapariḷāho ca uppajjati. Vīriyārambhassa abhāvena tasmim ārammaṇe **cetaso vā līnattaṃ** hoti, gocarajjhataṭṭo **bahiddhā puthuttārammaṇe cittaṃ vikkhipati**. **Evaṃ kilesapariḷāhe cāti**ādīnā tivīdhampi bhāvanānuyogassa kilesavatthubhāvaṃ upādāya samuccayavasena aṭṭhakathāyaṃ vuttaṃ. Yasmā pana te pariḷāhalīnattavikkhepā ekajjhaṃ na

pavattanti, tasmā pāliyaṃ “kāyārammaṇo vā” tiādīnā aniyamattho vā-saddo gahito.

Kilesānurañjitenāti kilesavivaṇṇitacittena hutvā na vattitabbam. Kathaṃ pana vattitabbanti āha “**kismiñcīdevā**”ti. **Na ca vitakketi na ca vicāretī**ti kilesasahagata vitakkavicāre na pavatteti. **Sukhitoti** jhānasukhena sukhitō.

Imassa bhikkhuno bhāvanā pavattāti sambandho. Yasmā hi imassa bhikkhuno taṃ mūlakammaṭṭhānaṃ paripanthe sati ṭhapetvā buddhaguṇādiānussaraṇena cittaṃ pasādetvā mūlakammaṭṭhānabhāvanā pavattā, tasmā paṇidhāya bhāvanāti vuttanti sambandho. **Aṭṭhapetvā**ti cittaṃ appavattetvāti attho veditabbo. Kammaṭṭhānādīnaṃ tiṇṇampi vasena atthayojanā sambhavati. Tenāha “**tatthā**”tiādī. **Sārento viyā**ti rathaṃ vāhayanto viya. Samappamaṇato aṭṭhakādivasena **sutacchitaṃ pakkhipanto viya**. Sukheneva kilesānaṃ okāsaṃ adento antarā asajjanto **alagganto**. Vipassanācārassa āradhāvuttitaṃ aparipanthatañca dassento opammadvayamāha. **Byābhaṅgiyā**ti kājadaṇḍena. **Kilesapariḷāhādīnā**ti kilesapariḷāhalīnattavikkhepanaṃ.

Gulakhaṇḍādīnīti gulakhaṇḍasakkharakhaṇḍādīni ucchuvikārabhūtāni. “Kāye kāyānupassī viharāmi” tiādivacanato “**pubbabhāgavipassanā kathitā**”ti vuttaṃ.

Ambapālivaggavaṇṇanā niṭṭhitā.

2. Nālandavaggo

2. Nālandasuttavaṇṇanā

378. Dutiyavagge paṭhamasuttaṃ heṭṭhā vuttanayattā suviññeyyanti taṃ laṅghitvā “**dutiye**”ti vuttaṃ.

Bhiyyataro abhiññāti sambodhiyā seṭṭhataroti abhilakkhito. **Bhiyyatarābhiññō**ti sabbasattesu adhikatarapañño. Tenāha “**uttaritarāñño**”ti. Sammā anavasesato bujjhati etenāti **sambodhī**ti āha – “**sambodhiyanti sabbaññutaññā**”ti. **Nippadesā gahitā**ti anavasesā buddhaguṇā gahitā aggamaggasiddhiyāva bhagavato sabbaguṇānaṃ siddhattā. Na kevalaṅca buddhānaṃ, atha kho aggasāvaka paccekabuddhānampi taṃtaṃguṇasamijjhaṃ aggamaggādhi gamenevāti dassento “**dvepi aggasāvaka**”tiādīmāha.

Aparo nayo – **pasannoti** iminā pasādassa vattamānatā dīpitāti **uppannasaddhoti** imināpi saddhāya paccuppannatā pakāsītāti āha – “**evaṃ saddahāmīti attho**”ti. Abhijānāti abhimukhabhāvena sabbaññeyyaṃ jānātīti abhiññō, bhiyyo adhiko abhiññoti **bhiyyobhiññō**. So eva atisayavacanicchāvasena bhiyyobhiññataroti vuttoti āha – “**bhiyyataro abhiññāto**”ti. Dutiyavikappe pana abhijānātīti abhiññā, abhivisiṭṭhā paññā. Bhiyyo abhiññā etassāti bhiyyobhiññō, so eva atisayavacanicchāvasena **bhiyyobhiññataro**. Svāyaṃ assa atisayo abhiññāya bhiyyobhāvakatoti āha – “**bhiyyatarābhiññō vā**”ti. Sambujjhati etāyāti **sambodhi**, sabbaññutaññānaṃ aggamaggañānaṃ. Sabbaññutaññānapadaṭṭhānañhi aggamaggañānaṃ, aggamaggañānapadaṭṭhānaṃ sabbaññutaññānaṃ **sambodhi nāma**. Tattha padhānavasena tadatthadassane paṭhamavikappo, padaṭṭhānavasena dutiyavikappo. Kasmā panettha arahattamaggañānasseva gahaṇaṃ, nanu heṭṭhimānīpi bhagavato maggañānāni savāsana meva yathāsakaṃ paṭipakkhavidhamanavasena pavattāni. Savāsana appahānañhi ñeyyāvaraṇappahānanti? Saccametam, taṃ pana aparipuṇṇaṃ paṭipakkhavidhamanassa vipakatabhāvatoti āha “**arahattamaggañāne vā**”ti. **Sabbanti** sammāsambuddhena adhigantabbam sabbam.

Khādanīyaṃ uḷāratā sātaraśānubhāvenāti āha “**madhure āgacchati**”ti. Pasamsāya uḷāratā visiṭṭhabhāvenāti āha – “**seṭṭhe**”ti. Obhāsassa uḷāratā mahantabhāvenāti vuttaṃ – “**vipule**”ti. Usabhassa ayanti āsabhī, idha pana āsabhī viyāti **āsabhī**. Tenāha – “**usabhassa vācāsadisī**”ti. Yena

guṇena sā taṃsadisā, taṃ dassetuṃ “**acalā asampavedhī**”ti vuttaṃ. Yato kutoci anussavaṇaṃ **anussavo**. Vijjāṭṭhānādisu kataparicayaṇaṃ ācariyaṇaṃ taṃ taṃ atthaṃ ñāpentī pavēṇī **ācariyaparamparā**. Kevalaṃ attano matiyā “iti kira evaṃ kirā”ti parikkappaṇā **itikirā**. Piṭakassa ganthassa sampadānato bhūtaṃ tassa gahaṇaṃ **piṭakasampadānaṃ**. Yathāsutānaṃ attānaṃ ākāraṇaṃ parivitaṅkkaṇaṃ **ākāraparivitaṅkko**. Tathevassa “evameta”nti diṭṭhiyā nijjhānakkhamaṇaṃ **diṭṭhinijjhānakkhanti**. Āgamādhigamehi vinā kevalaṃ anussutato takkamaggāṃ nissāya takkaṇaṃ **takko**. Anumānavidhiṃ nissāya gahaṇaṃ **nayaggāho**. Yasmā buddhavisaye ṭhatvā bhagavato ayaṃ therassa codanā therassa ca so avisayo, tasmā “**paccakkhato ñāṇena paṭivijjhitaṃ viyā**”ti vuttaṃ. Sīhanādo viyāti **sīhanādo**. Taṃsadisatā cassa seṭṭhabhāvena, so cettha evaṃ veditabboti dassento “**sīhanādo**”tiādīmāha. **Unnādayantenā**ti asanisadisam karontena.

Anuyogadāpanatthanti anuyogaṃ sodhāpetuṃ. Vimaddakkhamaṇhi sīhanādaṃ nadanto atthato anuyogaṃ **sodheti** nāma, anuyujjhanto ca naṃ **sodhāpeti** nāma. **Dātunti** sodhetuṃ. Keci “dānattha”nti atthaṃ vadanti, taṃ na yuttaṃ. Na hi yo sīhadānaṃ nadati, so eva tattha anuyogaṃ detīti yujjati. **Nighamsananti** vimaddanaṃ. **Dhamamānanti** tāpayamānaṃ. Tāpanaṅcettha gaggariyā dhammāpanasīsena vadati.

Sabbe teti sabbe te atīte niruddhe sammāsambuddhe. Tenetaṃ dasseti – ye te ahesuṃ atītamaddhānaṃ tava abhinīhārato oraṃ sammāsambuddhā, tesu tāva sāvakañāṇagocare dhamme paricchindanto mārādayo viya ca buddhānaṃ lokiyacittācāraṃ tvam jāneyyāsi. Ye pana te abbhatīta, tato parato chinnavatuma chinnavapaṅcā pariyādinnavaṭṭā sabbadukkhavītivattā sammāsambuddhā, tesu sabbesampi tava sāvakañāṇassa avisayabhūte dhamme kathaṃ jānissasīti. **Tenāti** sambodhisāṅkhātena sabbaññutaññānapadaṭṭhānena arahattamaggañāṇena. **Evamsilāti** tādisasīlā. **Samādhipakkhāti** samādhi ca samādhipakkhā ca samādhipakkhā ekadesasarūpekasesanayena. Tattha **samādhipakkhāti** vīriyasatiyo tadanugūṇā ca dhammā veditabbā. Jhānasamāpattīsu yebhuyyena viharavohāro, jhānasamāpattīyo samādhipadhānāti vuttaṃ “**samādhipakkhānaṃ dhammānaṃ gahitattā viharo gahito**”ti.

Yathā pana heṭṭhā gahitāpi samādhipaññā paṭipakkhato vimuttattā vimuccana-sāṅkhāta-kiccavisesa-dassanavasena vimutti-pariyāyena puna gahitā “evaṃvimuttā”ti, evaṃ dibbavihāro dibbavihāravisesadassanavasena puna gahito “evaṃvihārī”ti, tasmā sabbesaṃ samāpattivihārānaṃ vasenettha attho yujjatīti daṭṭhabbaṃ. **Vimuttīti saṅkham gacchanti** vimuccitthāti katvā. Esa nayo sesesupi. **Paṭippassaddhanteti** paṭippassambhanosāpanena. Sabbakilesehi nissaṭattā asaṃsaṭṭhattā vimuttattā ca **nissaraṇavimuttī** nibbānaṃ.

Anāgatabuddhānaṃ panāti pana-saddo visesatthajotano. Tena atītesu tāva khandhānaṃ bhūtapubbattā tattha siyā ñāṇassa savisaye gati, anāgatesu pana sabbaso asaṅgātesu kathanti imamattamaṃ joteti. Tenāha “**anāgatāpi**”tiādī. “**Attano cetasā paricchinditvā veditā**”ti kasmā vuttaṃ? Nanu atītanāgate sattāhe eva pavattaṃ cittaṃ cetopariyañāṇassa visayo, na tato paranti? Nayidaṃ cetopariyañāṇakiccavasena vuttaṃ, atha kho pubbenivāsaanāgataṃsañāṇaṃ vasena vuttaṃ, tasmā nāyaṃ doso. **Veditaṭṭhāne na karoti** sikkhāpadeneva tādisassa paṭikkhepassa paṭikkhittattā setughātato ca. Kathaṃ pana thero dvayasambhave paṭikkhepameva akāsi, na vibhajja byākāsīti āha “**thero kira**”tiādī. Pāraṃ pariyantaṃ minotīti pāramī, sā eva ñāṇanti pāramiñāṇaṃ, sāvakaṇaṃ pāramiñāṇaṃ **sāvakaṇaṃ pāramiñāṇaṃ**. Tasmim sāvakaṇaṃ ukkaṃsapariyantagata jānane nāyamanuyogo, atha kho sabbaññutaññāṇe sabbaññutāya jānane. Keci pana “sāvakaṇaṃ pāramiñāṇeti sāvakaṇaṃ pāramiñāṇavisaye”ti atthaṃ vadanti, tathā sesapadesupi. **Sila...pe... samatthanti** silasamādhipaññāvimuttīñāṇasāṅkhātānaṃ kāraṇaṃ jānanaṃ samatthamaṃ. Buddhasīlādayo hi buddhānaṃ buddhakiccassa parehi ete buddhāti jānanaṃ ca kāraṇaṃ.

Anumānañāṇaṃ viya saṃsaṭṭhitamaṃ ahutvā idamidanti yathāsabhāvato ñeyyaṃ dhāreti nicchinotīti **dhammo**, paccakkhañāṇanti āha “**dhammassa paccakkhato ñāṇassā**”ti. Anuetīti

anvayoti āha “**anuyogaṃ anugantvā**”ti. Paccakkhasiddhañhi atthaṃ anugantvā anumānaññaṃ pavatti “**diṭṭhena aditṭhassa anumāna**”nti veditabbā. Vidite vedakampi ñāṇaṃ atthato viditameva hotīti “**anumānaññaṃ nayaggāho vidito**”ti vuttaṃ. **Viditoti** viddho paṭiladdho, adhigatoti attho. **Appamāṇoti** aparimāṇo mahāvisayattā. Tenāha “**apariyanto**”ti. **Tenāti** apariyantattā. **Tena** vā apariyantena ñāṇena. Etena thero yaṃ yaṃ anumeyyamatthaṃ ñātukāmo hoti, tattha tattha tassa asaṅgamappaṭihatamā anumānaññaṃ pavattetīti dasseti. Tenāha “**so iminā**”tiādi. Tattha **imināti** iminā kāraṇena.

Pākārassa thirabhāvaṃ uddhamuddham āpetīti **uddhāpaṃ**, pākāramūlaṃ. **Ādi**-saddena pākāradvārabandhaparikhādīnaṃ saṅgaho veditabbo. Paccante bhavaṃ **paccantimaṃ**. Paṇḍitadovārikatṭhāniyaṃ katvā thero attānaṃ dasseti dassento “**ekadvāranti kasmā āhā**”ti codanaṃ samuṭṭhāpesi.

Yassā paññāya vasena puriso paṇḍitoti vuccati, taṃ paṇḍiccanti āha – “**paṇḍiccena samannāgato**”ti. Taṃtaṃtikattabbatāsu chekabhāvo byattabhāvo **veyyattiyaṃ**. Medhati aññāṇaṃ hiṃsati vidhamatīti medhā, sā etassa atthīti **medhāvī**. Ṭhāne ṭhāne uppatti etissā atthīti **ṭhānuppattikā**, ṭhānaso uppajjanapaññā. Anupariyāyanti etenāti anupariyāyo, so eva pathoti **anupariyāyapatho**, parito pākārassa anuyāyanamaggo. Pākārabhāgā sambandhitabbā etthāti **pākārasandhi**, pākārassa phullitapadeso. So pana heṭṭhimantena dvinnampi iṭṭhakānaṃ vigamena evaṃ vuccatīti āha – “**dvinnam iṭṭhakānaṃ apagataṭṭhāna**”nti. **Chinnaṭṭhānanti** chinnabhinnapadesaṃ, chinnaṭṭhānaṃ vā. Tañhi “**vivara**”nti vuccati. **Kīlīṭṭhanti** malīnaṃ. **Upatāpentīti** kilesapariḷāhena santāpentī. **Vibādhentīti** pīḷenti. Uppannāya paññāya nīvaraṇehi na kiñci kātuṃ sakkāti āha “**anuppannāya paññāya uppajjitum na denti**”ti. **Tasmāti** paccayūpaghātena uppajjitum appadānato. **Catūsu satipaṭṭhānesu suṭṭhu ṭhapitacittāti** catubbidhāyapi satipaṭṭhānabhāvanāya sammadeva ṭhapitacittā appitacittā. **Yathāsabhāvena bhāvetvāti** yāthāvato sammadeva yathā paṭipakkhā samucchijjanti, evaṃ bhāvetvā.

Purimanaye satipaṭṭhānāni bojjaṅgā ca missakā adhippetāti tato aññathā vattum “**apicetthā**”tiādi vuttaṃ. **Missakāti** samathavipassanāmaggasena missakā. “**Catūsu satipaṭṭhānesu suppatiṭṭhitacittāti** paṭhamam vuttattā satipaṭṭhānesu vipassanaṃ gahetvā satta bojjaṅge yathābhūtam bhāvetvāti vuttattā maggapariyāpannānaṃyeva ca nesaṃ nipariyāyabojjaṅgabhāvato tesu ca adhigatameva hotīti bojjaṅge maggo ca sabbaññutaññāñcāti gahite sundaro paṇho bhaveyyā”ti **mahāsivatthero āha**. **Na panevaṃ gahitaṃ** porāṇehīti adhippāyo. **Itīti** vuttappakāraparāmasanaṃ. **Theroti** sāriputtatthero.

Tatthāti tesu paccantanagarādīsū. **Nagaraṃ viya nibbānaṃ** tadatthikehi upagantabbato upagatānañca parissayarahitasukhādhiḡamatṭhānato. **Pākāro viya silaṃ** tadupagatānaṃ parito ārakkhabhāvato. **Anupariyāyapatho viya hirī** silapākārassa adhiṭṭhānabhāvato. Vuttañhetam – “**pariyāyapathoti kho bhikkhu hiriyā etaṃ adhivacana**”nti. **Dvāraṃ viya ariyamaggo** nibbānanagarappavesane añjasabhāvato. **Paṇḍitadovāriko viya dhammasenāpati** nibbānanagaraṃ pavīṭṭhapavisanakānaṃ sattānaṃ sallakkhaṇato. **Dinnoti** dāpito, sodhitoti attho. Sesam suviññeyyameva.

3. Cundasuttavaṇṇanā

379. Pubbe sāvatthito veḷuvagāmassa gatattā vuttaṃ “**āgatamaggeneva paṭinivattanto**”ti. **Sattannanti** upaseno, revato, khadiravaniyo, cundo, samaṇuddeso ahanti catunnaṃ, cālā, upacālā, sīsūpacālāti, tissannanti imesaṃ sattannaṃ arahantānaṃ. **Natthi nu khoti** etthāpi “**olokento**”ti ānetvā sambandho sīhāvalokanañāyena. Bhavissanti me vattāro haritum nāsakkhīti sambandho. **Idam dāni pacchimadassananti** bhūtakathanamattaṃ, na tattha sālayatādassanaṃ yathā tathāgatassa vesāliya nikkhamitvā nāgāpalokitaṃ.

Tassa tassa visesassa adhiṭṭhānavaseneva iddhibhedadassanaṃ **iddhivikubbanam**. Sīhassa vijambhanādivasena kīḷitvā nādasadisī ayaṃ dhammakathāti vuttaṃ “**sīhavikīḷito**

dhammapariyāyo’ti. **Gamanakālo mayhantī**ti ettha **iti**-saddo parisamāpane. Tena therena yathārambhassa vacanapabandhassa samāpitabhāvaṃ joteti. Esa nayo sesesupi edisesu sabbatthānesu. Yugandharādayo **paribhaṇḍapabbatā**ti veditabbā. **Ekappahārenevā**ti ekappahārena iva. Svāyaṃ **iva**-saddo na sakkomīti ettha ānetvā sambandhitabbo.

Paṭipādessāmīti tthitakāyaṃ paṭipādessāmi. Patthanākāle anomadassissa bhagavato vacanasutānusārena ñāṇena diṭṭhamattataṃ sandhāya **“taṃ paṭhamadassana”**nti vuttaṃ. **Dhāretuṃ asakkontī** guṇasāraṃ. **Esa maggoti** eso jātānaṃ sattānaṃ maraṇaniṭṭhito pantho. Punapi **evambhāvino nāma saṅkhārā**ti saṅkhārā nāma evambhāvino, maraṇapariyosānāti attho. **Ettakanti** ettakaṃ kālaṃ. **Saṅkaḍḍhitvā** saṃharitvā. **Mukhaṃ pidhāyā**ti mukhaṃ chādetvā. **Agghikasatānī**ti maḷaṅkuracetiyasatāni.

Purimadivaseti atītadivase. Yasmā dhammasenāpatino arahattappattadivaseyeva satthu sāvakasannipāto ahosi, tasmā **“pūritasāvakasannipāto esa bhikkhū”**ti vuttaṃ. **Pañca jātisatānī** bhummatthe, accantasamyoḃe vā upayogavacanāṃ.

Kaḷopihatthoti vilīvamayaabhājanahattho. **“Cammamayabhājanahattho”**ti ca vadanti. **Purantareti** nagaramajjhe. **Vaneti** araṇṇi.

Osakkanākāravirahitoti dhammadesanāya saṅkocahetuvirahito. **Visāradoti** sāravadirahito. **Dhammojanti** dhammarasaṃ, ojavantaṃ desanādhammanti attho. **Dhammabhoganti** dhammaparibhogaṃ, parehi saddhiṃ saṃvibhajanavasena pavattaṃ dhammasambhoganti desanādhammameva vadati. Tena vuttaṃ **“ubhayenapi dhammaparibhogova kathito”**ti.

Piyāyitabbato **piyehi**. Manassa vaḍḍhanato **manāpehi**. **Jātiyā**ti khattiyādi jātiyā. **Nānābhāvo** asahabhāvo visumbhāvo. **Aññathābhāvo** aññathattaṃ. **Sarīranti** rūpadhammakāyasaṅkhātāṃ sarīraṃ. Rūpakāye hi bhijjante bhijjanteva. **So bhijjeyyā**ti so mahantataro khandho bhijjeyya.

Dakkhiṇadisam gatoti dakkhiṇadisāmukhe pavatto. **Mahākhandho viyā**ti mahanto sāravanto sākḥākhandho viya. Sākḥākhandhā hi disābhimukhapavattākārā, mūlakhandho pana uddhamuggato. **Soḷasannaṃ pañhānanti** soḷasannaṃ aparāpariyapavattaniyānaṃ atthānaṃ. **Ñātuṃ icchito** hi attho pañho.

4-5. Ukkacelasuttādivaṇṇanā

380-381. Amāvasuposatheti amāvasiuposathe, kālapakkhauposatheti attho. **Purimanayenevā**ti anantarasutte vuttanayeneva.

6. Uttiyasuttavaṇṇanā

382. Maccudheyassāti maccuno pavattiṭṭhānassa.

8. Brahmasuttavaṇṇanā

384. Tasmim kāleti paṭhamābhisambodhiyaṃ. **Bhikkhuyeva natthi** dhammacakkassa appavattitattā, **bhikkhuyeva** bhikkhulakkhaṇayogato. Ekako maggo, na dvedhāpathabhūtoti ekamaggo, taṃ **ekamaggaṃ**. Jātiyā khayō vaṭṭadukkhassa antabhūtoti jātikkhayanto, nibbānaṃ, taṃ diṭṭhattā **jātikkhayantadassī**ti evamettha attho daṭṭhabbo.

9. Sedakasuttavaṇṇanā

385. Ayam tassa laddhīti ayam idāni vuccamānā tassa ācariyassa laddhi. **Tato anāmentoti** yena vaṃso namati, tena kāyaṃ anāmento. Tathā namanto hi patitvā cuṇṇavicuṇṇaṃ hoti. **Tanti kāyaṃ, taṃ vaṃsaṃ vā. Ākaḍḍhento viyāti** namitaṭṭhānato parabhāgena ākaḍḍhento viya. **Ekatobhāgiyaṃ katvāti** yathāvuttaṃ satim sūpaṭṭhitaṃ katvā onataṃ viya katvā. Tathā karaṇaṃ pana tathā vātūpatthambhagāhāpanenāti āha – “**vātūpatthambhaṃ gāhāpetvā**”ti. Tañca satiyā tadattham upaṭṭhānenāti vuttaṃ “**satim sūpaṭṭhitaṃ katvā**”ti. **Niccalova nisīdanto** antevāsī ācariyaṃ rakkhati, ettakaṃ ācariyassa laddhivasena vuttaṃ. “**Ācariyo vaṃsaṃ suggahitaṃ gaṇhanto**”tiādi sabbam heṭṭhā vuttanayameva.

“**Attānameva rakkhati**”ti idaṃ attano rakkhaṇaṃ padhānaṃ katvā vuttaṃ, **na antevāsikanti** avadhāraṇaphalaṃ. Attarakkhāya panettha sijjhamānāya antevāsikarakkhāpi siddhā eva hotīti. Dutiyapakkhepi eseva nayo. **So tattha nāyoti** yā attano eva rakkhā, sā atthato pararakkhāpi hotīti ayamettha nāyo yuttappayogo. **Anuvaḍḍhiyāti** yathāvaḍḍhitassa anuanuvaḍḍhiyā. Etena paṭiladdhasampayuttapamodaṇākāro dassitoti āha – “**sapubbabhāgāya muditāyāti attho**”ti. **Āsevanāyāti**tiādini padāni anudayatāpariyosānāni (yasmā satipaṭṭhānaṃ sevantassa siddhaṃ attano ca parassa ca rakkhaṇaṃ pakāsentī, tasmā) – “attānaṃ, bhikkhave, rakkhissāmīti satipaṭṭhānaṃ sevitaṭṭha”ntiādi vuttaṃ.

10. Janapadakalyāṇisuttavaṇṇanā

386. Janapadasmim kalyāṇīti sakalajanapade bhaddā rūpasampattiyā sikkhāsampattiyā ca sundarā seṭṭhā. Rūpasampatti ca nāma sabbaso rūpadosābhāvena rūpaṇaṇapāripūriyā hotīti tadubhayaṃ dassetuṃ “**chasarīradosarahitā pañcakalyāṇasamannāgatā**”ti vuttaṃ. Taṃ duvidhampi vivaranto “**sā hi**”tiādimāha. **Pañcakalyāṇasamannāgatāti** pañcavidhasarīragaṇasampadāhi samannāgatā. **Nātidighā nātirassāti** pamāṇamajjhimā dīghatarappamāṇā na hoti, na atirassā, lakaṇḍakarūpā na hoti. **Nātikisāti** ativiya kisathaddhamamsalohitā dissamānā aṭṭhisarīrā jālasarīrā na hoti. **Nātihūlāti** bhāriyamamsā mahodarā na hoti. **Nātikālā nāccodātāti** ativiya kāḷavaṇṇā jhāmaṅgāro viya, dadhitakkādīhi pamajjitamattakamsalohavaṇṇā na hoti. Manussaloke tādisiyā rūpasampattiyā abhāvato **atikkantā manussavaṇṇaṃ**. Yathā pamāṇayuttā, evaṃ ārohapariṇāhayogato ca paresaṃ pasādāvahā nātidighatādayo. Evaṃ manussaṇaṃ dibbarūpatāsampattipīti vuttaṃ “**appattā dibbavaṇṇa**”nti. Ettha ca nātidighanātirassatāvacanena ārohasampatti vuttā ubbedhena pasādikabhāvato. Kisathūladosābhāvavacanena pariṇāhasampatti vuttā. Ubhayenapi saṅghānasampadā vibhāvitā, nātikāḷatāvacanena vaṇṇasampatti vuttā vivaṇṇatābhāvato. **Piyaṅgusāmāti** pariṇatapiyaṅgupupphasadisasarīranibhāsā. **Mukhapariyosānanti** adharoṭṭhamāha. **Ayaṃ** yathāvuttā sarīravaṇṇasampatti. **Assāti** janapadakalyāṇiyā. **Chavikalyāṇatā** chavisampattihetukattā tassā. Esa nayo sesesupī. Nakhā eva pattasadisatāya **nakhapattāni**.

(**Pasāvo** sarīravayavena iriyananti āha – “**pavattīti attho**”ti, pasāvo yathāparitameva kanatanti, na sabhāvasandhānaṃ. Yathāvibhāvasena **uttamameva naccam naccati**. Te vā vīsatiyāsūtiram dhānappattiyā pavattiyā pavattimakatamandatā vibhāvasuṭatassa uttamameva gītañca gāyatīti attho.) [Etthantare pāṭho asuddho dussodhanīyo ca. Suddhapāṭho gavesitaṭṭho.] **Samatittiko telapattoti** mukhavattisamaṃ telānaṃ pūritattā samatittikamukhaṃ telabhājanaṃ. **Antarena ca mahāsamajjaṃ antarena ca janapadakalyāṇinti** janapadakalyāṇiyā, tassā ca naccagītaṃ pekkhituṃ sannipatitamahājanasamūhassa majjhato **pariharitabbo** netabbo. **Nanti** telaṃ. **Āhareyyāti** āpajjeyya. Tatridaṃ opammaṃsandanaṃ – telapattaṃ viya kāyagatāsati, tassa parihaṇaṇapuggalo viya vipassako, janakāyā viya puthuttārammaṇāni, asipuriso viya mano, telassa cājanaṃ viya kilesuppādanaṃ, sīsapātaṇaṃ viya ariyamaggañāṇasīsānuppatti. “Kāyagatā sati no bhāvitā...pe... sikkhitabba”nti vuttattā “**pubbabhāgavipassanāva kathitā**”ti vuttaṃ.

Nālandavaggavaṇṇanā niṭṭhitā.

3. Sīlaṭṭhitivaggo

1-2. Sīlasuttādivaṇṇanā

387-388. Sīlānīti bahuvacanaṃ anekavidhattā sīlassa. Tañhi sīlanaṭṭhena ekavidhampi cārittādivasena anekavidhaṃ. Tenāha – “**catupārisuddhisīlānī**”ti. **Pañhamaggoti** nātuṃ icchitassa atthassa vīmaṃsanaṃ. Tenāha – “**pañhagavesana**”nti.

3-5. Parihānasuttādivaṇṇanā

389-391. Puggalavasena parihānaṃ hoti na dhammasena. Yo na bhāveti, tasseva parihāyati. Tenāha “**yo hī**”tiādi.

6. Padesasuttavaṇṇanā

392. Padesato bhāvitattāti ekadesato bhāvitattā bhāvanāpāripūriyā ananuppattattā. Tenāha – “**cattāro hi magge**”tiādi.

7. Samattasuttavaṇṇanā

393. Samattā bhāvitattāti pariyattā bhāvitattā.

8-10. Lokasuttādivaṇṇanā

394-396. Mahāvisayattā mahatiyo abhiññā etassāti **mahābhiñño**, tassa bhāvoti sabbam vattabbaṃ. “**Satativihārasena vutta**”nti vatvā tamatthaṃ pākaṭṭhaṃ kātuṃ “**thero kirā**”tiādi vuttaṃ. **Tassā**ti therassa. **Āvajjanassa gatinti** ekāvajjanasseva gamanavīthiṃ. **Anubandhati** cakkavāḷānaṃ sahasaṃ ekāvajjaneneva sahasalokadhātuyā icchitamatthaṃ jānitum samatthoti dasseti.

Sīlaṭṭhitivaggavaṇṇanā niṭṭhitā.

4. Ananussutavaggavaṇṇanā

397-407. Yā vedanā sammasitvāti yā tebhūmakavedanā sammasitvā. **Tāvassā**ti tā tebhūmakavedanā eva assa bhikkhuno. Sadisavasena cetam vuttaṃ, aniccādisammasanavasena **viditā** pubbhāge sammasanakāle **upaṭṭhahanti. Pariggahitesū**ti pariṇānanavasena paricchijja gahitesu. “**Vedanā** taṇhāpapañcassa, **vitakko** mānapapañcassa, **saññā** diṭṭhipapañcassa mūlavasena sammasanaṃ vuttā”ti vadanti. “Vedanāvitakkasaññā taṇhāmānadiṭṭhipapañcānaṃ mūladassanavasenā”ti apare.

Ananussutavaggavaṇṇanā niṭṭhitā.

5. Amatavaggo

2. Samudayasuttavaṇṇanā

408. Sārammaṇasatipaṭṭhānāti ārammaṇalakkhitā satipaṭṭhānā kathitā, na satilakkhaṇā.

4. Satisuttavaṇṇanā

410. Suddhikaṃ katvā visum visum katvā. Tathā ca vuttaṃ pāliyaṃ “**kāye vā bhikkhū**”ti.

6. Pātimokkhasaṃvarasuttavaṇṇanā

412. Jeṭṭhakasīlanti padhānakasīlaṃ. Sīlaggaḥaṇaṇhi pāliyaṃ pātimokkhasaṃvaravaseneva āgataṃ. Tenāha “**tipiṭakacūlanāgatthero panā**”tiādi. Tattha **pātimokkhasaṃvarova sīlanti** avadhāraṇaṃ itaresaṃ tiṇṇaṃ ekadesena pātimokkhanatogadhabhāvaṃ dīpeti. Tathā hi anolokiyolokane ājīvahetu ca chasikkhāpadavītikkamane gilānapaccayassa appaccavekkhitaparibhoge ca āpatti vihitāti. **Tiṇṇīti** indriyasaṃvarādīni. **Sīlanti vuttaṭṭhānaṃ nāma natthīti** sīlapariyāyena tesam katthaci sutte gahitaṭṭhānaṃ nāma natthīti nipariyāyasīlataṃ tesam paṭikkhipati. **Chadvārarakkhaṇamattamevāti** tassa sallahukatamāha cittaḍhiṭṭhānamattena paṭipākatikabhāvappattito. Itaradvayepi eseva nayo. **Paccayuppattimattakanti** phalena hetuṃ dasseti. Uppādanahetukā hi paccayānaṃ uppatti. **Idamatthanti** idaṃ payojanaṃ imassa paccayassa paribhuñjanti adhippāyo. **Nipariyāyenāti** iminā indriyasaṃvarādīni tiṇi padhānasīlassa paripālanaparisoḍhanavasena pavattiyā pariyāyasīlāni nāmāti dasseti. Idāni pātimokkhasīlasseva padhānabhāvaṃ byatirekato anvayato ca upamāya vibhāvetuṃ “**yassā**”tiādimāha. Tattha **soti** pātimokkhasaṃvaro. **Sesāni** indriyasaṃvarādīni. Pātimokkhasaddassa attho pana visuddhimaggasaṃvaṇṇanādīsu vitthārito, tasmā tattha vuttanayeneva veditabbo.

Ācārena ca gocarena ca sampannoti kāyikacetasikaavītikkamasāṅkhātena ācārena ca navesiyādigocarātādisāṅkhātena gocarena ca sampanno, sampannaācāragocaroti attho. **Appamattakesūti** atiparittakesu anāpattigamanīyesu. “Dukkaṭṭadubbhāsitamattesu”ti apare. **Vajjesūti** akaraṇīyesu gārayhesu. Te pana ekantato akusalā hontīti āha – “**akusaladhammesū**”ti. **Bhayadassāvīti** bhayato dassanasīlo, paramāṇumattampi vajjaṃ sineruppamāṇaṃ viya katvā dassanasīlo. **Sammā ādiyitvāti** sammadeva sakkaccaṃ sabbaso ca ādiyitvā. **Sikkhāpadesūti niddhāraṇe bhumanti** samudāyato avayavaniddhāraṇaṃ dassento “**sikkhāpadesu taṃ taṃ sikkhāpada**”ntiādimāha. Sikkhāpadaṃ samādātabbaṃ sikkhitabbañcāti adhippāyo. **Sikkhāti** adhisīlasikkhā. Pubbe **pada**-saddo adhiṭṭhānaṭṭho, idha bhāgatthoti datṭhabbanti āha – “**sikkhākoṭṭhāsesū**”ti. Mūlapaññattianupaññattīdibhedam yamkiñci sikkhitabbaṃ pūretabbaṃ sīlaṃ, taṃ pana dvāravasena duvidhamevāti āha – “**kāyikaṃ vā vācasikaṃ vā**”ti. Imasmiṃ atthavikappe **sikkhāpadesūti** ādhāre bhummaṃ sikkhābhāgesu kassaci visuṃ aggahaṇato. Tenāha – “**taṃ taṃ sabba**”nti. “Tato tvam bhikkhu sīlaṃ nissāyā”ti vacanato anabhijjhā abyāpādasammādiṭṭhiyopi sīlanti vuttā, tasmā imasmiṃ sutte “**pātimokkhasaṃvarasīlameva kathita**”nti vuttaṃ.

7. Duccaritasuttavaṇṇanā

413. Etthāpi manosucaritaṃ sīlaṃ nāmāti dassētīti katvā vuttaṃ “**pacchimāpi tayo**”ti. Anabhijjhāabyāpādasammādiṭṭhidhammā sīlaṃ hotīti veditabbā kāyavacīsucaritehi saddhiṃ manosucaritampi vatvā “tato tvam bhikkhu sīlaṃ nissāyā sīle patiṭṭhāyā”ti vuttattā. **Sesaṃ** vuttanayameva. **Chaṭṭhasattamesūti** chaṭṭhasattamavaggesu apubbaṃ natthi. Tena vuttaṃ “**heṭṭhā vuttanayeneva attho veditabbo**”ti. Vaggapeyyālato pana imasmiṃ satipaṭṭhānasamūyutte katipayavaggā saṅghaṃ ārūḥhā, tathāpi tesam atthavisesābhāvato ekaccesu potthakesu mukhamattaṃ dassetvā saṃkhittā, ekaccesu atisaṃkhittāva, te saṅkhepavasena dve katvā “**chaṭṭhasattamesū**”ti vuttaṃ.

Amatavaggavaṇṇanā niṭṭhitā.

Satipaṭṭhānasamūyuttavaṇṇanā niṭṭhitā.

4. Indriyasaṃyuttaṃ

1. Suddhikavaggo

1. Suddhikasuttavaṇṇanā

471. Catubhūmaka ...pe... labbhanti kusalābyākatabhāvato tesam tiṇṇaṃ indriyānaṃ. **Vīriyindriyasamādhindriyāni...pe... sabbattha labbhanti** kusalattikasādhāraṇattā. **Catubhūmaka ...pe... vasesnāti** catubhūmakadhammaparicchedavasena ceva kusalādīhi sabbasaṅgāhakadhammaparicchedavasena ca vuttanti attho.

Dutiyasamaṇabrāhmaṇasuttavaṇṇanā

477. Dukkhasaccavasesnāti dukkhasaccabhāvena na pajānanti. Tañhi pariññeyyatāya dukkhasaccasaṅgahaṃ. **Samudayasaccavasesnāti** taṇhāvijjādīṃ saddhindriyassa samudayasaccabhāvena na pajānanti. **Nirodhanti** saddhindriyassa anupādāya nirodhanimittaṃ nibbānaṃ. **Paṭipadanti** saddhindriyanirodhagāminīṃ paṭipadaṃ ariyamaggaṃ. **Sesesūti** vīriyindriyādīsu.

Sukkapakkheti “saddhindriyaṃ pajānanti” tiādinayappavatte anavajjapakkhe. **Adhimokkhavasena āvajjanasamudayāti** “atthi dinna” ntiādinayappavattapubbabhāgabhūtasaddhādhimokkhavasena āvajjanuppattiyā. Tasmā paṭhamuppannā saddhā eva hettha “āvajjana” nti vuttā, na manodvārāvajjanaṃ. Esa nayo sesesupi. Tasmā paṭhamuppannā āvajjanā paggahuppattiṭṭhānānaṃ tikkhānaṃ vīriyindriyādīnaṃ paṭhamuppattiyā āvajjanapariyāyena vuttāti daṭṭhabbaṃ. Dubbalā hi paṭhamuppannā paggahābhāvato vīriyindriyādīnaṃ samudayoti balavabhāvappattavīriyindriyādīkassa āvajjanaṭṭhānīyāni hontīti tesam samudayoti vuttā, pubbe adhimuccanādivasena pavattassa āvajjanassa samudayāti attho. Puna **chandavasesnāti** kattukāmatākusalacchandavasena saddhādīnaṃ uppādetukāmatākārappavattassa chandassa vasena. **Manasikāravasena āvajjanasamudayāti** saddhindriyādivasena pavattassa dubbalassa tassa nibbattakayonisomanasikāravasena āvajjanassa uppattiyā. **Evampīti** “adhimokkhavasena” tiādinā vuttākāreṇapi. **Chasu suttesūti** dutiyato paṭṭhāya chasu suttesu. **Catusaccameva kathitaṃ.** Assādaggahaṇena hi samudayasaccaṃ, ādīnavaggahaṇena dukkhasaccaṃ, nissaraṇaggahaṇena nirodhamaggasaccāni gahitāntī. Paṭhamasutte pana indriyānaṃ sarūpadassanamevāti.

8. Dabbasuttavaṇṇanā

478. Soto āpajjīyati etenāti **soṭāpatti**, anāgataṃ pati paṭhamamaggo. **Sototi** ariyamaggasoto daṭṭhabbo. **Āpajjīyatīti** ādito paṭipajjīyati. Paṭhamamaggapaṭilābhanimittāni soṭāpanassa aṅgāni idha “**soṭāpattiyāṅgāni**” ti vuttāni. Tāni pana tīsu thānesu saddhā ariyakantaśīlācātī veditabbāni. **Savisayeti** sakavisaye. **Jeṭṭhakabhāvadassanatthanti** padhānabhāvadassanatthaṃ. Yattha saddhādiindriyānaṃ sātīsayakiccaṃ, tesam kiccātirekataṃ dassetunti attho. Idāni tamatthaṃ upamāhi vibhāvetuṃ “**yathā hī**” tiādi vuttaṃ. **Patvāti** attano kiccātirekaṭṭhānaṃ paṭilabhitvā. **Pubbaṅgamanti** saddahanakiccesu purecāraṃ dhorayhaṃ. **Sesāni** vīriyindriyādīni. **Tadanvayāntīti** tadanugatāni tassa saddhindriyādīkassa pakkhikāni. Esa nayo sesesupi. **Jhānavimokkheti** jhānasaṅkhāte vimokkhe samādhīpadhānatāya jhānānaṃ. Evañca katvā “soṭāpattiyāṅgāni patvā” ti idaṅca vacanaṃ samatthitaṃ hoti. Saddhūpanisañhi sīlanti. **Ariyasaccāni patvāti** cattāri saccāni abhisametabbāni pāpuṇitvā.

9-10. Paṭhamavibhaṅgasuttādivaṇṇanā

479-480. Nepakkaṃ vuccati paññāti āha – “**paññāyetaṃ nāma**” nti. Nipāyati saṅkilesadhamme visoseti nikkhāmetīti nipako, thiratikkhasatīpuggalo, tassa bhāvo **nepakkanti** satiyāpi nepakkabhāvo yujjateva. Evañhi “satīnepakkenā” ti idaṃ vacanaṃ samatthitaṃ hoti, satiyā ca nepakkenāti evaṃ vuccamānena satīniddeso nāma kato hotiyeva. **Asukaṃ nāma** suttaṃ vā kammaṭṭhānaṃ vā **me bhāsīti**. Vossajjīyati saṅkhāragataṃ etasmiṃ adhigateti **vossaggo**, nibbānaṃ. Taṃ ārammaṇaṃ karitvāti āha – “**nibbānārammaṇaṃ katvā**” ti. **Gacchantiyāti** saṅkhārānaṃ udayaṅca vayaṅca udayabbayaṃ gacchantiyā bujjhantiyā. Tenāha “**udayabbayapariggāhikāyā**” ti.

Saddhāsatipaññindriyāni pubbabhāgāni “itipi so bhagavā arahaṃ, cirakatampi cirabhāsitaṃ saritā anussaritā, udayatthagāminiyā paññāyā”ti ca vuttatā. “Āraddhavīriyo viharati, so anuppannāna”ntiādīnā ca vuttatā **vīriyindriyaṃ missakaṃ**. “Vossaggārammaṇaṃ karitvā”ti vuttatā **samādhindriyaṃ nibbattitalokuttameva. Ayamevā**ti yvāyaṃ navame vutto. Ayameva pubbabhāgamissakalokuttaratadhammaparicchedo.

Suddhikavaggaṇṇanā niṭṭhitā.

2. Mudutaravaggo

1. Paṭilābhasuttavaṇṇanā

481. Sammappadhāne ārabbhāti sammappadhāne bhāvanāvasena ārabbhā. Tenāha “**bhāvento**”ti. Yathā vīriyindriyaniddese “cattāro sammappadhāne ārabbhā vīriyaṃ paṭilabhatī”ti desanā āgatā, evaṃ satindriyaniddese “cattāro satipaṭṭhāne ārabbhā satim paṭilabhatī”ti, tasmā “**satindriyepi eseva nayo**”ti vuttaṃ. Saddhindriyādiniddesesu pana na tathā deseti.

2. Paṭhamasaṃkhittasuttavaṇṇanā

482. Indriyānaṃ tikkhādibhāvo vipassanāvasena vā maggavasena vā phalavasena vā gahetabboti vuttaṃ “**tatoti...pe... veditabba**”nti. Nanu cettha mudubhāvo eva pāḷiyaṃ gahitoti? Saccametaṃ, taṃ pana tikkhabhāve asati na hoti tikkhādibhāvoti vuttaṃ. Yato hi ayaṃ mudu, ito taṃ tikkhanti vattabbaṃ labhati apekkhāsiddhattā tikkhamudubhāvānaṃ pārāpāraṃ viya. Idāni “tato”tiādīnā saṅkhepato vuttamatthaṃ vitthārato dassetuṃ “**samattānī**”tiādī vuttaṃ. Tattha **samattānī**ti sampannāni. Itaraṃ tasseva vevacanaṃ. **Samattānī**ti vā pariyattāni, samattānīti attho. “Tato mudutarāni dhammānusārīmagassā”ti kasmā vuttaṃ? Tatoti hi sotāpattimaggavipassanindriyāni adhippetāniyeva, “tato mudutarāni”ti vuttapaṭhamamaggo dhammānusārī vā siyā saddhānusārī vāti byabharati? Nāyaṃ doso, sotāpattimaggekadesavaseneva laddhabbapaṭhamamaggāpekkhāya vipassanāya vibhāgassa adhippetatā. Yo hi sotāpanno hutvā iriyāpathaṃ akopetvā yathānisinnova sakadāgāmimaggam pāpuṇāti, tassa vipassanindriyāni sandhāya avibhāgena vuttaṃ – “tato mudutarāni sotāpattimaggassa vipassanindriyāni nāmā”ti. Yo pana sotāpanno hutvā kālantarena sakadāgāmī hoti, tassa sotāpattimaggatthāya pavattāni vipassanindriyāni nāma honti. So ce dhammānusārīgotto, tassa yathāvuttavipassanindriyato mudutarānīti “**tato mudutarāni dhammānusārīmagassā**”ti vuttaṃ. Vipassanindriyāni nāmāti ānetvā sambandho. Dhammānusārīvipassanindriyato saddhānusārīvipassanindriyānaṃ mudubhāvassa kāraṇaṃ sayameva vakkhati. Dhammena paññāya maggasotaṃ anussaratīti **dhammānusārī**, paññuttaro ariyo. Saddhāya maggasotaṃ anussaratīti **saddhānusārī**, saddhuttaro ariyo.

Evaṃ vipassanāvasena dassetvā maggavasena dassetuṃ “**tathā**”tiādī āraddhaṃ. Sampayogato sabhāvato ca arahattamaggapariyāpannāni **arahattamaggindriyāni. Arahattaphalindriyānī**ti etthāpi eseva nayo.

Idāni phalavasena dassetuṃ “**samattāni paripuṇṇāni**”tiādī vuttaṃ. Sotāpattimaggatthapuggalavasena nānattaṃ jātaṃ, tasmā te dvepi idha tatiyavāre na labbhantīti adhippāyo. Dhammānusārīsaddhānusārīnaṃ nānattaṃ kathaṃ jātanti āha “**āgamanenapi maggenapi**”ti. Tadubhayaṃ dassento “**saddhānusārīpuggalo**”tiādīmāha. **Uddisāpentoti** uddesaṃ gaṇhanto.

Maggo tikkho hoti upanissayindriyānaṃ tikkhavisadabhāvato. Tenāha “**sūraṃ ṇāṇaṃ vahati**”ti. **Asaṅkhārenāti** saraseneva. **Appayogenāti** tasseva vevacanaṃ. Dhammānusārīpuggalo hi āgamanamhi kilese vikkhambhento appadukkhena appakasirena akilamantova vikkhambhetuṃ sakkoti.

Saddhānusārīpuggalo pana dukkhena kasirena kilamanto hutvā vikkhambhetuṃ sakkoti, tasmā dhammānusārissa pubbhāgamaggakkhaṇe kilesacchedakaññaṃ adandhaṃ tikhiṇaṃ hutvā vahati, yathā nāma tikhiṇena asinā kadaliṃ chindantassa chinnaṭṭhānaṃ maṭṭhaṃ hoti, asi khippaṃ vahati, saddo na suyyati, balavavāyāmakiccaṃ na hoti, evarūpā dhammānusārino pubbhāgabhāvanā hoti, saddhānusārino pana pubbhāgakkhaṇe kilesacchedakaññaṃ dandhaṃ na tikhiṇaṃ asūraṃ hutvā vahati, yathā nāma nātītikhiṇena asinā kadaliṃ chindantassa chinnaṭṭhānaṃ na maṭṭhaṃ hoti, asi sīghaṃ na vahati, saddo suyyati, balavavāyāmakiccaṃ icchitabbaṃ hoti, evarūpā saddhānusārino pubbhāgabhāvanā hoti. Evaṃ santepi kilesakkhaye nānattaṃ natthi. Tenāha “**kilesakkhaye panā**”tiādi. **Avasesā ca kilesā khīyanti** saṃyojanakkhayāya yogattā.

3. Dutiyasaṃkhittasuttavaṇṇanā

483. Tatoti phalato phalavemattatāya cariyamānattā. **Indriyavemattatā** saddhādīnaṃ indriyānaṃ nānattena. **Phalanānattanti** arahattaphalādīnānattaṃ. **Puggalanānattanti** anāgāmiādīpuggalanānattaṃ.

4. Tatiyasaṃkhittasuttavaṇṇanā

484. Sīlakkhandhādīhi saddhindriyādīhi ca parito pūraṇena paripūraṃ arahattamaggaṃ karonto nipphattito **arahattaphalaṃ ārādheti** nipphādeti. **Tayo padesaṃaggeti** sīlakkhandhādīnaṃ apāripūriyā ekadesabhūte tayo heṭṭhimamagge. **Padesaṃ** heṭṭhimaphalattayaṃ. **Catūsūti** imasmiṃ vagge paṭhamādīsu catūsu suttesu. Kāmañcetha tatiye “tatoti phalavasena nissakka”nti vuttaṃ, catutthe “paripūraṃ paripūrakārī ārādheti, padesaṃ padesakārī”ti, “catūsūti suttesu missakāneva indriyāni kathitānī”ti pana vacanato vipassanāvasenapi yojanā labbhatevāti daṭṭhabbaṃ.

5-7. Paṭhamavitthārasuttādivaṇṇanā

485-487. Vipassanāvasena nissakkaṃ veditabbaṃ, na maggaphalavasena, imasmiṃ sutte sabbasova vipassanindriyānaṃ eva adhippetattā. Idāni tamatthaṃ pākaṭaṃ kātuṃ “**paripuṇṇāni hī**”tiādi vuttaṃ. Avihādīsu pañcasu suddhāvāsesu tattha tattha āyuvemajjhaṃ anatikkamitvā antarā kilesapariniḅbānena pariniḅbāyanato **antarāpariniḅbāyī**, asaṅkhāreṇa appayogena sarasatova pariniḅbāyanato **asaṅkhārapariniḅbāyī**, tabbipariyāyato **sasaṅkhārapariniḅbāyī**, uddhaṃ vāhibhāvena uddhamassa taṇhāsotaṃ vaṭṭasotaṃ vāti **uddhaṃsoto**, uddhaṃ vā gantvā paṭilabhitabbato uddhamassa maggasotanti **uddhaṃsoto**, akaniṭṭhabhavaṃ gacchatīti **akaniṭṭhagāmīti** evamettha saddattho daṭṭhabbo.

Imasmiṃ pana ṭhāneti “vipassanāvasena nissakka”nti vuttaṭṭhāne. **Arahattamaggeyeva ṭhatvāti** imasmiṃyeva bhava arahattamaggeyeva, na vipassanāya ca ṭhatvā. **Pañca nissakkāni nīharitabbānīti** “tato mudutarehi antarāpariniḅbāyī hotī”tiādīni pañca nissakkāni niddhāretvā kathetabbāni. Idāni tamatthaṃ vivaranto “**arahattamaggassa hī**”tiādīmāha. Tattha avihādīsu uppajjitvā uppannasamanantarāya pariniḅbāyanato **paṭhamaantarāpariniḅbāyī**. Tattha āyuppamāṇavemajjhaṃ appatvāva pariniḅbāyanato **dutiyaantarāpariniḅbāyī**, āyuvemajjhaṃ patvā pariniḅbāyanato tato paraṃ **tatiyaantarāpariniḅbāyī** veditabbo. “Pañca nissakkānī”ti kasmā vuttaṃ? Nanu asaṅkhārasasaṅkhārapariniḅbāyīti vattabbanti? Na vattabbanti dassento āha “**asaṅkhārapariniḅbāyissa sasaṅkhārapariniḅbāyinopi eteva pañca janā**”ti.

Tīṇi nissakkānīti “tato mudutarehi sotāpanno hotī”tiādīni tīṇi nissakkapadāni. Idha sakadāgāmī na gahito, so anāgāmimagge ṭhatvā nīharitabbo, anāgāmimaggassa vipassanindriyehi mudutarehi sakadāgāmī hoti. **Sakadā...pe... mudutarānīti** idaṃ sakadāgāmimaggassa vipassanindriyehi ekabjisaṅkhātasotāpannavipassanindriyāni mudutarāni hontīti tīṇi katvā vuttaṃ. **Dhammānusārīti**ādīdivayaṃ kolaṃkolādīdivayena gahitaṃ hotīti. **Sakadāgāmimaggassa hīti**ādi vuttasseva atthassa vivaraṇaṃ. Sesāṃ heṭṭhā vuttanayameva. **Chaṭṭhasattamāni vuttanayānevāti**

chaṭṭhasattamāni suttāni dutiyatatiyesu vuttanayāneva. Tattha pana missakāni indriyāni kathitāni, idha pubbabhāgavipassanindriyāni kathitānīti ayameva viseso.

8. Paṭipannasuttavaṇṇanā

488. Tanti maggaphalavasena nissakkaṃ. **Pāḷiyaṃ vuttameva** “arahattaphalasadchikiriyāya paṭipanno hotī”tiādīnā. **Aṭṭhahīti** catūhi phalehi catūhi ca maggehīti aṭṭhahi. **Bahibhūto** na antobhāvo. **Lokuttarāneva indriyāni kathitāni** maggaphalacittuppādapariyāpannattā.

9-10. Sampannasuttādivaṇṇanā

489-490. **Indriyasampannoti** ettha **sampannasaddo** paripūriatthoti āha “**paripunṇindriyo**”ti. **Missakāni indriyāni kathitāni** sāmāññatova desitattā.

Mudutaravaggavaṇṇanā niṭṭhitā.

3. Chaḷindriyavaggo

2. Jīvitindriyasuttavaṇṇanā

492. **Itthibhāveti** itthitāya. **Indaṭṭhaṃ karoti** tathāsattajanasāmāññakāraṇabhāvato. Itthiyā eva indriyaṃ **itthindriyaṃ**. Esa nayo purisindriye. **Jīveti** sahaḷāṭṭhadhammānaṃ jīvane pālāne pavattane. **Vaṭṭindriyānīti** vaṭṭahetubhūṭāni indriyāni. Imesu hi upādinnaindriyesu sati vaṭṭaṃ vattati paññāyati.

3. Aññindriyasuttavaṇṇanā

493. **Ajānitapubbaṃ dhammanti** catusaccadhammānaṃ, tathā **tesaṃyeva ñātadhammānanti**. Ayaṃ panettha attho – ājānātīti **aññā**, paṭhamamaggena ñātamanatikkamitvā jānātīti attho. Soṭāpannādīnaṃ chaariyānaṃ etaṃ nāmaṃ. Aññassa indriyāni **aññindriyāni**. **Aññātāvīsūti** ājānitavantesu. Yasmā aggaphaladhammesu ñāṇakiccaṃ sātisaṃyaṃ, tasmā taṃ kiccaṃ sesadhammesupi samāropetvā vuttaṃ “**aññātāvīsū arahattaphaladhammesū**”ti. **Tattha tattha** tesu tesu maggaphalesu. **Tena tenākārenāti** anaññātājānanādiākārena.

4. Ekabijisuttavaṇṇanā

494. **Vipassanato nissakkanti** vipassanindriyehi nissakkaṃ. Idāni tameva saṅkhepato vuttamatthaṃ vivaranto “**samattānī**”tiādīmāha. **Tīṇi nissakkāni evamidha pañca nissakkāni nīharitabbāni** ekabijīādivibhāvanato. Tenāha “**sakadāgāmimagassa hī**”tiādī. **Soṭāpattimagassa vipassanindriyāni** nāma tenattabhāvena sakadāgāmimaggaṃ pattuṃ gacchantassa soṭāpannassa vipassanindriyāni. Pañcapi te soṭāpattimagassa bhedaṃyevāti “**sakadāgāmimamme thatvā nīharitabbāni**”ti vuttaṃ.

Ekabijīti ettha khandhabijāṃ nāma kathitaṃ. Yassa hi soṭāpannassa ekaṃ khandhabijāṃ atthi, ekaṃ attabhāvaggahaṇaṃ, so ekabijī nāma. Tenāha – “**soṭāpanno hutvā**”tiādī. **Mānusakam bhavanti** idaṃ panettha desanāmattaṃ, devabhavaṃ nibbattetītipi vattuṃ vaṭṭatīyeva. Bhagavatā gahitanāmānetāni. Ettakañhi pamāṇaṃ gato sattakkhattuparamo nāma hoti, ettakaṃ kolaṃkolo, ettakaṃ ekabijīti bhagavatā etesaṃ nāmaṃ gahitaṃ.

Dve tayo bhaveti devamanussesu eva dve tayo bhave. Sambodhicatusaccadhammo paraṃ ayaṇaṃ nissayo gati etassāti **sambodhiparāyaṇo**. Kulato kulaṃ gacchatīti **kolaṃkolo**.

Sotāpatti phalasacchikiriya to paṭṭhāya hi nīcakule uppatti nāma natthi, mahābhogesu kulesu eva nibbattatīti attho. Kevalopi hi kula-saddo mahābhogakulameva vadati. **Dve vā tīpi vā kulānīti** devamanussavasena dve vā tayo vā bhaveti ayampi missakabhavena kathito. Jātassa kumārassa viya ariyāya jātiyā jātassa nāmameṭaṃ, yadidaṃ niyatoti sattakkhattuparamādikoti ca samaññāti dassento āha “**bhagavatā gahitanāmasenevā**”tiādi.

Yadi pubbahetuniyamato sotāpanno ca niyatoti sotāpattimaggato uddhaṃ tiṇṇaṃ maggānaṃ upanissayābhāvato pubbahetukiccaṃ natthīti sotāpattimaggassa upanissayabhāvo āpajjati. Yadi tassapi pubbahetuupanissayo siyā, tāva niyamato sotāpattimagguppattito pubbe eva niyamito, yāvañca akaniṭṭhaṃ tassa pubbahetu nāma, ahetaṃ kātā āpannā, iccassa aheta appaccayā nipphatti pāpuṇāti. Kiñca hetu ce? Niyamato sotāpanno ca niyatoti paṭhamamaggādhigameneva anukkamena upari tiṇṇaṃ maggānaṃ kiccāni nipphajjanti, evaṃ sattakkhattuparamatādiniyame sati sattamabhavādito uddhaṃ pavattatāya dukkhassa mūlabhūtā kilesā paṭhamamaggeneva khīṇāti upari tayo maggā akiccā siyuṃ. Tenāha “**paṭhamamaggassa upanissayo kato nāmā**”tiādi.

Yadi upari tayo maggā sattakkhattuparamāditaṃ niyamenti, tato ca añño sotāpanno natthīti sotāpattimaggassa akiccakatā nippayojanatā āpajjeyya. Atha sakkāyadīṭṭhiādippahānaṃ tassa kiccaṃ, tesam tesam pahānena sattakkhattuparamādiniyamatāya. Bhavitabbaṃ, yāva uparimaggā eva honṭīti sattabhavādito uddhamapavattanato tena vinānena sakkāyadīṭṭhiādippahānena ca tena vinā bhavitabbanti āha – “**paṭhamamagge anuppanneva upari tayo maggā uppannāti āpajjati**”ti. **Tiṇṇaṃ maggānanti** upari tiṇṇaṃ maggānaṃ. **Vipassanā niyameṭīti yujjati**ti vuttamatthaṃ vivaranto “**sace hī**”tiādimāha.

Sotāpanno vaṭṭajjhāsayo. Tatrekacce pākāṭe paññāte dassento “**anāthapiṇḍiko**”tiādimāha. **Idhaṭṭhakavokiṇṇasukkhavipassakassāti** yo imasmiṃ kāmabhava ṭhito manussadevavasena vokiṇṇabhavūpapattiko sukkhavipassako ca, tassa vasena. **Nāmaṃ kathitanti** sattakkhattuparamoti nāmaṃ kathitaṃ. Keci pana “kāmabhava sattakkhattuṃyeva uppajjati, na tato”ti vadanti, taṃ vīmaṃsitabbaṃ.

Sodhessāmīti jambudīpe kenaci tepiṭakena bhikkhunā saddhiṃ piṭakattayameva mayhaṃ uggahaparipucchāvasena sodheyyāmīti **paratīraṃ** jambudīpaṃ gato. Yo bhikkhu sakkotīti yojanā. Aniccānupassanādīsu ekamukhena abhiniviṭṭhenapi abhidhammapariyāyena tīhi eva vimokkhehi maggaṃ labhatīti abhinivesabhedenā tayo puggalā suññatato vuṭṭhitā, tathā tayo appaṇihitato vuṭṭhitāti cha honti, teva saddhādthurapaññādthuravasena **dvādasa sakadāgāmino**. Tathā **arahanto**, tayo antarāparinibbāyino eko upahaccaparinibbāyī eko uddhaṃsoto akaniṭṭhagāmīti pañca, te asaṅkhārasasaṅkhāraparinibbāyibhedena dasāti avihādīsu catūsopi cattālīsa, akaniṭṭhe pana uddhaṃsoto natthīti **aṭṭhacattālīsa anāgāmino**. **Vipassanā kathitā** sammasanacārassa kathitattā.

5-10. Suddhakasuttādivaṇṇanā

495-500. Yathā cakkhussa sahaṅgātatadindriyanissitadhammesu adhipateyyaṃ anuvattanīyattā, evaṃ taṃdvārikadhammesupi adhipateyyaṃ tehi anuvattanīyattāti vuttaṃ – “**adhipateyyasaṅkhātena indaṭṭhenā**”ti. Esa nayo sesindriyādīsopi. **Catusaccavasena kathitāni** sabhāvādivibhāvanassa kathitattā.

Chaḷindriyavaggaṇṇanā niṭṭhitā.

4. Sukhindriyavaggo

1-5. Suddhikasuttādivaṇṇanā

501-505. Yathā cakkhu dassane adhipateyyaṭṭhena cakkhundriyaṃ, evaṃ sukhavedanā sukhane

adhipateyyaṭṭhena sukhindriyaṃ. Esa nayo sesesupi. **Sesaṃ tebhūmakanti** sesaṃ bhūmittayavasena tebhūmakam.

6. Paṭhamavibhaṅgasuttavaṇṇanā

506. Kāyikanti ayamassa nissayavasena niddesoti āha – “**kāyapasādavatthuka**”nti.

Sarūpaniddeso sukhaṃ sukhindriyassa sarūpanti. Sādanīyaṭṭhena dhammapadāni attani assādayatīti **sātaṃ**, madhuraṃ. **Vedayitanti** vediyaṇaṃ, anubhavananti attho. **Aññadhammavisitṭho**ti phassādīhi aññehi dhammehi visadiso. **Kāyikanti** pasādakāyasannissitaṃ. **Cetasikanti** cetosannissitaṃ, tena vuttaṃ “**ettha panā**”tiādi. **Kāyapasāda...pe... natthi**, tasmā “**cattāro pasādakāye vatthum katvā**”ti vuttaṃ.

9. Kaṭṭhopamasuttavaṇṇanā

509. Dvinnaṃ araṇīnanti adharuttarāraṇīnaṃ. Kiñci dvayaṃ saṅghaṭṭitamattaṃ hutvā na samodhānagataṃ hotīti taṃnivattanattaṃ “**saṅghaṭṭanasamodhānā**”ti vuttaṃ. Punappunaṃ saṅghaṭṭanena hi tejopātubhāvo. **Adharāraṇī viya vatthārammaṇaṃ** asatipi vāyāme tajjasamphassapaccayato. **Uttarāraṇī viya phasso** vatthārammaṇādiphassena pavattanato. **Saṅghaṭṭo viya phassasaṅghaṭṭanaṃ** araṇidvayasāṅghaṭṭanā viya phassasseva vatthārammaṇesu saṅghaṭṭanākārena pavattito. **Aggi viya vedanā** anudhanaṭṭhena khaṇikāvāyañca. **Vatthārammaṇaṃ vā uttarāraṇī viya** indhanāpātagahaṇādīsu ussāhassa viya pavattisambhavato. **Phasso adharāraṇī viya** nirussāhanirīhatāvasena attasādhanato.

10. Uppaṭipāṭikasuttavaṇṇanā

510. Rasaṇaṃ bhañjanaṃ nirujjhaṇaṃ raso. Yo yo dhammānaṃ raso yathādhammaraso, tena **yathādhammarasena. Paṭipāṭiyāti** kamena, ubhayenapi dhammānaṃ pahānakkamenāti vuttaṃ hoti. **Imasmiṃ indriyavibhaṅgeti** imasmiṃ indriyasamuyuttasaññite indriyavibhaṅge. **Adesitattāti** sesasuttāni viya “sukhindriya”ntiādinā adesitattā idaṃ **uppaṭipāṭikasuttaṃ nāma. Valiyā** kharasamphassāya **phuṭṭhassa. Tanti** kaṇṭakavedanādī. **Etassa** dukkhindriyassa.

Tesaṃ tesanti domanassindriyādīnaṃ. **Kāraṇavasenevāti** taṃtaṃasādhāraṇakāraṇavasena. Tesañhi visesakāraṇaṃ dassento “**pattacīvarādīnaṃ vā**”ti āha.

Ekato vāti punappunaṃ paduddhāraṇaṃ akatvā ekajjhameva. Dutiyajjhānādīnaṃ upacārakkhaṇe eva nirujjhantīti ānetvā sambandho. **Tesaṃ** dukkhindriyadomanassādīnaṃ. **Atisayanirodhoti** suṭṭhu pahānaṃ ujuppaṭipakkhena vūpasamo. **Nirodhoyevāti** nirodhamattameva. **Nānāvajjaneti** yena āvajjana appanāvīthi hoti, tato bhijjāvajjane, anekāvajjane vā. Appanāvīthiyañhi upacāro ekāvajjano, itaro anekāvajjano anekakkhattuṃ pavattanato. Visamanisajjāya uppannakilamatho **visamāsanupatāpo. Pītipharāṇenāti** pītiyā pharaṇarasattā. Pītisamuṭṭhānānaṃ vā paṇītarūpānaṃ kāyassa byāpanato vuttaṃ. Tenāha “**sabbo kāyo sukhokkanto hotī**”ti. **Vitakkavicārapaccayepīti pi**-saddo aṭṭhānapayutto, so “pahīnassā”ti ettha ānetvā sambandhitabbo “pahīnassapi domanassindriyassā”ti. Etaṃ domanassindriyaṃ uppajjati sambandho. “Tassa mayhaṃ aticiraṃ vitakkayato vicārayato kāyopi kilami, cittampi vihaññī”ti ca vacanato kāyacittakhedānaṃ vitakkavicārapaccayatā veditabbā. Vitakkavicārabhāve uppajjati domanassindriyanti ānetvā sambandhitabbaṃ. **Tatthassa siyā uppattīti** tattha dutiyajjhānupacāre assa domanassassa uppattī bhaveyya. “Tatthassa siyā uppattī”ti idaṃ parikappavacanāṃ upacārakkhaṇe domanassassa suppahīnabhāvadassanattaṃ. Tathā hi vuttaṃ “**na tveva dutiyajjhāne pahīnapaccayattā**”ti. Pahīnampi somanassindriyaṃ pīti viya na dūreti katvā “**āsannattā**”ti vuttaṃ. Nānāvajjanupacāre pahīnampi pahānaṅgaṃ paṭipakkhena avihatattā antarantarā uppajjeyyāti imamatthaṃ dassento “**appanāppattāyā**”tiādimāha. “Tādisāya āsevanāya icchitabbattā yathā maggavīthito pubbe dve tayo javanavārā sadisānupassanāva pavattanti, evamidhāpi appanāvārato

pubbe dve tayo javanavārā upekkhāsahagatāva pavattantī”ti vadanti. **Aparisesanti** suvikkhambhitanti katvā vikkhambhanena anavasesaṃ.

Tathattāyāti tathabhāvāya paṭhamajjhānasamaṅgitāya. Sā panassa uppādanena vā uppanassa samāpajjanena vā hotīti vuttaṃ “**uppādanatthāya samāpajjanatthāyā**”ti. **Dvīsūti** navamadasamesu suttantesu.

Sukhindriyavaggaṇṇanā niṭṭhitā.

5. Jarāvaggo

1. Jarādhammasuttavaṇṇanā

511. Pamukhe, pāsādassa ca pacchimabhāge ātapo pacchātapo, tasmim **pacchātape**. So hi pāsādassa pamukhabhāvena kato. Kim pana bhagavato vajirasāraṃ sarīraṃ otāpetabbaṃ hotīti āha – “**sammāsambuddhassā**”tiādi. **Ayañca** imaṃ suttaṃ desitasamaye. **Na sakkoti** byāmapabhāya kāyaci pabhāya anabhibhavanīyattā. Kiñcāpi buddhābhā sūriyābhāya anabhibhavanīyā, ghammasabhāvatāya pana rasmīnaṃ parito pharantī sūriyābhā tikhiṇā uṇhāti āha “**rasmiteja**”nti. Idāni tamatthaṃ upamāya vibhāvetuṃ “**yatheva hī**”tiādi vuttaṃ.

Suvaṇṇāvaṭṭaṃ viyāti acche suvaṇṇapatte vinivattaāvaṭṭaṃ viya. **Garahaṇacchariyaṃ nāma kiretaṃ** “acchariyametam avisiccephalavada”ntiādīsu viya. **Na evametarahīti** attano pākaṭavasena vadati, na itaresampīti. **Sirājālāti** sirāsantānā. **Evarūpaṃ na hotīti** aññesaṃ pākatikasattānaṃ vuttākāraṃ viya na hoti puññasambhārassa ulāratamattā vipaccanassa pariyantagattā. Tenāha “**aññesaṃ apākaṭa**”nti. **Valiyāvaṭṭakanti** appakaṃ valiyāvaṭṭaṃ. Tenāha “**kesaggappamāna**”nti. **Sabbānīti** sirājālāni. **Purato vañkoti** thokaṃ purato natamattaṃ sandhāyāha. Tena vuttaṃ “**svāyaṃ aññesaṃ apākaṭa**”ti. **Nayaggāhatoti** anumānato. **Dhī tanti dhī**-saddayoge upayogavacanaṃ. **Dhīti** jigucchanaṭṭhe nipāto. **Dhikkāroti** jigucchāpayogo. **Taṃ phusatūti** tuyhaṃ pāpuṇātu.

2. Uṇṇābhabrāhmaṇasuttavaṇṇanā

512. Aññamaññassāti añño aññassa. **Na paccanubhoti** attano avisayabhāvato. Idāni taṃ aññavisayataṃ anvaṃyato byatirekato vibhāvetuṃ “**sace hī**”tiādi vuttaṃ.

Visayāni paṭisaranti etthāti **paṭisaraṇaṃ**. Indriyaviññāṇāni hi asatipi tādise adhippāye attano ārammaṇassa yāthāvato sampajānanato pavedanaviññāṇāni karontāni viya pavattanti, tathā lokassa aññattha siddhito. Tenāha bhagavā – “mano paṭisaraṇaṃ, manova nesam gocaravisayaṃ paccanubhoti”ti manodvārikajavanamano hi savisesaṃ manovisayaṃ paccanubhoti, pañcadvārikajavanamano mananamattameva paccanubhavati. **Rajjanādiggahaṇaṇcetta** nidassanamattaṃ, tasmā saddahanādipi gahitamevāti daṭṭhabbaṃ, pañcadvārappavattivasena tathā vuttaṃ. **Ekasmim pana dvāreti** cakkhudvāre.

Dubbalabhojakāti appānubhāvā rājabhoggā. **Āyanti** bhoguppattiṭṭhānaṃ. Yottabandhādinimittaṃ laddhabbakahāpaṇo **yottakahāpaṇo**. Addubandhādinimittaṃ gahetabbakahāpaṇo **addukahāpaṇo**. Māghātaghosanāya katāya hiṃsānimittaṃ gahetabbakahāpaṇo **māpahārahāpaṇo**. Tassa parimāṇaṃ dassetuṃ “**aṭṭhakahāpaṇo**”tiādi vuttaṃ. **Satavatthukanti** satakarīsavatthukaṃ.

Maggasatīti ariyamaggasati. Bhāvanamanuyuñjantassa hi javanamano ussakkivāva **maggasatiṃ paṭisarati** tappariyosānattā. **Tanti** nibbānaṃ. **Sāti** phalavimutti. **Paṭisarati** aggamaggasatiyā. Phalavimutti nibbānanti ubhayaṃ maggassa siddhāyevāti. Ārammaṇavasena natthi etassa paṭisaraṇanti

appaṭisaraṇaṃ asaṅkhatāmatassa santiniccasabhāvattā. Sayamaṃ pana sabbesaṃyeva ariyānaṃ paṭisaraṇaṃ. Tenāha “nibbānaṃ arahato gati”’ti (pari. 339). **Nibbānaṃ anupavittamaṃ** nibbānanissayattā. **Na tato paraṃ gacchati** gatassa aññassa tādisassa abhāvā. Nibbānaṃ pari sabbaso osānanti **nibbānapariyosānaṃ**.

Mūlajātā jātamūlā. Tato eva **patiṭṭhitā**. Kā panassāti āha “**maggena āgatasaddhā**”’ti. Maggo dalhāya asaṃhāriyasaddhāya mūlaṃ diṭṭhisampayuttāni ceva vicikicchācittañcāti **pañca akusalacittāni** samucchadavasena **pahīnāni**. **Pañca nīvaraṇānī**ti ettha apāyagamanīyāni paṭhamamaggeneva pahīnāni, itarāni vikkhambhanavasena jhānena pahīnānīti pañcasu orambhāgiyakilesasaṃyojanesu ekadesavigameneva bahiddhāsaṃyojano viya jātoti vuttaṃ “**jhānaanāgāmitṭhāne tṭhito**”’ti. Tenāha “so aparihīna...pe... nibbāyeyyā”’ti.

5. Paṭhamapubbārāmasuttavaṇṇanā

515. Pubbakotṭhake evamaṃ āgatasuttaṃ ādiṃ katvā **phalindriyāneva kathitāni** aggaphalavasena desanāya āgatattā.

10. Āpaṇasuttavaṇṇanā

520. Upari saha vipassanāya tayo maggāti vipassanāya saha sotāpattiphalato upari tayo maggā. Maggādhigamena idāni paccakkhabhūtatā “ime kho te dhammā”’ti vuttā. Tattha yaṃ aggabhūtaṃ, tassa vasena dassetuṃ “**arahattaphalindriyaṃ nāma**”’ti vuttaṃ indriyabhāvasāmaññena ekajjhaṃ katvā. **Ativijjhivā passāmī**ti sacchikatvā yāthāvato passāmi. **Catūhi indriyehī**ti vīriyindriyādīhi catūhi indriyehi. Sā vipassanāmaggaphalasaḥagatā siyāti missakā vuttā.

Jarāvaggavaṇṇanā niṭṭhitā.

6. Sūkarakhatavaggo

1. Sālasuttavaṇṇanā

521. Sūrabhāvenāti atisūrabhāvena. **Bujjhanatthāyāti** saccapaṭivedhāya.

2. Mallikasuttavaṇṇanā

522. **Cattāri indriyānī**ti paññindriyaṃ tṭhapetvā sesāni cattāri. “**Ariyāñānaṃ lokuttara**”’nti vuttaṃ maggañānaṃ katvā. Ariya-saddo pana yathā tathā visuddhepi hotīti tādisaṃ sandhāya vuttaṃ “**tampi panā**”’tiādi. Yathā hi cattāriindriyāni missakāni, evamaṃ paññindriyampi missakanti vuccamāne na koci virodhoti adhippāyenāha “**tampi pana...pe... vaṭṭatī**”’ti.

3. Sekhasuttavaṇṇanā

523. **Na sakkoti** indriyānaṃ aparipakkattā. **Atthīti pajānāti** nayaggāhena, na paccakkhato. Na hi ariyāpi anadhigataṃ maggaphalaṃ paccavekkhituṃ sakkonti.

6. Patiṭṭhitasuttavaṇṇanā

526. **Sāsavesūti** caturāsavavinimuttasu sesadhammesu ārammaṇesu. Tesupi uppajjanakaanatthato **cittamaṃ rakkhati nāma**.

8. Sūkarakhatasuttavaṇṇanā

528. Taṃ sandhāyāti taṃ sūkarakhataleṇaṃ sandhāya. **Etam** “sūkarakhatāya” nti vacanaṃ vuttaṃ. **Bhāvanapūṃsakanti** bhāvajotakaṃ napūṃsakavacanaṃ yathā “visamaṃ vātā vāyanti, ekamantaṃ nisīdī” ti. Kiccapaṭipatti tesam saṃkāsaṇaṭṭhena sapatiso, sapatiso eva **sappatisso**, sajeṭṭhakoti āha “**sappatissoṭi sajeṭṭhako**” ti.

Sūkarakhataavaggavaṇṇanā niṭṭhitā.

7. Bodhipakkhiyavaggavaṇṇanā

531-650. Sattānaṃ phalānaṃ hetubhūtāni “imesaṃ kho, bhikkhave, pañcanaṃ indriyānaṃ bhāvitattā” tiādinaṃ vuttāni, pañcindriyāniyeva phalūpacārena “**satta phalāni**” ti vuttāni. Tāni ca **pubbabhāgāni** “imesaṃ, bhikkhave, pañcanaṃ indriyānaṃ bhāvitattā...pe... sattānisamsā pāṭikaṅkhā” ti vacanato. **Tesanti** sattānaṃ phalānaṃ. “Dvinnaṃ phalānaṃ aññataraṃ phala” nti evaṃ atītasutte vuttāni heṭṭhā dve phalāni nāmāti vadanti. Yehi pana indriyehi aññatra pana antarāparinibbāyim sesāni phalāni honti, tāni cattāri sapubbabhāgāni lokuttarānīti vuttaṃ siyā.

Indriyasamūyuttavaṇṇanā niṭṭhitā.

5. Sammappadhānasamūyuttavaṇṇanā

651-704. Sammappadhānasamūyutte pubbabhāgavipassanāva kathitā “akusalānaṃ dhammānaṃ pahānāyā” tiādivacanato.

Sammappadhānasamūyuttavaṇṇanā niṭṭhitā.

6. Balasamūyuttavaṇṇanā

705-812. Balasamūyutte balāni missakāneva kathitāni “vivekanissita” nti vacanato.

Balasamūyuttavaṇṇanā niṭṭhitā.

7. Iddhipādasamūyuttam

1. Cāpālavaggo

1. Apārasuttavaṇṇanā

813. Chandaṃ nissāya pavatto samādhīti kattukamyatāchandaṃ adhipatiṃ katvā paṭiladdhasamādhī **chandhasamādhī. Padhānasaṅkhārāti** catukiccasādhakassa sammappadhānavīriyassettaṃ adhivacanaṃ. **Tehīti** chandasamādhīpadhānasaṅkhārehi. **Iddhiyā pādanti** nipphattipariyāyena ijjanaṭṭhena, ijjhanti etāya saddhā iddhā vuddhā ukkaṃsagatā hontīti iminā vā pariyāyena “**iddhī**” ti saṅkhātānaṃ upacārājjhānadikusalacittasampayuttānaṃ chandasamādhīpadhānasaṅkhārānaṃ adhiṭṭhānaṭṭhena pādabhūtaṃ, sesacittacetāsikarāsinti attho. Sā eva ca yathāvuttaiddhi yasmā heṭṭhimā heṭṭhimā uparimāya uparimāya pādabhūtā, tasmā vuttaṃ “**iddhibhūtaṃ vā pādanti iddhipāda**” nti. **Sesesūti** vīriyasamādhīādīsu. Tattha hi vīriyaṃ cittaṃ vīmaṃsaṃ adhipatiṃ katvā paṭiladdhasamādhī vīmaṃsāsamādhīti attho vedītabbo. **Idhāti** imasmiṃ iddhipādasamūyutte. **Ekaparicchedova** atthaniddeso.

5. Iddhipadesasuttavaṇṇanā

817. Iddhipadesanti iddhiyā ekadesaṃ. Ko pana soti āha – “**tayo ca magge tīṇi ca phalānī**”ti.

6. Samattasuttavaṇṇanā

818. Samattanti sāmāññaṃ samaṃ attanaṃ ijghanāṃ samattaṃ paripuṇṇaṃ. **Vivaṭṭapādakā eva iddhipādā kathitā** “apārā pārāṃ gamaṇāya saṃvattanti”tiādivacanato.

10. Cetiyasuttavaṇṇanā

822. **Udenayakkhassa cetiyatṭhāneti** udenassa nāma yakkhassa devāyatanaśāṅkhepena itṭhakāhi kate mahājanassa cittikatatṭhāne. **Katavihāro**ti bhagavantaṃ uddissa tattha katavihāro. **Vuccatī** purimavohārena “udenacetiya”nti vuccati. **Gotamakādīsūpī**ti gotamakacetiyanti evamādīsūpi. **Eseva nayoti** cetiyatṭhāne katavihārabhāvaṃ atidisati. **Vaḍḍhitā**ti bhāvanāpāripūrivaseṇa paribrūhitā. **Punappunaṃ katāti** bhāvanāya bahulīkaraṇavasena aparāparaṃ pavattitā ānītā. **Yuttayānaṃ viya katāti** yathā yuttamājāññayānaṃ chekena sārathinā adhiṭṭhitāṃ yathāruci pavattimarahaṭi, evaṃ yathāruci pavattanārahataṃ gamitā. **Paṭiṭṭhānatṭhena**ti adhiṭṭhānatṭhena. **Vatthu viya katāti** sabbaso upakkilesavisodhanena iddhivisesānaṃ pavattitṭhānabhāvato suvisodhitaparissayavatthu viya katā. **Adhiṭṭhitā**ti paṭipakkhadūrībhāvato subhāvitabhāvena taṃtaṃ adhiṭṭhānayogyatāya ṭhapitā. **Samantato citāti** sabbabhāgeṇa bhāvanupacayaṃ gamitā. Tenāha “**suvaḍḍhitā**”ti. **Suṭṭhu samāraddhāti** iddhibhāvanāya sikhappattiyā sammadeva saṃsevītā.

Aniyamenāti “yassa kassacī”ti aniyatavacanena. **Niyametvāti** “tathāgatassā”ti sarūpaggahaṇena niyametvā. **Āyuppamāṇanti** paramāyuppamāṇaṃ vadati. Tasseva gahaṇe kāraṇaṃ brahmajālavaṇṇanāyaṃ vuttanayeneva veditabbaṃ. **Mahāsivatthero** pana mahābodhisattānaṃ carimabhava paṭisandhidāyino kammaṃ asaṅkheyyāyukatāsaṃvattanasamatthataṃ hadaye ṭhapetvā buddhānaṃ āyusaṅkhārassa parissayavikkhambhanasamatthataṃ pāḷiyaṃ āgatā evāti imaṃ bhaddakappameva tiṭṭheyāti avoca.

Khaṇḍiccādīhi abhisuyyati etena yathā iddhibalena jarāya na paṭighāto, evaṃ tena maraṇassapi na paṭighātoti atthato āpannamevāti. “Kva saro khitto, kvacani patito”ti aññathā vuṭṭhitenapi theravādena aṭṭhakathāvacanameva samatthitanti daṭṭhabbaṃ. Tenāha “**so pana na ruccati...pe... niyamita**”nti.

Pariyuṭṭhitacittoti yathā kiñci atthānatthaṃ sallakkhetuṃ na sakkā, evaṃ abhibhūtacitto. So pana abhibhavo mahatā udakoghena appakassa udakassa ajjhottharaṇaṃ viya ahoṣīti vuttaṃ “**ajjhotthacitto**”ti. **Aññoti** therato, ariyehi vā añño yo koci paro puthujjano. Puthujjanaggahaṇaṇicettha yathā sabbena sabbaṃ appahīnavipallāso mārena pariyuṭṭhitacitto kiñci atthānatthaṃ sallakkhetuṃ na sakkoti, evaṃ thero bhagavatā kataṃ nimittobhāsaṃ sabbaso na sallakkhesīti dassanattaṃ. Tenāha “**māro hī**”tiādi. **Cattāro vipallāsāti** asubhe “subha”nti saññāvipallāso, cittavipallāso, dukkhe “sukha”nti saññāvipallāso, cittavipallāsoti ime cattāro vipallāsā. **Tenāti** yadipi itare aṭṭha vipallāsā pahīnā, yathāvuttānaṃ catunnaṃ vipallāsānaṃ appahīnabhāvena. **Assāti** therassa.

Maddatīti phusanaṃ maddanta viya hoti, aññathā tena maddite sattānaṃ maraṇameva siyā, kiṃ sakkhissati na sakkhissatīti adhippāyo. Kasmā na sakkhissati? Nanu esa aggasāvakaṃ mahiddhikassa mahānubhāvassa kucchim paviṭṭhoti? Saccāṃ paviṭṭho, tañca kho attano mahānubhāvassa dassanattaṃ, na vibādhanādhippāyena. Vibādhanādhippāyena pana idha “**kiṃ sakkhissatī**”ti vuttaṃ hadayaṃ maddanassa adhikatatā. **Nimittobhāsanti** ettha “tiṭṭhatu bhagavā kappā”nti sakalakappaṃ avatṭhānāyācanāya “yassa kassacī, ānanda, cattāro iddhipādā bhāvitā”tiādinā

aññāpadesena attano caturiddhipādabhāvanānubhāvena kappam avatṭhānasamatthatāvasena saññuppādanam nimittam. Tathā pana pariyāyaggahaṇam muñcivā ujukamyeva attano adhippāyavibhāvanam obhāso. **Jānantoyevāti** mārena pariyuṭṭhitabhāvam jānanto eva. Attano aparādhahetuko sattānam soko tanuko hoti, na balavāti āha – **“dosāropanena sokatanukaraṇattha”**nti. Kiṃ pana thero mārena pariyuṭṭhitacittakāle pavattiṃ pacchā jānāti? Na jānāti sabhāvena, buddhānubhāvena pana jānāti.

Anatthe niyojento guṇamāraṇena **māreti**, virāgavibandhanena vā jātinimittatāya tattha tattha jātam mārento viya hotīti **“māretīti māro”**ti vuttam. Atipāpattā **pāpimā**. Kaṇhadhammasamannāgato **kaṇho**. Virāgādiguṇanam antakaraṇato **antako**. Sattānam anattāvaham paṭipattiṃ na muñcatīti **namuci**. Attano mārapāsenā pamatte bandhati, pamattā vā bandhū etassāti **pamattabandhu**. Sattamasattāhato param satta ahāni sandhāyāha **“aṭṭhame sattāhe”**ti, na pana pallaṅkasattāhādi viya niyatakiccassa aṭṭhamasattāhassa nāma labbhanato. Sattamasattāhassa hi parato ajapālanigrodhamūle brahmuno sakkassa ca paṭiññātadhammadesanam bhagavantam ṇatvā “idāni satte dhammadesanāya mama visayam atikkāmessati”ti sañjātadomanasso hutvā ṭhito cintesi, “handāham dāni nam upāyena parinibbāpessāmi, evamassa manoratho aññathattam gamissati, mama manoratho ijhissati”ti cintetvā bhagavantam upasaṅkamitvā ekamantam ṭhito – “parinibbātu dāni, bhante, bhagavā”tiādinā parinibbānam yāci. Tam sandhāya vuttam “aṭṭhame sattāhe”tiādi. Tattha **ajjāti** āyusaṅkhāravossajjanadivasam sandhāyāha. Bhagavā cassa atibandhanādhippāyam jānantopi tam anāvikatvā parinibbānassa akālabhāvameva pakāseno yācanam paṭikkhipi. Tenāha **“na tāvāha”**ntiādi.

Maggavasena byattāti saccapaṭivedhaveyyattiyena byattā. **Tatheva vinītāti** maggavasena kilesānam samucchadavinayena vinītā. **Tathā visāradāti** ariyamaggādhigameneva satthusāsane vesārajappattiyā visāradā, sārājjakarānam diṭṭhivicikicchādipāpadhammānam vigamena visāradabhāvam pattāti attho. Yassa sutassa vasena vaṭṭadukkhatō nissaraṇam sambhavati, tam idha ukkaṭṭhaniddesena “suta”nti adhippetanti āha **“tepiṭakavasena”**ti. Tiṇṇam piṭakānam samūho **tepiṭakam**, tīṇi vā piṭakāni piṭakam, piṭakameva **tepiṭakam**, tassa vasena. **Tadevāti** yam tam tepiṭakam sotabbabhāvena sutanti vuttam, tameva. **Dhammanti** pariyattidhammam. **Dhārentīti** suvaṇṇabhājane pakkhittasīhavasam viya avinassantam katvā suppaṇṇasupavattibhāvena dhārenti hadaye ṭhapenti. Iti pariyattidhammavasena bahussutadhammadharabhāvam dassetvā idāni paṭivedhavasenapi tam dassento **“atha vā”**tiādi vuttam. **Ariyadhammassāti** maggaphaladhammassa, navavidhassa vā lokuttaradhammassa. **Anudhammabhūtanti** adhigamāyānurūpaṃ dhammabhūtam. **Anucchavikapaṭipadanti** tameva vipassanādhammamāha, chabbidhā visuddhiyo vā. **Anudhammanti** nibbānadhammassa anudhammo, yathāvuttapaṭipadā, tassānurūpaṃ abhisallekhitam appicchatādidhammam. **Caraṇasīlāti** samādāya vattanasīlā. Anumaggaphaladhammo etissāti vā **anudhammā**, vuṭṭhānagāminivipassanā, tassa caraṇasīlā. **Attano ācariyavādanti** attano ācariyassa sammāsambuddhassa vādam. Sadevakassa lokassa ācārasikkhāpanena **ācariyo**, bhagavā, tassa vādo, catusaccadesanā.

Ācikkhissantīti ādito kathessanti, attanā uggahitanīyāmena pare uggaṇhāpessantīti attho. **Desessantīti** vācessanti, pālīṃ sammā pabodhessantīti attho. **Paññāpessantīti** pajānāpessanti, saṅkāsessantīti attho. **Paṭṭhapessantīti** pakārehi ṭhapessanti, pakāsessantīti attho. **Vivarissantīti** vivaṭṭam karissantīti. **Vibhajissantīti** vibhattam karissantīti. **Uttānikarissantīti** anuttānam gambhīram uttānam pākātam karissantīti. **Sahadhammenāti** ettha **dhamma**-saddo kāraṇapariyāyo “hetumhi ṇāṇam dhammapaṭisambhidā”tiādīsu (vibha. 720) viyāti āha **“sahetukena sakāraṇena vacanenā”**ti.

Sappāṭihāriyanti sanissaraṇam. Yathā paravādam bhañjitvā sakavādo patiṭṭhahati, evam hetudāharaṇehi yathādhigatamattham sampādetvā dhammam kathessanti. Tenāha **“niyyānikam katvā dhammam desessantī”**ti, navavidham lokuttaram dhammam pabodhessantīti attho. Ettha ca “paññāpessanti”tiādīhi chahi padehi cha atthapadāni dassitāni, ādito pana dvīhi padehi cha byañjanapadāni. Ettāvātā tepiṭakam buddhavacanam samvaṇṇanāyena saṅgahetvā dassitam hoti.

Vuttañhetam **nettiyam** (netti. saṅghavāra) “dvādasa padāni suttaṃ, taṃ sabbam byañjanañca attho cā”ti.

Sikkhattayasaṅgahanti adhisīlasikkhādisikkhattayasaṅgahaṃ. **Sakalaṃ sāsana**brahmacariyanti anavasesaṃ satthusāsanaabhūtaṃ seṭṭhacariyaṃ. **Samiddhanti** sammadeva vaḍḍhitaṃ. **Jhānassādavasena**ti tehi tehi bhikkhūhi samadhigatajhānasukhavasena. **Vuḍḍhippattanti** uḷārapañītabhāvūpagamanena sabbaso parivuḍḍhimupagataṃ. **Sabbapāliphullaṃ viya** abhiññāsampadāhi sāsanaabhivuḍḍhiyā matthakappattito. **Paṭiṭṭhitavasena**ti paṭiṭṭhānavasena, paṭiṭṭhappattiyāti attho. Paṭivedhavasena bahuno janassa hitaṃ **bāhujaññaṃ**. Tenāha “**mahājanābhisamayavasena**”ti. Puthu puthulaṃ bhūtaṃ jātaṃ, puthuttaṃ bhūtaṃ pattanti vā **puthubhūtaṃ**. Tenāha “**sabbākārena puthulabhāvappatta**”nti. **Suṭṭhu pakāsanti** sammadeva ādikalyāṇādibhāvena paveditaṃ.

Satiṃ sūpaṭṭhitaṃ katvāti ayaṃ kāyādivibhāgo attabhāvasaññito dukkhabhāro mayā ettakaṃ kālaṃ vahito, idāni pana na vahitabbo, etassa avahanatthaṃ cirataraṃ kālaṃ ariyamaggasambhāro sambhato, svāyaṃ ariyamaggo paṭividdho, yato ime kāyādayo asubhādito sabhāvādito sammadeva pariññātāti catubbidhampi satiṃ yathātathaṃ visaye suṭṭhu upaṭṭhitaṃ katvā. **Ñāṇena paricchinditvāti** yasmā imassa attabhāvasaññitassa dukkhabhārasa vahane payoanabhūtaṃ attahitaṃ bodhimūle eva parisamāpitaṃ, parahitaṃ pana buddhaveneyyavinayanaṃ parisamāpitaṃ matthakappattaṃ, taṃ dāni māsattayeneva parisamāpanaṃ pāpuṇissati, tasmā āha “visākhapuṇṇamāyaṃ parinibbāyissāmī”ti, evaṃ buddhañāṇena paricchinditvā saccabhāgena vinicchayaṃ katvā. **Āyusaṅkhāraṃ vissajīti** āyuno jīvitassa abhisāṅkharaṇaṃ phalasaṃpattidhammaṃ na samāpajjissāmīti vissajī, taṃ vissajjaneneva tena abhisāṅkharīyamānaṃ jīvitasāṅkhāraṃ na pavattayissāmīti vissajī. Tenāha “**tatthā**”tiādi.

Ṭhānamahantatāyapi pavattiākāramahantatāyapi **mahanto pathavīkampo**. Tattha ṭhānamahantatāya bhūmicālassa mahantataṃ dassetaṃ “**tadā...pe... akampitthā**”ti vuttaṃ, sā pana jātikhettabhūtā dasasahassī lokadhātu eva, na yā kāci. Yā mahābhinihāramahājātiādisupī akampittha, tadāpi tattakāya eva kampane kiṃ kāraṇaṃ? Jātikhettabhāvena tasseva ādito pariggahassa katattā, pariggahaṇaṅcassa dhammatāvasena veditaṃ. Tathā hi purimabuddhānampi tattakameva jātikhettaṃ ahoṣi. Tathā hi vuttaṃ “dasasahassī lokadhātu nissaddā hoti nirākulā...pe... mahāsamuddo ābhujati, dasasahassī pakampaṭi”ti ca ādi. UdaKapariyantaṃ katvā chappakārapavedhanaena. Avītarāge bhimsetīti bhimsano, so eva **bhimsanakoti** āha “**bhayajanako**”ti. **Devabheriyoti** devadundubhisaddassa pariyaṇavacanamatthaṃ, na cettha kāci bherī devadundubhīti adhippetā, atha kho uppātabhāvena labbhamāno ākāsaṃ nigghosāsaddo. Tenāha “**devo**”tiādi. **Devoti** megho. Tassa hi tadā acchabhāvena ākāsaṃ vassābhāvena sukkhagajjitasaññite sadde niccharante devadundubhisamaññā. Tenāha “**devo sukkhagajjitaṃ gajjī**”ti.

Pīivegavissatṭhanti “evaṃ ciratarakālaṃ vahito ayaṃ attabhāvasaññito dukkhabhāro, dāni na cirasseva nikkhipissāmī”ti sañjātasomanasso bhagavā sabhāveneva pīivegavissatṭhaṃ udānaṃ udāneti, evaṃ udānentena ayampi attho sādhitō hotīti dassanattaṃ aṭṭhakathāyaṃ “**kasmā**”tiādi vuttaṃ.

Tulīyatīti **tulanti** tula-saddo kammaśādhanti dassetaṃ “**tulita**”nti vuttaṃ. Appānubhāvātāya **paricchinnaṃ**. Tathā hi taṃ paṭipakkhena parito khaṇḍitabhāvena parittanti vuccati. Paṭipakkhavikkhambhanaṃ dīghasantānatāya vipulaphalatāya ca **na tulaṃ na paricchinnaṃ**. Yehi kāraṇehi pubbe avisesato “mahaggataṃ atula”nti vuttaṃ, tāni kāraṇāni rūpāvacarato āruppassa sātisaṃ vijjantīti **arūpāvacaraṃ atulanti** vuttaṃ, itarañca tulanti. **Appavipākanti** tīsupī kammesu yaṃ appavipākaṃ hīnaṃ, taṃ tulaṃ. **Bahuvipākanti** yaṃ mahāvipākaṃ paṇītaṃ, taṃ atulaṃ. Yaṃ panettha majjhimaṃ, taṃ hīnaṃ ukkaṭṭhanti dvidhā bhinditvā dvīsu bhāgesu pakkhipitabbaṃ. Hīnattikavaṇṇanāyaṃ vuttanayeneva appabahuvipākaṃ niddhāretvā tassa vasena tulātulabhāvo veditabbo. Sambhavati etasmāti **sambhavoti** āha “**sambhava^ hetubhūta**”nti. **Niyakajjhataratoti** sasantānadhammesu vipassanāvasena gocarāsevanāya ca rato. Savipākaṃ samānaṃ

pavattivipākamattadāyikammaṃ savipākattḥena sambhavaṃ, na ca taṃ kāmādi[^] bhavābhisaṅkhārakanti tato visesanatthaṃ sambhavanti vatvā “**bhavasāṅkhāra**”nti vuttaṃ. **Ossajjī** ariyamaggena avassajjī. **Kavacaṃ viya** attabhāvaṃ pariyonandhitvā tḥitaṃ attani sambhūtattā **attasambhavaṃ kilesaṅca** abhindīti kilesabhedasahabhāvikkammosajjanaṃ dassento tadubhayassa kāraṇamāha “**ajjhatarato samāhito**”ti.

Paṭhamavikappe avasajjanaṃeva vuttaṃ. Ettha avasajjanākāroti taṃ dassento “**atha vā**”tiādimāha. Tattha **tīrentoti** “uppādo bhayaṃ, anuppādo khema”ntiādinā vīmaṃsanto. **Tulento tīrentoti**ādinā saṅkhepato vuttamatthaṃ vitthārato dassetuṃ “**pañcakkhandhā**”tiādiṃ vatvā bhavasāṅkhārassa avasajjanākāraṃ sarūpato dasseti. **Evanti**ādinā pana udānagāthāvaṇṇanāyaṃ ādito vuttamatthaṃ nigamanavasena dasseti. **Abhītabhāvaṅṇāpanatthaṅcāti** ayampi attho saṅgahitoti daṭṭhabbaṃ.

Cāpālavaggavaṇṇanā niṭṭhitā.

2. Pāsādakampanavaggo

1-2. Pubbasuttādivaṇṇanā

823-824. Parato imasmiṃ pāsādakampanavagge dasamasutte **āvi bhavissanti**. **Chaabhiṅṅāpādakā**ti channaṃ abhiṅṅānaṃ pādakabhūtā padhānabhūtā. Yathā paṭhamasutte, tathā dutiyatatiyasuttasupī ca chaabhiṅṅāpādakā iddhipādā kathitāti attho.

3. Chandasamādhisuttavaṇṇanā

825. Yo samādhissa nissayaabhūto chando, so idhādhippetoti āha “**chandanti kattukamyatāchanda**”nti. Tassa ca adhipateyyaṭṭho nissayaṭṭho, na vinā taṃ chandaṃ nissāyāti āha – “**nissāyāti nissayaṃ katvā, adhipatiṃ katvāti attho**”ti. **Padhānabhūtā**ti seṭṭhabhūtā, seṭṭhabhāvo ca ekassapī catukiccasādhanavasena pavattiyā, tato eva bahuvacananiddeso, padhānasāṅkhārattḥena padhānasāṅkharaṇato. “Chandaṃ ce nissāya...pe... ayaṃ vuccati chandasamādhī”ti imāya pāliya chandādhipati samādhī **chandasamādhī**ti adhipatisaddalopaṃ katvā samāso vuttoti viññāyati, adhipatisaddatthadassanavasena vā chandahetuko, chandādhipati vā samādhī **chandasamādhī**. Tena “chandasamādhinā ceva padhānasāṅkhārehi padhānabhūtasāṅkhārehi ca samannāgatā”ti vakkhati, taṃ ānetvā sambandho. **Padhānabhūtā**ti vīriyabhūtā. Keci vadanti – “saṅkhatasaṅkhārādinivattanatthaṃ padhānaggahaṇa”nti. Atha vā taṃ taṃ visesaṃ saṅkharotīti **saṅkhāro**, sabbampi vīriyaṃ. Tattha catukiccasādhakato tadaññassa nivattanatthaṃ **padhānaggahaṇanti**. Yathā chando chandasamādhinā ceva padhānasāṅkhārehi ca samannāgato, evaṃ chandasamādhī chandena ceva padhānasāṅkhārehi ca samannāgato. Padhānasāṅkhārāpi chandena ceva chandasamādhinā ca samannāgatāti tīsupī padesu samannāgatasaddo yojetabbo. **Tasmāti** yasmā tayopī chandādayo ekacittuppādapariyāpannā, tasmā sabbe te dhammā ekato katvā “ayaṃ vuccati...pe... iddhipādo”ti vuttanti. Evaṃ chandādīnaṃyeva cettha iddhipādabhāvo vutto, vibhaṅge pana tesam iddhibhāvo sampayuttānaṃ iddhipādabhāvo vuttoti dassento “**iddhipādavibhaṅge panā**”tiādimāha.

Idāni nesaṃ iddhipādātāpi sambhavatīti dassento “**apicā**”tiādimāha. Tattha chandañhi bhāvayato padhānaṃ katvā bhāventassa tathā pavattapubbābhisaṅkhārasena ijhamāno chando **iddhi** nāma, tassa nissayaabhūtā padhānasāṅkhārā **iddhipādo** nāma. Sesadvayepī eseva nayo. Tathā bhāvayantassa mukhyatāmattaṃ sandhāya vuttaṃ, ijghanattho pana sabbesaṃ samānanti dassento “**sampayutta...pe... ijjhantiyevā**”ti āha.

Iddhipāde asaṅkarato dassetuṃ “**apicā**”tiādi vuttaṃ. Tattha **chandādayoti** chandasamādhīpadhānasāṅkhārā. **Sesiddhipādesūti** vīriyiddhipādādisu. Tattha vīriyasamādhīpadhānasāṅkhārasamannāgatoti dvikkhattuṃ vīriyaṃ āgataṃ, tattha purimaṃ

samādhivisesaṃ, vīriyādhīpatisamādhī eva vīriyasamādhīti dutiyaṃ samannāgamaṅgadassanaṃ. Dveveva hi sabbattha samannāgamaṅgāni samādhī padhānasaṅkhāro ca, chandādayo samādhivisesanāni, padhānasaṅkhāro pana padhānavacaneneva visesito, na chandādīhīti na idha vīriyādhīpatitā padhānasaṅkhārassa vuttā hoti. Vīriyaṅca samādhīṃ vīriyehi samannāgamo vutto hoti. Yasmā pana chandādīhi visiṭṭho samādhī, tathāpi visiṭṭheneva ca tena sampayutto padhānasaṅkhāro sesadhammā ca, tasmā samādhivisesanānaṃ vasena cattāro iddhipādā vuttā, visesanabhāvo ca chandādīnaṃ taṃtaṃavassayadassanavasena hotīti “chandasaṃmādhī...pe... iddhipādo”ti ettha nissayatthehi pādasadde upādāyattṭhena chandādīnaṃ iddhipādātā vuttā hoti, teneva **abhidhamme uttaracūlabhājaniye** “cattāro iddhipādā chandiddhipādo”tiādīnā (vibha. 457) chandādīnaṃyeva iddhipādātā vuttā, pañhapucchake ca – “cattāro iddhipādā idha bhikkhu chandasamādhī”tiādīnā (vibha. 431) uddesaṃ katvāpi puna chandādīnaṃyeva kusalādībhāvo vibhatto. Upāyiddhipādadassanattṭhameva hi nissayiddhipādadassanaṃ kataṃ, aññathā catubbidhatā na hotīti ayamettha pālīvasena atthavinicchayo. Tattha **upāyiddhipādadassanattṭhamevā**ti chandādīke dhure jeṭṭhake pubbaṅgame katvā nibbattitasamādhī chandādīpatisamādhīti chandādīnaṃ iddhiyā adhigamūpāyadassanaṃ upāyiddhipādadassanaṃ, tadattṭhameva “tathābhūtaṃ vedanākkhandho...pe... viññāṅgakkhandho”ti tattha tattha pālīyaṃ nissayiddhipādadassanaṃ kataṃ chandādīvisiṭṭhānaṃyeva vedanākkhandhādīnaṃ adhippetattā. Evañcetāṃ sampañcchitabbāṃ, aññathā kevalaṃ iddhisampayuttānaṃyeva khandhānaṃ vasena iddhipādabhāve gayhamāne tesāṃ catubbidhatā na hoti visesakāraṇabhāvatoṭi adhippāyo.

Kecīti uttaravīhāravāsīno. **Anibbattoti** hetupaccayehi na nibbatta, na sabhāvadhammo, paññattimattanti adhippāyo. Vādamaddanattṭhāya hoti, abhidhamme ca āgato uttaracūlavāroṭi yojanā. **Cattāro iddhipādā**tiādī uttaracūlavārādasanaṃ. Ime pana uttaracūlavāre āgatā iddhipādā.

Raṭṭhapālatthero chande sati kathaṃ nānujānissantīti sattāhāni bhattāni abhuñjītvā mātāpitaro anujānāpetvā pabbajītvā chandameva nissāya arahattaṃ pāpuṇīti āha – “**raṭṭhapālatthero chandaṃ dhuraṃ katvā lokuttaradhammaṃ nibbatesī**”ti. **Soṇatthero**ti sukhumālasoṇatthero. So hi āyasmā attano sukhumālabhāvaṃ acintevā ativelāṃ caṅkamanena pādesu utṭhitesupī ussāhaṃ avissajjento vīriyaṃ dhuraṃ katvā lokuttaradhammaṃ nibbatesi. **Sambhutatthero** “cittavato ce alamariyaññadassanaviseso ijjeheyya, mayhaṃ ijjeheyyāti cittaṃ dhuraṃ katvā lokuttaradhammaṃ nibbatesi. Mogharājā “paññavato ce maggabhāvanā ijjeheyya, mayhaṃ ijjeheyyā”ti paññāpubbaṅgamaṃ paññādhuraṃ paññājeṭṭhakaṃ katvā arahattaṃ pāpuṇīti āha “**mogharājā vīmaṃsaṃ dhuraṃ katvā lokuttaradhammaṃ nibbatesī**”ti. Idāni nesaṃ ariyānaṃ upaṭṭhānussāhamantaṃjāṭisampadaṃ nissāya rañño santike laddhavisese amaccaputte nidassanabhāvena dassetuṃ “**tattha yathā**”tiādīmāha. Ettha ca punappunaṃ chanduppādanaṃ tosaṃ viya hotīti chandassa upaṭṭhānasadisatā vuttā, thāmabhāvato ca vīriyassa sūrattasadisatā, cintanappadhānattā cittassa mantasaṃvidhānasadisatā, yonisomanasikāra-sambhūtesu kusaladhammesu paññā seṭṭhāti vīmaṃsāya jāṭisampattisadisatā vuttā.

4. Moggallānasuttavaṇṇanā

826. Uddhaccapakatikāti vikkhittasabhāvā, vibhantacittāti attho. Anavaṭṭhitatāya vipphanditacittatāya **vipphandamānacittā**. Tucchatāya naḷo viyāti naḷo, māno, uggato naḷo etesanti **unnaḷāti** āha – “**unnaḷāti...pe... vuttaṃ hoti**”ti. **Capalāti** cāpalyatā nāma lolabhāvo. **Murāti** kharavacanā, pharusavacanāti attho. **Vikiṇṇavācā** nāma samphappalāpinoti vuttaṃ “**asamyatavacanā**”tiādī. Paṭipattidhamme pamuṭṭhā vinaṭṭhā paṭivinaṭṭhā sati etesanti **muṭṭhasatīti** āha – “**naṭṭhasatīti**”ti. **Ubbhantacittāti** samādhino abhāvena uddhacceneva uparūpari bhantacittā. **Pākatindriyā** abhāvītakāyātāya gāmadārakā viya pakatibhūtaindriyā. Nemo vuccati bhūmiyā baddhabhāvanimittapadeso, gambhīro nemo etassāti **gambhīranemo**. **Suṭṭhu nikhāto**tiādī tassa pādassa suppatiṭṭhitabhāvadassanaṃ.

5. Uṇṇābhabrāhmaṇasuttavaṇṇanā

827. **Pahānatthanti** anuppādapahānattham.

9. Iddhādidesanāsuttavaṇṇanā

831. **Abhiññāpādakaṃ catutthajjhānaṃ adhippetam** “iddhilābhāya pavattatī”ti vacanato.

10. Vibhaṅgasuttavaṇṇanā

832. **Chandaṃ uppādetvāti** bhāvanāchandaṃ uppādetvā. **Linākāro**ti bhāvanācittassa layāpatti. **Kosajjena** vokiññāpajjanaṃ vuttaṃ.

Evam pasādābhāvena cittassa vikkhepāpatti, tattha pasāduppādanena yaṃ sampahaṃsanam icchitabbam, tassa uppādanākāram dassetuṃ vuttaṃ “**so buddhadhammasaṅghaṃ āvajjetvā**”tiādi. Vatthukāme ārabha vikkhitto punappunam vikkhitto hotiyevāti vuttaṃ “**anuvikkhitto**”ti. Uppatham paṭipannassa cittassa daṇḍanaṭṭhena niggaṇhanaṭṭhena suttāni eva daṇḍoti **suttadaṇḍo**, tena suttadaṇḍena cittam tajjetvā. Pañcakāmaguṇe ārabha pavatto cittavikkhepo punappunam uppajjatevāti vuttaṃ “**anuvikkhitto anuvisaṭo**”ti.

Purepacchābhāvo kammaṭṭhānassa manasikāravasena uggahavasena vāti tadubhayaṃ dassetuṃ “**katha**”ntiādi vuttaṃ. **Atilīnādīsu catūsu ṭhānesūti** atilīnātipaggahitasamkhittaanuvikkhittasaññitesu catūsu ṭhānesu. Tattha bhāvanam anajjhogāhetvāva saṅkoco **atilīnatā**, ajjhogāhetvā anto saṅkoco **samkhittatā**, antosaṅkhepo **atipaggahitatā**, accāraddhavīriyatā **anuvikkhittatā**. Bahiddhā visamavitakkānubhāvanam āpajjanto dvattiṃsākāravasena aṭṭhikasaññāvasena vā gahetabbanti āha – “**sarīravasena veditabba**”nti. Tenāha “**uddham pādatalā**”tiādi (dī. ni. 2.377; ma. ni. 1.110).

Aññamaññaṃ asaṅkarato ākirīyanti pakārato ṭhapīyantīti **ākārā**, bhāgāti āha – “**yehi ākārehīti yehi koṭṭhasehī**”ti. Līngīyati sallakkhīyatīti **līngam**, saṅṭhānam. Nimīyati niddhāretvā paricchindīyatīti **nimittam**, upaṭṭhānam. **Yo bhikkhūti**ādi ālokasaññaṃ yo uggaṇhāti, tam dassanam. **Aṅgaṇeti** vivaṅgaṇe. **Ālokasaññaṃ manasikaroti** rattiyam. **Vīriyādīsūpīti** yathā “idha bhikkhu chandaṃ uppādetvā”ti chande vitthāranayo vutto, vīriyādīsūpi eso eva vitthāranayo yojetabbo.

Pāsādakampanavaggavaṇṇanā niṭṭhitā.

3. Ayogūlavaggo

2. Ayogūlasuttavaṇṇanā

834. **Iminā catumahābhūtamayenāti** iminā sabbalokapaccakkhena catūhi mahābhūtehi nibbattena catumahābhūtamayena. Manomayo pana nimmitakāyo bhagavato rucivasena paresam paccakkho hoti. **Omātīti** avamāti. Ava-pubbo hi mā-saddo sattiathopi hotīti “**pahoti sakkotī**”ti attho vutto. **Asambhinnapadanti** asādāhāraṇapadam aññattha anāgatattā. Kāyassa citte samodahanam āropanam tannissitatākaraṇaṅca atthato cittagatiyā pavattanamevāti āha “**cittagatiyā pesetī**”ti.

Tattha **cittagatigamanam** nāma cittavasena kāyassa pariṇāmanena “ayaṃ kāyo imam cittam viya hotū”ti kāyassa cittena samānagatikatāṭhapanam. Katham pana kāyo dandhapavattiko lahupavattinā cittena samānagatiko hotīti? Na sabbathā samānagatiko. Yatheva hi kāyavasena cittapariṇāmane cittam sabbathā kāyena samānagatikam na hoti. Na hi kadāci tam sabhāvasiddhena attano khaṇena avattitvā dandhavuttikassa rūpadhammassa vasena pavattitum sakkoti, “idaṃ cittam ayaṃ kāyo viya hotū”ti pana adhiṭṭhānena dandhagatikassa kāyassa anuvattanato yāva icchitaṭṭhānappatti, tāva kāyagatīanulomeneva hutvā santānavasena pavattamānam cittam kāyagatiyā pariṇāmitam nāma hoti.

Evam ‘‘ayaṃ kāyo idaṃ cittaṃ viya hotū’’ti adhiṭṭhānena pageva sukhalahusaññāya sampāditattā abhāvitiddhipādānaṃ viya dandhaṃ avattitvā yathā lahukaṃ katipayacittavāreṇeva icchitaṭṭhānappatti hoti, evaṃ pavattamāno kāyo cittaḡatiyā pariṇāmito nāma hoti, na ekacittakkhaṇeṇeva icchitaṭṭhānappattiyā, evaṃ katvā bāhāsamiñjanapasāraṇūpamāpi upacāreṇa vinā suṭṭhutaṃ yuttā hotīti. Aññathā dhammatāvilomatā siyā, nāpi dhammānaṃ lakkhaṇaññathattaṃ iddhibalena kātuṃ sakkā, bhāvaññathattameva pana kātuṃ sakkāti.

3-10. Bhikkhusuttādivaṇṇanā

835-842. ‘‘Dvinnaṃ phalāna’’nti āgatasuttaṃ sandhāya ‘‘**dve phalāni ādiṃ katvā**’’ti vuttaṃ. Sesam suviññeyyameva.

Ayoguḷavaggavaṇṇanā niṭṭhitā.

Iddhipādasamṃyuttavaṇṇanā niṭṭhitā.

8. Anuruddhasamṃyuttaṃ

1. Rahogatavaggo

1-2. Paṭhamarahogatasuttādivaṇṇanā

899-900. Chattimsāya ṭhānesūti ajjhattaṃ kāye samudayadhammānupassī, vayo, samudayavayo, bahiddhā samudayo, vayo, samudayavayo, ajjhatabhiddhā samudayo, vayo, samudayavayadhammānupassīti nava anupassanā, tathā vedanāya citte dhammesūti evaṃ chattimsāya ṭhānesu. **Dutiye dvādasasu ṭhānesūti** kāye ajjhattaṃ bahiddhā ajjhatabhiddhā, vedanāya citte dhammesūti evaṃ dvādasasu ṭhānesu.

3. Sutanusuttavaṇṇanā

901. Imāya pāḷiyāti imāya hīnattikapāḷiyā. **Ime dhammā hīnā** lāmakatṭhena. **Ime dhammā majjhimā** hīnapañītānaṃ majjhe bhavāti. Uttamatṭhena attappakatṭhena padhānabhāvaṃ nītāti **pañītā**.

4-7. Paṭhamakaṇḍakīsuttādivaṇṇanā

902-905. Kaṇḍakā etissā atthīti **kaṇḍakī**, karamandagaccho. Osadhibhāvāpekkhāya itthilinganiddeso, tabbahulatāya taṃ vanam ‘‘kaṇḍakīvana’’nteva paññāyittha. **Sahassalokanti** sahasacakkavāḷalokaṃ. **Dasacakkavāḷasahasam ekāvajjanassa āpātham āgacchati** tathā ālokavaḍḍhanassa katattā.

9. Ambapālivanasuttavaṇṇanā

907. Arahatabhāvadīpakanti arahattassa atthibhāvadīpakaṃ. ‘‘Arahatabhāvadīpika’’nti vā pāṭho.

Rahogatavaggavaṇṇanā niṭṭhitā.

2. Dutiyaṃvaggavaṇṇanā

909-922. Dasabalaññanti dasavidhabalaññam. **Ekadesenāti** padesavasena. Sāvakanampi attano

abhinīhārānurūpaṃ ñāṇaṃ pavattatīti te kālapadesavasena ceva yathāparicayasattapadesavasena ca ṭhānānīti jānanti, sammāsambuddhānaṃ pana anantaññānatāya sabbattheva appaṭihatameva ñāṇanti āha – “**sabbaññubuddhānaṃ panā**”tiādi. **Etam** dasabalaññānaṃ anantavisayattā **nippadesaṃ** anūnatāya **sabbākāraparipūraṃ**.

Dutiyavaggavaṇṇanā niṭṭhitā.

Anuruddhasaṃyuttavaṇṇanā niṭṭhitā.

9. Jhānasamṃyuttavaṇṇanā

923. Jhānasamṃyuttaṃ suviññeyyameva, missakanti vadanti.

Jhānasamṃyuttavaṇṇanā niṭṭhitā.

10. Ānāpānasamṃyuttaṃ

1. Ekadhammavaggo

1. Ekadhammasuttavaṇṇanā

977. **Etthā**ti etasmiṃ paṭhamasutte. **Vuttameva**, tasmā tattha vuttanayeneva veditabbanti adhippāyo.

6. Ariṭṭhasuttavaṇṇanā

982. No-saddo pucchāyaṃ, tasmā nūti iminā samānatthoti āha “**bhāvettha nū**”ti. **Kāmacchandoti** vatthukāmesu icchāti āha “**pañcakāmaguṇikarāgo**”ti. **Dvādasasu āyatanadhammesu** saparasantatipariyāpannesu. **Iminā** kāmacchandappahānakittanena paṭighasaññāpaṭivinayakittanena ca **anāgāmiaggam katheti** pañcorambhāgiyasaññojanasamucchedassa byākatattā. **Vipassanaṃ dassentoti** “vipassanaṃ anuyujjathā”ti dassento.

8. Padīpopamasuttavaṇṇanā

984. “Neva kāyopi kilamati na cakkhūnī”ti aṭṭhakathāyaṃ paduddhāro kato. “**Kāyopi kilamati, cakkhūnīpi vihaññanti**”ti vatvā yattha yathā hoti, tāni dassetuṃ “**dhātukammaṭṭhānasmim hi**”tiādi vuttaṃ. **Cakkhūni phandanti kilamantī**tiādi ativelam upanijjhāyane hotīti katvā vuttaṃ. **Imasmim pana kammaṭṭhāneti** ānāpānakammaṭṭhāne. **Evamāhāti** “bhikkhu cepi ākaṅkheyya, neva kāyo kilameyyā”ti evamāha.

Labbhātīti aṭṭhakathādhippāye ṭhatvā vuttaṃ, parato āgatena theravādena so anicchito. Na hi tārarūpamuttāvalikādisadisam nimittūpaṭṭhānākāramattaṃ khaṇamattaṭṭhāyinaṃ kasiṇanimittesu viya ugghāṇaṃ kātuṃ sakkoti. Tenāha “**na labbhatevā**”ti. **Ānisaṃsadassanatthaṃ gahito**, ānāpānassatisamādhismim siddhe ayaṃ guṇo sukheveva ijjhatīti. **Yasmā bhikkhūti imasmim vāre nāgatanti** yathā purimavāre “bhikkhu cepi ākaṅkheyyā”ti āgataṃ, evaṃ idha “bhāvite kho, bhikkhave, ānāpānassatisamādhimhī”ti āgatavāre bhikkhugghaṇamakataṃ, tasmā “so”ti na vuttaṃ.

9. Vesālisuttavaṇṇanā

985. Pākāraparikkhepavaḍḍhanenāti pākāraparikkhepena bhūmiyā vaḍḍhanena.

Rājagahasāvattiyo viya **idampi ca nagaram...pe... sabbākāravepullataṃ pattam.**

Anekariyāyenāti ettha **pariyāyasaddo** kāraṇavacanoti āha “**anekehi kāraṇehi**”ti, ayaṃ kāyo aviññāṇakopi saviññāṇakopi evampi asubho evampi asubhoti nānāvidhehi kāraṇehīti attho.

Asubhākārasandassanappavattanti kesādivasena tatthāpi vaṇṇādito asubhākārassa sabbaso dassanavasena pavattam. **Kāyavicchandaniyakathanti** attano parassa ca karajakāye vicchandannupādānakatham. **Muttam vāti**ādina byatirekamukhena kāyassa amanuññataṃ dasseti. Tattha ādito tīhi padehi adassaniyatāya asāratāya ca, majjhe catūhi duggandhatāya, ante ekena lesamattenapi manuññatābhāvamassa dasseti. **Atha khoti**ādina anvayato sarūpeneva amanuññatāya dassanam. “**Kesalomādi**”ti saṅkhepato vuttamattham vibhāgena dassetuṃ “**yeṇi**”tiādi vuttam.

Vaṇṇentoti vitthārento. **Asubhāyāti** asubhamātikāya. **Phātikammanti** bahulīkāro. Kilesacorehi anabhivhanāyattā jhānam “**cittamañjūsa**”nti vuttam. **Nissāyāti** pādakaṃ katvā.

Apare pana “tasmim kira addhamāse na koci buddhaveneyyo ahosi, tasmā bhagavā evamāha – ‘icchāmaham, bhikkhave’tiādī”ti vadanti. **Pare kirāti kira**-saddo arucisaṃsūcanattho. Tenāha “**idam pana icchāmatta**”nti.

Anekakāraṇasammissoti ettha kāraṇam nāma kāyassa asuciduggandhajegucchapaṭikūlatāva. **Sabbamakamsūti** puthujjanā nāma sāvajjepi tattha anavajjasaññino hutvā karanakārāpanasamanuññatābhedaṃ sabbam pāpam akamsu. Kāmam dasānussatiggahaṇeneva ānāpānassati gahitā, sā pana tattha sannipatitabhikkhūsu bahūnam sappāyā sātthikā ca, tasmā puna gahitā. Tathā hi bhagavā tameva kammaṭṭhānam imasmim sutte kathesi. Āhāre paṭikūlasaññā asubhakammaṭṭhānasadisā, cattāro pana āruppā ādikammikānam ayogyāti tesam idha aggahaṇam daṭṭhabbam.

Vesālim upanissāyāti vesālīnagaram gocaragāmaṃ katvā. **Muhuttenevāti** sathhari saddhamme ca gāravena upagatabhikkhūnam vacanasamanantameva uṭṭhahimsūti katvā vuttam. Buddhakāle kira bhikkhū bhagavato sandesaṃ sirasā sampaṭicchituṃ ohitasotā viharanti.

Ānāpanapariggāhikāyāti assāsapassāse pariggaṇhanavasena pavattāya satiyā. **Sampayutto samādhīti** tāya sampayuttaaññamaññapaccayabhūtāya uppanno samādhī. **Ānāpānassatiyam vā samādhīti** iminā upanissayapaccayasabhāvampi dasseti, ubhayatthāpi sahaṇatādīnam sattannampi paccayānam vasena paccayabhāvaṃ dasseti. “Yathāpaṭipannā me sāvakā cattāro satipaṭṭhāne bhāventī”tiādīsū uppādanavaḍḍhanaṭṭhena bhāvanāti vuccatīti tadubhayavasena attham dassento “**bhāvitoti uppādito vaḍḍhito vā**”ti āha. Tattha bhāvaṃ vijjamaṇataṃ ito gatoti **bhāvito**, uppādito paṭiladdhamattoti attho. Uppanno pana laddhāsevano **bhāvito**, paṇaḥbhāvaṃ āpādito vaḍḍhitoti attho. **Bahulīkatoti** bahulaṃ pavattito. Tena āvajjanādivasābhāvappattimāha. Yo hi vasābhāvamāpādito, so icchicchitakkhaṇe samāpajjitabbato punappunam pavattissati. Tena vuttam “**punappunam kato**”ti. Yathā “idheva, bhikkhave, samaṇo (ma. ni. 1.139; a. ni. 4.241), vivicceva kāmehi”ti (dī. ni. 1.226; ma. ni. 1.271; saṃ. ni. 2.152; a. ni. 4.123) ca evamādīsū paṭhamapade vutto eva-saddo dutiyādīsūpi vuttoyeva hoti, evamidhāpīti āha “**ubhayattha evasaddena niyamo veditabbo**”ti. Ubhayattha niyameṇa laddhaguṇam dassetuṃ “**ayaṃ hī**”tiādi vuttam.

Asubhakammaṭṭhānanti asubhārammaṇam jhānamāha. Tañhi asubhesu yogakammabhāvato yogino sukhavisesānam kāraṇabhāvato ca “**asubhakammaṭṭhāna**”nti vuccati. **Kevalanti** iminā ārammaṇam nivatteti. **Paṭivedhavasenāti** jhānapaṭivedhavasena. Jhānañhi bhāvanāvisesena ijjhantaṃ attano visayaṃ paṭivijjhantameva pavattati yathāsabhāvato paṭivijjhiyati cāti paṭivedhoti vuccati. **Oḷārikārammaṇattāti** bībhacchārammaṇattā. **Paṭikūlārammaṇattāti** jigucchitabbārammaṇattā. **Pariyāyenāti** kāraṇena, lesantarena vā. **Ārammaṇasantatāyāti** anukkamena vicitabbataṃ pattārammaṇassa paramasukhutaṃ sandhāyāha. Santehi sannisinne ārammaṇe pavattamāno dhammo

sayampi sannisinova hoti. Tenāha “**santo vūpasanto nibbuto**”ti, nibbutasabbapariḷāhoti attho. Ārammaṇasantatāya tadārammaṇaṇaṃ dhammānaṃ **santatā** lokuttaradhammārammaṇāhi paccavekkhaṇāhi veditabbā.

Nāssa santapaṇītabhāvāvahaṃ kiñci secananti **asecanako**. Asecanakattā **anāsittako**, anāsittakattā eva **abbokiṇṇo**, asammisso parikammādinā. Tato eva **pāṭiyekko** visuṃyeveko. **Āveniko** asādāhāraṇo. Sabbametaṃ sarasato eva santabhāvaṃ dassetuṃ vuttaṃ, parikammaṃ vā santabhāvanimittaṃ. **Parikammanti** ca kaṣiṇakaraṇādinimittuppādapariyosānaṃ, tādisaṃ ettha natthīti adhippāyo. Tadā hi kammatthānaṃ nirassādattā asantaṃ appaṇītaṃ siyā. Upacāre vā natthi ettha santatāti yojanā. Yathā upacārakkhaṇe nīvaraṇādivigamena aṅgapātubhāvena ca paresaṃ santatā hoti, na evamimassa. Ayaṃ pana ādisamannā...pe... paṇīto cāti yojanā. **Kecīti** uttaravihāravāsino. **Anāsittakoti** upasecanena anāsittako. Tenāha – “**ojavanto**”ti ojavantasadisoti attho. **Madhuroti** iṭṭho. Cetasikasukhapaṭilābhasaṃvattanaṃ tikacatukkajjhānavasena, upekkhāya vā santabhāvena sukhagatikattā sabbesampi jhānānaṃ vasena veditabbaṃ. Jhānasamuṭṭhānapaṇītarūpaphuṭṭhasarīratāvasena pana kāyikasukhapaṭilābhasaṃvattanaṃ daṭṭhabbaṃ, tañca kho jhānato vuṭṭhitakāle. Imasmiṃ pakkhe “**appitappitakkhaṇe**”ti idaṃ hetumhi bhummavacanaṃ daṭṭhabbaṃ.

Avikkhambhīti jhānena sakasantānato anīhate appahīne. **Akosallasambhūti** akosallaṃ vuccati avijjā, tato sambhūte. Avijjāpubbaṅgamā hi sabbe pāpadhammā. **Khaṇenevāti** attano pavattikkhaṇeneva. **Antaradhāpetīti** ettha antaradhāpanaṃ vināsaṇaṃ, taṃ pana jhānakattukaṃ idhādhippetanti pariyoṭṭhānappahānaṃ hotīti āha – “**vikkhambhīti**”ti. **Vūpasametīti** viśesena upasameti. Viśesena upasamaṇaṃ pana sammadeva upasamaṇaṃ hotīti āha “**suṭṭhu upasametīti**”ti. Sāsānikassa jhānabhāvanā yebhuyyena nibbedhabhāgiyā hotīti āha “**nibbedhabhāgiyattā**”ti. Ariyamaggassa pādakabhūto ayaṃ samādhi anukkamena vaḍḍhitvā ariyamaggabhāvaṃ upagato viya hotīti āha “**anupubbena ariyamaggavuḍḍhippatto**”ti. Ayaṃ panattho virāganirodhapaṭiṇissaggānupassanānaṃ vasena sammadeva yujjati. Sesāṃ suviññeyyameva.

10. Kimilasuttavaṇṇanā

986. Theroti ānandatthero. **Ayaṃ desanāti** “kathaṃ vibhāvito nu kho kimilā”tiādinā pavattā desanā. **Kāyaññataranti** rūpakāye aññatarakoṭṭhāse. **Evanti** yathā ānāpānaṃ anussaranto bhikkhu kāye kāyānupassī jāto, evaṃ sabbattha vāresu vedanānupassītiādi attho veditabbo.

Desanāsīsanti desanāpadesaṃ. Manasikārapadesena vedanā vuttāti taṃ sabbāṃ sarūpato aññāpadesato apadisati. **Yatheva hīti**ādinā tatha nidassanaṃ dasseti. **Cittasaṅkhārapadadvayeti** “cittasaṅkhārapaṭisaṃvedī passambhayaṃ cittasaṅkhāra”nti etasmiṃ padadvaye.

Evaṃ santepīti pītimanasikāracittasaṅkhārapadesena yadi vedanā vuttā, evaṃ santepi. **Esā** yathāvuttā **vedanā ārammaṇaṃ na hoti**. Vedanārammaṇā ca anupassanā, **tasmā vedanānupassanā na yujjati**. Yadi evaṃ mahāsatiṭṭhānādīsū “vedanā vediyatī”ti vuttaṃ, taṃ kathanti āha – “mahāsatiṭṭhānādīsūpī”tiādi. Tatha **sukhādīnaṃ vatthuntī** sukhādīnaṃ uppattiyā vatthubhūtaṃ rūpasaddādiṃ ārammaṇaṃ katvā vedanā vediyati, na puggalo puggalasseva abhāvato. **Vedanāppavattim upādāya** nissāya yathā “puggalo vedanaṃ vediyatī”ti **vohāramattaṃ hoti**. Evaṃ idhāpi vedanāya assāsapassāse ārabba pavatti, tathā pavattamanasikārasīsena “vedanāsu vedanānupassī bhikkhu tasmim samaye viharatī”ti vutto. **Taṃ sandhāyāti** taṃ vedanāya ārammaṇabhāvaṃ sandhāya. **Ādīnaṃ** padānaṃ. **Etassa** “vedanānupassanā na yujjati”ti vuttaanuyogassa.

Sappītike dve **jhāne samāpajjatīti** pītisahagatāni paṭhamadutiyaṃjjhānāni paṭipāṭiyā samāpajjati. **Tassāti** tena. Paṭisaṃviditasaddāpekkhāya hi kattuatthe etaṃ sāmivacanaṃ. **Samāpattikkhaṇeti** samāpajjanakkhaṇe. **Jhānapaṭilābhenāti** jhānena samaṅgībhāvena. **Ārammaṇatoti** ārammaṇamukhena

tadārammaṇajhānapariyāpannā **pīti paṭisaṃviditā hoti**, ārammaṇassa paṭisaṃviditattāti vuttaṃ hoti. Yathā nāma sappapariyesanaṃ carantena tassa āsaye paṭisaṃvidite sopi paṭisaṃvidito hoti mantāgadabalena tassa gahaṇassa sukarattā, evaṃ pītiyā āsayabhūte ārammaṇe paṭisaṃvidite sā pīti paṭisaṃviditāva hoti salakkhaṇato sāmāññalakkhaṇato ca tassā gahaṇassa sukarattā. **Vipassanakkhaṇeti** vipassanāpaññāya tikkhavisadabhāvappattāya visayato dassanakkhaṇe. **Lakkhaṇappaṭivedhenāti** pītiyā salakkhaṇassa sāmāññalakkhaṇassa ca paṭivijjhanena. Yañhi pītiyā visesato sāmāññato ca lakkhaṇaṃ, tasmim̐ vidite sā yāthāvato veditā eva hoti. Tenāha “**asammohato pīti paṭisaṃviditā hoti**”ti.

Idāni tamatthaṃ pāliya eva vibhāvetuṃ “**vuttañheta**”ntiādimāha. Tattha **dīghaṃ assāsavasenāti** dīghassa assāsassa ārammaṇabhūtassa vasena. Pajānato sā pīti paṭisaṃviditā hotīti sambandho. **Cittassa ekaggataṃ avikkhepaṃ pajānatoti** jhānapariyāpannaṃ “avikkhepo”ti laddhanāmaṃ cittassekaggataṃ taṃsampayuttāya paññāya pajānato. Yathā hi ārammaṇamukhena pīti paṭisaṃviditā hoti, evaṃ taṃsampayuttadhammāpi ārammaṇamukhena paṭisaṃviditā eva hontīti. **Sati upaṭṭhitā hotīti** dīghaṃ assāsavaseṇa jhānasampayuttā sati tasmim̐ ārammaṇe upaṭṭhitā ārammaṇamukhena jhānēpi upaṭṭhitā nāma hoti. **Tāya satiyāti** evaṃ upaṭṭhitāya tāya satiyā yathāvuttena tena ñāṇena suppaṭividditattā ārammaṇassa tassa vasena tadārammaṇā sā pīti paṭisaṃviditā hoti. **Dīghaṃ passāsavasenāti**ādisupi imināva nayena attho veditabbo. Tena vuttaṃ “**eteneva nayena avasesapadānipi atthato veditabbāni**”ti.

Yathevātiādisu ayaṃ saṅkhepattho – jhānapaṭilābhena yathā ārammaṇato pītiādayo paṭisaṃviditā honti tena vinā tesam̐ appavattanato. Evaṃ jhānasampayuttena taṃpariyāpannena vedanāsāṅkhātamanasikārapaṭilābhena ārammaṇato vedanā paṭisaṃviditā hoti aruṇuggamena viya sūriyassa tena vinā vedanāya appavattanato. Tasmā vuttanayena atisayappavatti vedanā suppaṭividditā, tasmā suvuttametanti pubbe vuttacodanaṃ nirākaroti.

Ārammaṇeti assāsapassāsanimittaṃ vadati. **Cittānupassīyeva nāmesa hoti** asammohato cittassa paṭisaṃviditattā. Tenāha “**tasmā**”tiādi. **Cittapaṭisaṃviditavaseṇāti ādi**-saddena itarā tissopi cittānupassanā saṅgaṇhāti.

Soti dhammānupassanaṃ anuyutto bhikkhu. **Yaṃ taṃ pahānaṃ** pahāyakaññaṃ. **Paññāyāti** aparāya vipassanāpaññāya aniccavirāgādito disvā duvidhāyapi ajjuhekkhitā hoti. **Idaṇhi catukkanti** aniccānupassanādivasena vuttaṃ catukkaṃ. **Tassāpi** dhammānupassanāya. Pajahatīti **pahānanti** āha “**niccasaññaṃ...pe... pahānakaraññaṃ adhippeta**”nti. **Vipassanāparamparanti** paṭipāṭiyā vipassanaṃāha. **Pathapaṭipannaṃ ajjuhekkhatīti** majjhimāya paṭipāṭiyā sammadeva vīthipaṭipannaṃ bhāvanācittaṃ pagghaniggahānaṃ akaraṇena ajjuhekkhati. **Ekato upaṭṭhānanti** yasmā majjhimasamathavīthinātivattiyā tattha ca pakkhandanena indriyānaṃ ekarasabhāvena, tatramajjhattatāya bhāvato avisesaṃ ekaggabhāvūpagamanena ekantato upaṭṭhāti, tasmā na tattha kiñci kātabbanti ajjuhekkhati. **Tatthāti** evaṃ ajjuhekkhane. **Sahajātanampi ajjuhekkhanā hoti** tesam̐ pavattanākārassa ajjuhekkhanato. “Paññāya disvā”ti vuttattā **ārammaṇajjuhekkhanā adhippetā**. Na kevalaṃ nīvaraṇādiddhamme ajjuhekkhitā, atha kho abhijjhā ...pe... paññāya disvā ajjuhekkhitā hotīti yojanā.

Paṃsupuñjaṭṭhāniyassa kilesassa uppattiṭṭhānadassanattaṃ “**catumahāpatho viya cha āyatanāni**”iceva vuttaṃ. Kāyādayo cattāro ārammaṇasatipaṭṭhānā. **Catūsu ārammaṇesūti** kāyādisu catūsu ārammaṇesu **pavattā cattāro satipaṭṭhānā** paṃsupuñjaṭṭhāniyassa kilesassa upahananato.

Ekadhammavaggaṇanā niṭṭhitā.

2. Dutiyavaggo

1-2. Icchānaṅgalasuttādivaṇṇanā

987-988. Kasmātiādi vihārasamāpattiācikkhaṇe kāraṇaṃ vibhāvetuṃ āradhamaṃ.

Eva-vākāroti eva-kāro vā-kāro ca. **Ekantasantattā** ekantena santamanasikārabhāvato. Sekkhavacaneneva tesam sikkhitabbassa atthibhāve siddhepi sikkhitabbarahitesu tesupi sekkhapariyāyassa vuccamānattā sikkhitabbasaddena sekkhe visesetvā vuttā. Āsavakkhayattham sikkhitabbassa abhāvepi diṭṭhadhammasukhavihārattham jhānādisikkhanena vinā sikkhitabbābhāvā “**asekkhā nāmā**”ti vuttā. Buddhānaṃ pana sabbaso sammadeva pariniṭṭhitasikkhattā “sikkhāmī”ti na vuttam. Ānāpānājjhānaphalasangāhāpatti **tathāgatavihāro**.

3-10. Paṭhamaānandasuttādivaṇṇanā

989-996. Aniccādivasenāti aniccadukkhānattavasena. **Pavicinati** pakārehi vicinati. **Nikkilesāti** apagatakilesā vikkhambhitakilesā. Pīṭisambojjhaṅgo, passaddhisambojjhaṅgoti pāṭho.

Yāya anosakkaṇaṃ anativattanaṅca hoti, ayaṃ tatramajjhattupekkaṃ **majjhattākāroti** vuttā. **Ekacittakkhaṇikā**ti ekacittuppādapariyāpannattā.

Cattunnaṃ catukkānaṃ vasena **soḷasakkhattukā**. Ānāpānasannissayena pavattattā ārammaṇavasena pavattā ānāpānārammaṇāpi aparabhāge sati ānāpānassatīti pariyāyena vattabbaṃ arahatīti “**ānāpānassati missakā kathitā**”ti vuttam. **Ānāpānamūlakā**ti ānāpānasannissayena pavattā satipaṭṭhānā. **Tesam mūlabhūtā**ti tesam satipaṭṭhānānaṃ mūlakāraṇabhūtā. **Bojjhaṅgamūlakā**ti bojjhaṅgapaccayabhūtā. **Tepi bojjhaṅgā**ti ete vīsati satipaṭṭhānahetukā bojjhaṅgā. **Vijjāvimuttipūrakā**ti tatiyavijjāya tassa phalassa ca paripūraṇavasena pavattā bojjhaṅgā. **Phalasampayuttā**ti catutthaphalasampayuttā, catubbidhaphalasampayuttā vā.

Dutiyavaggavaṇṇanā niṭṭhitā.

Ānāpānasamuyuttavaṇṇanā niṭṭhitā.

11. Sotāpattisaṃyuttam

1. Veḷudvāravaggo

1. Cakkavattirājasuttavaṇṇanā

997. Anuggahagaraṇesu nipātoti anuggaṇhanagaraṇatthajotako nipāto. Kimettha anuggaṇhāti, kiṃ vā garaṇatīti āha “**catunna**”ntiādi. Tattha **anuggaṇhanto** anucchavikaṃ katvā gaṇhanto. **Garaṇanto** nindanto. Issarasīlo issaro, tassa bhāvo **issariyaṃ**, pabhutā. Adhīnaṃ pati adhipati, tassa bhāvo **ādhipaccaṃ**, sāmibhāvoti āha – “**issariyādhipacca**”ntiādi. **Anantakānīti** antarahitāni.

Aveccappasādenāti vatthuttayassa guṇe yāthāvato avecca pavisitvā pasādo. So pana kenaci calanarahitoti āha “**acalappasādenā**”ti. **Maggenā**ti ariyamaggena. **Āgatappasādo** tassa adhigamena laddhappasādo. **Apubbaṃ acarimanti** ekajjhaṃ. Ariyasāvakaṇāhi ariyamaggo uppajjantova tīsu vatthūsu aveccappasādaṃ āvahanto eva uppajjati. **Tesanti** visayabhūtānaṃ tiṇṇaṃ vatthūnaṃ vasena tidhā vutto. **Yasmā ca** atthato **eko, tasmāva ninnānākaraṇo hoti** pavattaṭṭhānabhede satipi. **Ariyasāvakassa hītiādinā** nayena tamattham vivarati. **Pasādo** okappanā. **Pemaṃ** bhatti. **Gāraṇaṃ** garukaraṇaṃ. **Mahantaṃ** ulāraṃ. **Etaṃ** vibhāgena **natthi** sabbattha samānattā.

Evanti bhavantarepi akopaniyatāya. **Sadisavasena**ti aññehi akhaṇḍādīhi sadisavasena. Tenāha “**mukhavaṭṭi yañhi chinne**”tiādi. Khaṇḍā etissā atthīti **khaṇḍā**. Esa nayo sesesupi. Pātimokkhe

āgatānukkamena sīlassa ādimajjhavibhāgo vedītabbo. **Dvinnam vā tiṇṇam vāti** sīlakoṭṭhāsānaṃ. **Ekantaram bhinnanti** abhinnena ekantaram hutvā bhinnam. **Tesam** khaṇḍādānaṃ. “Bhujissehi” ti uttarapadalopena niddesoti āha “**bhujissabhāvakarehi**” ti. **Idam vītikkantanti** idampi sīlam vītikkantam. “Ayaṃ sīlassa vītikkamo” ti **evam parāmasitum asakkuṇeyyehi**.

2. Brahmācariyogadhasuttavaṇṇanā

998. Yesanti aniyamato saddhādānamādhārābhūtapuggaladassanaṃ. **Buddhe pasādo gahito**. So hi itarehi paṭhamam gahetabboti. **Ariyakantāni sīlāni gahitāni** sotāpannaṃ sīlānaṃ adhippetatā. **Saṅghe pasādo gahito** dhammappasādassa anantaram vuccamānattā. **Dhamme pasādo gahito** aveccapasādabhāvato. Sotam ariyamaggam ādīto patti sotāpatti, tassā aṅgāni **sotāpattiyaṅgāni**. **Paccenti** pajāyanti adhigacchanti. Tenāha “**pāpuṇanti**” ti. **Brahmācariyanti** maggabrahmācariyaṃ. **Katarapasādo** vattamānoti adhippāyo. **Maggappasādoti** maggasampayutto pasādo. **Āgamaggassāti** adhigatamaggassa. **Missakappasādo esoti** tasmā ubhopi therā paṇḍitā bahussutā.

3. Dīghāvuupāsakasuttavaṇṇanā

999. Yadaggena tasmiṃ upāsake yathāvuttāni sotāpattiyaṅgāni saṃvijjanti, tadaggena so tesu vattissatīti āha “**catūsu sotāpattiyaṅgesu sandissasi**” ti. Vijjam bhajantīti **vijjābhāgiyā**, tesu koṭṭhāsesu pariyaṇṇatīti vuttam “**vijjābhāgiyeti vijjākoṭṭhāsike**” ti.

4-5. Paṭhamasāriputtasuttādivaṇṇanā

1000-1001. “Sotāpatti” ti paṭhamamaggo adhippeto, tassa adhigamūpāyo **sotāpattiyaṅgam**. Tenāha “**sotāpattiyaṃ pubbhāgapaṭilābhaṅga**” nti. **Sotāpattiatthāyāti** sotāpattimaggaṭṭhāya. **Ānganti** kāraṇam. **Itare** ratanattayappasādādayo. Pubbhāgiyāya **sotāpattiyaṃ aṅgam** kāraṇanti.

6. Thapatisuttavaṇṇanā

1002. (Vitānaṃ kāyānaṃ kālanakāya, kāraṇassa upagātānaṃ sātāpariyā sījhati. Tattha kāyāparipajjhāyamukhena tantim ṭhapesi bhagavā. Na hi passatha namatthehi karaṇe niraṭṭhako piti vattati. “**Niyatattā**” ti vuttam. Tameva niyamaṃ “**majjhimapadeseyevā**” ti avadhāraṇena vibhāveti. Mahāmaṇḍalacārikam carantopi majjhimapadesassa antanteneva carati. Tattha ca vineyyajanassa samosaraṇatā mattapanavācamahatthasupananti.) [Etthantare pāṭho asuddho dussodhanīyo ca, suddhapāṭho gavesitabbo.] Aruṇuṭṭhāpanampi tattheva hoti. Paccantapadesa pana dūre vineyyajānā honti, tattha gantvā maggaphalesu patiṭṭhāpetvā tato paccāgantvā majjhimapadesa eva vāsam upagacchati, tattha manussehi katānaṃ kāraṇam mahapphalabhāvanīyamanatthanti daṭṭhabbam. “Āsanne no bhagavā” ti idam nidassanamattanti dassento “**na kevala**” nti ādimāha.

Sakiñcanasapalibodhanaṭṭhenāti ettha kiñcanaṃ palibodho asamāpitakiccatā, tadubhayassa atthibhāvenāti attho. **Mahāvāseti** mahāgehe.

Dvepi janāti isidattapurāṇā. **Sitam** nāma mandahasitam. **Hasitam** nāma vissaṭṭhahasitam. **Muttacāgoti** ādisu yaṃ vattabbam, tam **visuddhimaggaṭṭikāyam** (visuddhi. mahāṭī. 1.160) vuttanayena vedītabbam. **Samvibhāgeti** parassa dānavasena samvibhajane. **Akatavibhāganti** deyyadhammasena na katavibhāgam. Puggalavasena pana “sīlavantehi” ti vuttatā katavibhāgameva mahapphalatākaraṇena. Tenāha “**sabbam dātabbameva hutvā ṭhita**” nti.

(Etthantare pāṭho asuddho dussodhanīyo ca, suddhapāṭho gavesitabbo.)

7. Veļudvāreyyasuttavaṇṇanā

1003. Paveṇiāgatassāti anekapurisayugasena paramparāgatassa. **Attani upanetabbanti** attani netvā parasmim upanetabbaṃ. Tenāha “**yo kho myāyaṃ dhammo appiyo amanāpo, parassapeso dhammo appiyo amanāpo**”tiādi. **Amantabhāsenāti** samphassa samphappalāpassa amantāya mantārahitabhāsanena.

8-9. Paṭhamagiṇṇjakāvasathasuttādivaṇṇanā

1004-5. Dve gāmā dvinnam ṇātīnam gāmāti katvā. **Ñātiketi** evaṃladdhanāme ekasmim gāmake. **Giṇṇjakāvasatheti** giṇṇjakā vuccanti iṭṭhakā, giṇṇjakāhi eva kato āvasatho, tasmim. So kira āvāso yathā sudhāhi parikkamma payojanam natthi, evaṃ iṭṭhakāhi eva cinitvā kato. Tena vuttam “**iṭṭhakāmaye āvasathe**”ti. Tulāthambhadvārabandhakavāṭaphalakāni pana dārumayā eva. Oraṃ vuccati kāmādhātu, paccayabhāvena taṃ oraṃ bhajantīti **orambhāgiyāni**, orambhāgassa vā hitāni **orambhāgiyāni**. Tenāha “**heṭṭhābhāgiyāna**”ntiādi. **Tihi maggehīti** heṭṭhimehi tīhi maggehi. Tehi pahātabbatāya hi tesam saññojanānam orambhāgiyatā, oraṃ bhañjiyāni vā **orambhāgiyāni** vuttāni niruttinayena. Idāni byatirekamukhena nesam orambhāgiyabhāvaṃ vibhāvetuṃ “**tattha**”tiādi vuttam. Vikkhambhitāni samatthātāvighātena puthujjanānam, samucchinnāni sabbaso abhāvena ariyānam rūpārūpabhavūpapattiyā vibandhanāya na hontīti vuttam “**avikkhambhitāni maggena vā asamucchinnāni**”ti. **Nibbattivāsenāti** paṭisandhiggahaṇavasena gantum na denti. Mahaggatabhavagāmikammāyūhanassa vibandhanato **sakkāyadiṭṭhiādīni tīni** saññojanāni kāmācchandabyāpādā viya mahaggatabhavūpapattiyā visesapaccayattā **tattha** mahaggatabhave **nibbattampi** tannibbattihetukammaparikkhaye kāmabhavūpapattipaccayatāya mahaggatabhavato **ānetvā idheva** kāmabhāve eva **nibbattāpentī**. Tasmā **sabbānīpi** pañcapi saṃyojanāni **orambhāgiyāneva**. **Paṭisandhivasena anāgamanasabhāvoti** paṭisandhiggahaṇavasena tasmā lokā idha na āgamanasabhāvo. Buddhadassana-theradassana-dhammassavanānam pana atthāya assa āgamanam anivāritam.

Kadāci uppattiyā virālākāratā, pariyuṭṭhānamandatāya abahalatāti **dvedhāpi tanubhāvo**. **Abhiṇhanti** bahuso. **Bahalabahalāti** tibbatibbā. Yattha uppajjanti, taṃ santānam maddantā pharantā sādhentā andhakāraṃ karontā uppajjanti, dvīhi pana maggehi pahīnattā tanukatanukā mandamandā uppajjanti. **Puttadhītarō hontīti** idaṃ akāraṇam. Tathā hi āṅgapaccāṅgaparāmasanamattenapi te honti. **Idanti** “rāgadosamohānam tanuttā”ti idaṃ vacanam. **Bhavatanukavasēnāti** appakabhavavasena. **Tanti** mahāsīvattherassa vacanam paṭikkhittanti sambandho. Ye bhavā ariyānam labbhanti, te paripuṇṇalakkhaṇabhavā eva. Ye na labbhanti, tattha kīdisam taṃ bhavatanukam. Tasmā ubhayathāpi bhavatanukassa asambhavo evāti dassetuṃ “**sotāpannassā**”tiādi vuttam. **Aṭṭhame bhāve bhavatanukam natthi** aṭṭhamasseva bhavassa sabbasseva abhāvato. Sesesupi eseva nayo.

Kāmāvacaralokaṃ sandhāya vuttam itarassa lokassa vasena tathā vuttam asakkuṇeyyattā. Yo hi sakadāgāmī devamanussalokesu vomissakavasena nibbattati, sopi kāmabhavavaseneva paricchindītabbo. Bhagavatā ca kāmāloke ṭhatvā – “sakideva imaṃ lokaṃ āgantvā”ti vuttam. **Imaṃ lokaṃ āgantvāti** ca iminā pañcasu sakadāgāmīsū cattāro vajjetvā ekova gahito. Ekacco hi idha sakadāgāmiphalaṃ patvā idheva parinibbāyati, ekacco idha patvā devaloke parinibbāyati, ekacco devaloke patvā tattheva parinibbāyati, ekacco devaloke patvā idhūpapajjitvā parinibbāyati, ime cattāro idha na labbhanti. Yo pana idha patvā devaloke yāvatāyukaṃ vasitvā puna idhūpapajjitvā parinibbāyati, ayamidha adhippeto. Aṭṭhakathāyaṃ pana “imaṃ lokanti kāmabhavo adhippeto”ti imamattham vibhāvetuṃ “**sace hī**”tiādinā aññaṃyeva catukkaṃ dassitam.

Catūsu...pe... sabhāvoti attho apāyagamanīyānam pāpadhammānam sabbaso pahīnattā. **Dhammaniyaṃenāti** maggadhammaniyaṃmena **niyato** uparimaggādhigamassa avassaṃbhāvībhāvato. Tenāha “sambodhiparāyaṇo”ti. **Tesam tesam ṇāṇagatinti** tesam tesam sattānam “asuko sotāpanno,

asuko sakadāgāmī”tiādinā taṃtaṃñāṇādhigamaṇaṃ ñāṇūpapattiṃ. **Ñāṇābhisamparāyanti** tato parampi – “niyato sambodhiparāyaṇo sakideva imaṃ lokaṃ āgantvā dukkhassantaṃ karissatī”tiādinā ñāṇasahitaṃ upapattipaccayabhavaṃ. **Oloketassa** ñāṇacakkhunā apekkhantassa. Kevalaṃ **kāyakilamathova**, na tena kāci paresaṃ atthasiddhīti adhippāyo. **Cittavihesā** cittakhedo, sā kilesūpasamhitattā **buddhānaṃ natthi**.

Ādissati ālokīyati attā etenāti ādāsaṃ, dhammabhūtaṃ ādāsaṃ **dhammādāsaṃ**, ariyamaggañāṇassettaṃ adhivacanaṃ. Tena hi ariyasāvako catūsu ariyasaccesu viddhastasammohattā attānaṃ yāthāvato ñatvā yāthāvato byākareyya, tappakāsanato pana dhammapariyāyassa suttassa dhammādāsatā vedittabbāti. **Yena dhammādāsenāti** idha pana maggadhammameva vadati. Sesāṃ uttānatthattā suviññeyyamevāti.

Veḷudvāravaggavaṇṇanā niṭṭhitā.

2. Rājakārāmaṅgalaṃ

1. Sahassabhikkhunisāṅghasuttavaṇṇanā

1007. Dhammikattā desavāsīhi anukampito rājāti rājako, tassa ārāmo **rājakārāmo**, tasmim. **Bhūmisīsaṃ** seṭṭhappadeso, yatha vasanto lābhagayasaṅgappatto hotīti tesāṃ adhippāyo.

Vārāpehīti paṭisedhehi. **Yujjhāpetunti** kalahaṃ kārāpetuṃ. **Puna āgacchantāti** aparasmim saṃvacchare āgacchantā. **Ubbāṭṭetvāti** mahatī vīciyo ubbaṭṭetvā. Yathā tassa sakalameva raṭṭhaṃ ekodakābhūtaṃ hoti, evaṃ katvā samuddameva jātaṃ. Tena vuttaṃ “**samuddameva akāṃsū**”ti.

Isīnamantaraṃ katvāti isīnaṃ kārāṇaṃ katvā, isīnaṃ hetūti attho, isīnaṃ vā antarabhedāṃ katvā. Tathā loka kolāhalassa patthaṭataṃ vibhāvento bhagavā “**me suta**”nti āha paccakkhato jānampi. **Ucchinnoti** kulacchedena ucchinno. Na kevalaṃ sayameva, atha kho **saha raṭṭhehi**. **Vibhavanti** vināsaṃ upagato.

Taṃ sandhāyetaṃ vuttanti taṃ yathāvuttaṃ pasenadinā kosalarājena kārītaṃ vihāraṃ sandhāyetaṃ “rājakārāme”ti vuttaṃ.

2-3. Brāhmaṇasuttādivaṇṇanā

1008-9. Udayagāmininti ārambhato paṭṭhāya sampattiāvahaṃ.

4. Duggatibhayaṃsuttavaṇṇanā

1010. Duṭṭhā gati nippatti duggati, duggatabhāvo dālididiyaṃ, tadeva bhayaṃ, taṃ sabbaṃ anavasesaṃ vā **duggatibhayaṃ** daliddabhayaṃ. Sammadeva atikkantoti **samatikkanto**.

6. Paṭhamamittāmaccaṃsuttavaṇṇanā

1012. **Vohāramittāti** taṃtaṃdānaggahaṇavasena vohārakā mittā. **Āmantanapaṭimantanairiyāpathādīsūpīti** ālāpasallāpagamananisajjādiatthasaṃvidhānādīsū. **Ekato pavattakiccāti** saha pavattakattabbā. Amā saha bhavanti **amaccā**. “Amhākaṃ ime”ti ñāyantīti **ñātī**, āvāhavivāhasambaddhā. Tenāha “**sassusasurapakkhikā**”ti. Yonisambandhā vā **sālohītā**. Tenāha “**bhātibhaginimātulādayo**”ti.

7. Dutiyamittāmaccasuttavaṇṇanā

1013. Kismiñci kassaci ca tathā tathā uppannassa pasādassa aññathābhāvo **pasādaññathattam**. Bhūtasāṅghātassa ghaṇādikassa aññathābhāvo **bhāvaññathattam**. Nirayādigatiantaraupapatti **gatiññathattam**. Sabhāvadhāmmānaṃ kakkhaḷaphusaṇādilakkhaṇassa aññathābhāvo **lakkhaṇaññathattam**. “Ṭhitassa aññathattam paññāyati”ti evaṃ vuttam aññathattam **vipariṇāmaññathattam**. Lakkhaṇaññathattam na labbhati. Tenāha “**lakkhaṇam pana na vigacchati**”ti, sesaṃ labbhatīti. **Pathavīdhātuyāti** sasambhārapathavīdhātuyā. **Āpodhātuyāti** etthāpi eseva nayo. **Purimabhāvoti** ghaṇakāṭhinabhāvo. **Bhāvaññathattam** rasaññathattasabhāvo. **Gatiññathattam** uggatūpapatti. Tenāha “**tañhi ariyasāvakassa natthi**”ti. **Pasādaññathattampi natthiyeva** ariyasāvakassa.

Rājakārāmaṃvaggavaṇṇanā niṭṭhitā.

3. Saraṇānivaggo

1-2. Paṭhamamahānāmasuttādivaṇṇanā

1017-18. **Samiddhanti** sampuṇṇam. **Supupphanti** upasobhitatāya supupphitasadisattā. Byūhā nāma yehi eva pavisanti, tehi eva nikkhamanti. Tenāha “**byūhā vuccanti avinibbidharacchāyo**”ti. **Uddhatacārīnāti** yaṭṭhantarā.

3. Godhasakkasuttavaṇṇanā

1019. **Tīhīti** ratanattaye uppannehi tīhi pasādadhāmmehi. **Catūhīti** tehi eva saddhiṃ sīlena. **Kocidevātīdi** parikkappavasena vuttam bhagavati attano saddhāya uḷāratamabhāvadassanattam. Tenāha “**bhagavato sabbaññūtāyā**”tiādi. **Dhammo samuppādoti** vivādadhāmmauppattihetu. Tadeva hi sandhāyāha “**kiñcideva kāraṇa**”nti. **Kāraṇanti** nānakāraṇam. **Kalyāṇakusalavimuttanti** akalyāṇam akusalam, tadidaṃ yathāvuttaappasādanena apanītaatthadassanattam. **Assāti** mahānāmasakkassa. **Anavajjanadoso esoti** catūsu dhammesu ekenapi samannāgato sotāpanno hotīti anujānitvā catūhipi samannāgatenā ācikkhitabbanti yāthāvato anavajjanadosoti attho.

4. Paṭhamasaraṇānisakkasuttavaṇṇanā

1020. **Pamāṇenāti** ekena pamāṇena, na sabbaso. **Olokanam khamantīti** dassanamaggena catusaccadhammā paccattam passitabbā paṭivijjhitabbā. Paṭhamamaggakkhaṇe hi catusaccadhammā ekadesatova diṭṭhā nāma honti. “**Parimuccati**”ti **pana vattum vaṭṭati** paṭivijjhanakiriyāya vattamānattā. **Agantvā** apāyesu anuppattirahattā. Tenāha “**na gacchati**”ti, na uppajjatīti attho. **Mahāsāraruḅkhe dassento āha** – “yo koci viññujātiko mama ce gocaram gacchati, ekassa āgamanam avañjham amogha”nti dassetuṃ.

5. Dutiyasaraṇānisakkasuttavaṇṇanā

1021. **Dukkhetam** nirojakaṃ, tāya eva dukkhetatāya visamaṃ hotīti āha “**visamakhetta**”nti. **Loṇūpahatanti** jātasabhāvena loṇena ūsarena upahataṃ. **Khaṇḍānīti** khaṇḍitāni. **Temetvāti** temitattā. **Vātātapahatānīti** cirakālam vātena ceva ātapena ca upahatāni ābādhitāni.

6. Paṭhamaanāthapiṇḍikasuttavaṇṇanā

1022. **Ṭhānanti** ṭhānaso. Tenāha “**khaṇenā**”ti. Niyyānikanti pavattam ñāṇapaṭirūpakaṃ

pakatipurisantarajānanādemicchāññaṃ. Taṃ pana aniyyānikaṃ “niyyānika”nti paccavekkhaṇavasena pavatteyyāti āha “**micchāpaccavekkhaṇeṇā**”ti. Guṇaviyuttassa attano sakattani avatṭhānasāṅkhātā vimutti **micchāvimutti**.

7. Dutiyānāthapiṇḍikasuttavaṇṇanā

1023. Yathākammaṃ samparetabbato samparāyo, peccabhavo, samparāyahetukaṃ **samparāyikaṃ**, maraṇabhayaṃ.

Saraṇānivaggavaṇṇanā niṭṭhitā.

4. Puññābhisandavaggo

1. Paṭhamapuññābhisandasuttavaṇṇanā

1027. Avicchedena niccappavattiyamānāni puññāni abhisandanatṭhena “**puññābhisandā**”ti vuttā, tena puññanadiyoti attho vutto. Sukhassa āharaṇato ānayanato **sukhassāhāro**.

4. Paṭhamadevapadasuttavaṇṇanā

1030. Devānanti visuddhidevānaṃ. **Devapadānīti** tesam padāni devapadāni, devoti vā sammāsambuddho. **Devassa ñāṇena akkantapadānīti** paṭivedhaññaṇena ceva desanāññaṇena ca akkantapadāni. **Devā nāma** jātidevā. Tesampi devatṭhena devoti devadevo, sambuddho.

8. Vassasuttavaṇṇanā

1034. Pāraṃ vuccati nibbānaṃ saṃsāramahogghassa paratīrabhāvato. Tenāha – “tiṇṇo pāraṅgato, thale tiṭṭhati brāhmaṇo (saṃ. ni. 4.238; itivu. 69; pu. pa. 188), ye janā pāragāmino”ti (dha. pa. 85) ca. Atha vā pāti rakkhatīti **pāraṃ**, nibbānaṃ. Yo paṭivijjhati, taṃ vaṭṭadukkhato pāti rakkhati, accantahitena ca vimuttisukhena ca rameti, tasmā **pāranti** vuccati. **Gacchamānā evāti** pāraṃ nibbānaṃ gacchamānā eva. Te dhammā **āsavānaṃ khayāya samvattanti** sacchikiriyāpahānapaṭivedhānaṃ samakālattā.

10. Nandiyasakkasuttavaṇṇanā

1036. Pavivekatthāyāti pavivekasukhatthāya. **Paṭisallānatthāyāti** bahiddhā nānārammaṇato cittaṃ paṭinivattetvā kammaṭṭhāne sammadeva līnatthāya.

Puññābhisandavaggavaṇṇanā niṭṭhitā.

5. Sagāthakapuññābhisandavaggo

1. Paṭhamaabhisandasuttavaṇṇanā

1037. Saṅkhyā atthi heṭṭhā mahāpathaviyā, upari ākāseṇa, parito cakkavālapabbatena, majjhe tattha tattha ṭhitehi dīpapabbatapariyantehi paricchinnattā. Jānantena yojanato saṅkhātuṃ sakkāti adhippāyo. Mahāsarīramaccha-kumbhīla-yakkha-rakkhasa-mahānāgadānavādīnaṃ saviññāṇakānaṃ, baḷavāmukhapātālādīnaṃ aviññāṇakānaṃ bheravārammaṇānaṃ vasena **bahubheravaṃ**.

2. Dutiyāabhisandasuttavaṇṇanā

1038. Sambhedeti sambhedaṃ samodhānaṃ gataṭṭhāne. Yatthimā mahānadiyo saṃsandanti samentīti parikkappavacanametāṃ. Tādisāsu hi mahānadīsu kāci puratthimasamuddaṃ pavitṭhā, kāci pacchimaṃ.

3. Tatiyaabhisandasuttavaṇṇanā

1039. “Kusale patiṭṭhito”ti ettha yaṃ accantikaṃ kusale patiṭṭhānaṃ. Taṃ dassento “**maggakusale patiṭṭhito**”ti āha, heṭṭhimamaggakusaleti adhippāyo. Tenāha “**bhāveti magga**”nti. Ariyaphalaṃyeva **dhammasāro**. Kilesā khīyanti etthāti kilesakkhayo, nibbānaṃ, tasmiṃ **kilesakkhaye rato**.

4. Paṭhamamahaddhanasuttavaṇṇanā

1040. Ariyānaṃ buddhānaṃ dhanantipi ariyadhanaṃ, nibbānanti keci. Anayatopi visuddhaṭṭhena ariyañca taṃ dhanañca dhanāyitaṭṭhenāti ariyadhanaṃ, tena **ariyadhanena. Teneva bhogenāti** ariyadhanabhogena.

Sagāthakapuññābhisandavaggavaṇṇanā niṭṭhitā.

6. Sappaññavaggo

2. Vassaṃvutthasuttavaṇṇanā

1048. Samodhānetvāti yehi indriyādīhi bhāviyamānehi sotāpattimaggo anuppatto, tāneva. Dhammasamānatāya cetāṃ vuttaṃ. Aññāneva hi atthato taṃ taṃ maggaṃ sādhakāni indriyādīni. **Tanti paveṇī kathitāti** yaṃ kañci vineyyapuggalaṃ anapekkhitvā kevalaṃ tantivasena ṭhiti kathitā.

3. Dhammadinnasuttavaṇṇanā

1049. Sattasu janesūti sattasu kittiyamānesu upāsakajanesu. **Gambhīrāti**ādīsu **dhammagambhīrāti** pāḷigatiyā gambhīrā, tathā ca **sallasuttaṃ** heṭṭhā pakāsitameva. “**Cetanāhaṃ, bhikkhave, kammaṃ vadāmī**”tiādīnā (a. ni. 6.63; kathā. 539) āgataṃ **cetanāsuttaṃ**. Tattha “cetanāsahajātaṃ nānākkhaṇika”ntiādīnā paṭṭhāne āgatanayena, suttesu (a. ni. 3.101) ca “diṭṭhadhammavedanīya”ntiādīnā āgatanayena gambhīrabhāvo veditabbo, nibbānassa ceva ariyamaggaṃ ca pakāsanato **asaṅkhatasamuyuttassa** lokuttaratthadīpakatā. “Atītaṃpāhaṃ rūpena khajjiṃ, etarahi khajjāmī”tiādīnā pañcannaṃ khandhānaṃ khādakabhāvassa, puggalassa khāditabbatāya vibhāvanena **khajjanīyapariyāye** (saṃ. ni. 3.79) visesato nissattanijjīvatā dīpitāti vuttaṃ “**sattasuññatādīpakā khajjanikasuttantādayo**”ti. **Upasampajja viharissāmāti** ye tesu suttesu vuttapaṭipadaṃ sammadeva paripūrenti, te tesu upasampajja viharanti nāma. **Etthāti** “na kho neta”nti ettha na-kāro “aññamañña”nti ettha ma-kāro viya byañjanasandhimattameva, nāssa koci attho.

4. Gilānasuttavaṇṇanā

1050. Na kho panetanti na kho etaṃ, noti ca amhehīti atthoti āha “**na kho amhehī**”tiādī. Assasantīti **assāsanīyāti** āha “**assāsakarehī**”ti. Marissatīti **māriso**, ekantabhāvimaraṇo, so pana maraṇādīnavuttikoti vuttaṃ “**maraṇapaṭibaddho**”ti. **Adhimuccehīti** adhimuttiṃ uppādehi. Taṃ pana tathā cittassa pañidhānaṃ ṭhapananti āha “**ṭhapehī**”ti. **Āgamanīyaguṇesūti** pubbabhāgaguṇesu. **Pamānaṃ nāma natthi** anantāparimāṇattā. **Nānākaraṇaṃ natthi** vimuttiyā ninnānattā.

9. Paññāpaṭilābhasuttavaṇṇanā

1055. Paññāpaṭilābhāyāti maggaphalapaññāya paṭilābhattham. Tenāha “**satta sekkhā**”tiādi.

Sappaññavaggavaṇṇanā niṭṭhitā.

7. Mahāpaññavaggo

1. Mahāpaññasuttavaṇṇanā

1058. Mahante atthe pariggaṇhātīti saccapaṭiccasamuppādādi ke mahāvittahāre atthe paricchijja asesetvā muṭṭhigate viya katvā gaṇhāti. Sesam heṭṭhā vuttanayameva.

Mahāpaññavaggavaṇṇanā niṭṭhitā.

Sotāpattisaṃyuttavaṇṇanā niṭṭhitā.

12. Saccasaṃyuttam

1. Samādhivaggo

1. Samādhisuttavaṇṇanā

1071. Cितtekkagatāyāti nissakkavacanam “parihāyantī”ti padaṃ apekkhitvā.

Yathābhūtādivasenāti yathāgatādivasena. Yathābhūtam nāma imasmiṃ sutte “samāhito, bhikkhave, bhikkhu yathābhūtam pajānātī”tiādi. **Ādi-saddena** “tathā yasmā”tiādisaṅgaho daṭṭhabbo. Tathā hi yathābhūtavasena kāraṇacchedo kato “tathā yasmā”tiādivacanehi. **Vaṇṇāti** akkharā, “guṇā”ti keci. **Padabyañjanānīti** nāmādipadāni ceva taṃsamudāyabhūtabyañjanāni ca.

3. Paṭhamakulaputtasuttādivaṇṇanā

1073-75. Sāsanāvacarā adhippetā bāhirakānaṃ saccābhisamayassa abhāvato. **Tathāti** iminā catutthapañcomesu atthavisesābhāvaṃ dasseti. Yadi evaṃ kasmā visuṃ visuṃ desanāti āha “**tena tena abhilāpenā**”tiādi.

10. Tiracchānakathāsuttavaṇṇanā

1080. Duggatito saṃsārato ca niyyāti etenāti niyyānaṃ, saggamaggo mokkhamaggo ca. Tasmim niyyāne niyuttā, taṃ ettha atthīti **niyyānikā**. Vacīduccaritasamkilesato vā niyyātīti ī-kārassa rassattam ya-kārassa ka-kāraṃ katvā niyyānikā. Cetanāya saddhiṃ samphappalāpā veramaṇi. Tappaṭipakkhato aniyyānikā, tassa bhāvo **aniyyānikattam**. **Tiracchānabhūtanti** tirokaraṇabhūtam.

Kammaṭṭhānabhāveti aniccatāpaṭisaṃyuttacatusaccakammaṭṭhānabhāve. **Sāttakanti** dānasīlādinissitattā hitapaṭisaṃyuttam.

Visikhāti gharasanniveso. Visikhāgahaṇena ca gāmādigahaṇe viya tannivāsino visesato gahitā “āgato gāmo”tiādīsu viya. Tenāha “**sūrā samatthā**”ti. Kumbhaṭṭhānāpadesena kumbhadāsiyo vuttāti āha – “**kumbhadāsikathā**”ti. Ayāthāvato uppattiṭṭhitisaṃhārādivasena loko akkhāyati etenāti **lokakkhāyikā**. Iti iminā pakārena bhavo, iminā abhavoti evaṃ pavattāya **itibhavābhavakathāya saddhiṃ**.

Samādhivaggavaṇṇanā niṭṭhitā.

2. Dhammacakkappavattanavaggo

1. Dhammacakkappavattanasuttavaṇṇanā

1081. “Isīnaṃ patanuppattanavasena osīdanauppattanatṭhānavasena evaṃ ‘isipātana’nti ‘laddhanāme’ti saṅkhepato vuttamatthaṃ vivarituṃ ‘ettha hī’”tiādi vuttaṃ.

Āmantesīti ettha yasmā dhammacakkappavattanatthaṃ ayaṃ āmantanā, tasmā samudāgamato paṭṭhāya satthu pubbacaritaṃ saṅkhepeneva pakāsetuṃ vaṭṭatīti “**dīpaṅkarapādāmūle katābhinihārato paṭṭhāyā**”tiādi āraddhaṃ. Tatha **mārabalaṃ bhinditvā**ti mārañca mārabalañca bhañjitvā. Atha vā mārasa abhantaram bāhirañcāti duvidhaṃ balaṃ bhañjitvā. “**Dveme, bhikkhave, antā**”ti ettha **anta**-saddo “pubbante ñāṇaṃ aparante ñāṇa’”ntiādīsu (dha. sa. 1063) viya bhāgapariyāyoti āha “**dve ime, bhikkhave, koṭṭhāsā**”ti. **Saha samudāhārenā**ti uccāraṇasamakālaṃ. **Pattharivā aṭṭhāsi** buddhānubhāvena. **Brahmāno samāgacchimsu** paripakkakusalāmūlā saccābhisambodhāya katādhikārā.

Gihisaññojananti ghibandhanaṃ. **Chinditvā**ti haritvā. **Na vaḷaṅjetabbā**ti nānuyuñjetabbā. **Kilesakāmasukhassā**ti kilesakāmayuttassa sukhasa. **Anuyogoti** anubhavo. Gāmaṃvāsīhi sevittabbatā **gāmaṃvāsīnaṃ santako**. **Attanoti** attabhāvassa. Āhito ahaṃmāno etthāti **attā**, attabhāvo. **Dukkhakaraṇanti** dukkhuppādanam. **Attamāraṇehī**ti attabādhanehi. **Upasamāyāti** kilesavūpasamo adhippeto, tadatthasampadānavacananti āha “**kilesūpasamatthāyā**”ti. Esa nayo sesesupi.

Saccañāṇādivasena tayo parivaṭṭā etassāti **tiparivaṭṭam**, ñāṇadassanaṃ. Tenāha “**saccañāṇā**”tiādi. **Yathābhūtaṃ ñāṇanti** paṭivedhaññaṃ āha. **Tesuyeva** saccesu. Ñāṇena kattabbassa ca pariññāpaṭivedhādikkicassa ca **jānanaññaṃ**, “tañca kho paṭivedhato pagevā”ti keci. Pacchāti apare. Tathā **kataññaṃ**. **Dvādasākāranti** dvādasavidhaākārabhedam. **Aññatthā**ti aññesu suttesu.

Paṭivedhaññaṃpi desanāññaṃpi dhammacakkanti idam tatha ñāṇakiccaṃ padhānanti katvā vuttaṃ. Saddhindriyādiddhammasamudāyo pana pavattanaṭṭhena cakkanti **dhammacakkaṃ**. Atha vā cakkanti āṇā, dharmato anapetattā dhammañca taṃ cakkañca, dharmena ñāyena cakkantipi **dhammacakkaṃ**. Yathāha “dhammañca pavatteti cakkañcāti dhammacakkaṃ, cakkañca pavatteti dhammañcāti dhammacakkaṃ, dharmena pavattatīti dhammacakkaṃ, dharmacariyāya pavattatīti dhammacakka’”ntiādi (paṭi. ma. 2.40-41). **Ubhayampī**ti paṭivedhaññaṃ desanāññaṃpi ubhayampi. **Etanti** tadubhayaṃ. **Imāya desanāyāti** iminā suttana **pakāsentena bhagavatā** yathāvuttaññādvayasāṅkhātāṃ **dhammacakkaṃ pavattitaṃ nāma** pavattanakiccassa aññhitattā. **Paṭiṭṭhiteti** aññāsi koṇḍaññattherena sotāpattiphale paṭiṭṭhite. **Pavattitaṃ** nāma kassapasammāsambuddhassa sānanantaradhānato paṭṭhāya yāva buddhuppādo, ettakaṃ kālaṃ appavattapubbassa pavattitattā, uparimaggādhigamo panassa atthaṅgato evāti.

Ekappahārenāti ekeneva pahārasaññitena kālena. Divasassa hi tatiyo bhāgo pahāro nāma. Pāḷiyaṃ pana “tena khaṇena tena layena tena muhuttanā”ti vuttaṃ. Taṃ pahāraṅkhaṇasallakhaṇameva. **Sabbaññūtaññānubhāsoti** sabbaññūtaññānubhāvena pavatto obhāso cittaṃ paṭicca utusamuṭṭhāno veditabbo. Yasmā bhagavato dhammacakkappavattanassa ārambhe viya parisamāpane ativiya uḷāratamaṃ pītisomanassaṃ udapādi, tasmā “**imassapi udānassā**”tiādi vuttaṃ.

9. Saṅkāsanasuttavaṇṇanā

1089. Atthasamvaṇṇane vaṇṇiyanteti **vaṇṇā**. Teyeva pariyāyena akkharāṇato **akkharāni**. Atthaṃ byañjenti **byañjanāni**. Yasmā pana akārādike sarasamaññā, kakārādike byañjanasamaññā, ubhayattha vaṇṇasamaññā, tasmā vuttaṃ “**vaṇṇānaṃ vā ekadesā yadidaṃ byañjanā nāmā**”ti. **Nettiyaṃ** pana

vākye byañjanasamaññā. Byañjanaggahaṇeṇeva cettha ākāraniruttiniddesā gahitā evāti daṭṭhabbaṃ. **Saṅkāsanā**ti atthassa ñāpanā bhāgaso. Tenāha “**vibhattiyo**”ti. Saṅkāsanaggahaṇeṇeva cettha pakāsanā vuttā hoti. Vibhattiyo hi atthavacaneneva vivaranti, tāhi kāraṇapaññattiyo vuttāyevāti, tāhipi atthapadāni gahitāneva honti. Ayamettha saṅkhepo, vitthāro pana **visuddhimaggavaṇṇanāyaṃ nettiatṭhakathāyañca** vuttanayena veditabbo. **Sabbākārenā**ti sabhāgādivibhāvanākārena. **Vaṇṇādīnanti** tasmim̐ pana vitthāre pavattavaṇṇādīnaṃ. **Tasmāti** vaṇṇādīnaṃ antaabhāvato. **Evamāhāti** “aparimāṇā vaṇṇā byañjanā saṅkāsanā”ti evamāha.

10. Tathasuttavaṇṇanā

1090. Sabhāvāvijahanatṭhenāti attano dukkhasabhāvassa kadācipi apariccajanena tathasabhāvaṃ. Tenāha “**dukkhañhi dukkhomeva vutta**”nti. **Sabhāvassāti** dukkhasabhāvassa. **Amoghatāyāti** avaññhatāya. **Avitathanti** na vitathaṃ. Tenāha “**na hi dukkhaṃ adukkhaṃ nāma hotī**”ti. **Aññabhāvānupagamenāti** samudayādisabhāvānupagamanena musā na hotīti añño aññathā na hotīti **anaññathaṃ**. Tenāha “**na hī**”tiādi.

Dhammacakkappavattanavaggavaṇṇanā niṭṭhitā.

3. Koṭigāmaṅgaḥ

1. Koṭigāmasuttavaṇṇanā

1091. Ananubodhāti paṭivedhassa anurūpabodhābhāvena. **Appaṭivedhāti** saccānaṃ paṭimukhaṃ vedhābhāvena.

2. Dutiyakoṭigāmasuttavaṇṇanā

1092. Phalasaṃmādhīphalapaññānanti aggaphalasaṃmādhīaggaphalapaññānaṃ.

7. Tathasuttavaṇṇanā

1097. Ariyānanti buddhānaṃ ariyānaṃ. Tenāha “**na hī**”tiādi.

8. Lokasuttavaṇṇanā

1098. Paṭividdhattā desitattā cāti iminā paṭivedhaññāṇena desanāññāṇena ca pariggahitattā **ariyasantakāni honti** ariyassa bhagavato santakabhāvato.

10. Gavampatisuttavaṇṇanā

1100. Ekappaṭivedhoti ekeneva ñāṇena catunnaṃ ariyasaccānaṃ ekajjhaṃ paṭivedho.

Koṭigāmaṅgavaṇṇanā niṭṭhitā.

4. Sīsapāvanavaggo

3. Daṇḍasuttavaṇṇanā

1101. Punappunaṃ vaṭṭasmiṃyeva nibbattanti aditṭhattā catunnaṃ ariyasaccānaṃ.

5. Sattisatasuttavaṇṇanā

1105. Bhaveyya ceti dukkhadomanassāni ajjuhekkhitvā sahitehi tehi saccābhisamayo bhaveyyāti evaṃ parikkappanā na kātabbāti.

9. Indakhīlasuttavaṇṇanā

1109. Ajjhāsanti sassatādibhedam ajjhāsayaṃ. So hi “idameva saccam moghamañña”nti gāhassa mukhabhūtattā **mukhanti adhippeto**. Tañca apare aditthasaccā olokenti, ditthasaccā pana neva olokenti.

10. Vādatthikasuttavaṇṇanā

1110. Kukkuko pamāṇamajjhimassa purisassa hatthoti attho. **Kukkūti** tasseva nāmaṃ.

Sīsapāvanavaggavaṇṇanā niṭṭhitā.

5. Papātavaggo

1. Lokacintāsuttavaṇṇanā

1111. Lokacintanti lokasannivesapaṭisaṃyuttavīmaṃsāva. “Lokacitta”ntipi pāṭho, taṃtaṃlokapariyāpanaṃ cittanti attho. **Nāḷikerādayoti ādi**-saddena avuttānaṃ osadhitiṇavanappatiādīnaṃ saṅgaho. **Evarūpanti** edisaṃ aññaṃpi taṃtaṃlokacittaṃ.

Vigatacittoti attatthaparathato apagatavitakko addasa evaṃ adhiṭṭhahiṃsūti sambandho. **Sambarimāyanti** sambarena asurindena uppāditaṃ asuramāyaṃ, yaṃ “indajāla”ntipi vuccati indassa mohanattham uppāditaṃ. **Samparivatteti** paridhāvetvā. **Yathā neti** ne asure yathā so puriso passati, evaṃ adhiṭṭhahiṃsu. Kasmā panete evaṃ adhiṭṭhahiṃsūti? Taṃ purisaṃ tattha tathānisinnaṃ disvā “ayañca devo”ti āsaṅkantā tathā adhiṭṭhahitvā bhisamuḷālachiddehi pavisitvā attano asurabhavanaṃ gatā. Tenāha bhagavā – “**devānaṃyeva mohayamānā**”ti.

2-3. Papātasuttādivaṇṇanā

1112-3. Mariyādapāsāṇoti gijjhakūṭapabbatassa mariyādapākārasadisso mahanto pāsāṇo. **Aniṭṭharūpanti** ettha rūpa-saddo sabhāvattho “piyarūpe sātārūpe”tiādīsu (ma. ni. 1.408-409) viyāti āha – “**aniṭṭhasabhāva**”nti.

5. Vālasuttavaṇṇanā

1115. Upāsananti ācariyaupāsaṇaṃ, ācariyaṃ antevāsinā vā divase divase sikkhanavasena upāsitaṃ upāsananti laddhanāmaṃ **kaṇḍakhipanasippaṃ**. **Kaṇḍam atikkamanteti** saraṃ khipante. **Poṅkhānupoṅkhanti** poṅkhasaddattham pākaṭam katvā dassetuṃ “**ekaṃ kaṇḍam khipitvā**”tiādi vuttaṃ. **Aparaṃ anupoṅkhanti** ettha aparanti tatiyakaṇḍam. Anupoṅkham nāma idanti dassetuṃ “**anupoṅkham nāma dutiyassa poṅkha**”nti vuttaṃ. Tañhi tatiyena sarena vijjhīyati. **Puna aparāṃ tassa poṅkhanti** idaṃ pana aparāparaṃ avirajjanaṃ dassetuṃ vuttaṃ. **Durabhisambhavataranti** abhibhavitum asakkuṇeyyatarāṃ. **Vāḷanti** kesam. **Sattadhā bhinditvāti** sattakkhattum viphāletvā. **Tassa ekaṃ bhedanti** tassa kesassa ekaṃ aṃsusāṅkhātam bhedaṃ gahetvā. **Vātingaṇamajjhe bandhitvāti** vātingaṇaphalassa majjhatthāne bandhitvā. **Aparaṃ bhedanti** aparāṃ kesassa aṃsusāṅkhātam bhedaṃ. **Aggakoṭiyaṃ bandhitvāti** yathā tassa vālabhedassa ūkāmatam likhāmatam

vā kaṇḍassa aggakoṭṭim adhikaṃ hutvā tiṭṭhati, evaṃ bandhitvā. **Usabhamatteti** vīsatiyaṭṭhimatte ṭhāne **ṭhito**. **Kaṇḍabaddhāya koṭṭiyāti** kaṇḍabaddhāya vālassa koṭṭiyā vātingaṇabandhanavālassa koṭṭim paṭivijjheyya.

8. Dutiyachiggaḷayugasuttavaṇṇanā

1118. Adhiccuppattikanti yadicchāvasena uppajjanakaṃ. **Chiggaḷenāti** chiggaḷapadesena. **Chiggaḷaparīti** heṭṭhimayugassa chiggaḷapadesassa uparī. **Āruḷhassa chiggaḷenāti** ubhinnampi chiddena. **Gīvappavesanaṃ viyāti** catunnaṃ yugānaṃ chiddapadeseneva uparūpari ṭhitānaṃ chiddantarena kāṇakacchapassa gīvappavesanaṃ adhiccatarasambhavaṃ. Tatopi adhiccatarasambhavo manussattalābho, tato adhiccatamasambhavo ariyamaggaṭṭilābhoti dassento āha “**catusaccapaṭivedho ativīya adhiccatarasambhavo**”ti.

Papātavaggavaṇṇanā niṭṭhitā.

6. Abhisamayavaggavaṇṇanā

1121. Abhisamayaṣṣyutte vitthāritova, tasmā tatha vuttanayeneva tassa attho veditabbo.

7. Paṭhamaāmakadhañṇapeyyālavaggo

3. Paññāsuttavaṇṇanā

1133. Lokiyampi visuddhatthena “ariya”nti vattabbaṃ labhatīti “**lokiyalokuttarenā**”ti vuttaṃ.

4. Surāmerayasuttavaṇṇanā

1134. Piṭṭhasurāti piṭṭhena kātabbasurā, tathā **odanasurā pūvasurā**, majjarasādibhūte kiṇṇe pakkhipitvā kattabbā surā **kiṇṇapakkhittasurā**. **Sambhārasaṣṣyuttāti** mūlabhesajjasambhārehi saṣṣyuttā. **Pupphāsavoti** nāḷikerapupphādito assavanakāāsavo. Muddikaphalādito assavanakāāsavo **phalāsavo**. **Itīti**adiattho. Tena madhvāsavaḷāsavasambhārasaṣṣyutte saṅgaṇhāti. **Surāsavavinimuttanti** yathāvuttasurāsavavinimuttaṃ.

10. Pacāyikasuttavaṇṇanā

1140. Nīcavuttinoti kule jeṭṭhānaṃ mahāpitucūḷapitujeṭṭhabhātīkādināṃ abhivādanapaccuṭṭhānaañjalikammaśāmicammādivasena nīcavuttino.

8. Dutiyāmakadhañṇapeyyālavaggo

8. Bījagāmasuttavaṇṇanā

1148. “Mūlabīja”ntiādīsu mūlameva bījanti **mūlabījaṃ**, mūlabījaṃ etassātipi **mūlabījaṃ**. Tattha purimena bījagāmo vutto “bījānaṃ samūho”ti katvā, dutiyena bhūtagāmo. Duvidhopeso sāmaññaniddesena, “mūlabījaṇca mūlabījaṇca mūlabīja”nti ekasesanayena vā bījattho veditabbo. Esa nayo sesesupi. **Phaḷubījanti** pabbabījaṃ. Bāhirapaccayantarasaṃavāye sadisaphaluppattiyā visesakāraṇabhāvato viruhanasamatthe sārāphale niruḷho bīja-saddo. Tadattasiddhiyā mūlādīsipi kesuci pavattatīti tato nivattanatthaṃ ekena bīja-saddena visesetvā vuttaṃ “**bījabīja**”nti “rūparūpaṃ, dukkhadukha”nti (saṃ. ni. 4.327) ca yathā. **Nīlatiṇarukkhādīkassāti** allatiṇassa ceva allarukkhādīkassa ca. **Ādi**-saddena osadhigacchalatādīnaṃ gahaṇaṃ.

9. Vikālabhojanasuttavaṇṇanā

1149. Aruṇuggamanato paṭṭhāya yāva majjhanhiko, ayaṃ buddhādiariyānaṃ āciṇṇasamāciṇṇo bhojanassa kālo, tadañño vikāloti āha – “**vikālabhojanāti kālātikantabhojanā**”ti.

10. Gandhavilepanasuttavaṇṇanā

1150. Yaṃ kiñci pupphanti ganthimaṃ aganthimaṃ vā yaṃ kiñci pupphajātaṃ, tathā pisitādibhedam yaṃ kiñci gandhajātaṃ.

9. Tatiyaāmakadhañṇapeyyālavaggo

1. Naccagītasuttavaṇṇanā

1151. Saṅkhepato “sabbapāpassa akaraṇa”ntiādinayappavattaṃ (dī.ni. 2.90; dha.pa. 183) bhagavato sāsanaṃ accantachandarāgapavattito naccādīnaṃ dassanaṃ na anulometīti āha “**sāsanaṃ ananulomattā**”ti. Attanā parehi ca payojiyamānaṃ payojāpiyamānañca eteneva nacca-saddena gahitaṃ, tathā gītavāditasaddehi cāti āha – “**naccananaccāpanādivasenā**”ti. **Ādi**-saddena gāyana-gāyāpana-vādāna-vādāpanādīni saṅgaṇhāti. Dassanena cettha savanampi saṅgahitaṃ virūpekasesanayena. Yathāsakaṃ visayassa ālocanasabhāvatāya vā pañcannaṃ viññānaṃ savanakiriyāyapi dassanasāṅkhepasabbhāvato “**dassanā**”iceva vuttaṃ. Avisūkabhūtassa gītassa savanaṃ kadāci vaṭṭatīti āha – “**visūkabhūtā dassanā cā**”ti. Tathā hi vuttaṃ **paramatthajotikāya khuddakaatṭhakathāya** (khu. pā. atṭha. 2.pacchimapañcasikkhāpadavaṇṇanā) – “dhammūpasamhitam gītam vaṭṭati, gītūpasamhito dhammo na vaṭṭatī”ti.

2. Uccāsayanāsuttavaṇṇanā

1152. Uccāti ucca-saddena samānattham ekaṃ saddantaram. Seti etthāti **sayanam**, uccāsayanam mahāsayanañca samaṇasārupperahitaṃ paṭikkhittanti āha – “**pamañātikkantaṃ akappiyattharaṇa**”nti. Āsandādiāsanañcettha sayaneneva saṅgahitaṃ. Yasmā pana ādhāre paṭikkhitte tadādhārikiriyā paṭikkhittāva hoti, tasmā “uccāsayanamahāsayanā”iceva vuttaṃ. Atthato pana tadupabhogabhūtanisajjānipajjanehi virati dassitāti daṭṭhabbam. Atha vā uccāsayanamahāsayanañca uccāsayanamahāsayanañcāti **uccāsayanamahāsayananti** etasmiṃ atthe ekasesanayena ayaṃ niddeso kato yathā – “nāmarūpapaccayā saḷāyatana”nti (udā. 1). Āsanakiriyāpubbakattā vā sayanakiriyāya sayanaggahaṇeneva āsanampi gahitanti daṭṭhabbam.

3. Jātarūpasuttavaṇṇanā

1153. Aññepi uggahāpane upanikkhittasādiyane ca paṭiggahaṇattho labbhatīti āha – “**na uggahāpentī, na upanikkhitaṃ sādiyanti**”ti. Atha vā tividdham paṭiggahaṇam kāyena vācāya manasāti. Tattha kāyena paṭiggahaṇam **uggahaṇam**, vācāya paṭiggahaṇam **uggahāpaṇam**, manasā paṭiggahaṇam **sādiyanam**. Tividdhampi paṭiggahaṇam sāmāññaniddesena, ekasesanayena vā gahetvā “paṭiggahaṇā”ti vuttanti āha – “**neva nam uggahanti**”tiādi. Esa nayo “**āmakadhañṇapaṭiggahaṇā**”tiādīsipi.

4. Āmakadhañṇāsuttavaṇṇanā

1154. Nīvārādiupadhañṇassa sāliādīmūladhañṇantogadhattā vuttaṃ “**sattavidhassā**”ti.

5. Āmakamaṃsasuttavaṇṇanā

1155. “Anujānāmi, bhikkhave, pañca vasāni bhesajjāni – acchavasam, macchavasam, susukāvasam, sūkaravasam, gadrabhavasam”nti (mahāva. 262; pārā. at̥tha. 623) vuttattā idam uddissa anuññātā nāma. Tassa pana “kāle paṭiggahita”nti (mahāva. 262) vuttattā paṭiggahaṇam vaṭṭatīti āha – “**aññatra uddissa anuññātā**”ti. Vinayavasena upaparikkhitabbo, tasmā samantapāsādikāya vinayaṭṭhakathāya vuttanayenettha vinicchayo veditabbo.

10. Catutthaāmakadhaññapeyyālavaggo

2-3. Kayavikkayasuttādivaṇṇanā

1162-63. Kassaci bhaṇḍassa gahaṇam **kayo**, dānam **vikkayo**. **Tattha tatthāti** gāmantare santike ca gamanam dūtakkammanti vuccatīti yojanā. **Pahiṇagamanam** khuddakagamanam.

4. Tulākūṭasuttavaṇṇanā

1164. Rūpakūṭam sarūpena sadisena chalavohāro. **Aṅgakūṭam** attano hatthādīnā aṅgānam chalakaranam. **Gahaṇakūṭam** mānesu gahaṇavasena. **Paṭicchannakūṭam** ayacuṇṇādīnā paṭicchannena chalakaranam. **Mahatiyā** tulāya. **Pacchābhāgeti** tulāya pacchimabhāge. **Hatthenāti** hatthapadesena. **Akkamatīti** uttāham adento gaṇhāti. **Dadanto pubbabhāgeti** paresam dadanto pubbabhāge hatthena tulam akkamati. **Tanti** ayacuṇṇam.

Lohapātiyoti tambalohapātiyo. **Suvaṇṇavaṇṇā karontīti** asanikhādasuvaṇṇakanakalimpitā suvaṇṇavaṇṇā karonti. Mānabhājanassa hadayabhūtassa abhantarassa bhinnam **hadayabhedo**. Nimiyamānassa tilataṇḍulādīkassa sikhāya aggakoṭiyā bhinnam **sikhābhedo**. Khettādīnam minanarajjuyā aññathākaranam **rajjubhedo**. Rajjugahaṇeneva cettha daṇḍakassa gahaṇam katamevāti daṭṭhabbam.

6-11. Chedanasuttādivaṇṇanā

1166-71. Vadhoti muṭṭhippahārasātālanādīhi himsanam, viheṭhananti attho. Viheṭhanatthopi hi vadha-saddo dissati “atthānam vadhitvā vadhitvā rodeyyā”tiādīsu. Aṭṭhakathāyam pana “māraṇa”nti vuttam, tam pana pothanam sandhāyāti sakkā viññātam māraṇasaddassa vihimsanepi dissanato. Sesam suviññeyameva.

Āmakadhaññapeyyālavaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Mahāvaggavaṇṇanāya līnatthappakāsanaṃ niṭṭhitā.

Nigamanakathāvaṇṇanā

Sakalarūpārūpasammasane saṅhasukhumavisayaññatāya vipassanācāranipuṇabuddhīnam susaṃyatakāyavacīsamācāratāya samathavipassanāsu sammadeva yatanato ca **yatinam** bhikkhūnam khandhāyatanadhātusaccindriyapaṭiccasamuppādabhede paramatthadhamme nānāyehi nāṇavibhāgassa sannissayena **bahukārassa** saṃyuttāgamavarassa atthasamvaṇṇanam kāmam sārathappakāsanaṃ eva **nipuṇā** yā mayā aṭṭhakathā āradhāti sambandho. Savisesam paññāvahaguṇattā eva hissa ganthārambhe āditopi “paññāpabhedajanassā”ti vuttam. **Mahāaṭṭhakathāya sāranti** saṃyuttamahāaṭṭhakathāya sāram. **Ekūnasatthimattoti** thokam unabhāvato **matta-saddagahaṇam**.

Mūlaṭṭhakathāya sāranti pubbe vuttasaṃyuttamahāaṭṭhakathāya sārāmeva puna nigamanavasena vuttanti. Atha vā **mūlaṭṭhakathāya sāranti** porāṇaṭṭhakathāsu atthasāraṃ. Tena etaṃ dasseti “saṃyuttamahāaṭṭhakathāya atthasāraṃ ādāya imaṃ sārathappakāsiniṃ karontena sesamahānikāyānampi mūlaṭṭhakathāsu idha viyogakkhamaṃ atthasāraṃ ādāya akāsi”nti. “Mahāvihārādhivāsīna”nti ca idaṃ purimacchimāpadehi saddhiṃ sambandhitabbaṃ “mahāvihārādhivāsīnaṃ samayaṃ pakāsayantiṃ mahāvihārādhivāsīnaṃ mūlaṭṭhakathāya sāraṃ ādāyā”ti ca. **Tena puññaena. Hotu sabbo sukhī lokoti** kāṃāvacarādivibhāgo sabbo sattaloko yathārahaṃ bodhittayādhigamavasena sampayuttena nibbānasukhena sukhito hotūti sadevakassa lokassa accantaṃ sukhādhigamāya attano puññaṃ pariṇāmeti.

Ettāvatā sārathappakāsiniyā

Samyuttanikāya-aṭṭhakathāya līnatthappakāsanā niṭṭhitā.

Samyuttaṭṭhā samattā.